

ივ. ჯავახიშვილის სახელობის
თბილისის სახელმწიფო უნივერსიტეტი

ნიკო ნიკოლაძის კაბინეტი

გელა საითიქა

ქურონალი „კლდე“
(1912-1915 წწ.)

გამომცემლობა „ნეკერი“
2003

ნაშრომი წარმოადგენს მონოგრაფიულ გამოკვლევას ყოველკვირეულ საზოგადო-ეკონომიურ და სალიტერატურო ჟურნალ „კლდის“ შესახებ. ეროვნულ-დემოკრატიული მიმართულების ეს ბეჭდური ორგანო გამოდიოდა 1912 წლის 16 სექტემბრიდან 1915 წლის 17 მაისამდე. ჟურნალის დამფუძნებლები იყვნენ გულმხურვალე მამულიშვილები — დავით ვაჩნაძე, რევაზ გაბაშვილი და შალვა ამირეჯიბი. ჟურნალმა „კლდემ“ გაზეთ „საქართველოსთან“ ერთად, დიდი როლი შეასრულა ქართული ეროვნული ცნობიერებისა და ეროვნულ-დემოკრატიული პარტიის დამოუკიდებელ პოლიტიკურ ორგანიზაციად ჩამოყალიბების საქმეში.

ნიგნი განკუთვნილია ჟურნალისტიკის ფაკულტეტის სტუდენტებისა და ლექტორების, აგრეთვე XX საუკუნის ქართული პოლიტიკური აზრის ისტორიით დაინტერესებული მკითხველებისათვის.

რედაქტორი: დალი ჩიკვილაძე

რეცენზენტები: შოთა გაგოშიძე
თამაზ ჯოლოგუა

© გელა საითიძე, 2003

ISBN 99928-56-67-6

შ ი ნ ა ა რ ს ი

| | |
|---|-----|
| შესავალი | 4 |
| ჟურნალ „კლდის“ მიზნები და ამოცანები | 8 |
| ჟურნალი „კლდე“ და საქართველოს ტერიტორიების საკითხი | 20 |
| ჟურნალი „კლდე“ და ქართველ-სომეხთა ურთიერთობის საკითხი | 41 |
| ჟურნალი „კლდე“ და ეკონომიკის საკითხები | 59 |
| ჟურნალი „კლდე“ და ივერიის ეკლესიის საკითხი | 67 |
| ჟურნალი „კლდე“ და კახეთის რკინიგზის მშენებლობის საკითხი | 73 |
| ჟურნალი „კლდე“ და რუსეთის IV სახელმწიფო სათათბიროს არჩევნების საკითხი | 79 |
| ჟურნალი „კლდე“ გამოჩენილ მამულიშვილთა სახელის წარმომადგენლები | 89 |
| ჟურნალი „კლდე“ და ლიტერატურისა და ხელოვნების საკითხები | 111 |
| დასკვნა | 143 |
| რეზიუმე | 146 |

შესავალი

საქართველოს ეროვნულ-დემოკრატიული პარტია დამოუკიდებელ პოლიტიკურ ორგანიზაციად 1917 წლის ივნისში გაფორმდა, თუმცა მისი ჩამოყალიბების პროცესი კარგა ხნით ადრე იყო დაწყებული. მისი აკვნის ერთ-ერთი პირველი დამრწვევი დიდი ილია გახლდათ. წინამურის ტრაგედიის შემდეგ, ილიას იდეების გაცხადების საშუალებებად ეროვნული მიმართულების ქართული პერიოდული გამოცემები იქცნენ. მათ შორის აღსანიშნავია ჟურნალები: „ნიშადური“, „საქართველო“, „ერი“, „კლდე“... გაზეთები — „ივერია“, „იმერეთი“, „სამშობლო“, „საქართველო“ და სხვ.

XIX საუკუნის 90-იანი წლების ბოლოს, საქართველოს პოლიტიკური ცხოვრების ასპერეზზე გამოსულმა ახალ-თაობამ, ე.წ. „მესამე დასმა“, მიზნად დაისახა ილიას და მის თანამოაზრეთა წინააღმდეგ ბრძოლა. მათ მიერ სახელმძღვანელოდ აღიარებული იდეოლოგია — მარქსიზმი, როგორც ცნობილია, უპირველეს მნიშვნელობას სოციალურ საკითხებს უთმობდა, ხოლო ერვნული მეორეხარისხოვან საქმედ მიაჩნდა.

XX საუკუნის დასაწყისიდან ქართული საზოგადოების დაყოფა პარტიებად, ჯგუფებად თუ მიმდინარეობებად, ერთგვარ მოდად იქცა, რომელმაც კიდევ უფრო დაასუსტა ისედაც დაძაბუნებული ქართული ეროვნული ცნობიერება... ამ მდგომარეობიდან გამოყვანის და მიძინებული ენერჯის გააქტიურების საქმეში, გარკვეული როლი ითამაშა რუსეთის თვითმპყრობელობის წინააღმდეგ 1905-1907 წლების რევოლუციურმა გამოსვლებმა.

სხვადასხვა პოლიტიკური ძალების აქტიური პროპაგანდის მეშვეობით საზოგადოების დიდმა ნაწილმა თითქმის ირწმუნა სოციალური და ეროვნული განთავისუფლების შესაძლებლობა... მაგრამ რევოლუციის დამარცხებამ ქართველი ხალხი თვალნათლივ დაარწმუნა იმაში, რომ ცარიზმი „ინოროდცებისათვის“ საერთოდ და, კერძოდ, ქართველებისათვის, არაფერს გაიმეტებდა... იგი გონს მოეგო და რეაქციის წინააღმდეგ ახალი შეტაკებისათვის მზადება დაიწყო. ასეთ ვითარებაში დიდი მწიშვნელობა ენიჭებოდა იმას, თუ ვინ იკისრებდა ერის მეთაურობას. აქ აშკარა იყო ისიც, რომ მრავალრიცხოვანი და სხვებთან შედარებით უფრო ორგანიზებული სოც.-დემოკრატიული პარტია ერის მესაჭის ფუნქციას ვერ შეასრულებდა. ამის მიზეზი ზემოთ მითითებული ეროვნული საკითხის მეორე ხარისხოვნად მიჩნევა იყო... სოც.-დემოკრატების პოზიცია რელიეფურად ირეკლებოდა რუსეთის სახელმწიფო სათათბიროში ნარგზავნილ ქართველ დეპუტატთა საქმიანობაშიც, რომლებიც ინტერნაციონალიზიმის ცხენზე ამხედრებულნი, საერთო სარუსეთო

საკითხების გადანყვეტისაკენ უფრო მიმართავდნენ თავიანთ ძალისხმევას და საჭიროდ არ თვლიდნენ სამშობლო ქვეყნის ჭირვარამზე ყურადღების განსაკუთრებულად გამახვილებას. ის კი არა და გაშმაგებით ილაშქრებდნენ ყველა იმათ წინააღმდეგ, ვინც ეროვნული საკითხის შესახებ ხმის ამოღებას ბედავდა...

სწორედ ამ დროს სამშობლოს სიყვარულით გულანთებულმა ახალგაზრდა მამულიშვილთა მცირე ჯგუფმა, თბილისში ყოველკვირეული საზოგადო-ეკონომიური და სალიტერატურო ჟურნალ „კლდის“ დაარსება განიზრახა.

„სახალხო გაზეთი“ ამის შესახებ ქართველ საზოგადოებას აუწყებდა: „ახლო მომავალში გამოვა ყოველკვირეული ჟურნალი „კლდე“. ჟურნალის ხელმძღვანელებად იქნებიან: რევაზ გაბაშვილი, შალვა მესხიშვილი, გიორგი ჟორდანიძე, დავით ვაჩანაძე და შალვა ამირეჯიბი“.

ჟურნალის დაარსების ინიციატორი, ორგანიზატორი და ძირითადი დამფინანსებელი განათლებული პიროვნება და გამოჩენილი მამულიშვილი დავით ვაჩანაძე იყო, რომელსაც კალამიც შესანიშნავად უჭრიდა და „დავით კახელის“, „დ.კ.“-ს, „ეკალის!“ და სხვა ფსევდონიმებით ჟურნალში სისტემატურად ათავსებდა წერილებს სოფლის მეურნეობის, კოოპერატივებისა და ამხანაგობების, ბანკებისა და სალაროების, კრედიტების და ფინანსების, ქართული ტერიტორიების საკითხებზე.

ჟურნალის ოფიციალური რედაქტორ-გამომცემელი, ავტორ-შემოქმედი, საქმის მწარმოებელი, გამავრცელებელი და კორექტორიც კი – რევაზ გაბაშვილი გახლდათ. მისი ძირითადი ფსევდონიმები იყო: „რაე“, „რ.გ.“, „ლამურა“, და სხვ. აღსანიშნავია, რომ ჟურნალის ხელმოწერელი სარედაქციო წერილებიც და სხვა არაერთი საპრობლემო ხასიათის სტატიაც მის კალამს ეკუთვნის.

ჟურნალის ერთ-ერთი მესვეურთაგანი იყო აგრეთვე, ნიჭიერი პოეტი, მწერალი და პუბლიცისტი შალვა ამირეჯიბი, რომელიც თავის მკითხველებს „ფარსმან-ფარუხის“, „ფარის“, „ა-ის“, „ფ.ფ.“-ს სახელით ესაუბრებოდა.

„კლდეში“, მისი გამოსვლის პირველი დღეებიდანვე თანამშრომლობდნენ: ალექსანდრე ფრონელი (ყიფშიძე), მიხეილ ადამაშვილი (ჯავახიშვილი), შალვა ქარუმიძე, დავით კასრაძე, მიხეილ მაჩაბელი, ალექსანდრე სარაჯიშვილი („რიმ-ბაბა“), დიმიტრი ჯავახიშვილი, გიორგი დაფქვიაშვილი, ვასილ ყიფიანი, სამსონ დადიანი, იროდიონ სონლულაშვილი და სხვები, რომლებიც დიდი ილიას იდეე-

¹ „სახალხო გაზეთი“ 1912 წლის 25 აპრილი

ბის მიმდევრებად და მისი დანყებული საქმის გამგრძელებლად თელიდნენ თავს.

ჟურნალს დრო და დრო თავისი მხატვრული ნაწარმოებებით ამშვენებდნენ: ვაჟა-ფშაველა, ეკატერინე გაბაშვილი, კოტე მაყაშვილი, იოსებ მჭედლიშვილი, გრიგოლ მეგრელიშვილი, იოსებ გრიშაშვილი, დუტუ მეგრელი (ქოჩაკიძე),² ია ეკალაძე (იაკობ ცინცაძე), მელანია (ნიკოლოზ ნათიძე) და სხვები; შემდგომში „კლდის“ ავტორთა რიგებს შეემატნენ: ნიკო ნიკოლაძე, სარგის კაკაბაძე, გიორგი ნამორაძე, პავლე ინგოროყვა, თედო ლლონტი, გიორგი მამრაძე, ლ. ფავლენიშვილი, გ. ნიკოლაიშვილი, ლ. დიასამიძე, ე. ალშიბაია და ათეულობით სხვა მოღვაწე, რომელთა სახელები ჯერჯერობით მრავალრიცხოვან გაუხსნელ ფსევდონიმებს არიან ამოფარებული (მაგალითად მეგობარი, მოხეტიალე, ნაცარა, დიოგენი, ლელი, ძვერელი, მროველი, ი. იმერელი, თ. თიანელი, გორელი, შამქორი, გ. ახ-ელი, დონ-დიეგო, მგზავრი, გარეშე, ელო, დამსწრე, მეთვალყურე, ვინმე მენსი, ქუთაისელი, რიონელი, ამხანაგი, ვინმე სოფლელი, ძველი სტუდენტი, ნიჩბისელი, მამაძე, ინ. ს-ნი, შეუპოვარი, გული, სემიტი, დეგოთელი და სხვ.)

ჟურნალის ფურცლებზე გარდა ორიგინალური ნაწარმოებებისა, სისტემატურად იბეჭდებოდა უცხოელი მწერლების ნაწარმოებთა თარგმანები (მაგ. გი დე მოპასანის, ჯერომ ჯერომის, ჯეკ ლონდონის, ოსკარ უაილდის, ანატოლ ფრანსის, იოჰან ვოლფგანგ გოეთეს, ტარას შევჩენკოს და სხვათა.)

ჟურნალში მოღვაწე ეს თანამშრომლები იყვნენ ის ადამიანები, რომლებიც რეაქციის წლებში „ეროვნული საკითხის დაყენების ილია ჭავჭავაძისეულ ტრადიციებს აგრძელებდნენ. ქართველ საზოგადოებას მოუწოდებდნენ ებრძოლათ სახელმწიფოებრივი სუვერენიტეტის აღდგენისათვის. მათ თეორიულ წერილებში დასაბუთებული იყო დამოუკიდებლობის კანონიერი უფლება, მისი სიკეთე ხალხის ეკონომიური და სულიერი ცხოვრების აღორძინებისათვის; დამლუპველად იყო მიჩნეული სოციალურად განსხვავებული საზოგადოებრივი ფენების ურთიერთდაპირისპირება და შინაომი. 1913-1914 წლებში ეს მიმართულება გამოირჩეოდა თავისი ეროვნულ-პატრიოტული სულისკვეთებით და მომნიჭებული იყო დამოუკიდებელ პოლიტიკურ პარტიად გაფორმებისათვის, რაც დროებით შეაფერხა პირველი მსოფლიო ომის დანყებამ².

ავტორთა მრავალრიცხოვნობა, ჟურნალის თემატურ მრავალფეროვნებასაც განაპირობებდა, რაც ფართო მკითხველის მიზიდვის გარანტიაც იყო.

² ა. სურგულაძე, პ. სურგულაძე. საქართველოს ისტორია. საკითხავი წიგნი. 1783-1990., თბ., 1991, გვ. 171.

ჟურნალი თავის უპირველეს მიზნად მიიჩნევდა ეროვნული, პოლიტიკური, ეკონომიური, ფილოსოფიურ-ფსიქოლოგიური, ტერიტორიული თუ ერთა შორის ურთიერთობის საკითხების წინა პლანზე წამოწევას და მათზე ქართველი საზოგადოების ყურადღების მომართვას.

ჟურნალ „კლდის“ უპირველესი დევიზი იყო: „გამდიდრდით! იმუშავეთ! შეიძინეთ!“ ეს მაშინ, როცა სოციალისტური პარტიები და მათი ბეჭდური ორგანოები ხალხს გაპროლეტარებისა და კერძო საკუთრების უარყოფისაკენ მოუწოდებდნენ.

ჟურნალი „კლდე“ ფართო ფორმატის 16 გვერდიანი ყოველკვირეული გამოცემა იყო. ორი წელი და რვა თვე იარსება და სულ 115 ნომერი გამოვიდა. მან გამოსვლისთანავე დიდი პოპულარობა და ავტორიტეტი მოიპოვა ქართველ მკითხველ საზოგადოებაში და როგორც ეროვნულ-დემოკრატიული მიმართულების პერიოდულმა გამოცემამ მნიშვნელოვანი კვალი დააჩნია ქართული პოლიტიკური აზრის ჩამოყალიბებისა და განვითარების საქმეს.

ჟურნალის ფურცლებზე იმ დროს დასმული და გადაჭრილი არა ერთი საკითხი, დღესაც დიდ პრაქტიკულ ღირებულებას ინარჩუნებს და ამიტომ მისი მონოგრაფიულად შესწავლის საქმე ფრიად აქტუალურად მიგვაჩნია.

ჟურნალ „კლდის“ მიზნები და ამოცანები

ჟურნალ „კლდის“ პირველი ნომერი 1912 წლის 16 ენკენისთვის (სექტემბერს) გამოვიდა. სარედაქციო წერილში „წინასიტყვაობის მაგიერ“ დასაბუთებული იყო ჟურნალის დანიშნულება, მისი კონკრეტული მიზნები და ამოცანები... კერძოდ ნათქვამი იყო, რომ მას ხელი უნდა შეეწყო ქართველი ხალხის სულიერი და მატერიალური აღორძინება — განმტკიცებისათვის, ანუ ხალხის განათლება და ეკონომიური სიძლიერე ერთად შედუღებული უნდა ყოფილიყო „ნაციონალური ცხოვრების პირობებით და გრძნობებით“³.

ჟურნალი „კლდე“ თავის პირველსავე ნომერში ყველა ქართველისათვის გასაგონად ხაზგასმით მიუთითებდა: „თუ არ გინდათ უცხო კაპიტალის, ცოდნის, ინიციატივის მონები გახდეთ, ფეხზე დადექით და ენერგიულად შეუდექით იმ საფუძვლების ჩაყრა-გამაგრებას, რომელზედაც მომავალში აღორძინდება მძლავრი და ჯანმრთელი ქართველი ერი.“

ეს საფუძველი არის: ფართო განათლება და ეკონომიური ძალა ხალხისა შედუღებული ერთად ნაციონალურ ცხოვრების პირობებით და გრძნობებით. მიტანა ერთი ქვისა და გამაგრება ამ საფუძველზე შეადგენს უმთავრეს მიზანს ჟურნალი „კლდისას“ და ამიტომ ჩვენი ჟურნალი ეცდება გაუზიაროს მკითხველებს ყოველნაირი მასალა ფართე ქართულ საზოგადოებრივ-ეკონომიური ცხოვრებიდან და შეაკავშიროს თანამოაზრენი და ერთგულნი მიმდინარე დიდ ეროვნულ მუშაობისათვის“⁴.

იქვე დასტამბულ წერილში „ჩვენი საქმეები“ ყურადღება იყო გამახვილებული ქართველი ერის არაერთ სატიკვარზე, რომელიც მაშინ საქართველოს დაუძღურებულ სხეულში მტკიცედ იყო ფეხმოკიდებული. რამდენადმე გამოფხიზლებული საზოგადოება თითქოს იბრძოდა კიდევ ავადმყოფობისაგან თავის დასაღწევად, მაგრამ უნაყოფოდ, ვინაიდან „ბრძოლა ჩვენი დონ კიხოტის ბრძოლას ჰგავდა“ და განეული მუშაობა ნაყოფის არ მომტანი იყო.

ავტორი ყურადღებას ამახვილებდა აპატიამი ჩაყარდნილ ქართველ ინტელიგენციაზე, რომლისთვისაც „მოქმედება ტანჯვა იყო, რადგან გრძნობდა თავის უღონობას...“, ხოლო რაც შეეხებოდა „კალმით მომუშავე ინტელიგენტებს“ ანუ პუბლიცისტებს, არც ერთი მათგანი არ იყო ერის საზოგადო აზრის გამომხატველი და არც ერთის სიტყვას არავითარი გავლენა არ ჰქონდა მკითხველ სა-

³ ჟურნ. „კლდე“, 1912 წლის 16 სექტემბერი, გვ. 2.

⁴ იქვე, 1912 წლის 26 სექტემბერი, გვ. 3.

ზოგადოებაზედ, ვინაიდან მათი აზრები არ „შეეთანხმებოდა უმრავლესობის აზრს“ და ხელს ვერ უწყობდა სწორედ უმრავლესობის აზრების შეკავშირებასა და სამოქმედოდ წარმართვას.

„დღევანდელი ჩვენი პუბლიცისტი განცალკევებითა სდგას და გაიმღერის, მარტოკაა ის, მსმენელი არა ჰყავს, მწერალიც ის არის, მკითხველიც, განმანათლებელიც და გასანათლებელიც, დამრიგებელიც და დასარიგებელიც“⁵.

ავტორის აზრით, ჩვენს წარსულს ცხოვრებაში ორიოდ საკითხი მაინც იყო წინ წამოწეული: მასებში ეროვნული შემეცნების გამოღვიძება და ტერიტორიისა და ენის დაცვისათვის ბრძოლა... მენინავეობა აქ თავად-აზნაურულ ინტელიგენციას ეკავა, რომელსაც „ნათლად ჰქონდა გათვალისწინებული გეგმა თავისი მოქმედებისა, მტკიცედ ადგა თავის აზრს და მიმართულებას, გულწრფელი სიყვარულით ბრწყინავდა მისი გული და თავის მიზანს ემსახურებოდა ფანატიკოსის ჯიუტობით“⁶.

ასეთი ინტელიგენტები იყვნენ „უანგარო, გულწრფელი მუშაკები, მედგარი მებრძოლები მტერსა და დუშმანთან, მოყვარული და არა მოშურნე თავის ძმისა, რომელიც მხარში ედგა და მასთან ერთად ერთი გზით ვლიდა“⁷.

სწორედ ეს ერთიანობა, ერთი მიზნისაკენ სწრაფვა აძლიერებდა ჩვენს ერს საუკუნეების მანძილზე, სწორედ მათი თავდაუზოგავი ბრძოლითა და შრომით იქნა შენარჩუნებული ეროვნული სული და თვითმყოფადობა.

ახლად დაარსებული ყურნალის მიზანი სწორედ ეროვნული სულისკვეთების აღდგენა და მისი წინსვლისათვის ზრუნვა უნდა გამხდარიყო.

„კლდის“ პირველსავე ნომერში დაბეჭდილი მასალებიდან საპროგრამო ხასიათისაა „ა—ი“-ს (შ. ამირეჯიბის) წერილი — „შინაური მიმოხილვა“, რომელშიც პუბლიცისტი აანალიზებდა რა საქართველოში შექმნილ საზოგადოებრივ-პოლიტიკურ და ეკონომიკურ ვითარებას, აღნიშნავდა, რომ „ჩვენი სოფლები ღარიბი იყო, ხოლო ქალაქები ნახევრად ჩვენი აღარ იყო“... ამის მიზეზით ხელის ჩაქნევა და მომავლისადმი რწმენის დაკარგვა არ შეიძლებოდა... ამიტომ „აღორძინებაც იმ ადგილებიდან უნდა დაეწყოთ, სადაც ჯერ კიდევ თავმოყრილი იყო ეროვნული ძალა თავისი პოტენციური შესაძლებლობებით. ასეთი ძალა კი „კლდეისტა“ აზრით, „სოფელი და ჩვენი პატარა დაბა-ქალაქები“ იყო. თბილისი თითქმის დაკარგული იყო ეროვნული აღებ-მიცემობის გასავითარებლად... ჩვენი

⁵ ჟურნ. „კლდე“, 1912 წლის 26 სექტემბერი, გვ. 3.

⁶ იქვე, გვ. 2.

⁷ იქვე, გვ. 3.

პატარა ქალაქების ვაჭრობაც, ნახევრად უცხოთა ხელში, სახელდობრ სომხების ხელში იყო. თუმცა ჟურნალს სამართლიანად მიაჩნდა, რომ „ერის სიმდიდრე არ განისაზღვრება კერძო პირთა სიმდიდრით“, რომ ებრაელებსა და სომხებს მრავალი მდიდარი წარმომადგენელი ჰყავდათ, მაგრამ ისინი მდიდარ ერებად არ ითვლებოდნენ, ვინაიდან თავიანთი ეროვნული ეკონომიკური სტრუქტურა არ გააჩნდათ... „თუ ეკონომიკურ ინტერესს ერისას ზედ არ ერთვის ღრმა ნაციონალური ინტერესი, უამისოდ იგი, როგორც შემკრები ძალა საერთო ეროვნული ცხოვრებისა, ნულია!“ უპირველეს ყოვლისა, საჭირო იყო რთული სოციალური და ეროვნული ორგანიზმის ჩამოყალიბება. ეროვნული ორგანიზმის შემადგენელი ნაწილები კი, — ავტორის თქმით, იყო: ტერიტორია, ენა, კულტურა, რელიგია, სახელმწიფოებრივი ცხოვრება ანმყოში თუ წარსულში, საზოგადოებრივი დანებებულებანი, კლასები და მისი გამომხატველი ორგანოები... ავტორი ფაქტებზე დაყრდნობით აკეთებდა დასკვნას, რომ ქართველ ვაჭარს მეტი პერსპექტივა აქვს, ვიდრე სომეხს საქართველოში მცხოვრებს, რადგან „ქართველი ვაჭარი და სომეხი ვაჭარი საქართველოში ორი სხვა და სხვა ფსიხიკაა. პირველი შემქმნელია მომავალში ეროვნულ-ეკონომიურ ცხოვრებისათვის, მეორე მისდევს მარტო მოგებას, პირველი ბინადარია ათასის ინტერესებით მიჯაჭვული თავის მიწა-წყალს, მეორე — უბინადრო, რომელსაც უცხო ერთან არაფერი არ აერთებს; პირველი ეროვნულია, მეორე ანტიეროვნული. აი განსხვება. და თუ ყველა ამას ზედ დაუმატებთ იმ პატრიოტიზმს, რომლითაც შეხვდება საქართველო თავის ეკონომიურ ალორძინების დასაწყისს, ჩვენ ხელთ გვექნება მთელი ჯამი იმ განსხვავებისა, რომელიც დიდ უპირატესობას უქმნის ჩვენთვის“⁸.

მომდევნო ნომრის სარედაქციო წერილში, რომლის სათაურია „ახალი ძალა“, საუბარია იმაზე, რომ ეროვნული ორგანიზმის სიმძლავრე და ჯანმრთელობა დამყარებულია არა მარტო ამა თუ იმ „პოლიტიკური გეგმის აღიარებაზე, არამედ ამ პოლიტიკურ გეგმის კულტურულ-ეკონომიურ შინაარსზეც“; რომ „თანამედროვე პოლიტიკური ბრძოლა შეუძლებელია და წაგებულია, თუ მას მხარში არ უდგას ძლიერი ეკონომიური ფაქტორები“;⁹ რომ სწორედ „ეკონომიური უძღურება“ იყო ის მწარე სინამდვილე, რომელიც ყოველთვის წინ ელობებოდა „ქართული ეროვნული ცხოვრების ალორძინებასა და განვითარებას“, რომ სილატაკე იყო „ქართული ეროვნული ცხოვრების“ ის ტრალედია, რომლისგანაც აუცილებლად უნდა განთავისუფლებულიყო ყოველი ქართველი...

⁸ ჟურნ. „კლე“, 1912 წლის 16 სექტემბერი, გვ. 15.

⁹ იქვე, გვ. 1.

მაგრამ რა ძალებს შეუძლიათ ქართველთა ამ მძიმე მდგომარეობიდან განთავისუფლება?..

დასმულ კითხვას ჟურნალშივე ჰქონდა პასუხი გაცემული: „ერთ-ერთი უმთავრესი ფაქტორი ეროვნული ორგანიზმის სიძლიერისა არის სალი ეკონომიკა — მწყობრი კულტურულ-ეკონომიკური სისტემა...“, რომ „ეს ძალაა, რომელიც ბადესავით უნდა მოეფინოს ჩვენს ქვეყანას, რათა ეროვნული სიძლიერე შექმნას. მასთან ერთად აუცილებელ საჭიროებას შეადგენს ქართული ვაჭრობა-მრეწველობის აღორძინება, რისთვისაც დაბა-ქალაქებში უნდა დაარსებულიყო სავაჭრო-სამეურნეო და საურთიერთო ბანკები იაფი კრედიტით და გახსნილიყო ქართული პროფესიონალური საკომერციო სასწავლებლები“; გარდა ამისა განსაკუთრებული ყურადღება უნდა მიქცეოდა „ქართული კოოპერატიული დანესებულებების“ განმტკიცება-განვითარებას, რადგან 1844 წელს ქალაქ როჩდელში გადმოსროლილმა ლოზუნგმა „ძალა ეკონომიკურ ერთობაშია“ მსოფლიო დაარწმუნა მის ცხოველმყოფელობაშიო და ა.შ.¹⁰.

რ. გაბაშვილის თქმით, „კლდეისტა“ (მისგან შერჩეული ტერმინია — გ. ს.) მიერ არჩეული ლოზუნგი ელდა იყო როგორც სოციალისტებისათვის... ისე შეძლებულთათვის“, რადგან ვაჭრობა მთელ ქართველ ხალხს (მუშას, გლეხს, აზნაურს, თუ ინტელიგენტს) სირცხვილად და საძრახისად მიაჩნდა; შეძენის მაგივრად თავდაზნაურობა მხოლოდ ჰყიდდა მიწებს უცხოელებზე და მუშაობას გაურბოდა: მთელი ინტელიგენცია ბოდავდა უსაქმო სოციალიზმით, ხოლო ნახევარ ინტელიგენცია (ე.ი. „რუსეთის სოციალ-დემოკრატიული პარტია“) გაპროლეტარებას ქადაგებდა — შეძენილის ძარცვას, აშენებულის დანგრევას და შვრებოდნენ კიდევც...“¹¹.

ჟურნალი დაბადების დღიდანვე ხმალშემართული დადგა ქვეყნის ეროვნული ინტერესების დაცვის სადარაჯოზე. „კლდეისტა“ მთავარი საზრუნავი ქართველ ხალხში ეროვნული თვითშეგნების ამაღლებისათვის ბრძოლა იყო. „ეროვნული იდეა მათთვის იმავ დროს საკითხი იყო ქართულის ენისა, ქართულის ტერიტორიისა, ქართულის მესაკუთრეობისა და ვაჭრობა-მრეწველობისა“... მათი აზრით, „ყოველი იდეა რეალიზაციის დროს იგივე იყო, რაც ოქროს ფული გადახურდავებული სპილენძის გროშებზედ. ვინც არ აფასებს სპილენძის გროშს, მან არ იცის ფასი ოქროს მანეთისაც“¹².

გამომდინარე აქედან, „კლდეისტები“ პირდაპირ მოუწოდებდნენ ქართველ ხალხს: „განავითარეთ ქვეყნის მწარმოე-

¹⁰ ჟურნ. „კლდე“, 1912 წლის 16 სექტემბერი, გვ. 1-2.

¹¹ რ. გაბაშვილი. რაც მახსოვს. წიგნში: „დაბრუნება“, თბ., ტ. III, 1992, გვ. 114.

¹² ჟურნ. „კლდე“, 1913 წლის 22 სექტემბერი, გვ. 1.

ბლური ძალები, მოაწყვეთ ყოველგვარი ეკონომიკური ირგანიზაციები, ჩაუნერგეთ მათ ეროვნული სული და ამ გალესილი იარაღით ამაყნი და ძლიერნი გამოდით საბრძოლველად“-ო¹³.

„კლდეისტებს“ მიაჩნდათ, რომ „ყოველი ერის ფიზიკური ძალა, არსებობის საფუძველი, განმტკიცებული უნდა იყოს მისი ეკონომიკური ცხოვრებით“, რადგან „ეკონომიურად გაღონიერებული ხალხია სულიერად ღონიერი და გონებრივად ფხიზელი“, რომ „ყოველ მისწრაფებას ძალა ეკონომიურ საფუძველში უნდა ჰქონდეს“, რომ „თანამედროვე პოლიტიკური ბრძოლა ნაგებულია, თუ მას მხარში არ უდგას ძლიერი ეკონომიკური ფაქტორები“ და ა.შ. ეს აზრი შეესაბამებოდა რა ყურნალის მთავარ ლოზუნგს, შემდგომში მის ყველა საკვანძო მნიშვნელობის პუბლიკაციაში დომინირებდა. ყურნალს ერისთვის უმნიშვნელოვანეს მოვლენად მიწისა და ტერიტორიის საკითხის სწორად გადაჭრა მიაჩნდა, რადგან მასზე დიდად იქნებოდა დამოკიდებული „ქვეყნის მომავლის ბედი“. ყურნალი გადაჭრით იცავდა მიწის კერძო საკუთრების პრინციპებს, რის შესახებაც პირდაპირ იყო გაცხადებული მის ერთ-ერთ სარედაქციო სტატიაში: „...ჩვენ უსათუოდ კერძო საკუთრების მომხრენი ვართ. ეს არც იძულებითი კომპრომისია ჩვენის მხრივ, არც ტაქტიური მოსაზრება. ჩვენ აქ ვდგავართ იმ ნადაგზე, რა ნიადაგზედაც სუფევს მთელი ეკონომიკური სტრუქტურა საქართველოში“¹⁴.

ყურნალის მართებული შენიშვნით, „მეურნეთა და მესაკუთრეთა ქვეყანაში“, თუ ეს პრინციპი დაირღვეოდა, მაშინ იგი ქართველი ხალხის ტრადიციული ცხოვრების დარღვევასაც განაპირობებდა და საბოლოო ჯამში მის დაღუპვას გამოიწვევდა. ამიტომ, ეროვნულ-პოლიტიკური ვითარებიდან გამომდინარე „კლდე“ საჭიროდ თვლიდა ზოგიერთი რეფორმის გატარებას... კერძოდ, აღმოსავლეთ საქართველოში დემოგრაფიული სიტუაციის გასაუმჯობესებლად საჭიროდ მიაჩნდა აქაურ მემამულეებს ზედმეტი და დაუშუშავებელი მიწები ქართული საკოლონიზაციო ფონდისათვის დაეთმოთ, ხოლო შემდგომ ხელმისაწვდომ ფასებში მცირემიწიან ქართველ გლეხკაცებისათვის მიეყიდათ.

უფრო ადრე, ყურნალის მეოთხე ნომერში დასტამბულ სტატიაში — „მწვავე საკითხი“, დავით კახელი (ვაჩნაძე) საქართველოს ეკონომიკური განვითარების აუცილებლობაზე ამახვილებდა ყურადღებას. „უამისოდ ჩვენი ბრძოლა, ბრძოლა არსებობისათვის, უნაყოფო იქნება და ჩვენი იმედები ქვეყნის კეთილ მომავლისა ფუჭად დარჩება“¹⁵.

¹³ ყურნ. „კლდე“, 1913 წლი 20 იანვარი, გვ. 2.

¹⁴ იქვე, 1913 წლის 22 სექტემბერი, გვ. 4.

¹⁵ იქვე, 1913 წლის 20 იანვარი, გვ. 12.

დავით ვაჩნაძე იქვე სვამდა კითხვას, თუ როდის შეიძლებოდა გამხდარიყო ეკონომიური ძალა, *ეროვნულ* ძალად? (ხაზგასმა დ. ვაჩნაძისაა — გ. ს.) და თვითონვე პასუხობდა: „როდესაც ის ეროვნულ ქონებრივ შექმნასთან ერთად მტკიცედ დაიცავს სამშობლო მიწა-წყალს, ეროვნულ კულტურას, დედა ენას... როცა იგი გამსჭვალული იქნება ერთის მიზნით და გრძნობით, როცა ქართული ეკონომიური საკითხები მჭიდროდ იქნებიან გადაბმული ქართველი ერის ჭირ-ვარამთან, მის ეროვნულ იდეალებთან და მისწრაფებებთან“¹⁶.

„კლდეისტებს“ მიაჩნდათ რომ ვერც ერთი ერის ფიზიკური ძალა, „ვერც ერთი პოლიტიკური იდეა, ვერც ერთი კულტურული დანესებულება ფეხს მჭიდროდ ვერ მოიმაგრებდა, თუ ლონიერი ხალხი არ ეყოლებოდა დამცველად, თუ არ იქნებოდა კონტიგენტი ადამიანებისა, რომლებიც ამ იდეებს ცხოვრებაში განახორციელებდნენ. ამისათვის კი ხალხის შეგნებული მოქმედება იყო საჭირო“¹⁷.

„კლდეისტებს“ სწამდათ, რომ „წავიდა ის დრო, როცა საქართველო იარაღით სწყვეტდა თავის ბედ-იღბალს“; რომ უნდა წასულიყო ის დროც, როცა მხოლოდ კულტურული ლაყობით და მწერლობით ვაპირებდით ქვეყნის აშენებას, უნდა ამოიფხიკოს ჩვენი ფსიხოლოგიიდან ის შეცდომა, ვითომც მხოლოდ პოეზიას, ლექსთა წყობას, თეატრს და სხვა ამ გვარებს ჰქონდეთ უდიდესი და უმაღლესი კულტურული ღირებულება ხალხის ცხოვრებაში; რომ მხოლოდ „შეგნებულ სარდლებს“ არაფრის გაკეთება არ შეუძლით, თუ მათ ბრძანებებს შეგნებული ჯარისკაცები არ ეყოლებათ შემსრულებლად, ვინაიდან „ხალხში, მასაში შეგნება ისე ადვილად არ შედის როგორც ბევრს ჰგონია“. მათი აზრით, არც „უურნალ-გაზეთების სიმრავლით, ბიბლიოთეკების დაარსებით თუ წარმოდგენების გამართვით“ თავის მოწონება იყო არა თუ სასარგებლო და საკმარისი, არამედ მავნებელიც კი იყო, ვინაიდან, სინამდვილის დანახვას უშლიდა ხელს და ესთეტიკურად დამტკბარს თუ მონოდება-დარიგებით აღსავსე ნაწარმოების ნაკითხვის შემდეგ, კუჭი უფრო ალგ ზნებული ხდებოდა და დაკმაყოფილებას მოითხოვდა...

რ. გაბაშვილის თქმით, ხალხი ნაკლებ ეტანება პირდაპირი თეორიით გადმოცემულ სწავლებას და სიმართლეს... სულ სხვაა, როცა რაიმე პრაქტიკულ ცოდნას აწვდი და ამ ცოდნის პირდაპირ ნაყოფს აჩვენებ მას, ხოლო შემდეგ ზურგმომაგრებელი ხალხი თვითონ შეიგნებს იმას, თუ რა უფრო საჭიროა და რომელი იდეები, რომელი პოლიტიკური მისწრაფებანი უფრო ხელსაყრელია მისთვის... ავ-

¹⁶ ჟურნ. „კლდე“, 1913 წლი 20 იანვარი, გვ. 12.

¹⁷ იქვე, გვ. 4.

ტორს ღრმად სწამდა, რომ „მარტო ეკონომიურად გალონიერებული ხალხია სულიერადაც ღონიერი და გონებრივადაც ფხიზელი“¹⁸.

„კლდის“ გამოსვლას, მის საპროგრამო განცხადებას და დამოკიდებულებას საზოგადოებრივ—პოლიტიკური ცხოვრებისადმი, საკმაოდ დიდი რეზონანსი მოჰყვა იმდროინდელ ქართულ, რუსულ და სხვა ენებზედ გამომავალ კავკასიურ პრესაში. სხვადასხვანაირი იყო მათი დამოკიდებულება ახლად მოვლენილი თანამოძმისათვის.

მაგალითად, გაზეთი „Завкавказе“, ჟურნალ „კლდის“ პირველი ნომრის გამოსვლასთან დაკავშირებით, თავის „პრესის მიმოხილვაში“ აღნიშნავდა: „გამოვიდა ქართული ყოველკვირეული ჟურნალ „კლდის“ პირველი ნომერი. თავიანთი ჟურნალის საფუძვლად XIX საუკუნის პოლონელი მოღვაწეების ნააზრევიდან გადმოკეთებულ (ნასესხებ) დევიზს უდებენ: ეკონომიური საქმიანობის განვითარებას, სახალხო-ეკონომიური ორგანიზაციების მოწყობას, ისეთი შენობის მკვიდრ ფუნდამენტზე აგებას, თანაც იმგვარად აგებას, რომ ეს საქმიანობა ეროვნულ ფარგლებში მიმდინარეობდეს. მომავალში კი ძალამოკრეფილი ხალხი თვითონ მოძებნის საშუალებას და დროს, რომ თავის თავი შეიცნოს“¹⁹.

საინტერესოა აღინიშნოს, რომ სოც.-ფედერალისტური მიმართულების „სახალხო გაზეთი“ ჟურნალ „კლდის“ პუბლიცისტებს „მენწრილმანე ვაჭრების“ ფსიქოლოგიის გამომხატველებად, მოუხეშავ, აპოლიტიკურ ადამიანებად თვლიდა და მათ „რეაქციული მიმართულების“ წარმომადგენლებად აცხადებდა.

„კლდეისტები“ უყურადღებოდ არ ტოვებენ თავიანთ ოპონენტს და პასუხსაც არ უგვიანებენ. „სახალხო გაზეთმა“ სულ უმიზეზოდ და ანაზღეულად აპოლიტიკოსებად მოგვნათლა, — წერდა „კლდე“ და რაკი ვითომ პოლიტიკა არა გვნამს, სხვა ყველა ჩვენს აზრებს „წვრილმანების პოლიტიკას“ უწოდებს. უპირველესად ყოვლისა, ჩვენ ვაცხადებთ, რომ ასეთი აზრი გაზეთისა სიცრუეა, რომელიც არც ერთის სიტყვით, არც ერთის სტრიქონით არ დაგვიმსახურებია და, თუ „სახალხო გაზეთმა“ მაინც დაგვნამა ცილი, ალბათ იმიტომ, რომ ჩვენ აპოლიტიკზმთან თავისი თავი უფრო პოლიტიკურად მოეჩვენა“²⁰. „კლდეისტები“ ერთხელ კიდევ ხაზგასმით აყალიბებდნენ თავიანთ დამოკიდებულებას ერის სამომავლო ბედისამი და სწამდათ, რომ გონიერი ეროვნული პოლიტიკა სწორედ ის იქნებოდა, რომელიც აამოქმედებდა ხალხს თუნდაც იმისთანა სასტიკ ხანაში, რომელშიც ისინი იმჟამად ცხოვრობდნენ. თქვენ ისიც

¹⁸ ჟურნ. „კლდე“, 1913 წლი 20 იანვარი, გვ. 4-5.

¹⁹ გაზ. „Завкавказе“, 1912 წლის 19 სექტემბერი, გვ. 2.

²⁰ ჟურნ. „კლდე“, 1912 წლის, 30 სექტემბერი, გვ. 5.

არ გჯერათ და გიკვირთ, — მიმართავდნენ „კლდეისტები“ თავიანთ ოპონენტს, რომ ვაჭარი თავის სიმდიდრით ეროვნულ სიმდიდრესაც ქმნიდესო. სჩანს ეს თქვენ არსად გინახავთ, არსად გაგიგონიათ, არსად წაგიკითხავთ! მაგრამ განა თქვენ ვალდებული ხართ ყველაფერი ნახოთ, გაიგონოთ და წაიკითხოთ? „რა ბედნიერი ხარ, რომ არაფერი წაგიკითხავს“, — უთხრა ერთმა ფილოსოფოსმა გლეხს. ამასვე ვეტიყვით თქვენც“²¹.

საინტერესოა ალინიშნოს, რომ ჟურნალ „კლდის“ საქმიანობაში დადებითი და სასარგებლო მომენტები შეუნიშნავს „კლდეისტთა“ ყველაზე რადიკალურ მოწინააღმდეგეს, სოც.-დემოკრატების ლიდერს ნოე ყორდანიას. ამის თაობაზე მოგვიანებით შალვა ამირეჯიბი წერდა: როდესაც ჟურნალი „კლდე“ პირველად გამოვიდა და მორცხვად განაცხადა პროგრამას მოქმედება გვირჩევნაო, პირველი ფედერალისტები იყვნენ, რომ სიცილი მოგვაყარეს და ჩვენი მოქმედება „წერილმანების პოლიტიკათ“ მონათლეს, (გულისხმობს „სახალხო გაზეთის“ ზემოთნახსენებ გამოსვლას — გ. ს.), მაგრამ მადლობა ღმერთს, საქართველოში კვლავ ყოფილა სამართლიანობა, რომელმაც ათქმევინა ბატონ ანს: „ამ საერთო ატმოსფეროში მხოლოდ „კლდემ“ შეიტანა სხვა ჰანგი, წამოაყენა კითხვები და შეეცადა პრაქტიკულ პოლიტიკის შემუშავებასო“.

ჩვენ სიამოვნებით ვიღებთ ამ მართალ სიტყვას და არა მარტო ამას, იმ ნაკლსაც, რომელზედაც გვითითებს ქართველ მშრომელ ხალხის ბელადი, მაგრამ ვიღებთ არა „ნათესავეებისაგან“ (გულისხმობს სოც.-ფედერალისტებს — გ. ს.), არამედ მოწინააღმდეგეებისაგან, ჩვენ საკუთარ და ჭეშმარიტ მოწინააღმდეგეებისაგან.

ჩვენში სიცრუეს ბევრს ლაპარაკობენ და სიმართლის გაგონება კი არავის არ უყვარს. ნამდვილად კი რამდენ კარგ გაკვეთილს აძლევს იგივე ბ-ნი ანი მათ, ვინც წარა-მარა საქართველოს პოლიტიკურ საკითხზე წუნუნებს და კი არას აკეთებს. ბ-ონ ანის წერილი „ფედერალისტების ბანაკში“ პირდაპირ პასუხია, თუ რატომ არ გახდა ქართული საკითხი პოლიტიკურ საკითხად. იმიტომ რომ, ისინი ვინც დაინტერესებულნი არიან ავტონომიით, არაფერს არ აკეთებენ იმის გარდა, რომ ერთსა და იმავე მასალას ხან ვრცლად ბეჭდავენ „სახალხო ფურცელში“, ხან შემოკლებით „ზვირთში“. პოლიტიკა კი ამით არსად შექმნილა“²².

1913 წლის 22 ენკენისთვის (სექტემბერს) ჟურნალი თავის სარედაქციო წერილიში „წლის თავზედ“, რომლის ავტორია „ა-ი“ (ჩვენი აზრით, ამირეჯიბი — გ. ს.), აჯამებდა რა ერთი წლის მანძილზე განეული მუშაობის შედეგებს, მრავალ საინტერესო ფაქტზე

²¹ ჟურნ. „კლდე“, 1913 წლი 20 იანვარი, გვ. 5.

²² გაზ. „საქართველო“, 1915 წლის 30 ოქტომბერი.

ამახვილებდა ყურადღებას, რაც უშუალოდ დაკავშირებული იყო ყურნალის მიზან-მიმართულებასთან, საპროგრამო მოთხოვნებთან, ტერიტორიების, ენის კულტურის, ეკონომიკის თუ სხვა საჭირობოროტო საკითხების გადანყვეტასთან...

„დღეს სრულდება ერთი წელიწადი, რაც ჩვენმა ყურნალმა პირველად იხილა დღის სინათლე. ერთი წელიწადი საზოგადოებრივ ცხოვრებაში ფრიად მოკლე დროა და ამ ხნის განმავლობაში, რასაკვირველია, ჩვენ ვერ მოვახერხებდით გაგვეხორციელებინა თუნდ უმცირესი ნაწილი მაინც ჩვენის აზრებისა. მიუხედავად ამისა, ნებას ვაძლევთ ჩვენს თავს ვიფიქროთ, რომ მცირეოდენი კვალი ჩვენმა ყურნალმაც დააჩნია ჩვენს ცხოვრებას. სრულებითაც არ გვსურს პირად ღირსებას მივანეროთ ეს მოვლენა. ბეჭდვითი სიტყვა ისეთი, იარაღია, თუ კი მას სათავეში გულწრფელი და მართალი აზრი უდევს, იგი ყოველთვის მოახდენს შთაბეჭდილებას. ამას გარდა მრავალ საკითხების განხილვის დროს, ჩვენ ვიდექით ისეთ ნიადაგზედ, რომელიც თავისთავად ღირსი იყო ყურადღებისა. ყველა ეს იმის თავდებია, რომ ხმა ჩვენი არ დარჩებოდა ხმად მლაღადებლისა უდაბნოსა შინა“²³.

გამომცემელთა აზრით, ყურნალი არ იყო რომელიმე პარტიის ორგანო და ეს იმიტომ, რომ ისეთი პარტია, რომელსაც მათი იდეების გავრცელება შეეძლო ხალხში, ჯერ-ჯერობით არ არსებობდა. მაგრამ ის ფაქტი, რომ ისინი არც სხვა რომელიმე არსებულ პარტიის პრინციპებს აღიარებდნენ „სავსებით და უკრიტიკოდ“, თავისთავად იმის მაჩვენებელი იყო, რომ მოქმედების დროს მათ ჰქონდათ თუ „საკუთარი პროგრამა არა, საკუთარი ხმა მაინც, რომელიც განირჩეოდა სხვა პარტიათა პროგრამათაგან“²⁴.

მაინც რაში პოულობდა თავის გამოხატულებას ეს განსხვავება? „იმამი, რომ საქართველოში ქუდზე — კაცის გასოციალისტების ხანამ თავისი დრო მოჭამა...“ „კლდეისტები“ კი კერძო საკუთრების მომხრეებად გამოდიოდნენ... და ეს არ იყო იძულებითი კომპრომისი, ანდა უბრალო ტაქტიკური მოსაზრება. არამედ ეს იყო საქართველოს ისტორიულ გამოცდილებებზე დაყრდნობით გაკეთებული დასკვნა... გამომდინარე აქედან, თავიანთ საქმიანობაში საქართველოს კი არ ენეოდნენ თავისკენ, არამედ თვით ისინი მიდიოდნენ მასთან. ამის გამო განსხვავება „კლდესა“ და სხვა გამოცემებს შორის აშკარა იყო... გამომდინარე აქედან ყურნალი დაასკვნინდა: „დიდი უმრავლესობა ჩვენის ქვეყნისა კერძო მესაკუთრეა... მაგრამ ჩვენი მესაკუთრეობა ისეთ სახეს იღებს, ისეთ საფუძველზედ სდგება და ისეთი ელემენტი იჭერს მასში მთავარი ელემენტის

²³ ყურნ. „კლდე“, 1913 წლის 24 სექტემბერი, გვ. 1.

²⁴ იქვე, გვ. 1.

ადგილს, სახელდობრ, გლახობა, რომელსაც არსებითად დემოკრატიზმი არ ეუცხოება. ამიტომ ჩვენ რომ მოგვესურებინა ხალხისათვის ჩვენი პროგრამის ჩვენება ეს პროგრამა უსათუოდ დემოკრატიული იქნებოდა²⁵.

ამასთან ერთად, მათთვის ეროვნული იდეა ცარიელი აბსტრაქცია კი არ იყო, არამედ „იმავე დროს იგი საკითხია ქართულის ენისა, ქართულის ტერიტორიისა, ქართულის ეკლესიისა, ქართულის კულტურისა, ქართულის მესაკუთრეობისა და ვაჭრობა-მრეწველობისა...“ რომ „კლდეისტები“ ეროვნული საკითხის გარჩევის დროს „არა მარტო იდეას იცავდნენ, როგორც აბსტრაქციას, არამედ მის ექვივალენტსაც“²⁶.

ავტორის განმარტებით მათ „თავი ეროვნული ინტერესების დარაჯად მარტო იმიტომ კი არ მიაჩნდათ, რომ, როცა ბათუმის ოლქში ქართული ენის შევიწროება დაიწყეს, ხმა მაშინ ამოიღეს, ანდა როცა კავკასიის უმაღლესი ხელისუფლება „ხიზანთა საკითხის“ სახით „ქართულ ტერიტორიას არა ქართველებს ურიგებდა“... არა! ისინი სრულიად შეგნებულად აკეთებდნენ ამას, რადგან სწამდათ, „რომ ზემოთხსენებულ საკითხში ნამდვილ ქართულ ინტერესებს იცავდნენ, სწორედ ისინი და არა სხვები, რომლებმაც ასეთ საკითხშიაც კი ვერ გამოიჩინეს საკმაო პატრიოტიზმი.“ (ავტორი გულისხმობს საქართველოს სოციალისტურ პარტიებს — გ. ს.)

შემდეგი საკითხი, რომელსაც „კლდეისტები“ თავიანთი საქმიანობის ძირითად მიმართულებად თვლიდნენ, სხვატომელთა შემოტყვევისაგან ქართული სასიცოცხლო ინტერესების დაცვა იყო, რადგან უხეშად ირღვეოდა „ეროვნული სამართლიანობა“. მათი პოზიცია მტკიცე იყო: „ეროვნულ პოლიტიკაში ისინი ანგარიშს უწევდნენ სხვა ერთა ინტერესებსაც, მაგრამ არ აპირებდნენ იმ პოლიტიკურ რეგვენებს, ან გულკეთილ დიასახლისებს დამსგავსებოდნენ, რომლებიც კერძების დარიგების დროს სტუმრებს იმდენს მიართმევენ, რომ თვითონ უკერძოდ რჩებიან“ ხოლმე.

„კლდეისტთა“ დამოკიდებულება ჩვენს მეზობელ ერებთან თვით საქართველოს ტერიტორიულ მდებარეობიდან გამომდინარეობდა. მათი აზრით, ისტორიულად ქართველი ხალხი არავის ცხოვრებაში არ ერეოდა. მას მუდამ თამამად შეეძლო ეთქვა: ჩემს საკუთარ ტერიტორიაზე ვცხოვრობ და ვიდრე ეს ტერიტორია არსებობს, მე სუპერ არბიტრი ვარ ყველა მთავარ საკითხში, რომელსაც ამ ტერიტორიის ცხოვრება წარმოშობს. აქედან გამომდინარე, ყველა სხვა

²⁵ უფრ. „კლდე“, 1913 წლის 24 სექტემბერი, გვ. 1.

²⁶ იქვე გვ. 1.

ხელოვნურად შექმნილი ნაციონალური საკითხები, როგორც ოსური, ან სომხური სრული კრახით დამთავრდებოა.

სულ სხვანაირი იყო „კლდეისტიების“ დამოკიდებულება საქართველოს გარეთ მცხოვრებ ერებთან, მათ შორის განსაკუთრებით კი უშუალო მეზობლებთან — აზერბაიჯანელებთან, სომხებთან, კავკასიის სხვა ხალხებთან. მითუმეტეს იმ დროს, როცა მოკლებულნი იყვნენ პოლიტიკურ თავისუფლებას და კავკასიის ყველა ერისა და ეროვნების წარმომადგენელს რუსის უღელი ედგა. „კლდეისტა“ აზრით, ქართველებს, „არავითარი მიზეზი არ ქონდათ ცუდ განწყობილებაში ყოფილიყვნენ, მაგალითად, განჯის თათრებთან, ან ერევნის სომხებთან“, ვინაიდან ისინი თავის მშობლიურ მინაზე ცხოვრობდნენ...²⁷ ყველა მათგანს უნდა ეზრუნა, რომ პოლიტიკური, სოციალური თუ ეკონომიური საკითხები, თავისი ეროვნული ინტერესების შესაბამისად თავისსავე მინა-წყალზე განევითარებინათ, იქვე აელორძინებინათ სოფლის მეურნეობა თუ ვაჭრობა-მრეწველობა... ანუ იმას უნდა ცდილიყვნენ, რათა სამეურნეო წინსვლის ისეთი ფორმები მოენახათ, რომელნიც გააადვილებდნენ ეკონომიური აღორძინების პროცესს. კოოპერაცია და წვრილი კრედიტი, უნდა ყოფილიყო პირველი ეტაპი, რომელიც უნდა გაეარა ქართველ მეურნეს. „ჩვენ ღრმად გვნამს, რომ ეს პროცესი უკვე არსებობს. ჩვენს სამშობლოში უკვე არის ისეთი კუთხეები, რომლებიც ინტენსიურ კულტურის მაგალითს წარმოადგენენ. კახეთის რკინის გზა, რომლის დამოუკიდებლობას ჩვენ მუდამ ვიცავდით, სრულად შესცვლის სამეურნეო სურათს კახეთისას და სხვა პროვინციები არ დააყოვნებენ თავიანთშიც გააფართოონ ინტენსიური მეურნეობა. ამიტომ ჩვენი ყურადღება შრომისა და კაპიტალის ერთმანეთთან ბრძოლაზე კი არ იყო მიპყრობილი, არამედ ამ შრომის გაადვილებაზე და ამ კაპიტალის შექმნაზე. და ეს გარემოება, რასაკვირველია, არსებით ჰქმნის განსხვავებას ჩვენსა და სხვა არსებულ გარემოცვათა შორის“²⁸-ო, წერდა „კლდე“.

ასეთი იყო ის უმთავრესი საკითხები, რომლებზედაც წერა თავის უპირველეს მოვალეობად მიაჩნდა ჟურნალს, მაგრამ ძნელი იყო პრაქტიკულად მათი განხორციელება, ვინაიდან არ არსებობდა ისეთი პოლიტიკური ძალა, რომელიც ქართველი საზოგადოების ამგვარს თავკაცობას შესძლებდა.

„არსებობს კი ისეთი პოლიტიკური ჯგუფი, რომელიც თავს იდებდა ყველა ზემო აღნიშნულის ქადაგებას და სისრულეში მოყვანას?“ — სვამდა კითხვას ჟურნალი და თვითონვე პასუხობდა: „გადაჭრით შეიძლება ითქვას, რომ არა! ამის გაკეთება არ

²⁷ ჟურნ. „კლდე“, 1913 წლის 7 თებერვალი, გვ. 15.

²⁸ იქვე, გვ. 3.

შეუძლიათ არსებულ პოლიტიკურ ჯგუფებს, რადგანაც წინააღმდეგ შემთხვევაში მათ ბევრ ისეთ რამეზე უნდა სთქვან უარი, რაც ერთად-ერთი შეადგენს მათ თანამედროვე პროგრამების სიუხვეს...“ რომ „ეროვნული ინტერესების დაცვა ნახევარი სიტყვით, ნახევარი თვალის ჩაკვრით და ნახევარი ბიჯით...“ შეუძლებელი იყო. გამომდინარე ყოველივე ზემოთქმულიდან, „კლდეისტები“ თვლიდნენ, რომ „სიტყვას, მათგან ასე მოკრძალებით ნათქვამს იმ დღეს, როცა პირველად გამოვიდა მათი ჟურნალი, თან მოჰყვებოდა საქმეც და საქართველოს რეალური პირობები ნარმოშობდნენ ახალ შეჯგუფებას, რომელიც თავს იღებდა წმინდა მოვალეობას ერის ინტერესების დაცვისას“²⁹.

დაკვირვებულ მკითხველს აქ ნათლად შეუძლია დაინახოს „კლდეისტთა“, ანუ მომავალი ეროვნული-დემოკრატიული პარტიის სამოქმედო პროგრამის ძირითადი მიმართულებები... ზემოთ მოტანილი ვრცელი ამონაწერები, იგივეა, რაც სხვა პოლიტიკური პარტიებისა და ჯგუფების საპროგრამო განცხადებანი, რომელნიც უმეტეს შემთხვევაში მხოლოდ საპროპაგანდო დანიშნულებისა იყვნენ და შორს იდგნენ კონკრეტული საქმეებისაგან. ამ შემთხვევაში კი საქმე გვაქვს ისეთ ფაქტთან, როცა პრაქტიკული შედეგებიდან გამომდინარე თანდათან ყალიბდებოდა ერთიანი სამოქმედო პროგრამა, რომელსაც რეალური ბაზა გააჩნდა.

²⁹ ჟურნ, „კლდე“, 1913 წლის 7 თებერვალი, გვ. 1-3.

ყურნალი „კლდე“ და საქართველოს ტერიტორიების საკითხი

ქართული ტერიტორიების შენარჩუნებისათვის ბრძოლა ყურნალ „კლდის“ ერთ-ერთ მთავარ საზრუნავს წარმოადგენდა, ვინაიდან „მასში ირეკლებოდა საქართველოს მომავლის ბედი“ და, რომ „ტერიტორიისა და მიწის წართმევა ქართველებისათვის ისტორიულ-პოლიტიკური ნიადაგის გამოცლა იქნებოდა...“. არა-და ეს პოლიტიკა ხომ დაჟინებული თანმიმდევრობით ხორციელდებოდა რუსეთის მიერ 1783 წლის გეორგიევსკის ტრაქტატის უსირცხვილოდ დარღვევისა და ძალით ოკუპირება-ანექსიის შემდეგ, რითაც საქართველოს საკუთარი სახელმწიფო საზღვრები მოეშალა. ამიტომ იყო, რომ „კლდეისტები“ გამუდმებით ცდილობდნენ საქმის კურსში ჰყოლოდათ თავისი მკითხველები იმის თაობაზე, თუ რა გზებითა და საშუალებებით ანხორციელებდა რუსეთის თვითმპყრობელობა ქართული მიწა-წყლის გასხვისებას, გარუხებას, გასომხებას და ა. შ. რა თქმა უნდა, ამ მუხანათური პოლიტიკის ასე საჯაროდ მხილებას რედაქციას არავინ აპატიებდა და ამიტომ იყო, რომ იგი თავის ფურცლებზე ხშირად უთმობდა ადგილს ოფიციალური ცნობების გადმობეჭდვას სხვადასხვა რუსული გამოცემებიდან. ასე, მაგალითად, 1912 წლის 265-ე ნომერ „Правительственный Вестник“-ის მონაცემებით „რუსების კავკასიაში გადმოსახლება დიდი ხანია დაწყებული“, მაგრამ მას, „გასული საუკუნის ბოლომდე უფრო შემთხვევითი ხასიათი ჰქონია“.

1899 წლის კანონით დაწყებული რუსი სოფლელებისა და მოქალაქეების გეგმაზომიერი გადმოსახლებები, რასაც 1905 წლიდან კიდევ უფრო ორგანიზებული ხასიათი მისცემია... სად იყო ის მიწები, რომლებზეც გადმოსახლებულთა დამკვიდრება ხორციელდებოდა? ყურნალის თქმით: „საქართველო — ეს უძლიერესი და უდიდესი სახელმწიფო მთელს კავკასიაში — რუსებს ხომ სრულიად უომრად ჩაუვარდა ხელში. და ეს ფაქტი — საქართველოს რუსეთის ხელში გადასვლა, მოასწავებდა აუარებელი მიწა-ადგილების ხაზინის საკუთრებად მოქცევას. 1801 წლის აქტით (იგულისხმება იმპერატორ პავლე I-ის მიერ გამოცემული მანიფესტით აღმოსავლეთ საქართველოს სამეფოს გაუქმება და რუსეთისათვის მიერთება — გ. ს.) რუსეთის სახელმწიფო ხაზინის განკურგებაში დიდძალი მამული გადავიდა“, რამაც მეტისმეტად გააფართოვა „ხაზინის მიწის ფონდი“. ეს ადგილები იმთავითვე გათვალისწინებული იყო „საზღვრების გასამაგრებლად და იქ ჭეშმარიტი რუსების დასასახ-

ლებლად. სწორედ ეს თვალთახედვა ამოქმედებდა მთავრობას განაპირა ქვეყნებში...³⁰

აი, ამ მუქთად ნაშოვნი მიწების ორგანიზებული ათვისება თვითმპყრობელურმა ხელისუფლებამ განსაკუთრებული ინტენსიურობით 900-იანი წლების დამდეგიდან დაიწყო, როცა კავკასიაში მეფისნაცვლის პოსტი ისევ აღადგინა და ამ მაღალ თანამდებობაზე ქართველთმოძულე გრაფი ვორონცოვ-დაშკოვი დანიშნა.

მაინც ვინ იყო ვორონცოვ-დაშკოვი და რა პოლიტიკას ატარებდა იგი კავკასიაში თავისი ათწლიანი (1905-1915წწ.) მოღვაწეობის დროს?!

იგი თვითმპყრობელური რუსეთის ისტორიაში ფრიად კოლორიტული ფიგურაა და ცარიზმისადმი განსაკუთრებული ერთგულების გამო გრაფის ტიტულიც ჰქონდა მინიჭებული. როცა მთელს რუსეთის იმპერიას ხალხის რევოლუციურმა გამოსვლებმა ზანზარი დაანეებინა, მაშინ 70 წელს მიღწეული გრაფი, იმპერატორმა ყველაზე უფრო საშიშ რეგიონში — კავკასიაში დანიშნა თავის ნაცვლად და უფლებებზე მეფური მიანიჭა, რათა ჭკუაზე მოეყვანა რომანოვების ტახტის ურჩი ქვეშევრდომები... 1905 წლის მაისში იგი თბილისში ჩამოვიდა და ერთგულად შეუდგა იმ პოლიტიკის გატარებას, რომელიც იმპერიის ინტერესებიდან გამომდინარეობდა...

„გრაფ ვორონცოვ-დაშკოვის პოლიტიკა ოდნავადაც არ განსხვავდებოდა რუსეთის ჩვეულებრივი ბიუროკრატიული პოლიტიკისაგან განაპირა ქვეყნებში... ამ პოლიტიკის ერთი შემადგენელი ნაწილი იყო, რომელიმე ერის აჩემება, მისდამი მეტი ყურადღების გამოჩენა და ა. შ., რათა სხვები გაებრაზებია და საბოლოოდ ერთმანეთისათვის გადაეკიდებია...“ ამიერ-კავკასიაში „ამ პოლიტიკის აღსასრულებლად და განსახორციელებლად გრაფმა ვორონცოვ-დაშკოვმა სომხები აირჩია... იგი იმ დროს ჩამოვიდა საქართველოში, როცა მთელ ქვეყანას რევოლუციის ცეცხლი ჰქონდა მოკიდებული. აქ კი პირველი როლი ქართველებს ეჭირათ... დასაწყისში იგი თითქო ქართველებს მეტ ყურადღებასაც კი აქცევდა — ურთიერთობა ჰქონდა ქართველ სოც.-დემოკრატებთან, მათ ლიდერებთან, სტაროსელსკის დანიშვნა ქუთაისის გუბერნატორად და სხვ. ამ პოლიტიკას განეკუთვნებოდა... როგორც კი რეაქციის ხანა დადგა, გრაფმა მაშინვე გამოაჩინა თავისი ბრწყალები და იგი მთელი სისასტიკით შეუდგა რეპრესიული ზომების გატარებას. მარტო გენერალ ალიხანოვ-ავარსკის დამსჯელი ექსპედიციის მოქმედების გახსენება კმარა, რომელიც გრაფ ვორონცოვ-დაშკოვის მიერ გაცემული ბრძანების მიხედვით მო-

³⁰ ურნ. „კლდე“, 1913 წლის 13 იანვარი, გვ. 1.

ქმედებდა... მეფისნაცვლის ასეთმა საქციელმა ქართველი საზოგადოების ყველა ფენის აღშფოთება გამოიწვია... იმ ხანებში ქართლ-კახეთის თავად-აზნაურთა დეპუტატების საკრებულომ, თბილისის მაზრის თავად-აზნაურთა მარშალმა, თავადმა ლ. ჯამბაკურ-ორბელიანმა პირდაპირი პროტესტი გამოუცხადა მეფისნაცვალს და 1906 წლის დარბაზობაზე არ გამოცხადდა, თუმცა კარგი პირადი ნაცნობობა აკავშირებდა მასთან... გრაფს ერთგვარი ბოიკოტი გამოუცხადა თბილისის მაღალი საზოგადოების საუკეთესო ნაწილმაც, ასე ჩატყდა ხიდი გრაფსა და ქართველებს შორის... სამაგიეროდ თბილისში მცხოვრები სომხური პლუტოკრატია დაიახლოვა და თავის საყრდენ ძალად გაიხადა... სომხებისათვის მონყალე თვალით გადახედვა იმითაც იყო განპირობებული, რომ მათ, დაშნაკცუტუნის პარტიის მიერ შთაგონებულთ, რევოლუციურ გამოსვლებში მონაწილეობა არ მიუღიათ. ამ დამსახურების გამოც იყო, რომ რუსეთის ხელისუფლებამ სომხების ეკლესიას საეკლესიო მამულები დაუბრუნა... მეფისნაცვალსა და სომეხთა მდიდარ ბურჟუაზიას შორის ურთიერთ კეთილმეგობრულ დამოკიდებულების დამყარებაში დიდ როლს თამაშობდა გრაფის მეუღლე ელისაბედ ანდრიას ასული... მეფისნაცვლის სასახლის კარს, მართალია, ბოიკოტი გამოუცხადეს ბაგრატიონ-გრუზინელებმა, ჯამბაკურ-ორბელიანებმა, ერისთავებმა თუ ანდრონიკაშვილებმა, მაგრამ სამაგიეროდ გრაფის სასურველ სტუმრებად იქცნენ — ფითოეები, ალიხანოვები, მანთაშოვები, არამიანცები, ხატისოვები და სხვები, რომლებიც სხვებზე თავიანთი უპირატესობის ნიშნად ვორონცოვ-დაშკოვს „ნამ გრაფს“ ეძახდნენ. შემდეგში, როცა მოხუცებულობამ და ავადმყოფობამ მეფისნაცვალს თავისი დამართა, მის მაგივრად მთელი კავკასიის საქმეებს მისი მეუღლე „80 წლის დედაბერი“ (კ. ჩხეიძის სიტყვებია) მართავდა.

ვორონცოვ-დაშკოვის მმართველობის დროს დაიწყო დაუნდობელი დევნა ქართველი უმაღლესი საეკლესიო მოღვაწეების (კირიონი, ლეონიდე, ანტონი და სხვ.) და, საერთოდ, ქართული მართლმადიდებელი ეკლესიის მიმართ. ყოველგვარი სისაძაგლის ჩადენის უფლება ჰქონდათ მიცემული ეგზარხოს ინოკენტის, დეკანოზ ვოსტორგოვს და მათ მსგავს რუს სასულიერო მამებს... სწორედ, გრაფის ოჯახთან დაახლოებულმა ეგზარხოსმა ინოკენტიმ გააუქმა ალავერდის კათედრა, ხოლო მისი ეპისკოპოსი დავითი სამშობლოდან გააძევა... ვორონცოვ-დაშკოვის დროს მეფისნაცვლის კანცელარიაში შემუშავებულ იქნა პროექტი ამიერ-კავკასიის გუბერნიების ტერიტორიების ხელახალი გადამიჯვნის მიზნით, რომელიც სომხების სურვილების მიხედვით უნდა განხორციელებულიყო და სხვ.

ქართველთა მიმართ აშკარა სიძულვილის გამოხატულება იყო პირველი მსოფლიო ომის წლებში ქართველ მაჰმადიანთა, კერძოდ აჭარელთა სასამართლოების მოწყობა, მათთვის სამშობლოს და-ლატის დაბრალებით და ტანჯვა-წამების მიყენებით. ჟურნალ „გან-თიადის“ თქმით, ამით რუსეთს სურდა „საქართველოს მთლიანობის კედლების ღრმად შენგრევა...“³¹ აღსანიშნავია, რომ ეს გულბოროტი მაღალი რანგის რუსი მოხელე, საიმპერიო ხელისუფლების მიერ აჭარელთა დასახმარებლად გამოყოფილ მცირე თანხასაც არ აძლევდა შეჭირვებულთ, რისთვისაც იგივე ჟურნალის მითითებით: არაერთხელ შეტაკება მოუვიდათ გრაფის მეუღლესთან საქართველოს ახალ ეგზარქოსს პიტკირიმს და ქართლ-კახეთის თავად-აზნაურთა წინამძღოლს თავად კოტე აფხაზს“³².

საბოლოოდ ამ პოლიტიკას გადაყვა ვორონცოვ-დაშკოვის მოღ-ვაწეობა და მისი დათხოვნის დროს ზემოთ დასახელებულ პირთა მოსაზრებებს დიდი ანგარიში გაუწიეს.

ამ გაიძვერა და მექრთამე მოხელის დროს, იშვიათი იყო ახალი კანონი თუ სხვა სახის საკანონმდებლო აქტი გამოსულიყოს და იგი ქართველი ხალხის სასიცოცხლო ინტერესების წინააღმდეგ არ ყო-ფილიყოს მიმართული. მაშინ, როცა უდიდეს გულმოდგინებას იჩენდა საქართველოში შემოხიზნულ, თუ მომავალში ჩამოსასახლე-ბელი სხვა ხალხების მიმართ. მაგალითად, უდიდეს ძალისხმევას იჩენდა კავკასიაში, კერძოდ საქართველოში გადმოსახლებული რუსი ოჯახებისათვის საცხოვრებელი ადგილების შერჩევის, მათთ-ვის ყველაზე ვარგისი მიწის ნაკვეთების გამოყოფის, გზებისა და არხების გაყვანის, სარწყავი და დასალევი წყლის საკითხის მოგ-ვარებისათვის, ხოლო შემდეგ თავისი მხედველობის არედან არ უშ-ვებდა ახლადჩამოსახლებულთათვის ყოველგვარი სესხის მიცემის, სახლ-კარის აშენების, საერთო-სასარგებლო საქმეების მოწყობის, გზის ხარჯების ანაზღაურებისათვის და ა. შ.

„კლდის“ ფურცლებზე დასტამბული მასალები ფარდას ხდიდ-ნენ იმ მზაკვრულ ჩანაფიქრებს, რომლებსაც სტრატეგიული აუ-ცილებლობიდან გამომდინარე, ვორონცოვ-დაშკოვების მსგავსი რუსი მაღალჩინოსნები, ქართველი ხალხის უფლებრივი ინტერესე-ბის შევიწროვების მიზნით მისსავე ტერიტორიაზე ანხორ-ცილებდნენ. მაგალითისათვის მეფისნაცვლის კანცელარიაში შე-მუშავებული კანონპროექტი „ოს ხიზანთა შესახებ“ გამოდგება, რო-მელიც რუსეთის სახელმწიფო სათათბიროში განსახილველად მომზადდა. ეს კანონ-პროექტი, თუ კი მას კანონის ძალა მიეცემოდა ითვალისწინებდა „კავკასიონის ქედიდან მეჯვრისხევამდე (მდ. მე-

³¹ ჟურნ. „განთიადი“, 1915 წლის 15 ოქტომბერი, გვ. 25.

³² იქვე, გვ. 26.

ჯუდა) და საჯავახოში ათითასობით დესეტინა მიწის საქართველოში ხიზნათ მოსული ოსებისათვის უფასოდ გადაცემას.“

ყურნალში გამოქვეყნებული ამ საკითხისადმი მიძღვნილი მასალებიდან ყურადღებას იქცევს ალ. ყიფშიძის (ფრონელის) წერილების სერია, საერთო სათაურით: „ანმყო და მომავალი ხიზნებისა“, დ. ვაჩნაძის სტატია — „არჩილ ჯორჯაძე და ხიზნობა“ და სხვ.

1913 წლის 28 აპრილს ყურნალში დასტამბულ სტატიაში — „დაავადებული დემოკრატია“ რ. გაბაშვილი ეკამათებოდა რა სოც. — ფედერალისტების ორგანოს გაზეთ „სახალხო გაზეთის“ წარმომადგენელს არჩ. ჯ-შვილს (არჩილ ჯაჯანაშვილს) ხიზნათა საკითხის გამო, მიუთითებდა: „ჩვენ ყურნალში მთელი თვეა იბეჭდება მეტად სერიოზული და საინტერესო გამოკვლევა ხიზნათა საკითხისა, რომელიც ისეთ მცოდნე პირს ეკუთვნის, როგორიც ა. ყიფშიძეა“³³.

შემდეგ იგი ყურადღებას ამახვილებდა არჩ. ჯაჯანიშვილის განცხადებაზე იმის შესახებ, რომ „საქართველო ქართველებისათვის კი არ უნდა იყოს, არამედ საქართველო უნდა იყოს ყველა იმათთვის, ვინც საქართველოში სცხოვრობს, ვისაც მისი მომავალი სწამს...“ და, რომ „საქართველოს პოლიტიკური იდეალი საქართველოში მცხოვრებ ერთა საერთო იდეალი უნდა იყოს“-ო.

კეთილი და პატიოსანი უნდა იყოს, მაგრამ რომ არ იყოს, ანდა ხომ ვხედავთ რომ არ არის! — ესიტყვება მას რევაზ გაბაშვილი და ოპონენტის გასაგონად განაგრძობს: „დღეს ბრმა უნდა იყვეს ადამიანი, რომ არა ხედავდეს, თუ როგორ გვავეინროვებენ, როგორ აცლიან გვერდს ჩვენს სამშობლოს ისინი, ვის ხელშიაც ძალაა; თვალნი დაშრეტილნი უნდა ჰქონდეს იმას, ვინც ვერ ხედავს, თუ როგორ აძლიერებს თვით მთავრობა იმ ელემენტს, რომელიც ჩვენ გვასუსტებს შეგნებულად“... ანდა იქნებ „დაავინყდა არ. ჯ-შვილს, რომ არჩევნების დროს (გულისხმობს რუსეთის IV სახელმწიფო სათათბიროს არჩევნებს — გ.ს.) მარტოოდენ ის გამოაშკარადა, რომ სომხობის „მონიწივე“ ხალხი წინააღმდეგია ჩვენი პოლიტიკური იდეალისა?.. განა ისიც დაავინყდა, რომ „რკალივით გვარტყავენ გარშემო შიდა გუბერნიებიდან გადმოსახლებულთ?.. განა არ ახსოვს, რომ ოსებს უქმნიან ლიტერატურას და მფარველობას უწევენ 60 წლის განმავლობაში მხოლოდ იმიტომ, რომ ოლსტერი მოგვიმზადონ?..“

წერილის დასასრულს რ. გაბაშვილის აღმფოთება კიდევ უფრო მატულობდა და დაფიქრებისაკენ მოუწოდებდა როგორც უშუალოდ ოპონენტს, ისე მთელ ქართველ საზოგადოებას და წერდა: „...საღ გონებიან პოლიტიკოსს როგორ ეპატიება იმის არ ცოდნა, რომ მთლიანი ტერიტორია, ეროვნული მთლიანობა მხოლოდ ფუძეა შემ-

³³ ჟურნ. „კლდე“ 1913 წლის 28 აპრილი, გვ. 8-9.

დგომში პოლიტიკური პირობების შექმნისათვის და როდესაც დაგვაქუცმაცებენ, როდესაც ცალკე სომხობა, ცალკე ოსობა, ცალკე შიდა გუბერნიებიდან გადმოსახლებულნი დაგვეყოფენ და ცალკე უცხო მხარეში ემიგრაცია შეასუსტებს ჩვენი ეროვნული მაჯის ცემას — მაშინ გვიანლა იქნება: წამხდარსა საქმეს რას არგებს, მას უკან თითზე კბენანი“³⁴.

რ. გაბაშვილის მიერ შექმნილი ალ. ყიფშიძის დასკვნები, მართლაც ყურადსაღებია და დღესაც ინარჩუნებენ თავიანთ ცხოველმყოფელობას. ავტორის თქმით: „ეს იყო ცარცვა ქართველებისა ოსების სასარგებლოთ,“ რომ „1864 წელს ბატონყმობისაგან განთავისუფლებისას ქართველ გლეხს რაღაც სადავო „ჩამონაჭრები“ მისცეს და ისიც გამოსყიდვით 55 წლის განმავლობაში, მაშინ, როცა ახალი კანონ-პროექტით ხიზან ოსებს უფასოდ და თანაც სამუდამოდ უნდა მისცემოდათ საუკეთესო სავარგულები. სამწუხარო ის იყო, რომ „ოს ხიზანთა შესახებ“ კანონ-პროექტის მიღების მხარდამჭერებად ქართველი სოციალისტ-ინტერნაციონალისტებიც გამოდიოდნენ და გაშმაგებით ილაშქრებდნენ „კლდე-ისტ-ნაციონალისტთა“ წინააღმდეგ. ეს მხარდაჭერა უმაღლეს დონეზეც იქნა დაფიქსირებული, როცა რუსეთის IV სახელმწიფო სათათბიროს დეპუტატები — სოციალ-დემოკრატები — კარლო ჩხეიძე და აკაკი ჩხენკელი მხარს უჭერდნენ ხსენებული პროექტის კანონად ქცევას და თითქოს ვერ ამჩნევდნენ საით იყო მიმართული თვითმპყრობელობის განხრახვა, როცა ისედაც ეთნოგრაფიულად აჭრელეებულ ამიერკავკასიაში „კიდევ ერთი ზედმეტი ელემენტის შექმნას“ აკანონებდნენ.

„ერთა უთანხმოება და შეხლა-შემოხლა ყველა დემოკრატიასაგან არის გმობილი და ჩვენი სოციალისტური დემოკრატიაც მუდამ ამას გაიძახის, მაგრამ როდესაც ბიუროკრატია არ კმაყოფილდება კავკასიაში არსებულ ეროვნებათა სიმრავლით და ხელოვნურად ჰქმნის და აძლიერებს კიდევ ერთ ელემენტს, რომ მეტი მასალა იქონიოს ერთა შუღლისათვის, განყენებულ აზროვნებით დაბრმავებული ჩვენი დემოკრატია ამ რეაქციონურ ხრიკებს უჭერს მხარსა. განა იგივე აგენტები არ სცდილობდნენ შეექმნათ „მეგრელთა ეროვნება“ და სხვა, რომ უფრო ადვილად დავექსაქსენით... ჩვენ კიდევ გვესმის, როდესაც ბატონი ჩხეიძე მხარს უჭერს და აჩქარებს კიდევ ხიზანთა კანონ-პროექტის განხილვას, რადგან იგი ეკუთვნის ანტიეროვნულს, ან უკეთ ანტიეროვნულ ინდეფერენტიზმით ავადმყოფ პარტიას, მაგრამ ჩვენ სრულიად არ გვესმის სოც.-

³⁴ ურნ. „კლდე“ 1913 წლის 28 აპრილი, გვ. 13.

ფედერალისტების ყალბი პოზიცია იმ საკითხში, საცა სოციალისტური და ეროვნული პრინციპი ერთმანეთს ენიანალმდეგებიან...³⁵

არ შეიძლება შემოთების გარეშე ნავიკითხოთ მინების დაკარგვის შიშით გაოგნებული ქართლელი გლეხკაცობის საჩივარის სტრიქონები, მიმართული არა მარტო კავკასიის მეფისნაცვლისა და თბილისის გენერალ-გუბერნატორისადმი, არამედ რუსეთის IV სახელმწიფო სათათბიროსადმი და იქ მოღვანე ქართველი დეპუტატების კ. ჩხეიძისა და ვ. გელოვანისადმი... ფრონის ხეობის ოქონის საზოგადოების სოფლების — თერეგენის, ახალშენის, ნედლათის, ხუნდისუბნის, თილის, შინდრის, მულრისის, ტყისუბნის, ნაბაკევისა და ოქონის მცხოვრებნი თავიანთ თხოვნაში აღნიშნავენ: „... ვინ იცის რა დროიდან, — ჩვენ მამა-პაპათ აქ უცხოვრიათ, სამშობლოს მიდამოები განსაცდელის დროს სისხლით მოურწყავთ, ოფლი დაუღვრიათ და ჩვენამდის ჩვენი მამული შეუნახავთ... დღემდის თუ თავისუფლად ვსარგებლობდით საძოვრითაც, ტყითაც, დღეს გარსშემორტყმული ხიზნებით შევეინროვდით და განვიცდით გაჭირებას უმამულობით,—“ო და მათ ყურადღებას მიაქცევდნენ იმაზე, რათა ხიზანთა შესახებ კანონ-პროექტი არ დაეკანონებიათ, რადგან „მაშინ ჩვენ აქ აღარ გვეცხოვრებო.“

ორმაგად გულსატკენი იყო სოც.-ფედერალისტების იმუამინდელი პოზიცია ოს ხიზანთა საკითხისადმი, რადგან სულ რამდენიმე წლის წინ, მათი ლიდერის, გამოჩენილი მამულიშვილის არჩილ ჯორჯაძის ნაფიქრ-ნააზრევს უდარდელად ივინყებდნენ... სწორედ ამაზე ამახვილებდა ყურადღებას დავით ვაჩნაძე.

„კლდეში“ დაბეჭდილ „ვინმე სოფელის“ სტატიაში დიდი გულისტკივილით იყო გამოთქმული, რომ ქართული მინების, უმთავრესად ქართლის გამოჩენილ საგვარეულოების სამფლობელოები დანანევრებულ-დაქუცმაცებული და მთლიანად ან ნაწილობრივ სხვა რჯულის ხალხის ხელში იყო გადასული. ასე იყო საციციანოს, ზაჯანახოს, სათარხნოს, ქვემო საციციანოს, დიდმის ველის, სკრის ხეობის (შალიკაშვილების), საამირეჯიბოს, საფალავანდოს, ფრონის ხეობის — კალატოზიანთ, სამაჩაბლოს, საამილახვროს, სამუხრანბატონოს, საგურამოს, საორბელიანოს, საბარათიანოს თუ სამელიქიშვილოს კუთვნილი ტერიტორიები... მაგალითად იმდროისათვის სკრის ხეობა „მთლიანად დაკარგული ჰქონდათ თავად შალიკაშვილებს და თქვენს მტერს მოუვიდეთ, რაც მათ მოუვიდათ... დიდი წილი ამ სათავადოსი ქართველ კათოლიკეთა ხელში გადავიდა, დანარჩენი კი ფრიდონოვმა და ავსარქისოვმა დაისაკუთრეს.“

³⁵ იურნ. „კლდე“, 1914 წლის 25 თებერვალი, გვ. 10.

იგივე ბედი ხვდა ერისთავიანთ ატენის ხეობაში: ხიდისთავში გორელმა სომხებმა მოიკალათეს, ატენში ჩვენმა ბანკმა და გლეხობამ. კარგა დიდი ნაწილი ატენის ხეობისა პოლკოვნიკმა სიბონოვმა შეიძინა, დანარჩენი — სახელმწიფო ბანკმა, ხოლო მისგან — ლეკმა ჯამათ-ჭაჯიევმა.

ჯავახიშვილებისა — რუსმა პროფესორმა, ზოგი კი ოსობამ.

სათარხნოში გასაყიდი მამულები რომ აღარ დარჩა, სწმენებელ მასალად ჰყიდდნენ დიდი მოურავის, გიორგი სააკაძის ციხე-დარბაზის ნანგრევებს სოფელ ნოსტეში.

დიღმის ველის მინების დიდი ნაწილი ხატისოვის პარტიას ჰქონდა შეძენილი.

ფრონის ხეობაში (დვინში) მაცხოვრებელი ფალავანდიშვილები, ხერხეულიძეები, კალატოზიშვილები ამ ხეობიდან წავიდნენ... ერთი კომლი დარჩა სოფ. ყორნისში და ისიც ისეა გაოსებული, რომ ქართულ ლაპარაკსაც ვეღარ ახერხებს და დანარჩენ ოსებში ვეღარ გაარჩევთო.

სამუხრან-ბატონოში უდელები და ხატისოვის პარტია ბატონობენ.

საგურამოში გურამიშვილი აღარავინ გვეგულება. v

ბორჩალოს მებატონეები თავის დროზე ყველაზე გავლენიანნი იყვნენ... ყველაზე ადრე დაკარგეს იქაურმა ორბელიანებმა, ბართაშვილებმა და მელიქიშვილებმა თავიანთი, მართლაც, რომ ლატიფუნდიები, მათ ნამოსახლარზე ხარობენ უდელები, თათრები, სომხები, ნემცები, რუსები, ბერძნები... თამამშოვები, თაიროვები, ყაზაროვები, მანთაშოვები და მრავალნი სხვადასხვა ისტორიულ ხანას შემოსეულნი.

ამ ბოლო დრომდე შენახული შესანიშნავი ახპატის მამული 15000 დესეტიანა სასტუმრო „ორიანტის“ ნადიმებმა იმსხვერპლეს და არამიანცს ჩაუგდეს ხელში... ერთი უდიდესი მემამულის ქონებიდან, მაღლიერმა თავად-აზნაურობამ მის მემკვიდრეს რამდენიმე ასი დესეტიანა მამული გადაურჩინა, რათა გამოჩენილი მარშლის მემკვიდრეს, მათდა სამარცხვინოდ, ცენზი არ დაჰკარგვოდა.

თუ ჩვენს თავადაზნაურობას კიდევ რაიმე დარჩა, ისიც ისეა დატვირთული ვალითა და ვახშით, რომ ამ სულ ცოტა ხანში ცენზიანი თავად-აზნაური ცაცია ხელის თითებზე ჩამოითვლებაო, — ნერდა „კლდე“.³⁶

ყურნალში არაერთ სხვა დიდგვაროვანთა სახელებსაც ვხვდებით, რომლებიც ასევე უდიერად, დაუფიქრებლად ექცეოდნენ ადგილ-მამულებს და ორიოდ გროშის ფასად უცხოტომელებს უთმობდნენ... ასე იქმნებოდა ქართული ტერიტორიების მფლობელი

³⁶ ურნ. „კლდე“, 1912 წლის 9 დეკემბერი, გვ. 2-5.

„რეალური მოსახლეობა,“ რომელსაც პრეტენზია ჰქონდა ეროვნულ საკუთრებად გამოეცხადებია ქართული მიწები და გულარხეინად დამკვიდრებულიყვნენ მასზე.

სტატიამი „ტერიტორიის საკითხი“ ავტორს მოჰყავდა ფედერალისტების „სახალხო გაზეთის“ სიტყვები: „მწარე ცრემლით ვსტირით, რომ ახალქალაქის მაზრა, ეს ოდესღაც სავანე ქართულის კულტურისა, დღეს მარტო ნაშთებითა და ნანგრევებით მოგვავონებს საქართველოს, გული გვენვის, მაგრამ უნდა შევეურიგდეთ იმ ამკარა ფაქტს, რომ ეს მაზრა დღეს აღარაა ქართველობისა და „რეალური მოსახლეობის“ პრინციპიდან გამომდინარე იგი სხვატომელთა კუთვნილებად უნდა ვაღიაროთო...“ ჟურნალი „კლდე“ ამის გამო მწარე ირონიით შენიშნავდა: „ამრიგად ეს „მუხლ-ცრემლიანი და თვალ-მოდრეკილი“ პატრიოტები ჰგლოვობენ იმას, რაზედაც ხელს იღებენ და ხელს იღებენ იმაზე, რაზედაც ჰგლოვობენ“-ო.

შემდეგ ავტორი მოაგონებდა ყველას, თუ რატომ და ვისი ხელშეწყობით მოხდა, რომ ახალქალაქის მაზრაში, საქართველოს ამ ისტორიულ მხარეში — ჯავახეთში, ქართველობა აღარ ცხოვრობდა. მისი აზრით, ეს იყო შედეგი იმისა, რომ „1829 წლამდის ახალქალაქის ახლანდელი მაზრა ახალციხესთან ერთად ოსმალეთის სამფლობელოს შეადგენდა. ამ პროვინციებში უმთავრესად ქართველობა სცხოვრობდა. როდესაც რუსეთმა შემოიერთა იგი, მთელი მაჰმადიანი ქართველობა ყარსის მხარეს გადაიხვეწა... ამის მიზეზი რელიგიური შიში და ფანატიზმი იყო. მაჰმადიანობას ეშინოდა, რუსებს მათი გაქრისტიანებისათვის არ მიეყოთ ხელი. ასწლობით ნასახლი ქართველი მაჰმადიანობა ყველაფერს სტოვებდა — ადგილს, სახლ-კარს და სამუდამოდ ემშვიდობებოდა თავის სამშობლოს... დაცარიელებულ ადგილებს რუსეთის ხაზინა ეპატრონებოდა, ხოლო შემდეგ ოსმალეთიდან ლტოლვილ სომხობას ასახლებდა მასზე. მათ დაიჭირეს მზამზარეული და საცხოვრებლად მონყობილი მხარე...“³⁷

ჟურნალის თქმით, ამ ისტორიის არ ცოდნის გამო ზოგიერთ ქართველსაც კი ეს ადგილები „ისტორიული სომხეთის ნაწილად“ მიაჩნდა.

ამ ყველაფრის შესანიშნავად მცოდნე „კლდეისტები“ თავიანთ ძალისხმევას იქითკენ მიმართავდნენ, რომ სამშობლო მინაწყალი სხვისთვის არ დაგვეთმო... რევან გაბაშვილი პატრიოტული ალტკინებით მიმართავდა ქართველობას: „...სამშობლო განსაცდელშია, მას უდიდესი საფრთხე მოელის — დაკარგვა ტერიტორიისა, ყველაფრის დაკარგვაზე უარესია სიციცხლის მოსურნე ერისათვის.

³⁷ ჟურნ. „კლდე“, 1914 წლის 9 მარტი, გვ. 2-4.

ცალკე პირს შეუძლიან დაჰკარგოს მინა, როგორც სხვა საკუთრებაც, მაგრამ მაინც ადამიანად დარჩეს, მაგრამ ერს, როგორც ეკონომიკურს, კულტურულს და პოლიტიკურს ერთეულს, ტერიტორიის დაკარგვა აცლის ისეთ გვერდს, ისეთს მხარეს, შემადგენელს თვით ცნება „ერის“ შინაარსისას, რომ ერი გარდაიქმნება ბოგანო კონგლომერატად.“ მისი აზრით, „როცა ორგანიზმი დაავადებულია,“ მას ყველა ზიანს აყენებს... რით ვუშველოთ ჩვენს ქრილობას, რით დავიფაროთ სხეული იმ აფთარი ცხოვრებისაგან, რომელიც დღემუდამ სისხლიდანა გვცლის. ჩვენ სახლში ჩვენ მტერთა ბანაკში ვართ და თითქოს საზოგადოებას ალლო ვერ აულია ამისი, თითქო დაჰკარგვია უნარი შემეცნებისა და გრძნობას აჰყოლია მარტო; ისიც გრძნობას არა თავმოყვარეობის, გამბედაობის და ძალის, არამედ გრძნობას ვაი-ვიშისას, ქალურ ლანძღვისას, ტირილისას და ლაჩრობისას. სწორედ ახლაა საჭირო მოკრება ეროვნულ გონებისა, იმ საშუალებათა გამოსანახავად, რომელნიც გვიხსნიდნენ ჭირისაგან ამისა.“

ავტორის აზრით, მაინც რა საშუალებანი შეიძლებოდა გამონახულიყო ამისათვის?! პათეტიკური მიმართვა საზოგადოებისადმი ფონდის შესაგროვებლად? გალანძღვა და სამარცხვინო ბოძხედ გაკვრა იმ პირთა, რომელნიც მამულს ჰყიდდნენ, ან იმ ერთა და დანესებულებათა, რომელნიც ძალით თუ ფულით გვგლეჯენ სახსრებსა?... მისი თქმით, ყველა ეს ბრძოლა უღირსი და უშედეგო ბრძოლა იყო... საჭირო იყო სხვა, უფრო რეალური გზების გამონახვა იქედან თავის დასაღწევად...

„კლდეისტებმა“ დროულად ამოიცნეს ის მუხანათური ჩანაფიქრი, რაც ა/კ ადმინისტრაციულ-ტერიტორიულ გადამიჯვნას უნდა მოჰყოლოდა. მეფისნაცვლის კანცელარიაში შემუშავებული კანონ-პროექტით გუბერნიების ხელახალი საზღვრების დანესებას „რეალური მოსახლეობის პრინციპი“ უნდა დადებოდა საფუძვლად. ეს კი სომხების ნისქვილზე წყლის პირდაპირი დასხმა იქნებოდა, ხოლო ქართველებისათვის — მშობლიური ტერიტორიების ხელყოფა... „ამ ახალი გადამიჯვნით სრულიად იცვლება აღმოსავლეთ კავკასიის ფიზიონომია,“ — ნერდა „კლდე“ და მოურიდებლად ამხელდა ასეთი კანონის მიღების ინიციატორებს.

„ერთი ნელინადია, სომხურ პოლიტიკურ მოღვაწეთა წრეებში დაიბადა აზრი — სომხების მოსახლეობის მიხედვით გადამიჯნონ ა/კავკასიის გუბერნიების საზღვრები და შემოფარგლონ სომხების ტერიტორია. შეიმუშავეს პროექტი, სანამესტნიკომ ეს პროექტი პრინციპიალურად მიიღო და ერევანისა და განჯის საგუბერნიო ად-

მინისტრაციას განსახილველად და ადგილობრივ გამოსაკვლევად გადასცა,³⁸ — ნათქვამი იყო ერთ-ერთ ნერილში.

შ. ამირეჯიბის აზრით, ასეთი პროექტი ყოველად მიუღებელი იყო ქართველი ხალხისათვის; რომ შეიძლებოდა „ქარგი პროექტების წერა, შეიძლებოდა უგვან პროექტების წერაც, შეიძლებოდა ახალი საზღვრების შექმნა, მაგრამ შეუძლებელი იყო ახალი გეოგრაფიის დანერგა.“³⁹

შალვა ამირეჯიბის თქმით, „შეუძლებელი იყო ტერიტორიის საზღვრების გამოკვლევა მარტო რეალური მოსახლეობის პრინციპის მიხედვით... ტერიტორიის მოსაზღვრის ერთ-ერთი მნიშვნელოვანი პრინციპი — ისტორიული პრინციპი იყო, რაც ქართველ ხალხს ნებას აძლევდა, როცა უნდოდა და სადაც უნდოდა იქ დასახლებულიყო. ამიტომ საჭირო იყო კარგად გარკვევა იმისა თუ საით გაიზრდებოდა საქართველოს ქართული მოსახლეობა...“⁴⁰

გარდა ამისა, „კლდეისტების“ პოზიცია ნათელი იყო და იგი დაბეჯითებით მოითხოვდა საქართველოს საზღვრების ხელუხლებლობას, იმის მიხედვით, რომელიც დაფიქსირებული იყო რუსეთ-საქართველოს 1783 წლის გეორგიევსკში დადებულ ტრაქტატში. „ჩვენ უნდა ვაღიაროთ საქართველოს ავტონომია იმ პოლიტიკურ-ტერიტორიულ ფარგლებში, რა ფარგლებშიც იგი შეუერთდა რუსეთს, რადგან მარტო ეს საზღვრებია ის, საცა შეუვალა ჩვენი პოლიტიკური მდგომარეობა. რაც მოხდა ამის შემდეგ — ე.ი. რაც რეალურად ხდებოდა — ეს უბრალოდ ძალ-მომრეობაა და არა პოლიტიკური ვითარება პოლიტიკური ორგანიზმისა.“⁴¹

კანონ-პროექტის კანონად ქცევა და ადმინისტრაციული ერთეულების საზღვრების შეცვლა მომაკვდინებელი იქნებოდა საქართველოსათვის, ვინაიდან თბილისის გუბერნიას ყოველგვარი სისხლისღვრის გარეშე ჩამოსცილდებოდა ბორჩალოს, ახალციხისა და ახალქალაქის მაზრები მთლიანად, ხოლო თბილისისა ნაწილობრივ და საზღვარი თბილისიდან სულ ოთხიოდე კილომეტრის დაშორებით, დღევანდელი ნავთლულის მიდამოებში გაივლიდა. თვითმპყრობელობა ამით ცდილობდა საქართველოს საბოლოოდ დაშოკებას, ხოლო სომხებს მათთვის საოცნებო „დიდი არმენიის“ შექმნის შესაძლებლობას აძლევდა.

ამ საკითხთან დაკავშირებით ჟურნალში გამოქვეყნებულ დავით ვაჩნაძის „მცირე განმარტებაში“ აღნიშნული იყო: „კანონ-პროექტის მიღების შემთხვევაში შეიქმნებოდა „სომხეთის ავტონომია“ სხვისი

³⁸ ჟურნ. „კლდე“, 1913 წლის 1 დეკემბერი, გვ. 2-3..

³⁹ იქვე, 1914 წლის 12 იანვარი, გვ. 3.

⁴⁰ იქვე, 1914 წლის 2 თებერვალი, გვ. 2.

⁴¹ იქვე, 1914 წლის 23 მარტი, გვ. 4.

მინების ხარჯზე და მოექცეოდა იგი განსაკუთრებული საადმინისტრაციო მმართველობის ქვეშ. მისივე გაანგარიშებით საქართველოს ჩამოერთმეოდა 1 323 317 დესეტინა „მშვენიერი და მდიდარი ნაწილები“...⁴²

კანონ-პროექტის მიხედვით უგულბებლყოფილი იყო ბუნებრივი საზღვრები, გათვალისწინებული არ იყო ეკონომიკური ცენტრების, ბაზრების, გზების და ა.შ. საურთიერთო პრინციპები... და რაც მთავარია, ის ადათ-წესები, რომლებიც ამა თუ იმ რეგიონში საუკუნეების მანძილზე იყო შემუშავებული და დამკვიდრებული...

„თბილისის გუბერნიაში საიმპერიო კანონებს გარდა მოქმედებენ ის კანონები და ადათები, რომელნიც შეიმუშავა ქართველმა საზოგადოებრიობამ ისტორიულად. ეს კანონები და ადათები თავის თანამედროვე გამოსახულებას მოითხოვენ და თუ რუსის მთავრობამ მისი გადაწყვეტა აქამდისაც ვერ მოახერხა სამშობლო ნიადაგზე, როგორ მოახერხებს მის გადაწყვეტას, როცა მას იგი ყოფილ განჯისა და ერევნის სახანოებში გადაიტანს,“⁴³ — წერდა შ. ამირეჯიბი და მოურიდებლად ააშკარავებდა მთავრობის ჩანაფიქრს, რომელიც ცდილობდა „სომხებისათვის კავკასიაში ტერიტორია მოექებნა,“ თორემ ისტორიულადაც და რეალურადაც ზემოდასახელებული მაზრები (ბორჩალოსი, ახალქალაქის, ახალციხის თუ თბილისის) ქართული პროვინციები იყო...

აგრძელებდა რა ამ პრობლემაზე მსჯელობას ჟურნალის მომდევნო ნომერში, დავით კასრაძე მიუთითებდა: „თავდაცვის ინსტიტუტი ჩვენი ცხოვრების პერიპეტიებზე ყოველთვის დაკავშირებული იყო ტერიტორიის შენარჩუნებასთან. ქართველი ერი, როგორც მინათმოქმედი, მუდამ მას დასტრიალებდა თავს... ქართველებს არ ჰსურთ თავის მამულის საზღვრებს იქით გადახედვა,“ როგორც ამას სჩადიოდნენ და მიეჩვივნენ კიდევ ფინიკიელები, ებრაელები და სომხები... „მთელს ისტორიულს სარბიელზე ქართველი ერის ინდივიდუალობა შეუძლებელია უტერიტორიოდ წარმოვიდგინოთ და ტერიტორია კიდევ ე.ი. ჩვენი ქვეყანა უ-ქართველ ეროდ,“⁴⁵ — დაასკენიდა იგი.

ეს იმ დროს, როცა რუსეთის თვითმპყრობელობა ყველაფერს აკეთებდა საქართველოს დაშლა-დაქუცმაცებისათვის, მისი ასიმილირებისა და მის ტერიტორიაზე სხვატომელთა მასობრივი განსახლების, მეზობელ ხალხთა შორის შუღლისა და მტრობის ჩამოგდებისათვის... მაგრამ რუსთა შორის მაშინაც იყვნენ საქართ-

⁴² ჟურნ. „კლდე“, 1914 წლის 12 იანვარი.

⁴³ იქვე, გვ. 4.

⁴⁴ იქვე, 1914 წლის 19 იანვარი, გვ. 6.

⁴⁵ იქვე.

ველოსადმი, მისი მდიდარი ისტორიული წარსულისადმი გულწრფელი პატივისცემელი და გულშემატყვივარი, რომლებიც ობიექტურობის გრძნობას არ ღალატობდნენ და რეალურად აფასებდნენ მოვლენებს. სჯეროდათ, რომ მისი ქვეყნის ხელისუფლების მიერ უკულმა ნათესი, შხამიან ნაყოფს მოუტანდა მისსავე ხალხს, და დადგებოდა „დრო და რუსი შოვინისტების მიერ „ინოროდცებში“ სიძულვილის დათესვის სისტემას ყველა გაიგებდა“⁴⁶

ეს სიტყვები ცნობილ რუს მოღვაწეს, შესანიშნავ ისტორიკოსსა და პუბლიცისტს, მართლმადიდებელი ეკლესიის კანონთა უბადლო მცოდნეს ნიკოლოზ დურნოვოს ეკუთვნის და, მართლაც, თუ რა ნაყოფი მოაქვს „ინოროდცებისადმი“ სიძულვილს, რუსეთში დღეს არსებული სიტუაციაც მონიშნავს.

„კლდისტა“ უპირველესი მოთხოვნა ტერიტორიის საკითხთან დაკავშირებით, რუსეთ-საქართველოს 1783 წლის ტრაქტატის შესაბამისად მისი განხორციელების მოთხოვნა იყო, ანუ ისე როგორც ის გეორგიევსკის ტრაქტატის მეორე არტიკულით იყო დაფიქსირებული: „...დიდებულება მისი (ე.ი. ეკატერინე II-ის — გ.ს.) აძლევს იმპერატორებსა თავს-მდებობასა თვისსა მთლად (და დაუკლებლად) დაცუასა ზედა წინდელთა სამფლობელოთა მისისა უგანათლებულესობისა მეფისა ირაკლი თეიმურაზოვიჩისათა და წინადასდებს განვრცელებასა ესევეითარისა თავს-მდებობისა ეს (ე) გვარსა ზედა სამფლობელოსა, რათა რომელიცა წარმდინარეობასა შინა დროსათა გარემოებითა და განრჩეითითა ხატითა შესაბამისად სამფლობელოისა მისისა მიმართ დამტკიცდებიან“⁴⁷

რევაზ გაბაშვილის თქმით, მას და მის თანამოაზრეებს დიდი ბრძოლების გადატანა მოუხდათ არა მარტო „რუსეთის მთავრობასთან“ არამედ „ყველა ჯურის ქართველ სოციალისტებთან“, რომელთათვისაც ტერიტორიის საკითხი არც ისე მნიშვნელოვანი იყო. ისინი მხარს უჭერდნენ არა ისტორიულ, არამედ ხსენებულ ტერიტორიაზე იმჟამად მცხოვრებ „რეალური მოსახლეობის“ პრინციპს. უფროსი „კლდე“ იყო ერთადერთი სხვა ქართულ გამოცემათა შორის, რომელმაც საქვეყნოდ ამხილა ქართველ სოციალისტთა „მამულიშვილობა“... რომელთაც 1912 წელს მონანილეობა მიუღიათ კიევში გამართულ „რუსეთის არასახელმწიფოებრივ ერთა კონფერენციაში“ და ხელი მოუწერიათ არაოფიციალურ დოკუმენტზე, რომლის ძალითაც საინგილო მორალურად აზერბაიჯანისთვის დაუთმიათ, აფხაზეთი — ჩრდ. კავკასიისათვის, ხოლო ახალციხე-ახალქალაქისა და ბორჩალოს მაზრები სომხეთისათვის, ეს დოკუმენტი თავისი ხელმოწერით „დაუმშვენებიათ“ სოც.-

⁴⁶ იქვე, 1913 წლის 25 მაისი, გვ. 10.

⁴⁷ იხ. „გეორგიევსკის ტრაქტატი“, გამოკვლევა ვალ. მაჭარაძისა, თბ., 1983, გვ.68.

დემოკრატებს — ნოე რამიშვილსა და სილიბისტრო ჯიბლაძეს, სოც.-ფედერალისტებს — სამსონ ფირცხალავას და იოსებ ბარათაშვილს. ჟურნალის აზრით, სამნუხარო კიდევ უფრო ის იყო, რომ კონფერენციის ეს გადაწყვეტილება იქ დასტამბულ რუკაზეც დაუფიქსირებიათ.

ხაზგასმით უნდა აღინიშნოს, რომ „კლდეისტებს“ ტერიტორიის საკითხი ვინრო ეროვნულ საქმედ, ანუ „საქართველო — ქართველებისათვის!“ არასდროს გაუხდიათ. მათი უპირველესი საზრუნავი იყო საქართველოს ტერიტორიული მთლიანობის შენარჩუნება და არა აქ მცხოვრებ სხვა ერთა მისი საზღვრებიდან განდევნა. გამომდინარე აქედან, მათი სურვილები განივთებას პოულობდა კონკრეტულ ლოზუნგში „საქართველო ჯერ ქართველებისათვის!“ ამაში საჭოჭმანო და მიუღებელი არა გვეგონია, რაიმე იყოს, თუ კაცი გეტყვის: არას გერჩით, ოღონდ ჩემ კარ-მიდამოში ჯერ მე მომეცით სულის მოთქმის საშუალებაო.⁴⁸

რევაზ გაბაშვილი აძლევდა რა შეფასებას ამ მიმართულებით ჟურნალის მიერ განეულ საქმიანობას, ასკვნიდა: „კლდესა“ და „კლდეისტებს“ ამ საკითხის გარშემო ატეხილი ბრძოლის მეტი რომ არა გვენარმოებინა რა და, რაც მივალნიეთ, იმის მეტი არა გაგვეკეთებინა რა, მაშინაც ვერავინ იტყვის - „ამაოდ დაშვრენენ“-ო.⁴⁹

სამნუხაროდ, საქართველოს ტერიტორიებთან დაკავშირებული მწვავე საკითხების წრე არც ისე ვინრო იყო და „კლდეისტებიც“ არავის ერიდებოდნენ მათი ავი ზრახვები საამკარაოზე გამოეტანათ...მაგალითად, ასეთ საკითხთა რიგს განეკუთვნება „მულანლოს ველის“ გასარწყევების (მელიორაციის)საქმე. ერთი შეხედვით, აქ ცუდი თითქოს არაფერი უნდა ყოფილიყო, მითუმეტეს, როცა ხელისუფლება თვითონ აპირებდა მილიონობით მანეთის გამოყოფას ამ ჩანაფიქრის განსახორციელებლად. მაგრამ თუ სად იყო ძალის თავი დამარხული, ეს ერთ-ერთმა პირველებმა „კლდეისტებმა“ დაინახეს. კერძოდ ის, რომ აღმოსავლეთ საქართველოს მდინარეების მთელი ნყლის მარაგი ამ ტერიტორიების მორწყვას უნდა მოხმარებოდა, რადგან იქ რუსული ახალშენების დაარსება იყო გათვალისწინებული. რუსეთის სოფლის მეურნეობის მინისტრის თქმითაც: ამიერკავკასიაში, თუ არა იქ, სხვაგან არსად იყო საკმაოდ ფართო ადგილები „შიდა რუსეთიდან გადმოსახლებულთა მასის კომპაქტურად დასახლებისათვის.“ აღნიშნული ჩანაფიქრის განხორციელება კი საბოლოოდ გადაწყვეტდა საქართველოს დემოგრაფიული რუკის შეცვლის საკითხს. „კლდემ“ მთელი საზოგადოე-

⁴⁸ უფრო ერცლად იხ. გელა საითიძე. „საქართველო ჯერ ქართველებისათვის!“ ვაზ.

„ლიტერატურული საქართველო“ 1995 წლის დეკემბრის ნომერში.

⁴⁹ იხ. ნიგნი „დაბრუნება“, ტ. III, გვ. 117.

ბის ყურადღების რამდენადმე მობილიზება შესძლო, როცა მან თავის ფურცლებზე დასტამბა შესაბამისი კანონ-პროექტი თავისი კომენტარებით. დ. კახელი (დავით ვაჩნაძე) ამასთან დაკავშირებით აღნიშნავდა: „ჩვენმა რედაქციამ მიიღო ცნობა, რომ ადგილობრივი მთავრობის წყლის გამგებლობას განზრახული აქვს მოკლე ხანში, კანონის ძალით სრულიად აუკრძალოს *ქართლ-კახეთში მცხოვრებ ხალხს მტკვრისა, არაგვისა, ქსნისა, იორისა, ალაზნისა და სხვ* (ხაზგასმა დ. ვაჩნაძისაა — გ.ს.) მდინარე წყლების სარწყავად ხმარება. ეს წყალი მთავრობას სდომებია აღმოსავლეთ კავკასიის უდაბნოების (მულანლოს ველი) 300 000 დესეტინის მოსარწყავად, სადაც იგი აპირობს რუსეთიდან გადმოსახლებულთა ახალშენების მონყობას. ქართლ-კახეთის დიდძალ ურწყავ მინდვრებს ველარ ეღირსება თავის სამშობლო მდინარეების სარწყავი წყალი... დღეს ყველაფერი შენირულია აგრესიული პოლიტიკისათვის, ქართველი ხალხის წინააღმდეგ, ქართულ წყლებსაც კი პოლიტიკური მიმართულება ეძლევა...”

დ. ვაჩნაძის აზრით, საჭირო იყო ქართველი საზოგადოებრიობა მტკიცედ დამდგარიყო იმ უსამართლობის წინააღმდეგ, რაც ქართულ სოფელს, ქართველ გლეხკაცობას ელოდებოდა თუ მულანლოს ველის მელიორაციის შესახებ კანონ-პროექტი კანონად იქცეოდა... ამაზე უნდა ყოფილიყო საუბარი 1914 წლის დეკემბრის თვის დასაწყისში, „ამიერკავკასიის სამელიორაციო კრებაზე“, რისთვისაც საჭირო იყო საზოგადოებრივი აზრის შექმნა...

„უმეტესი ნაწილი ამიერ-კავკასიის წყლებისა საქართველოს ეკუთვნის,— წერდა იგი... მაშასადამე უმთავრესად ქართველებმა უნდა იზრუნონ თავის კუთვნილებაზედ. ამისათვის კი საჭიროა ეხლავე სერიოზული და ბეჯითი მომზადება, რომ ამ კრებიდან მართლაც რაიმე სარგებლობა ვნახოთ და ჩვენი ქვეყნის მეურნეთა წრეებს მივეშველოთ.“

გადაუდებელ საქმედ უნდა ყოფილიყო მიჩნეული შესაფერისი სტატისტიკური მასალების შეგროვება, რათა ყველასათვის დაემტკიცებიათ, რომ საქართველოს გლეხობა პირველ რიგში იმსახურებდა სარწყავ წყალს. „ჩვენი დაწესებულებანიც — სამეურნეო საზოგადოება და საადგილმამულო კომისია ეხლავე უნდა შედგომოდნენ სტატისტიკური მასალების შეგროვებას.“ თბილისის გუბერნიის თავადაზნაურთა წინამძღოლი თ-დი კოტე აბხაზი იმთავითვე დიდ დაინტერესებას და მონაწილეობას იღებდა ამ საქმეში, როგორც საორგანიზაციო კომიტეტის წევრი და ხსენებული კრების მონვევის ინიციატორი. მას გუბერნიაში შემავალი მაზრებისა და სხვა დაწესებულებათა ხელმძღვანელებისა და ცალკეული მოღვაწეებისათვის დაუგზავნია მონოდებები, სადაც

მოითხოვდა, რომ ყველა შეგნებული ქართველი ყურადღებით მოკიდებოდა ამ საქმეს...

დ. ვაჩნაძის აზრით, დადგა დრო, რათა მოქმედების ლოზუნგად ქცეულიყო: „სარწყავი და სასმელი წყალი ქართულ სოფელს!“⁵⁰

„კლდეისტა“ ასეთი გამოსვლები, რა თქმა უნდა, დიდ რისკთან იყო დაკავშირებული, მაგრამ მათდა სასახელოდ უნდა ითქვას, რომ ისინი არავისა და არაფერს არ ერიდებოდნენ, როცა საქმე სამშობლოს ინტერესებს ეხებოდა. უმეტესწილად სწორედ მათმა მტკიცე პოზიციამ განაპირობა ის, რომ ხსენებული კანონ-პროექტი პროექტად დარჩა და მისი დაკანონება ვერ მოხერხდა.

საცეცხლე ამბრაზურაზე მკერდით გადაფარების ტოლფასი გმირობის გამოჩენა მოუხდათ „კლდეისტებს“ მაშინაც, როცა შუაგულ ქართლში, ტირიფონისა და ამურიანის ყველაზე უფრო ინტენსიურად დასახლებულ ტერიტორიაზე სამხედრო პოლიგონის მონყობის საქმეს ეხებოდა. ამით იმას როდი ვამბობთ, რომ მაშინდელი ქართული პრესა და შეგნებული ქართველობა ამ საშინელი განზრახვის მხოლოდ პასიური მაცურებელი იყო და არაფერს აკეთებდა... არა! ჩვენ იმ თვალსაჩინო როლზე ვამახვილებთ ყურადღებას, რომელიც ჟურნალმა „კლდე“ და მის ირგვლივ შემოკრებილმა მამულიშვილებმა შეასრულეს... ორიოდე სიტყვით საკითხის ისტორიის შესახებ... რუსეთის თვითმპყრობელურმა ხელისუფლებამ ხელმწიფე-იმპერატორის მითითებით და სტოლიპინის დაუნდობელი ძალისხმევით, რამდენადმე მოახერხა ქვეყნის შიგნით არეულობის დაშოშმინება, მაგრამ საერთაშორისო მასშტაბით ავტორიტეტ-დაკარგულ რუსეთს იაპონიასთან მწარე დამარცხების შემდეგ, თავის სამხედრო ძლიერების რეაბილიტაციის მოხდენა სურდა ახალი ომის გაჩაღებით. ომისათვის მზადება მისი ყოველდღიური საქმიანობის უპირელეს საზრუნავს წარმოადგენდა.. ცარიზმს კარგად მოეხსენებოდა ისიც, რომ კავკასია თავისი გეოპოლიტიკური მდებარეობის გამო მოვლენების ცენტრში აღმოჩნდებოდა. ამიტომ იყო, რომ ამ მხარეში სამხედრო ცოცხალი ძალისა და ტექნიკის თავმოყრას ადრინანდ შეუდგა. სწორედ ამან განაპირობა ის აუცილებლობა, რომ არა მარტო სამხედრო ძალების თავმოყრის, არამედ მათი ინტენსიური წვრთნისათვისაც ეზრუნა... იმპერიის სამხედრო უწყებამ დაიწყო სამხედრო პოლიგონისათვის ადგილის შერჩევა... გრაფ ვორონცოვ-დაშკოვისთანა ქართველთმძულე მოხელეებს გაუჩნდათ შანსი, ხელიდან არ გაეშვათ ასეთი შემთხვევა და საქართველოს ისედაც დაფლეთილ-დასისხლიანებული სხეულისათვის ახალი სასიკვდილო ჭრილობა მიეყენებინათ... თავდაპირველად პოლიგონისათვის ადგილის გამონახვა თბილისის შემოგა-

⁵⁰ ჟურნ. „კლდე“, 1914 წლის 29 ივნისი, გვ.6-7.

რენში მოუნადინებიათ. კომისიას გენერალ მეხმანდაროვის (მეხმანდარიანის) მეთაურობით ასეთ ადგილად ავჭალიდან ავლაბარამდე, ლოტკინის მთისა და კუკიის აგარაკების რაიონი მოუნიშნავს, მაგრამ შემდგომ ეს ვარიანტი უარუყვიათ და პოლიგონისათვის ახალ ადგილად გორის მაზრაში ტირიფონის ველი შეურჩევიათ.

პოლიგონისათვის განსაზღვრულ მიწების მესაკუთრეებს სამხედრო უწყება სარფიან გამოსასყიდს ჰპირდებოდა და ეს იყო ის სატყუარა, რომელსაც ადვილად ნამოეგო არაერთი გულხარბი ქართველი მემამულეც... მათ შორის ციციშვილები, ამილახვრები, თუმანიშვილები და სხვები... ისინი თითქოს დაბრმავებულდაყრუებულნი ველარ ხედავდნენ, რომ მათ საკუთრებაში მყოფ მიწებზე საუკუნეების განმავლობაში ათასობით ქართველი გლეხკაცი ცხოვრობდა.

ჟურნალმა „კლდე“ ერთ-ერთმა პირველმა აღიმაღლა ხმა ამ მზაკვრული ჩანაფიქრის წინააღმდეგ, როცა ჯერ კიდევ 1913 წლის ბოლოს თავის ფურცლები დაუთმო Legatus-ის (დუშიკო ფალავანდიშვილის, მწერალ-პუბლიცისტის) წერილს, სათაურით: „სოფლის აყრა“.

კორესპონდენტი „კლდის“ რედაქციას წერდა: „ერთი პირი ამ წერილის „სახალხო გაზეთში“ გავაგზავნე დასაბეჭდად და ერთსაც თქვენ გიგზავნი“-ო. რედაქცია თავის მიწანერში აღნიშნავდა: „რედაქცია ათავსებს ჟურნ. „კლდეში“ ამ წერილს, რადგანაც იგი „სახალხო გაზეთში“ მთლიანად არ დაბეჭდილა“; საქმე ის იყო, რომ სამხედრო უწყებას გადაწყვეტილი ჰქონდა „საამილახვრო მამულში“ ე.წ. ტირიფონის ველზე და ამურიანში პოლიგონი მოეწყო, რასაც შეეწირებოდა სოფლები — სობისი, დიდი ხურვალეთი, ორჭობანი, ახალშენი, ჭალა, კასპი, ბერბუკი, ახალსოფელი, ზელდულეთი, უფლისციხე, ნადარბაზევი, ზეგარდა, ნიგოზა, ზემო რენე, ქვემო რენე, გამდლის წყარო, კოდის წყარო, პატარა ხურვალეთი, შავშვები და ნანრეთი, სადაც 600-მდე კომლი ცხოვრობდა, ძირითადად ქართველები, აგრეთვე მცირერაოდენობით ოსები და სომხები...

ეს იყო იმ ადგილებიდან ქართველთა ფეხის ამოკვეთისათვის გამიზნული ჩანაფიქრი... ამიტომ იყო, რომ წერილი მონოდებით მთავრდებოდა: „ვისაც გეყურებოდეთ, თვალნი გაახილეთ!“-ო. ✓

„კლდე“ იმავე დღეებიდან შემოიღო მუდმივი რუბრიკა — „ტირიფონის გარშემო“, სადაც გამოქვეყნებული მასალებით ქართველი საზოგადოება სისტემატურად ჰყავდა საქმის კურსში... ასეთი მასალების რიგს განეკუთვნებოდა შემდეგი ინფორმაციები, რომლებიც ჟურნალშია დასტამბული: „სამხედრო უწყებისათვის მსხვერპლად შეწირულმა ტირიფონის მრავალმა სოფელმა 20 000 კაცით, რომელთაც აყრა და განადგურება მოელით, მთელი

აღდგომა გლოვაში და ტირილში გაატარა. ტირის და ჰგლოვობს მოხუცი, ახალგაზრდა, ქალი და ბავშვი. ამ რამდენიმე დღის წინად სოფლელი ხალხი თავის მამა-პაპათა სასაფლაოებისაკენ გაემართა თავის მკედრებთან გამოსათხოვებლად... საშინელი სურათი გეშლებოდათ თვალწინ — სამარეებთან დაჩოქილი ხალხი ტირილით და გოდებით თავის ძვირფას ნაშთებს მოსთქვამდნენ და ეთხოვებოდნენ მათ“.

„სამხედრო კომისიამ საბოლოოდ გადასწყვიტა ტირიფონის შექენა და ეხლა სოფელ-სოფელ დაიარება და აფასებს სახლ-კარს, მამულებს“.

„პოლიგონის საზღვარი გადატანილია ჩრდილო დასავლეთით და ქ. გორს მიუახლოვდა, რადგანაც სამხრეთი კუთხე მანთაშვეს შექენილი აქვს და მისი გამოსყიდვა მეტად ძვირად უჯდება სამხედრო უწყებას“.

„ტირიფონის გლეხობას ჯერ დანამდვილებით არ ეუბნებიან, სად უპირობს მთავრობა მათ გადასახლებას, სხვადასხვა ხმები დადის გლეხობაში. ამას წინად კახეთზედ უთითებდნენ, მაგრამ დღეს სულ სხვა ალაგებზე უჩვენებენ — ყარსის ოლქი, ზაქათალა, შირაქი, საჩჩინეთი (დაღესტნის ოლქი) და სხვა“.

„ქართლის მარშალი თავ. ნიკ. ალექსის ძე თუმანიშვილი არამცთუ არ ეხმარება ტირიფონის მცხოვრებთ ამ უბედურებაში, პირიქით, როგორც ნამდვილი წყაროებიდან გვატყობინებენ, თავის წილსა უწყებაზედ (იგულისხმება სამხედრო უწყება — გ. ს.) ჰყიდის. თუ ეს მართალია, თავად თუმანიშვილს დავინწყებია, რომ იგი მარშალია, რომ იგი ჯერ საერთო საქმეს უნდა ემსახუროს. ამ შემთხვევის შემდეგ კი იგი მარშლად ველარ ჩაითვლება“.

„თავადი გივი ნიკოლოზის ძე ამილახვარიც თავის წილს ტირიფონში — 3000 დესეტინას ამავე უწყებაზე ჰყიდის. თავად გივისგანაც, როგორც ნამესტნიკის მართველობასთან ახლო მდგომისაგან, ქართველი გლეხები უფრო დახმარებას მოელოდნენ, მაგრამ აქაც პირადმა ინტერესმა გაიტაცა წარჩინებული ქართველი და საზოგადო ინტერესი ანაცვალა. ეს მხოლოდ იმით თუ აიხსნება, რომ თავადი გივი ამილახვარი ცოტათი დაშორებია ქართულ საქმინობას? მაგრამ ნუთუ ქართველების გლოვამ და გოდებამ მის სმენადის ველარ მიაღწია! თუ მიაღწია, მაშინ იქნებ თავის დიდი მამის სამაგალითო სიყვარული ქართველ გლეხებისადმი და საქმისადმი მოგონებოდა, გაეხსენებია დღევანდელი ტირიფონის გლეხობის მდგომარეობა, თავი შეეკავებია და საერთო უბედურებაში მიშველებოდა ქართველობას“⁵¹.

⁵¹ ურნ. „კლდე“ 1914 წლის 13 აპრილი, გვ. 11-12.

არც სხვა გამოორჩეული გვარიშვილები ირჯებოდნენ სამშობლო მინა-წყლის გადარჩენისათვის. პირიქით, აქაოდა, მუშტარი არ დაეკარგოთო და თვითონ სთავაზობდნენ „საქონელს“... მაგ., „თავადმა ციციშვილებმა თვითონ შესთავაზეს კუთვნილი მიწები პოლიგონისათვის დაბა ბაკურიანიდან 8 ვერსის დაშორებით — ვაკე ადგილი, მთებით დაცული ქარებისაგან, წარმტაცი პლატო, კლიმატური სადგურისათვის ვარგისი...“ ისინი იმაზეც ამახვილებდნენ ყურადღებას, რომ ეს ადგილები ნაკლებად დასახლებულია, არავის აყრა არ მოგიწევთ და უფრო იაფი დაგიჯდებათ, ვიდრე ტირიფონის ველი, ან სხვა ადგილებიო...⁵²

ყურნალში სხვა აღმაშფოთებელი ფაქტებიც არის დაფიქსირებული იმის დასტურად, თუ როგორ ჰქონდა ზოგიერთ შეძლებულ ქართველს, ეროვნული თვითშეგნება დაქვეითებული...
1913 წლის ოქტომბერში „კლდე“ ყურადღებას ამახვილებდა ერთ ფაქტზე, რომელიც ბორჩალოში „ვეებერთელა მამულის გაყიდვას“ შეეხებოდა... ყურნალი წერდა: „ჩენ არაერთხელ აღგვინიშნავს, რომ ქართული მიწები მუდმივ და სისტემატურად იყიდება და უცხოელების ხელში გადადის... ვეებერთელა მამულები დატვირთულნი კერძო და ბანკის ვალებით, ნედლიმკებით, ჯარიმებით, სახელმწიფო გადასახადებით, დაუმუშავებელ-მოუვლელი და უპატრონოდ მიგდებული ზედიზედ იყიდებიან და გადადიან უცხოელების ხელში“⁵³, მაგრამ ამ მიზეზების გარეშეც ხდებოდა მიწების ისეთი გაუმართლებელი გაყიდვა, რომ კაცი გაოგნებული რჩებოდა.

სწორედ ასეთ ფაქტზე ამახვილებდა ყურნალი ყურადღებას და თავის მკითხველს მოუთხრობდა ქართველი მემამულის ნიკ. კვეზერელის ქმედებაზე, რომელსაც თავისი „ვეებერთელა და მშვენიერი მამული“ ბორჩალოში, 1100 დესეტიან ფართობით, 700 ჯიშიანი ძროხით, სამეურნეო ინვეტარით, ყველის ქარხნით, რომლის წლიური შემოსავალი 20-25 ათასი მანეთი ყოფილა, 200 000 მანეთად გაუყიდა, თანაც ვინმე გერმანელ პეტრე ამეტერზე... ყურნალის რედაქციის გაოცებას იწვევდა ის, რომ მემამულე კვეზერელს თითქმის ნახევარი მილიონი მანეთის ღირებულების ქონება ამეტერისათვის საოცარი პირობით მიუყიდა... იგი კვეზერელისეულ მამულს ბანკში აგირავებდა 100 000 მანეთად, ერთ წელიწადში ამ თანხას უკან დაიბრუნებდა და მას გადაუხდიდა ქართველ მემამულეს, ხოლო მეორე 100 000 მანეთის გადასახდელად 8 წლის ვადა ჰქონდა... „ერთი სიტყვით ბ-მა კვეზერელმა გერმანელ ამეტერს ვეებერთელა მამული და მდიდარი საქმე აჩუქა“, — აღნიშნავდა ყურნალი და გულისტკივილს ვერ მალავდა იმის გამო, რომ

⁵² გაზ. „Закавказская Речь“ 1914 წლის 8 ივნისი.

⁵³ ყურნ. „კლდე“, 1913 წლის 27 ოქტომბერი, გვ. 11.

კვებერელს უარი უთქვამს თავის ნათესავეებისათვის, რომლებსაც იმავე პირობით სურვილი ჰქონიათ ხსენებული ქონების შექმნის... „აი ეს საუცხოვო მაგალითი დღევანდელ ქართველ მემამულის ფსიქოლოგიისა! მშვიერია მამულს სტოვებს, მდიდარია — მამულს ჰყიდის“⁵⁴.

ამის შემდეგ აღარც უნდა გაგვიკვირდეს, როცა სხვა ერის წარმომადგენელი — მანთაშევი თუ ძმანი მისნი, ათასობით დესეტინა მიწებს ჯერ მუქთად იგდებდნენ ხელში, ხოლო შემდეგ მისთვის შესაფერი მომენტის დადგომისთანავე ამ მიწებს ყიდნენ და მილიონებს იჯიბავდნენ. „კლდეში“ გამოქვეყნებულ ერთ-ერთ კორესპონდენციაში მითითებული იყო: „... ამას წინააღმდეგ მანთაშევი შეიძინა ნაწილი აშურიანის ველისა... მართალია, ბევრსა ცდილობდა მანთაშევი მთლად შეეძინა აშურიანის ველი, მაგრამ ვერ მოუხდა, რადგან უმთავრესმა მონაწილემ თ-დმა გიორგი ამილახვარმა ცივი უარი განუცხადა. ჯერ შარშან ზაფხულსავე, გავარდა თუ არა ხმა მანთაშევი აშურიანი იყიდა და ახლა სურს სხვა მამულებიც იყიდოსო, მაშინვე შიშის ზარმა მოიცვა ადგილობრივი გლეხკაცობა. არიქა, თავს ვუშველოთ, თორემ მილიონერი მანთაშევი კრიჭაში ჩაგვიდგა, მამულს ხელიდან გვაცლის და ჩვენ რაღა გვეშველებო...“⁵⁵.

აი, ასეთ „დამსახურებულ“ პიროვნებას, რომეხ მილიონერ მანთაშევს, თბილისში ათიოდე წლის წინათ სომხებმა ძეგლი დაუდგეს, როგორც დიდ ქველმოქმედს...

ქართველი საზოგადოების წარმომადგენლებისაგან არავინ დაფიქრებულა ეკითხა, ვისი სისხლითა და ოფლით მოპოვებული მილიონები ჰქონდა, რა სიკეთეს ჩადიოდა იგი ქართველი მოსახლეობისათვის საქართველოში, რომელიმე ერთი კონკრეტული ფაქტის დასახლება მაინც გახსენებოდა ვინმეს აზრის საილუსტრაციოდ და ა. შ.

1914 წლის 11 მაისს ჟურნალი ბეჭდავს სარედაქციო სტატიას სათაურით: „ახალი უბედურება“, რომელშიც მოურიდებლადაა მხილებული თვითმპყრობელური ხელისუფლების მზაკვრული ჩანაფიქრი — ქართული მიწების დაცლის და ქართველი მოსახლეობის მასობრივი განადგურების შესახებ.

„სამხედრო უწყებას პოლიგონი დასჭირდა. აშურიანი, მკვებავი გამოლმა სოფლებისა არაფრად ეყო; ტირიფონა — მკვებავი მთელი ქართლისა, შუაგული, ეკონომიური ბაზისი გორის მაზრისა, თავისი სოფლებით, მცხოვრებლებით ამ საბედისწერო პოლიგონსა ჰყვება. მთელი ქვეყანა ღალადებს ამ უბედურებას, მცხოვრებნი სტირიან და პირს იხოკენ, მაგრამ პოლიგონს თავისი „სახელმწიფო მოსაზრე-

⁵⁴ ჟურნ „კლდე“, 1913 წლის 27 ოქტომბერი, გვ. 11.

⁵⁵ იქვე, 1914 წლის 13 აპრილი, გვ. 12.

ბანი“ აქვს და იგი განზე იწევს. იგი არ კმაყოფილდება მტკვრის გაღმა მხარით, იგი გამოღმაც აპირობს გამოსვლას, — მეტეხსა, გრაკალს, ბარნაბიანთ-კარსა და ყარალაჯს ეპოტინება...

რა უმაღლესი მოსაზრება უნდა დაუპირდაპირდეს იმ განუზომელ ჭირსა, რომელიც უნდა თავს დაატყდეს მთელს ამ მხარეს; რა მოსაზრებით შეიძლება გამართლდეს 20-30 ათასი მცხოვრების აყრა, მათი მიწა-წყლის, მამულ-დედულის, საფლავების გადათხრა? ყოველად უაზრო და ბარბაროსულია ის წესი, რომელიც აღარაფერს ერიდება... და ჯალათივითა სწყვეტს მიწიდან სიცოცხლის ნიშნებს. მერე რად? რომ უსიცოცხლო ზარბაზნებმა იგრიალონ, რომ ცხენებმა იჯირითონ და სალდათებმა ივარჯიშონ... არა, ეს რაღაც არაჩვეულებრივი დარბევაა, მცხოვრებლებზე ზრუნვის მაგივრად, ეს რაღაც „პოგრომია“⁵⁶.

და ეს ხდებოდა იმ დროს, როცა საქართველოს მოსახლეობა ჯერ კიდევ არ გამოსულიყო იმ საშინელი შოკიდან, რომელიც მას თავს დაატეხეს 1905-1907 წლების რევოლუციის პერიოდში, როცა გენერალმა ალიხანოვ-ავარსკიმ თვითპყრობელობის დასტურით ცეცხლს მისცა დას.-საქართველოს სოფლები და დაბა-ქალაქები...

ყოველივე ზემოთქმულიდან გამომდინარე შეიძლება დავასკვნათ, რომ „კლდეისტიები“ უდიდეს ძალისხმევას იჩენდნენ ქართული ტერიტორიების შესანარჩუნებლად, მოურიდებლად ამხელდნენ არა მარტო ცარისტულ პოლიტიკას ამ სფეროში, არამედ იმ ვაიქართველებსაც, რომლებიც დაუფიქრებლად ეწეოდნენ ქართული მიწების გაყიდვას უცხოტომელებზე და ივინყებდნენ, რომ „ენა და მიწა იყო ცხოვრების საფუძველი და თუ ერი ორივეს დაჰკარგავდა, მაშინ იგი ყველაფერს დაჰკარგავდა“.⁵⁷

⁵⁶ შურნ. „კლდე“, 1914 წლის 11 მაისი, გვ. 1.

⁵⁷ იქვე.

ჟურნალი „კლდე“ და ქართველ-სომეხთა ურთიერთობის საკითხი

ამთავითვე უნდა შევნიშნოთ, რომ ქართველ-სომეხთა ურთიერთობის საკითხებზე „კლდის“ ფურცლებზე დასტამებული მასალები, მართალია, მწვავე და მოურიდებელია, მაგრამ ზღვარს არასოდეს არ გადადის და შეურაცხყოფას არ აყენებს თავის სამშობლოში მოღვაწე სომეხ ხალხს. „კლდისტა“ უპირველესი სამიზნე საქართველოში შემოხიზნული სომხური ბურჟუაზიის „საგმირო საქმეების“ წარმოჩენა იყო, რომლის წარმომადგენელები თავიანთი თავხედური მოქმედებით, წყალს ამღვრევდნენ საუკუნეების მანძილზე გვერდი-გვერდ მცხოვრებ ამ ორ ხალხს შორის.

„კლდე“ თავის ერთ-ერთ სტატიაში ყურადღებას ამახვილებდა ამ მომენტზე და ხაზგასმით წერდა: „როცა ქართველები სომხებზედ ლაპარაკობენ, სახეში ჰყავთ ის სომხები, რომლებიც საქართველოში მოსახლეობენ. არა თუ შორეულ ადგილებში მცხოვრები სომხები, თვით მოსაზღვრე განჯის გუბერნიის სომხებიც კი არ შედიან დამოკიდებულების იმ სფეროში, რომელსაც ქართველ-სომეხთა ურთიერთობა ჰქვია. აქედან ცხადია, რა უსამართლოა ის აზრი, როცა ჩვენ საზოგადოთ სომხების სიძულვილს გვიკიჟინებენ“⁵⁸.

ჟურნალის აზრით, ამ ორ მეზობელ ხალხს შორის კეთილმეზობლური და სოლიდარული დამოკიდებულების შენარჩუნებისათვის საჭირო იყო შეგნება იმისა, თუ რა უფლებები ჰქონდათ საქართველოში ქართველებს და შემდეგ სომხებს და ყველა დანარჩენთ, ვინც აქ ცხოვრობდა. საჭირო იყო რუსეთის საუკუნოვანი პოლიტიკის შედეგების ფხიზლად გაცნობიერება, რომელსაც ასე მიზანმიმართულად ანხორციელებდა თვითმპყრობელური ხელისუფლება არა მარტო ქართველების, არამედ იმპერიის განაპირა მხარეებში მცხოვრები „ინოროდცების“ მიმართაც.

„გათიშე და იბატონე“-ს პრინციპით მოქმედი ცარისტული რეჟიმის ერთგული დამქაშები, მეფისნაცვალ ვორონცოვ-დაშკოვის ხელმძღვანელობით და მასთან ალიანსში მყოფი თბილისელი მდიდარი სომხების უდიდესი უმრავლესობა (მანთაშოვები, არამიანცები, ბაბოვები, ხატისოვები, ბოზარჯიანცები, ყაზაროვები, ხაჩატუროვები და სხვ.) თავიანთი თავხედური მოქმედებებით უნდობლობის ბზარს აღრმავებდნენ ორ მეზობელ ხალხს შორის, რომელთაც ბედმა ერთმანეთის გვერდი-გვერდს ყოფნა არგუნა. თვითმპყრობელობის მხარდაჭერით გათამამებულნი ისინი შოვინისტური აღტკინებით ილტვოდნენ რეალობად ექციათ თავიანთი

⁵⁸ ჟურნ. „კლდე“, 1912 წლის 4 ნომბერი, გვ. 4.

სულიერი მამის აბრაამ კათალიკოსის საუკუნეების წინათ დანაბარები ქართველებთან დამოკიდებულების შესახებ...

როცა ქართულმა ეკლესიამ, იმჟამინდელი საჭეთმპყრობლის კირიონ პირველის ხელმძღვანელობით ქალკედონის მსოფლიო საეკლესიო კრების (607-609 წწ) დადგენილებით დიოფიზიტობა აღიარა, ამით განაწყენებულმა მონოფიზიტებმა (გრიგორიანელებმა), ლიდერობა რომ არ დაეკარგათ კავკასიაში, დიდი ძალისხმევა გამოიჩინეს, რათა ქართული ეკლესია თავის გავლენის სფეროდან არ გაეშვათ... მაგრამ დარწმუნდნენ რა, რომ კირიონსა და მის სამწყსოს მოდრეკას ვეღარ შეძლებდნენ, მაშინ სომეხთა კათალიკოსმა აბრაამმა ქართველი ერი დასწყევლა, ხოლო სომეხ ხალხს საყოველთაო ეპისტოლეით მიმართა ქართველებთან სამომავლო ურთიერთობის თაობაზე და კონკრეტული პროგრამა დაუსახათ: „ქადილით გაამაყებულმა არ მიატოვეს წვალება, არამედ ჩვენც თავისკენ მიგედრიკეს და ხრანცივის სწავლება გაბედა ამ უღმრთო კირიონმა, რის გამოც ჩვენი მოძღვრების მიერ რომაელთა მიმართ აღრე გამოკვეთილი საზღვარი დარჩეს აღსასრულამდე. თუ არ მოიქცევიან ჭეშმარიტებაზე, ჩვენც ამასვე ვბრძანებთ ქართველებზე: სრულიად არ ეზიაროთ მათ არც ლოცვაში, არც ჭამაში, არც მეგობრობაში, არც დედა – მძუძეობაში, არც სალოცავად წასვლით ჯვარში და არც ჩვენს ეკლესიაში მიღებით. მათგან ქორწინებისგანაც სრულიად განეშორეთ. მხოლოდ იყიდეთ და მიჰყიდეთ...“⁵⁹

უნდა ითქვას, რომ იმ დღიდან მოყოლებული, სულიერი მამის ეს მითითება სომეხი ერისათვის შეურყეველია და მომენტის შესაფერისად მას ხან ააქტიურებენ და ხან ანელებენ... ჟურნალი „კლდე“ აგრძელებდა რა დიდი ილიას „ქვათა ღალადის“ კურსს, საამჟამოაზე გამოჰქონდა ჩვენი ეროვნული ინტერესების ხელმყოფთა ნამოქმედარი. მას სწამდა, რომ „ეროვნული სამართლიანობა უმაღლესი სამართლიანობა იყო“ და ეროვნულ პოლიტიკაში ანგარიში უნდა განეოდა „სხვა ერთა უფლებათაც“; მაგრამ „არასდროს არ დავმსგავსებოდით იმ პოლიტიკურ რეგვენებს ან, გულკეთილ დიასახლისებს, რომლებიც კერძის დარიგების დროს სტუმრებს იმდენს მიართმევენ ხოლმე, რომ თითონ უკერძოდ რჩებიან“-ო⁶⁰.

ჟურნალის სავსებით სწორი კონცეფცია ჰქონდა შემუშავებული მეზობელ ერებთან საურთიერთოდ: „ჩვენი დამოკიდებულება ჩვენს ახლო მოსახლე ერებთან გამომდინარეობს თვით საქართველოს ტერიტორიული აგებულებიდან. ქართველი ხალხი არავის ცხოვრებაში არ ერევა. მას თამამად შეუძლიან სთქვას, რომ თავის საკუთარ

⁵⁹ უხტანესი. ისტორია გამოყოფისა ქართველთა სომეხთაგან. თბ., 1975, გვ. 211.

⁶⁰ ჟურნ. „კლდე“ 1913 წლის 15 სექტემბერი, გვ. 1.

მინა-წყალზე სცხოვრობს და ვიდრე ეს ტერიტორია არსებობს ყველა ეროვნული საკითხი ქართული თვალსაზრისით უნდა წყდებოდეს...“⁶¹

პირველმა მსოფლიო ომმა დღის წესრიგში დააყენა ოსმალეთიდან და სპარსეთიდან ლტოლვილ ათეულ ათასობით სომხის საკითხი. ჯერ კიდევ სომეხთა ცნობილ გენოციდამდე (1915წ.), გაუსაძლის პირობებში ჩავარდნილმა სომეხობამ, რუსეთის იმპერიაში შემავალ ერევნისა და თბილისის გუბერნიებს მოაშურა. ეს საკითხი, ანუ გამოქცეულ ლტოლვილთა საკითხი, ფართო აგიტაციის მეოხებით მსოფლიო საზოგადოების ყურადღების არეში მოექცა. გამოქცეულ სომეხთა უმრავლესობა მუდმივ საცხოვრებლად და სამკვიდრებლად უპირატესად საქართველოს ტერიტორიას ირჩევდა. ქართველი საზოგადოების პატრიოტული ნაწილი ამაში დიდ საფრთხეს ხედავდა, რადგან ამის მწარე ისტორიული გამოცდილება სახეზე იყო, როცა რუსეთ-ირანის 1827-1829 წლების ომის დროს „გამოქცეულმა სომეხობამ უომრად დაიპყრო მთელი ახალქალაქის მაზრა და ნაწილობრივ ბორჩალოს და ყარსის ოლქებისა“⁶².

რევაზ გაბაშვილის თქმით, აუცილებელი იყო გაჭირვებაში ჩავარდნილ ადამიანთათვის ხელის გამართვა, მაგრამ ასევე საჭირო იყო ქართველებსაც ეფიქრათ თავის თავზე. „ყოველი ადამიანი ვალდებულია ქრისტიანული სიყვარულით ხელი წააშველოს დავრდომილს და შეინახოს იგი, მაგრამ როცა ეს დავრდომილი აღემატებიან მის ძალას — იგი ვალდებულია თავისთავზეც იფიქროს“... პუბლიცისტის აზრით, ლტოლვილ სომეხთა დასამკვიდრებლად უფრო უპირანი იქნებოდა ჩრდ. კავკასია, ვინაიდან თუ გამოქცეული სომეხები ოდესმე მოინდომებდნენ თავიანთ სამშობლოში დაბრუნებას, იქიდანაც ისევე ადვილად დაბრუნდებოდნენ, როგორც ერმიადინიდან და ახალქალაქის მაზრებიდან და, თუ არ მოისურვებდნენ, მათთვის როგორც სამშობლოს თავმინებებულთათვის, რა განსხვავება უნდა ყოფილიყო — აქ იქნებოდნენ თუ იქ?“ წერილის დასასრულს რევაზ გაბაშვილი დაასკვნია: „ჩვენი ობიექტური აზრი ასეთი არის და გვიკვირს, რომ ერთმანეთში ურევენ გამოქცეულთა დახმარებას და გამოქცეულთა საკითხს. პირველი გრძნობის საკითხია, მეორე კი გონებისა“⁶³.

ჟურნალი მომდევნო ნომრებშიც აგრძელებდა ამ თემაზე საუბარს და ახალ-ახალი ფაქტები მოჰყავდა იმის დასამტკიცებლად, რომ გამოქცეულთა ლტოლვას კავკასიისაკენ, კერძოთ კი

⁶¹ ჟურნ. „კლდე“, 1913 წლის 15 სექტემბერი, გვ. 1.

⁶² იქვე, გვ. 4.

⁶³ იქვე, გვ. 2.

საქართველოსაკენ, ვილაცის უჩინარი ხელი მართავდა... იგივე რევაზ გაბაშვილი თავის სტატიაში, რომლის სათაურია „გამოქცეულები“, უმეტესწილად სომხურ პრესაში გამოქვეყნებულ მასალებზე დაყრდნობით, მკითხველი საზოგადოების ყურადღებას მიაქცევდა იმაზე, რომ „გამოქცეულთა საკითხი ხელოვნურად შექმნილი იყო“, რომ „სპარსეთიდან და ოსმალეთის ზოგიერთი ადგილებიდან არ დაძრულა არც ერთი შეძლებული სომეხი, იქედან „გამორბიან“ მხოლოდ ლარიბ-ლატაკნი“⁶⁴.

რა არის ამ უცნაურობის მიზეზი? — ამ კითხვას სვამდა და იქვე პასუხობდა: „ეს გამოქცეულები ნამდვილის შიშით კი არ არიან შეპყრობილნი, არამედ ორმაგი პოლიტიკით. ჯერ ერთი სპარსეთისა და ოსმალეთის მდიდარი და შეძლებული სომხობა თვითონ აბრიყვებს ლარიბ-ლატაკებს და თავიანთ მთავრობებთან ერთად ძალით თუ პროპაგანდით ისტუმრებს მათ უცხოეთში, საცა ჰპირდება თითქმის ალთქმულ ქვეყანას და თავიდან იშორებს შემანუხებელ ელემენტებს...“, ეს ერთი, ხოლო მეორეს მხრით, აქაური სომხობა მართლაც შველის გამოქცეულებს და ამისათვის შესძრა რუსეთისა და ინგლისის საზოგადოების ნაწილიც კი. ის ლარბ-ლატაკნი, რომელთაც თავის სამშობლოში იქნებ პურიც არ ენახათ თვალითა, ... რომელთაც „წარმოდგენაც არა აქვთ, რა არის ჩაი და შაქარი, რომელნიც უარს ამბობენ თევზის ჭამაზედაც კი... ასეთი ლარიბ-ლატაკნი გამოიქცევიან ათასობით, როცა აქ ურიგებენ ტანისამოსს, თეთრ პურს, სანოვაგეს, ჰქმნიან სასადილოებს, სამკერვალოებს, პოულობენ სამუშაოს, აძლევენ საქონელს, იარაღს და ზოგან მიწასაც...“⁶⁵

აღსანიშნავია, რომ თბილისში იმჟამად შემოხიზნული იყო სპარსეთიდან გამოქცეული 3 000-მდე აისორიც... ჟურნალის მართებული შენიშვნით, გადმოხიზნულთა საკითხი მეტად რთული და სერიოზული საკითხი იყო, მაგრამ მას განსაკუთრებულ სიმწვავეს აძლევდა საომარი პირობები; რის გამოც საშინელ ეკონომიკურ სიდუხჭირეს განიცდიდა საქართველოს ძირითადი მცხოვრებნი, რომლებსაც ორი წლის მოუსავლიანობის გამო „სხვისი გასაჭირის თავის თავზე მიღებაც“ აღარ შეეძლო. გარდა ამისა, თუ გადმოხიზნულნი ჩვენს ტერიტორიაზე დასახლებას მოინდომებდნენ, ეს კიდევ უფრო ააჭრელებდა ეროვნულად თბილისის გუბერნიას... „ეს საქმე მეტად გაართულებს და გაამწვავებს საქმეს“, — წერდა „კლდე“ და პირდაპირ აცხადებდა: „ეს დიდ საფრთხეს განუშადებს ჩვენს ეროვნულს მდგომარეობას და არ შეგვიძლია ყოველის ღონით

⁶⁴ ჟურნ. „კლდე“, 1915 წლის 8 თებერვალი, გვ. 3-5.

⁶⁵ იქვე, 1915 წლის 1 თებერვალი, გვ. 15.

წინააღმდეგობა არ გავუწიოთ ჩვენი მიზან-წყლის აჭრელებას, რომელიც ქართველ ერსაც ძლიერს ჰყოფნის“—ო⁶⁶.

სომეხ-ქართველთა ურთიერთობის საკითხზე ჟურნალ „კლდის“ ფურცლებზე გამოქვეყნებულ მრავალ საყურადღებო მასალათა შორის განსაკუთრებით გამოირჩეოდა „ა—ი“ (ამირეჯიბი) ნერილი — „საქართველო და სომხეთი“.

ნერილი დანერილია იმ დროს, როცა I მსოფლიო ომის ქარცეცხლში გახვეულია, როგორც ვეროპის, ისე აზიის არაერთი სახელმწიფო. მათ შორის სისხლისმღვრელი ბრძოლები მიმდინარეობს რუსეთსა და ოსმალეთს შორის... იმ ხანებში ოსმალეთში მცხოვრებ სომხებს იმედი გაუჩნდათ ავტონომიის მიღების... ამას სომხებიც და სხვა ქვეყნების მთავრობებაც ხმამაღლა გამოთქვამდნენ. ასევე იყო რუსეთშიც, ასევე იყო საქართველოშიც. „ოსმალთა სომხეთის საკითხი“ სისტემატური განხილვის საგნად ჰქონდა ყველა პარტიას თუ ბეჭდვით ორგანოს... ქართველი მოსახლეობის უდიდესი ნაწილი პრინციპულად მომხრე იყო და მიესალმებოდა სომხეთის თავისუფლებას. ქართულ საზოგადოებაში ამასთან დაკავშირებით გამოითქმებოდა აზრი, რომ სომხეთის თავისუფლება მათ რიცხვს შეამცირებს საქართველოშიო. ავტორის შენიშვნით, „ასეთი აზრი სიმართლეს არ უნდა ყოფილიყო მოკლებული“, მაგრამ, როცა თბილისში გამომავალმა ერთ-ერთმა სომხურმა გაზეთმა ხმამაღლა განაცხადა: ჩვენ კავკასიიდან ფეხსაც არ მოვიცვლითო... ჩვენ ძალიან ნაკლებ გვაინტერესებს — მართლა ნავლენ თუ არა სომხები კავკასიიდან; რომ უბრალოდ შეუძლებელია ეჩმიაძინის გადატანა ოსმალეთის სომხეთის ტერიტორიაზე, ანუ სომხებს კავკასიაში ცხოვრების უფლება საუკუნეების მანძილზე ისევე ჰქონდა, როგორც ყველა მკვიდრ ერს კავკასიისას. მაგრამ ავტორს სხვა რამ აინტერესებს და სრულიად ბუნებრივადაც: შეამცირებდა თუ არა სომხების შემოსევას საქართველოში განთავისუფლებული სომხეთი?... რა გავლენას მოახდენდა იგი საქართველოზე, სადაც იმჟამად 300 ათასამდე სომეხი ცხოვრობდა? შეიძლებოდა მცირე იმედი მაინც გაჩენილიყო, რომ ნაწილი ამ სომხებისა თავის სამშობლოს მიაშურებდა?

ავტორი მხარს უჭერდა იმხანად „კავკასიურ სლოვოში“ გამოთქმულ მოსაზრებებს, რომ თბილისის თვითმართველობის ხმონების უმრავლესობა სომხეთში არ ნავიდოდნენ. მიზეზი ამისა ის იყო, რომ „სამშობლო ქვეყანაში დედაენის უცოდინართა მისვლა იგივეა, რომ უცხო ქვეყანაში უპასპორტოდ მოხვიდე“ — და მაგალითისათვის ასახელებდა ხატისოვსა და დოლუჟანოვს; ხმონების გარდა არც სომეხი ადვოკატებიც არ ნავიდოდნენ, რადგან მათი

⁶⁶ ჟურნ. „კლდე“, 1915 წლის 1 თებერვალი, გვ. 15.

ერთადერთი ენა რუსული იყო, რომელთაც თავისუფალ სომხეთში მართლმსაჯულებას სამსახურს ვერ გაუნვედნენ... მაგრამ იყო ჭეშმარიტი სომეხი ხალხი, პატრიოტი სომხები, იდეური სომხები, რომლებიც თავიანთ მოვალეობად ჩათვლიდნენ თავისუფალ სამშობლოში წასვლას... ამას მოითხოვდა მათი სამშობლოს რეალური ინტერესები, ვინაიდან სომხეთში იმჟამად ყველაზე ნაკლები თვით სომხები იყვნენ... ევროპის დიპლომატიამ კიდევაც რომ შექმნას სომხეთი უსომხებოდ, ეს ვერ დააკმაყოფილებდა პატიოსანი და პატრიოტი სომხის სურვილს... ამიტომ სომხის ხალხს ხმამაღლა უნდა მოეწოდებინათ სხვა ქვეყნების ტერიტორიაზე მცხოვრები სომხებისათვის, თავიანთ სამშობლოში დაბრუნებულიყვნენ და თავიანთ მიწაზე დამკვიდრებულიყვნენ...

შემდეგ წერილის ავტორი ასე სვამდა კითხვას: ნავლენ თუ არა სომხები საქართველოდან თავიანთ სამშობლოში? გვეუბნებიან, რომ არა! ასეთი განცხადება უცნაურად მიაჩნდა მას და განაგრძობდა: თანამედროვე მოქალაქეობრივობის უმაღლესი ეთიკა ის არის, რომ ადამიანი თავის ქვეყნის ქვეშევრდომი იყოს. ეს გრძნობა არის სომხის ერში და ამიტომ იბრძვის თავისუფლებისათვის; რომ ჩვენ ვერ წარმოგვიდგენია ისეთი სომეხი, რომელიც სიამოვნებით არ იცხოვრებდა თავის ტერიტორიაზე. რა თქმა უნდა, აქაც იქმნებოდა განსხვავება წვრილ მენარმესა და მსხვილ მრენველ-ვაჭართა დამოკიდებულებას შორის... საქართველოში არ იყო არც ერთი მსხვილი სასოფლო მეურნეობა, რომ მიწის მფლობელობა პარტულიარული ტიპისა ყოფილიყო და ამიტომ მას ეროვნულ-სომხური მნიშვნელობა არ ჰქონოდა. თვით ახალქალაქის მაზრაში დასახლებული სომხები სახაზინო მიწაზე ესახლებოდნენ და არა კერძო საკუთრებაში მყოფ ტერიტორიაზე... ამისათვის პირველ რიგში ანგარიში უნდა გაენიათ თვით სომხებს, ვიდრე სხვა სახელმწიფოებს... ვინაიდან, ავტორის შენიშვნით: „თუ ეს ნაკლი გამოსწორებული არ იქმნება — ჩვენ სომხეთის თავისუფლება ვერ წარმოგვიდგენია. სახელმწიფოს მოწყობა რომ უხალხოდ ადვილი იყოს, მაშინ ებრაელ მილიონერებისათვის სულ უბრალო საქმე იქნებოდა პალესტინის ყიდვა. სიონისტების გეგმაც იმიტომ დაიმსხვრა, რომ პალესტინაში წასვლის მსურველი ცოტა აღმოჩნდა. ნუ თუ სომხებიც ამას ჩაიდენენ?“⁶⁷.

თავის ამ მსჯელობას და იქედან გამომდინარე შედეგებს ავტორი სავალდებულო მისაღებად როდი თვლიდა სომხებისათვის, მაგრამ „მათ უფლება უნდა მოგვცენ სწორედ ასე ვიმსჯელოთ, როცა ჩვენს თვალწინ ასეთი დიდი საკითხი წყდება, რაც უშუალოდ

⁶⁷ ჟურნ „კლდე“ 1914 წლის 14 დეკემბერი, გვ. 2-3.

ჩვენს სასიცოცხლო ინტერესებსაც ეხება“-ო, — დაასკვნიდა შ. ამირეჯიბი.

ასეთი შეგონებები საქართველოში მოკალათებულ, თუ ამ მიზნით აქეთკენ ლტოლვილ სომეხთათვის, მგლის თავზე სახარების კითხვის ტოლფასი იყო.

მათ ქმედებაში პატრიოტი მამულიშვილი კარგად ხედავდა, რომ საბაბმიცემული უცხოტომელები საქართველოსაკენ მოილტვოდნენ, ქართული მიწების უბრძოლველად ხელში ჩასაგდებად... გათვლა მალევეაკური იყო... სპარსეთსა და ოსმალეთში ისინი უმრავლესობას ვერასოდეს მიაღწევდნენ, საქართველოში კი შეეძლოთ ამ სანუკვარი მიწების აღსრულება... რა თქმა უნდა, გამოქცეულთა უმრავლესობას ეს გაცნობიერებული არ ჰქონდა, მაგრამ კარგად იცოდნენ მათ, ვისაც „დიდი არმენიის“ შექმნის იდეა ტვინს უღრღნიდა და, რომელსაც სწორედ ქართული ტერიტორიების მუქთად მიტაცების დიდი იმედი ჰქონდათ...

სამსონ დადიანის თქმით, საქართველოში „გადმოცვივნილი სომეხობა. საქართველოს ნამდვილ შედგენილ ნაწილად, მისთვის სასარგებლო და აუცილებელ ელემენტად ვერ გახდებოდა, და იგი არასდროს იზრუნებდა მისთვის, რადგანაც საქართველო მისი სამშობლო არ იყო. ამიტომ იგი, ე.ი. სომეხობა ან უნდა გათქვეფილიყო ქართველობაში, ან ახალი სამშობლო ეძებნა. პირველი არ მოხდებოდა, ე.ი. არ გაითქვიფებოდა, რადგან სომხის ერი საკმაოდ კულტურულია იმისათვის, რომ თავისი ეროვნული სახე შეენარჩუნებია... ასე, რომ სომეხთა ინტერესები იმთავითვე დაუპირისპირდა ქართველთა ინტერესებს... ერთის შემატება — მეორის დაკლება იყო, ერთის გამდიდრება მეორის გაღატაკებას მოასწავებდა.. ამ ნიადაგზე ერთმანეთს დაუპირისპირდა ეს ორი ელემენტი და სომეხებს აუცილებლად უხდებოდა ორგვარი ბრძოლა: იგი იბრძვის, როგორც ბურჟუაზია საერთოდ და ამავე დროს, როგორც უცხო ერის წარმომადგენელი უცხო ერის ბანაკში. ამიტომ ქართველებს ბრძოლა უხდებათ სომეხებთან, როგორც უცხო ელემენტთან, საკუთარ ტერიტორიაზე“⁶⁸.

„კლდეისტა“ ამგვარ გამოსვლებს დიდი გულისწყრომით ხვდებოდნენ თბილისში სომეხურ ენაზე გამომავალი ჟურნალ-გაზეთები: „ჰორიზონი“, „არევი“, „მშაკი“ და სხვ. ამდენად, რ. გაბაშვილის და მის თანამოაზრეთა ყოველი გამოსვლა მათდამი პასუხიც იყო...

აღსანიშნავია, რომ რუსეთის ცენტრალური პრესის ფურცლებზეც სათანადო ადგილი ეთმობოდა სომეხ ლტოლვილთა განსახლების და ამ კონტექსტში სომეხ-ქართველთა ურთიერთობის სა-

⁶⁸ ჟურნ. „კლდე“, 1914 წლის 16 თებერვალი, გვ.4.

კითხს... მაგალითად, გაზეთი „Санкт-Петербургские Ведомости“ ცეცხლზე ნავთს ასხამდა, როცა აღნიშნავდა: „თბილისში ახლა დიდია „გამოქცეულთა“ რიცხვი. მათ აქეთ-იქით ასახელებენ და თუ ეპისკოპოზ ნერსესის შუამდგომლობა შეწყნარებულ იქმნა და გამოქცეულთ რუსული პასპორტები დაურიგდათ, მაშინ მათი დასახელება უფრო ფართო ხასიათს მიიღებს... მათი უმეტესი ნაწილი, როგორც ყოველთვის, ახლაც ქართველთა საზღვრებში იქნება დასახლებული. საქართველოში ასეთი დასახლება აგერ ათეული წლებია ხდება, რაც ისედაც ხდებოდა თუნდა ოსმალეთში არავითარი დევნა და ექსცესები არ ყოფილიყო. სომეხთა დასახლება ქართველთა ტერიტორიაზე კი ქართველების უმტკივნეულეს საკითხს შეადგენს. თანამედროვე ქართველის ეროვნულ მსოფლმხედველობად აღიარებულია აუცილებლად შენახვა და დაცვა საქართველოს ტერიტორიისა. საქართველოს ეროვნული აზრი არავითარ კომპრომისებს არ იცნობს ამ საკითხში და აი, სწორედ ამიტომ არის, რომ ქართველ-სომეხთა საერთაშორისო დავაში უმთავრესად ტერიტორიის საკითხი არის ხოლმე ნიადაგი“.

ამ წერილის გამო გაზეთი „Закавказская Речь“-ი წერდა: „არ შეიძლება ამ წერილის ავტორს არ დავეთანხმოთ, რომ მინა-წყლის საკითხი ყველაზე მტკივნეული და სადავიდარაბო საკითხია ჩვენი და სომხების ურთიერთობისა, რომლის გადაუჭრელობის გამო ყოველად შეუძლებელია ჩვენი მეზობლობა-მეგობრობა და თანხმობით ცხოვრება“⁶⁹

სომეხ-ქართველთა ურთიერთობის საკითხი მრავალი რაკურსით არის წარმოჩენილი ჟურნალი „კლდის“ ფურცლებზე დასტამბულ მრავალფეროვან მასალებში. „კლდეისტები“ ცდილობდნენ ამით დაენახვებიათ ყველასათვის, პირველ რიგში კი სომეხთათვის, რომ მათი პრეტენზიები ქართული ტერიტორიების დასაკუთრებისა უმადურობის, არაზნეობრივობის და არაადამიანურობის გამოვლენის სფეროს განეკუთვნებოდა.

„კლდის“ მასალების მიხედვით, სომეხთა უმადურ დამოკიდებულებასა და დაუნდობლობას საქართველოსა და ქართველებისადმი ახალი სტიმული მისცა რუსეთის გაბატონებამ კავკასიაში... რუსეთის მიერ საქართველოს ძალდატანებით მიერთების შემდეგ, სომხების ჩამოსახლება და ქართული მიწების მითვისებას ხელოვნური სახე ჰქონდა; ეს პროცესი კავკასიის უომრად დაპყრობისა (სომეხთა მიერ) მეთოდურად სწარმოებდა და XX საუკუნის დასაწყისიდან კიდევ უფრო ინტენსიურ ხასიათს ღებულობდა. ამიტომ იყო, რომ „თვით სასომხეთში სომეხთა რიცხვი ნახევარ მილიონს აღემატებოდა, რომელთა უმრავლესობა საქართველოში იყვნენ განს-

⁶⁹ ურნ. „კლდე“, 1914 წლის 16 თებერვალი, გვ.4.

ახლებულნი... უბედურება ის იყო, რომ სომხები უსამშობლობას არც განიცდიდნენ. ჟურნალის შენიშვნით „მერე როგორ გგონიათ, ესეთი არაბუნებრივი მოვლენა ინვევს მათში ებრაელებისებურ ტირილს სამშობლო მხარეზედ? სულაც არა... მათი მონინავე ხალხი მთელ პოლიტიკურ სისტემას ქმნის „დიდი სომხეთის“ თაობაზე, რომელიც მოიცავს ამიერ-კავკასიას, ოსმალეთის 6 ვილაეთს და კილიკიასაც კი...“⁷⁰

რევაზ გაბაშვილს, როგორც რედაქტორს, კარგად ესმოდა პრესის, როგორც ცხოვრების სარკის როლი... აკი მიუთითებდა კიდეც: პრესა მოვალეა პირდაპირ შეხედოს თვალებში სიმართლეს და პირდაპირ დაასახელოს ხოლმე ყველა საგანი თავისი სახელით“—⁷¹ და ასრულებდა კიდეც ამას.

პირდაპირ, სიმართლის დასახელების პოზიცია კარგად ირეკლება სპირიდონ კედიას („ს.კ.“) ვრცელ წერილში — „სამხრეთის საფრთხე“, რომელშიც ისევ სომეხ ლტოლვილთა შესახებაა საუბარი და იქედან გამომდინარე ქართველთათვის შექმნილ უმძიმეს პრობლემაზე...

„სამხრეთიდან დაიძრა სომეხი, სპარსი, აისორი... თავიანთი მამა-პაპისეული სამკვიდრებელი ერთბაშად დატოვეს და ღონეს ღონობენ, ახალი ბინა სხვაგან დაიღონ. გამოქცეულთა რიცხვი დიდია: 120-150 ათასამდე აღის... დღეს-დღეობით ეს ხალხი ჩრდილოეთისაკენ მოიწევს და ღია კარებში შემოჭრას ეძალება. ახდელია საქართველოს ბჭენი და ბოქლომი სხვას უჭირავს. ამ გარემოების წყალობით და მხოლოდ ამ გარემოებისა მომდგარი ნაოტი ხალხი წარმოადგენს ამკარა საფრთხეს. ამ ხალხის სახით ჩვენს ეროვნულ თვითარსებობას ახალი განსაცდელი მოეწვინა.“ ავტორის აზრით, ამ გარემოებას ყოველი „მოაზროვნე და მოდარაჯე“ ქართველის გულისყური უნდა მიეპყრო და იგი საერთო „ბჭობისა და ფიქრის საგნად გამხდარიყო“, მაგრამ სამწუხაროდ, ასე არ მომხდარა. რატომ?

„ქართველი ინტელიგენცია და ქართული პრესა, უფრო უსხეულო კოსმოპოლიტიზმის კარებს დარაჯობს, ვიდრე სხეულღებულ საქართველოს ღია საზღვრებს. ქართული პრესა გაურბის ეროვნული ბრძოლის ქაცვიან საკითხს; მას ჯერ კიდევ ეწოთილება თამამი, გაბედული ხმა ამოიღოს ეროვნული თვითგანმტკიცების სახელით“. სპ. კედიას აზრით, მაინც რას ეკრძალოდა ქართველი ინტელიგენტი? „საკუთარი ეროვნული აზროვნების დაძაბუნებამ და გაუგებარმა, უკრიტიკო ტრფიალმა ფრთოსან პრინციპებისადმი მოჰკლა ქართველ ინტელიგენტში ნიჭი ტერიტორიულ წარ-

⁷⁰ ჟურნ „კლდე“, 1914 წლის 23 ნოემბერი, გვ. 2-4.

⁷¹ იქვე, 1915 წლის 1 თებერვალი, გვ. 13.

მოდგენისა და დაახმო გრძნობა ტერიტორიის სიყვარულისა...“, ამიტომ, „საჭირო იყო მთელი თავისი ენერჯით გალაშქრება საქართველოს ხელახალი ეროვნული აჭრელებისა და აფერადების წინააღმდეგ“⁷².

იმავე სტატიის, გაგრძელებაში სპ. კედია ყურადღებას ამახვილებდა თბილისში გამომავალ სომხური ორიენტაციის რუსულენოვან გაზეთ „Кавказское слово“-ში დასტამბულ ცნობაზე იმის შესახებ, რომ „სომხეთი და რუსეთი მოკავშირენი არიან“.

უბლიცისტის მართებული შენიშვნით, ასეთი „კავშირის“ რეალურობაზე სომხებმა და მათმა მესვეურებმა იფიქრონ, მაგრამ ქართველთა პირდაპირი მოვალეობა იყო გამოეცნოთ, თუ რა მოელოდა „საქართველოს ამ ახალი მოვლენისაგან“... საჭირო იყო გათვალისწინებულ ყოფილიყო „ისტორიული ხასიათი თითოეული მოქმედი მოკავშირისა“, გაეხსენებიათ ამ მოკავშირეების „წარსული საქმიანობა“.

„ჯერ ესაა: მოკავშირეთაგან ერთერთი მოკლებულია იურიდიულ პიროვნებას; მრავალი ასი წელიწადია, რაც მან დაჰკარგა დამოუკიდებლობა, რაც მას ტერიტორიული მთლიანობა ხელიდან წაუვიდა; დაერღვა სამშობლო კერა და სხვადასხვა მხარეს მოედო. ეს სომხობაა, ერი უსახელმწიფო.“

მეორე — სრული იურიდიული პიროვნება. ძლიერი სახელმწიფო, მპყრობელი მრავალი ერისა. ეგ დიდი რუსეთია.

ამ დიდი ისტორიული უბედურების დასაბამიდან დაძრული სომხის ხალხი ცოტ-ცოტათი წელი-წელ სადმე უნდა დალაგებულ-დამკვრიდებულყო. საკუთარ სახელმწიფოებრივ და ეროვნულ ზრუნველობას ჩამოშორებული იქ დაიდებდა ბინას, სადაც უკეთ იცხოვრებდა. პირველი რაზმები, რასაკვირველია, გეოგრაფიულად მეზობელ ქვეყნებს უნდა წვეოდა. ამ მხრივ საქართველო ბუნებით პირველი სასვენო ადგილი იყო. და აი, ასე, ჯერ ზოოლოგიურად სიცოცხლის შენარჩუნების ინსტიქტით თავმეფარებულმა ხალხმა რა ფეხი მოიკიდა და წელში გასწორდა, თანდათანობით გაუჩნდა სურვილი ფეხმოკიდების ადგილის საბოლოო დანარჩუნებამისაკუთრებისა... იგი იწყებს ეროვნული პოლიტიკის შეთხზვას, ადგენს გეგმას ეროვნული მომავლისათვის...”

სპ. კედიას აზრით, „მთელი ამ პროცესის დასაწყისი ისტორიულ იძულებაში მარხია“ საქმე ისაა, რომ „საქართველოს მიწის შუაგულში ახალფესვიანყრილი სომხის ეროვნული სხეული შეუდგა თავისი საქმის კეთებას, სხვაგან დამკვიდრებას; უცხოთა შორის საკუთარი ბინის მოპოვებას. სხვისი ეროვნული ერთფეროვნების

⁷² ურნ. „კლდე“, 1915 წლის 8 თებერვალი, გვ.7.

დაშლას, დარღვევას", რაც გადაიქცა „სომხის ერის ისტორიულ ხასიათად და გარდღვეალ მიდრეკილებად. *C'était Lpus ort quelui!*" (ხასგასმა სპ. კედისია — გ. ს.)

სომეხთა ცხოვრებაში დადგა მკაფიოდ ჩამოყალიბებული ფსიხოლოგიური ვითარება... მოკავშირის გაჩენა-გამოძებნის.

ასეთ მოკავშირედ მას რუსეთი მოეწვლინა და საქართველოს ნიაღზედ უნებლიეთ შეიკრა ეს კავშირი...⁷³

საინტერესოა სპ. კედისა მიერ მიგნებული ლოგიკური დასკვნა. „დაშლილ, გაბნეულ და უსახელმწიფო ერს (სომეხეთს) და ძლიერ და მტკიცედ შემოჭედილ სახელმწიფოს (რუსეთს) შორის კავშირს ხელი შეუწყო „ხასიათის იგივეობამ“, რაც სხვისი მინების მიტაცების სურვილში აირეკლებოდაო...⁷⁴

ყურნალი „კლდე“ იმავე ნომერში თავის მკითხველს კიდევ ერთ საინტერესო მასალას აცნობდა, რომელიც ასევე გაზეთ „САНК-Петербургские Ведомости“-ში ყოფილა დასტამბული. წერილში გაანალიზებულია სომეხ-ქართველთა ურთიერთობის საკითხი, რომელიც ახლებურად დასმულა XIX საუკუნის 60-70-იან წლებში. სახელმწიფო სათათბიროს წევრის, მილიუკოვის განცხადება, რომ ამ საკითხს უწინარეს ყოვლისა „რუსეთის სარგებლიანობის თვალსაზრისით“ განვიხილავო, გასაგებია, მაგრამ ავტორის თქმით, არც მილიუკოვსა და არც სხვებს, ვინც ამ თემაზე აზრის გამოთქმას მოისურვებენ არ უნდა დავინწყნოდათ, რომ „რუსეთის მეფის გვირგვინში გამომჭვირვალე პატარა ქვეყანა, სისხლით და ხორციით შენებებული რუსეთთან“ საქართველო გახლდათ. ეს საქართველო ისტორიულად მუდამ მზად იყო პატარა დაჩაგრული ერების მხარეზე მდგარიყო, „როდესაც ეგვიპტის ულლიდან ებრაელების განთავისუფლების ამბავმა მოაღწია საქართველომდე, ქართველები განიხარებდნენ და ღმერთს მადლობას უხდიდნენ“ ამ ფაქტის გამო; რომ ქართველობას არა ერთხელ უხსნია სომეხები და მათი სატახტო ქალაქი (გულისხმობს ქ. ანს-გ. ს.) მტრის ხელიდან, მიუცია მათთვის თავშესაფარი და შემდეგ თავის მცხოვრებთა უფლებებს ანიჭებდა და მათთან ათანასწორებდა...“

საინტერესოა აღინიშნოს, რომ რუსულ გაზეთში გამოქვეყნებულ სტატიაში ყურადღება იყო გამახვილებილი ერთ საყურადღებო გარემოებაზე, რომელიც მანამდე არავის გახსენებია. ეს იყო საქართველოს ლერბი, რომლის მეოთხედ ნაწილში ჩასმული იყო სომხური ოქროსთმიანში და შავგვირგვინოსანი ლომი.

სტატიის ავტორის ანგარიშგასანევი შენიშვნით, სომეხთა სამეფო ლერბის მოთავსება ქართველებისაში, უდიდეს მნიშვნელო-

⁷³ ჟურნ. „კლდე“, 1915 წლის 15 თებერვალი, გვ.3-4.

⁷⁴ იქვე, გვ. 3-4.

ბას იძენდა სომეხთა ტერიტორიის მოფარგვლის დროს, რადგან სწორედ ტერიტორიის საკითხი ერთი უმძიმესი საკითხთაგანი იყო ამ ორი ერის ურთიერთობის დარეგულირების საქმეში.

„კლდეისტები“ ასე თანდათანობით ცდილობდნენ შეეგნებინებიათ სომხური ბურჟუაზიის შოვინისტური სულისკვეთებით გაყენებული ნაწილისათვის, რომ მათი მცდელობები — ჩარჩული გზით მოპოვებული სიმდიდრის გამოყენებით ზიანი მიეყენებიათ ქართული საქმისათვის, — დასაღუპავად იყო განწირული და საბოლოოდ სიმართლე მაინც იზეიმებდა და მათ მიერ დატესილი სიძულვილი მათდა საზიანოდ გამოიღებდა უმწარეს ნაყოფს.

აქ შალვა ამირეჯიბის კიდევ ერთ სტატიასზე შევაჩერებთ მკითხველის ყურადღებას. სტატიის სათაურია „სომხები“. მასში საუბარია ამ ორი ხალხის ურთიერთ დამოკიდებულებაზე მათი მრავალსაუკუნოვანი ისტორიის მანძილზე. განსაკუთრებული აქცენტია გაკეთებული იმ რეალობაზე, რომელიც იმჟამად არსებობდა ახლო მეზობელთა შორის, რით იყო ყოველივე ეს განპირობებული და ა. შ.

ავტორი სტატიის დასაწყისშივე გადაჭრით აცხადებდა, რომ მცნება „მეზობლობა“ ველარ იტევდა იმ რეალობას, რომელსაც იგი გულისხმობდა... რომ „სომხები ქართველებს „მეზობელ“ ერად გვთვლიან“; რომ ისტორიულად ასეთი შეხედულება სრული ჭეშმარიტებაა“, რომ „ჩვენ ოდესღაც დამოუკიდებელ სახელმწიფოებს წარმოვადგენდით და ეს სახელმწიფოები ერთმანეთის მეზობლად იდგნენ“. მაგრამ ეს იყო ოდესღაც“. სამეზობლო სახელმწიფოებრივი დემარკაციული ხაზის მოშლის შემდეგ, ბევრი რამ შეიცვალა... სომხებსა და ქართველებს შორის ომები და დიდი განხეთქილება არ ყოფილა, „თუ არ მოვიგონებთ კათალიკოს აბრაამის წყევლას, სომხებსა და ქართველებს შორის არც დიდი უსიამოვნება ყოფილა. ეს იყო მაშინ, როცა ჩვენ მართლა მეზობლები ვიყავით“, მაგრამ შემდეგ პოლიტიკური პირობების გავლენით, „მოხდა ის, რომ ოდესღაც მხოლოდ „მეზობელი“ სომეხი, ეხლა სახლში ჩამოსახლდა“. ე.ი. დაიკარგა მეზობლობა, რადგან, ავტორის თქმით: „უბრალო ენაზედ მეზობლობა ისეთ წესრიგს ჰქვია, როცა თქვენი საკუთარი ქოხი, ჩემი საკუთარი ქოხის გვერდზეა, მაგრამ, როდესაც თქვენ საკუთარი ქოხიდან გამოდიხართ და ჩემს საკუთარ ქოხში სახლდებით, ჩემს პირად კეთილდღეობას აშკარა ვნებთ, ეს უკვე მეზობლობა კი არ არის, ეს არის კონკუბინატი ორ მოძულე არსებათა. აი, რა ვართ ჩვენ დღეს და, არა მეზობლები!“⁷⁵

⁷⁵ ჟურნ. „კლდე“, 1913 წლის 15 დეკემბერი, გვ. 4-7.

ამ მოსაზრების გამოთქმის შემდეგ ავტორი თვითონვე სვამდა კითხვას: თუ რით შეიძლებოდა ამ საქმის შველა და როგორ უნდა დაგვეღწია თავი ამისათვის?

ავტორი საღად მსჯელობს და სწორ მოსაზრებებს გვთავაზობს: „ქართველებიც და სომხებიც ისტორიული ერებია. ჩვენ ორივეს დაქარგული გვაქვს პოლიტიკური თავისუფლება, მაგრამ არც ქართველებსა და არც სომხებს არ დაგვიკარგავს პოლიტიკური თავისუფლების აზრი...“, რომ სწორედ ამაში გამოსჭვივოდა არა იმდენად უფლება, რამდენადაც მოვალეობა, რათა ორივე ერს განეეითარებია ეს აზრი და აქტიურად ემოქმედა დაქარგულის დასაბრუნებლად... მაგრამ საქართველოში მცხოვრები სომხები ივინყებდნენ ამას და შესყიდვის გზით ქართული ტერიტორიების ხელში ჩაგდებას და ამ გზით „არმენიზმის“ დამკვიდრებას ცდილობდნენ, რომ ეკონომიკურად დაპყრობილი ჩვენი ქალაქების, თუ დაბა-სოფლების თავზე, თავმომწონედ და უპირატესობის გრძნობით დაბრმავებულები „არმენიზმის“ დროშას აფრიალებდნენ“ ვერ ამჩნევდნენ, რომ სომხის ბურჟუაზიის როლი კავკასიაში მათდა საზიანოდ ანტიეროვნული იყო... ეს განსაკუთრებულად აირეკლებოდა იმაში, რომ ისინი სომხის ერს საოცარი სიჯიუტით მიერეკებოდნენ სხვის მიწებზე, მათ შორის ქართველთა მიწებზეც დასამკვიდრებლად... ავტორის აზრით, სწორედ აქ იყო ის ანტი-ბატრიოტიზმი, რაც სომხის ერში სამშობლო ტერიტორიების სიყვარულს ვერასოდეს განავითრებდა; ეს აწყობდა მთავრობას (გულისხმობს რუსეთის ხელისუფლებას — გ. ს.), ვინაიდან სომეხი მუდამ ბრმა იარაღის როლს ასრულებდა მის ხელში, ამასთან იგივე მთავრობა ყოველ ეროვნულ ორგანიზმში მეტხორცსა ჰქმნის... ამის სამაგიეროდ სომხებს ნება ეძლევათ ყველგან და ყოველთვის თავიანთი შოვინიზმი აღვივონ. მითუმეტეს, რომ რუსეთისათვის სომხური შოვინიზმი საშიში არ არის“⁷⁶.

ავტორი წინასწარმეტყველურად დაასკენიდა, რომ თავისი კაპიტალით, ანუ ეკონომიური უპირატესობით გათამამებულ სომეხთა საქციელი ქართველი ერის მიმართ „წინდანინვე განწირული იყო“, რადგან XX საუკუნეში ამგვარი უპირატესობა მოისპობა, წინ წამოინევეს ლოზუნგი: სრული განთავისუფლება უცხო ერთა ეკონომიური უღლისაგან და დადგება დრო და სომეხ კაპიტალისტთა პროგრამა სამარის მიწად წაეყრება მათ შემქმნელებს“⁷⁷.

იქვე იმაზეც იყო მითითებული, რომ „სომხის ბურჟუაზიას ასი წლის განმავლობაში იმაზე მეტი არა უკეთებია რა, რომ რუსეთის მთავრობას დასდევდა უკან და იქ ბანაკდებოდა, საცა ეს უკანასკნელი თავის კანცელარიას ხსნიდა. ცხადია რომ სომხის ხალხი მათ

⁷⁶ ურნ. „კლდე“, 1913 წლის 15 დეკემბერი, გვ. 6.

⁷⁷ იქვე, გვ. 6.

ყველგან ვერ გაჰყვებოდა და რა გამოვიდა აქედან? ის, რომ სიმდიდრე, ჭონება და კულტურა სომხის ბურჟუაზიისა მოექცა საქართველოში, თბილისში, იმ დროს, როცა მისი მთავარი მომხმარებელი თბილისიდან ასე შორს იყო. ისტორია ერთხელ როდისმე იტყვის, რომ ეს იყო ამაო შრომა და ოფლი⁷⁸.

სწორედ ამ ხელმოცარულ სომეხ კაპიტალისტთა ნაშეივნით არიან ისინი, რომლებსაც დღესაც არ დაუქარგავთ იმედი, რომ თავიანთი „სახელოვანი“ წინაპრების მიერ აშენებულ „სოლოლაკის უბანს“, არამიანცის საავადმყოფოს, ბოზარჯიანცის, კაზარიანცის, მანთაშიანცის თუ სხვათა მკვიდრად ნაშენებ ნაგებობებს დაიბრუნებენ... ამიტომ არის, რომ ქართველთმოდულე მანთაშოვს ძეგლს უდგამენ „მშობლიურ“ თბილისში, როგორც დიდ ქველმოქმედს.

საქართველოში მცხოვრებმა სომხებმა უნდა შეიგნონ ის აზრი, რომ საქართველოში პირველობა ქართველებს ეკუთვნით. როცა სიტყვა „პირველობას“ ვხმარობთ, ჩვენ სახეში მათი, სომხების, უკანა რიგში ჩაყენება კი არ გვაქვს, არამედ ინტერესების პირველობას ვგულისხმობთ. თუ ისინიც იმ აზრისანი არიან, რომ ჩვენ ქართველები, ჩვენი ეროვნულის ცხოვრებით ვცხოვრობთ, ვიმყოფებით ჩვენს მინა-წყალზედ და ჩვენცა გვაქვს რაიმე იდეალი, მაშინ მათ ისიც უნდა აღიარონ, რომ საქართველოში გაბატონებული ინტერესი — ქართული ინტერესი უნდა იყოს.

ეს ისეთი მარტივი ფორმულაა, რომ მას არავითარი ქართული სპეციფიური თვისება არა აქვს. გადაიტანეთ ეს ფორმულა რომელ ხალხშიც გინდათ, რომელ ტერიტორიაზედაც გინდათ, იგი ყველგან ეროვნული ცხოვრების თავი და ბოლო იქმნება. თვით უკეთილშობილესი თეორია ერთა თანამშრომლობისა მას წუნს ვერ უპოვნის, მაგრამ უბედურება ის არის, რომ საქართველოში მცხოვრებ სომხებს ჰგონიათ, რომ მათაც სწორედ ისეთივე, მაგრამ სომხური ინტერესი აქვთ როგორც ჩვენ... სომხებს ჰგონიათ, რომ მათი ინტერესები საქართველოში იმავე ზომისავე და ამავე მოდგმისავე არიან, როგორც ჩვენი. მაგრამ ეს შემცდარი აზრია. საქართველოს საკითხი საქართველოში უნდა გადაწყდეს, მაგრამ სომხეთის საკითხი კი ვერ გადაწყდება საქართველოში⁷⁹.

ავტორის აზრით, საუბარი შეიძლებოდა უმცირესობის ინტერესებზე, ანუ იმ სომხების ინტერესებზე, რომლებიც საქართველოში უმცირესობას შეადგენდნენ, და შესაძლო იყო ისინი ქართველთა უმრავლესობას დაეჩაგრათ... „საქართველოს სომხობა სულ უმცირესი ნაწილია სომხის ერისა (რომელსაც ბინადრობა თავის საკუთარ ადგილზედა აქვს), ამიტომ ჩვენი იმათდამი დამოკიდებულება

⁷⁸ ჟურნ. „კლდე“, 1913 წლის 15 დეკემბერი, გვ. 7.

⁷⁹ იქვე, 1912 წლის 4 ნოემბერი, გვ. 5.

არ არის დამოკიდებულება ორის ერისა“. გამომდინარე აქედან, აქ მცხოვრები სომხები უნდა დაჰყაბულებოდნენ თავიანთ მდგომარეობას საქართველოში და უნდა ეცნოთ ჩვენი უფლებები ჩვენს სამშობლოში⁸⁰.

მაგრამ ამაო იყო ასეთი შეგონებები... რუსეთის ხელისუფლების მიერ ზურგამაგრებული „სოლოლაკის პლუტოკრატია“, როგორც იტყვიან, აშკარა შეტევაზე იყო გადასული და ფორსირებულად ცდილობდა ყველაფრის მისაკუთრებას და არა მარტო ქართული ტერიტორიებისას, არამედ ჩვენი ისტორიული ძეგლებისას, საარჩევნო უფლებებისას და ა. შ.

მაგალითისათვის ერთ-ერთ ამონარიდს მოვიტანთ ყურნალის 1914 წლის 4 მაისის სარედაქციო წერილიდან. „სომხების შოვინისტურმა მისწრაფებამ, რომელმაც უკანასკნელ დროს უტიფრად წამოჰყო თავი ჩვენი სამშობლოს ყველა კუთხეში, სიღნაღში თავის აპოგეას მიაღწია. თვითმმართველობის დასაპყრობად გამართულ ბრძოლას გორში, თელავში, თბილისის საქალაქო საქმეებში, ახლა აქ გადაუნაცვლებია... ბრძოლა სომეხთა მხრიდან ქართველთა წინააღმდეგ აშკარაა... აქ გასაკვირი არაფერია, რადგან ჩვენი კეთილი მეზობლების ზრახვები ფარდა ახდილი და არაერთგზის დადასტურებულია, მაგრამ სავალალოც ბევრი იყო სომეხთათვის, რადგან წარმოუდგენელ სიბეცეს იჩენდა ის ხალხი, რომელიც საუკუნეობით შეითვისა ქართველმა ერმა, იძმო და დღეს, მესამისაგან დაყრილ საკენკით წათამამებული ძირს უთხრის იმ მუხასა, რომლის რკოებით იკვებებოდა...“

სტატიაში „სომეხ-ქართველთა ურთიერთობა“ სამსონ დადიანი მრავალ საჭირობოროტო საკითხზე ამახვილებდა ყურადღებას და ისტორიულ ჭრილში განიხილავდა ამ ორი მეზობელი ერის ურთიერთობას საუკუნეების მანძილზე, როცა „ბედმა თუ უბედობამ მათი ინტერესები ერთმანეთში გადახლართა...“, როცა სახელმწიფოებრივობა დაკარგულ და გაბოგანოებული „სომხის ერის ერთი ნაწილი (განურჩევლად წოდებისა) თანდნთან საქართველოში შემოიხიზნა, ჩვენი სახელმწიფოს ქვეშ დაისვენა, გულუხვმა საქართველომ თავისი მონყალების კალთა გადაებერტყა“, მაგრამ სომეხი ვერ იზრუნებდა საქართველოსათვის, რადგანაც იცოდა „ეს მისი არ იყო“. როგორც საკუთარი კულტურის მქონე ხალხმა მაშინვე გაითვალისწინა, თავისი ეროვნული სახის შენარჩუნებისათვის უნდა ეზრუნა, ამიტომ „იმ თავითვე დაუპირისპირდა სომეხთა ინტერესები ქართველთა ინტერესებს... ამიტომ ქართველებს უხდებოდა ბრძოლა სომეხებთან, როგორც უცხო ელემენტთან, საკუთარ ტერიტორიაზე“. სომეხების უპირველეს საფიქრალად იქცა, რაც შეიძლე-

⁸⁰ ჟურნ. „კლდე“, 1912 წლის 4 დეკემბერი, გვ. 5.

ბოდა მეტი ქართული ტერიტორიების ხელში ჩაგდება. მათზე თავიანთი დასახლებების შექმნა, დამკვიდრება და გამრავლება... ამიტომ სოლიდარობის გრძნობის რეალური განხორციელება შეუძლებელი იყო მაშინ როცა „საკუთარს ვინმე ძალით, ურცხვად და უბოდისოთ გართმევს“. სამს. დადიანი ერთხელ კიდევ ხაზგასმით იმეორებდა საყოველთაოდ აღიარებულ ჭეშმარიტებას: ყველა ეროვნულ ღირებულებათაგან (ენა, სარწმუნოება, კულტურა...) მხოლოდ ტერიტორიას აქვს უდიდესი მნიშვნელობა“, რომ ტერიტორიის საკითხის გადანყვეტა არ შეიძლება რეფერენდუმებითა და „რეალური მოსახლეობის“ პრინციპით, რომ „კავკასიაში ქართულ ტერიტორიად აღიარებულ უნდა იქმნას მხოლოდ ის ტერიტორია, რომელიც საქართველოს სახელმწიფოს ეჭირა, როდესაც იგი ასი წლის წინათ რუსეთის სახელმწიფოს დაუკავშირდა“, ხოლო „ეროვნული უმცირესობანი, რომლებიც მის ტერიტორიაზე ცხოვრობენ გარანტირებულნი იქმნებიან და დარჩებიან საქართველოს სრულუფლებიან მოქალაქეებად“⁸¹.

რა თქმა უნდა, რუსეთის ხელისუფლების მხარდაჭერით გათამამებულ და დაშნაკცუთუნის პარტიის იდეებით შეირალებულ სომეხთა შეძლებული ფენების წარმომადგენლებს, გაგონებაც აღარ სურდათ იმის შესახებ, რომ მათ, სხვის ტერიტორიაზე შემოხიზნულთ, კულტურული ავტონომიის მიღების გარანტიას აძლევდა აბორიგენი ერი, როცა იგი თავს დააღწევდა ცარისტულ რეჟიმს... სომეხთა უსაფუძვლო პრეტენზიების დასაბუთებისადმი იყო მიძღვნილი ვინმე იშხანიანის ნიგნაკი, რომელიც იშხანად რუსულ ენაზე დაისტამბა საკმაოდ პრეტენზიული სათაურით: „*Экономические общественные основы армяно-грузинского антагонизма*“.

ჟურნალი „კლდე“ აფასებდა რა ამ „ნაშრომის“ ავ-კარგს, აღნიშნავდა: მასში ავტორი „საოცარის მოურიდებლობით ხსნიდა ნიღაბს სომხურ ნაციონალისტურ პოლიტიკას და საშუალებას აძლევდა ყოველ შეგნებულ ქართველს, ნათლად წარმოედგინა ჩვენი „მეზობლობისა და მეგობრობის“ გულწრფელობა სიმშვიდისა და ძმობის მოძახილებში“.

„კლდის“ რეცენზეტის აზრით, ხსენებულ ნიგნაკის ავტორს „უტიფარი დასკვნები გამოჰყავდა საქართველოს სიკვდილზედ, სომხურ პროგრესულ კაპიტალის მსვლელობის წინაშე“. იშხანიანის თქმით — „სომეხ-ქართველთა ანტაგონიზმი მოგონილი კი არ იყო, არამედ იყო, არის და იქნება მუდამ, რადგან ღრმა ეკონომიურ და საზოგადოებრივ საფუძველზეა დამყარებული“-ო.

⁸¹ ჟურნ. „კლდე“, 1914 წლის 2 მარტი, გვ. 5.

ყურნალის სამ ნომერში დაბეჭდილია ამ „ნაშრომის“ სა-
ფუძვლიანი შეფასება და დამაჯერებლად არის ნაჩვენები სომეხი
„მეცნიერის“ შოვინისტური და თავხედური ნააზრევი, რომელიც
მუდამ დარჩება, როგორც უშავესი წერტილი ამ ორი ხალხის
ურთიერთობის ისტორიაში⁸².

სომეხ-ქართველთა ურთიერთობის საკითხებზე სხვა მასალებ-
საც უხვად ვხვდებით ყურნალ „კლდის“ ფურცლებზე, მაგრამ ყველა
მათგანზე ყურადღების შეჩერება არც ღირს და არც საჭიროა...
თუმცა იმავე პერიოდში გამოთქმული ერთი საყურადღებო მოსაზ-
რების გახსენება დღესაც კი აქტუალურად ჟღერს: „ორ ერს შორის
თანხმობა თუ ბრძოლა დამოკიდებულია მათი არსებობის ინტერე-
სებზე, თუ ორი ერის ინტერესები პარალელურია, მათ შორის წი-
ნააღმდეგობა კი არა, სრული თანხმობაა, მაშინ ვინ სულელი იქნება
არ აღიაროს ეს ფაქტი და ბუნებრივ მოკავშირეს ხელი ჰკრას! მა-
გალითად ქართველთა და თათართა (იგულისხმება აზერბაიჯანი -
გ. ს.) ინტერესები არსად ერთმანეთს არ ეწინააღმდეგებიან,
პირიქით ერთი და იგივე ჭირი, ერთი და იგივე პოლიტიკური გან-
საცდელი მათთვის ბრძოლის საერთო ნიადაგს ჰქმნის. ეს სრულიად
არ ითქმის სომეხ-ქართველთა დამოკიდებულების შესახებ“⁸³.

„ისტორია — ცხოვრების მასწავლებელია“ — ამბობდა ციცე-
რონი და ამ სიბრძნის განმეორება დღევანდელი სომეხი ერის
ზოგიერთ წარმომადგენელსაც არ აწყენს.

იმ ხანებში „კლდეისტა“ მიერ სომეხ-ქართველთა ურთიერთ-
ობებზე ყურადღების გამახვილება სავსებით გამართლებულად მიგ-
ვაჩნია იმდენად, რამდენადაც ამ საკითხმა ერთხელ კიდევ მწვავე
ხასიათი მიიღო... ცარისტული ხელისუფლების მაღალმოხელეთა
მონყალე თვალის ყურებით გაყოყოჩებულ თბილისელი სომხების
გამდიდრებულ წარმომადგენლებს „ცა ქუდად აღარ მიაჩნდათ და
დედამინა ქალამნად“ პირდაპირ შეტევაზე გადმოდიოდნენ ქარ-
თული ტერიტორიების ხელში ჩასაგდებად; ურცხვად აცხადებდნენ
პრეტენზიას ქართული მატერიალური კულტურის ძეგლებზე —
ეკლესია-მონასტრები იქნებოდა ისინი, თუ ციხე-კოშკები, გზები თუ
ხიდები, სოფლები თუ დაბა-ქალაქები... ერის „უგვირგვინო მეფე“
უკვე მთანმინდაზე განისვენებდა, ხოლო მის „ქვათა ლალაში“
გაცხადებული მოსაზრებანი მიაჩნდათ „ხმად მლალადებლისა უდაბ-
ნოსა შინა...“

ცნობილი მკვლევარის ბონდო არველადის მართებული
შენიშვნით „ფაქტია, რომ ზოგიერთი სომეხი მეცნიერი დღესაც კი
მეგობრულ გრძნობებს არ ავლენს, თითქოს და მეცნიერული ინ-

⁸² ყურნ. „კლდე“, 1914 წლის 27 აპრილი, გვ. 6.

⁸³ ყურნ. „თავისუფალი საქართველო“, 1914 წლის მარტი, გვ. 23.

ტერესებით განმსჭვალულნი, კალმით შეიარაღებულნი დაწოლას ახდენენ და პრეტენზიას აცხადებენ უძველეს ქართულ მინებზე“, რომ „ასეთი ტიპის სომეხ მეცნიერთა არასაკადრისი საქციელი „არ ახალია, ძველია“, ხოლო თვალები დახუჭო ასეთ „შემოქმედებაზე“ იმის ტოლფასია, რომ წინაპართა ნათელი ხსოვნა დაივიწყო. ეს კი არავის არ ეპატიება, მითუმეტეს შთამომავლობას. ამის მაგალითი დიდმა ილია ჭავჭავაძემ მოგვცა, რომელმაც მთელი სიმძაფრით გამოაშკარავა სიმართლე იმ საზოგადოებრივ სიმახინჯეზე და ჩვენ „ქვათა ლაღადი“ დაგვიტოვა... საფიქრებელი იყო, იმის შემდეგ მაინც ზოგიერთი სომეხი მეცნიერი დაფიქრებულყო და ჭეშმარიტების გზას დასდგომოდა, მაგრამ ასე არ მოხდა, პირიქით, ისინი კიდევ უფრო გააქტიურდნენ და საქართველოზე თავდასხმებს აგრძელებდნენ“⁸⁴.

ისტორიის გაკვეთილების დავიწყება არ შეიძლება.

⁸⁴ Бондо Арвеладзе. „Армянские“ или грузинские церкви в Грузии. Тб . 1997, стр. 8

ჟურნალი „კლდე“ და ეკონომიკის საკითხები

როგორც ზემოთ გაკვრით მივუთითეთ, ჟურნალი „კლდე“ გამოსვლის პირველი დღეებიდანვე კერძო საკუთრების მომხრე და მის დამცველად გამოდიოდა. ყურადღებას ამახვილებდა ქართული სოფლის, გლეხკაცობის, სოფლის ინტელიგენციის, სოფლად საბანკო და საკრედიტო დანესებულებების, კოოპერატივებისა და სხვადასხვა ამხანაგობების დაფუძნების, უმინაწყო სოფლის მოსახლეობის გარკვეული ნაწილის ქვეყნისშიგა მიგრაციის საკითხებზე და ა. შ.

ჟურნალის ამ განყოფილებას იმთავითვე განაგებდა მისი ერთ-ერთი დამაარსებელი დ. ვაჩნაძე. თბილისის კადეტთა კორპუსში საშუალო განათლების მიღების შემდეგ მან პეტერბურგის უმაღლესი სამხედრო სასწავლებელი დაამთავრა და წლების მანძილზე სხვადასხვა სამხედრო ნაწილში მსახურობდა. იყო ერთ-ერთი დამაარსებელი „კავკასიის ოფიცერთა“ სამხედრო-პოლიტიკური ორგანიზაციისა, რომლის უპირველეს მიზანს შეადგენდა „რევოლუციის გზით იმპერიის დესპოტური რეჟიმის შეცვლა ლიბერალურ დემოკრატიულით“⁸⁵.

1907 წელს დ. ვაჩნაძე თავს ანებებს სამხედრო სამსახურს და თბილისში ბრუნდება და მალე ქორწინდება თამარ დავითის ასულ ციციშვილზე... აქტიურად ებმება ეროვნულ და საზოგადოებრივ საქმიანობაში. სწავლობს დავიწყებულ მშობლიურ ენას და ქმნის სასოფლო სამეურნეო და საკრედიტო-კოოპერაციულ ორგანიზაციებს. თანამშრომლობს სოც.-ფედერალისტთა გაზეთ „სახალხო გაზეთში“ და „დავით კახელის“ ფსევდონიმით არაერთ საყურადღებო წერილს აქვეყნებს საქართველოს მიწების კოლონიზაციის; სასოფლო კოოპერაციების, საკრედიტო ამხანაგობების და სხვა საკითხებზე; თავის მშობლიურ სოფელ დიდ ლილოში აარსებს „მერძევეთა ამხანაგობას „ლილოს“, აგრეთვე საკრედიტო ბანკს სოფელ ოძისსა და დიდ ლილოში... ჟურნალ „კლდის“ გამოსვლის შემდეგ რომლის უპირველესი დამფინანსებელიც თვითონ იყო, კიდევ უფრო მეტი ინტენსიურობით ცდილობს ქართული სოფლის აღორძინებასა და სოფლის მოსახლეობის კულტურული დონის ამაღლებას. იგი არა მარტო პატრიოტული გულმხურვალებით მოუწოდებდა ქართველ ხალხს ეკონომიკურად გაძლიერებისაკენ, არამედ თვითონ იძლეოდა მაგალითს იმისას, თუ როგორ შეიძლებოდა ამ მოწოდებათა პრაქტიკული ხორცმესხმა. დ. ვაჩნაძე არა მარტო რედაქციის

⁸⁵ ჟურნ. „ივერია“ (თბილისი-პარიზი), 1992, გვ. 122. ✓

თანამშრომელთა, არამედ იმდროინდელ ქართულ საზოგადოებაში გამოირჩეოდა აგრარული, საკრედიტო, საფინანსო თუ კოოპერაციული საკითხების შესანიშნავი ცოდნით... სწორედ ღრმა თეორიული და პრაქტიკული ცოდნით შეიარაღებული, დიდი მოურიდებლობით გამოდიოდა სოციალისტური პარტიებისა და მათი ბეჭდური ორგანოების წინააღმდეგ, რომლებიც ქართველ ხალხს გაპროლატარებისაკენ მოუწოდებდნენ.

როგორც მოგვიანებით თვითონვე იგონებდა: „უურნალი „კლდე“ გაბედულად შეებრძოლა საქართველოში გამეფებულ სოციალისტურ პრესას... განსაკუთრებით, სოც.-დემოკრატიული იდეოლოგიურ-პაქტიკულ ანტი-ეროვნულ მიმართულებასა და მოქმედებას...“⁸⁶

დ. ვაჩნაძემ თავისი დასაბუთებული გამოსვლებით, პრაქტიკული ხელშეწყობით ათასობით დესეტინა ქართული მიწა გადაარჩინა უცხოტომელთათვის ხელში ჩაგდებისაგან; იგი საკუთარი მაგალითით შთააგონებდა სხვებსაც, რომ მიზანმიმართული საქმიანობით შეიძლებოდა სიმდიდრის შეძენაც და ცხოვრების პირობების გაუმჯობესებაც. საინტიერესოა აღინიშნოს, რომ მერძვეთა კოოპერატივი „ლილო“, რომლის დამაარსებელი დ. ვაჩნაძე იყო, 1913 წლის ივლისში დაუთვალაიერებია სენატორ ვატაცის, თბილისის გუბერნატორს ჩერნიავესკის, ქართლ-კახეთის თავად-აზნაურობის მარშალს კოტე აფხაზს, სასოფლო-სამეურნეო საზოგადოების თავმჯდომარეს დ. ჩოლოყაშვილს და ამავე საზოგადოების მდივანს ვ. რცხილაძეს⁸⁷.

დ. ვაჩნაძე კმაყოფილებას გამოთქვამდა საქართველოს სოფლებში საკრედიტო კოოპერაციის ზრდა-განვითარებით (1913 წლის მაისისათვის მათი რიცხვი 200-ზე მეტი იყო) და ზოგიერთი მათგანის საქმიანობა სანიმუშოდაც კი მიაჩნდა. მაგრამ, მისი აზრით, „ჩვენს საკრედიტო კოოპერაციას ჯერ კიდევ ბევრი ნაკლი ჰქონდა“, რომელთაგან ერთ-ერთი „ქართული სასოფლო ბანკების ურიცხვი და უმიზნო გამრავლება“ იყო, და თუ ასე გაგრძელდებოდა „მალე იმის მოწმენიც გახდებოდა საზოგადოება, რომ ყოველ ქართულ სოფელს თავისი ბანკი ექნებოდა“... ავტორის აზრით, თუ ეს მოვლენა „ევროპულ სოფელში ბუნებრივად ჩაითვლებოდა, სადაც გლეხის განვითარება, კულტურა, ქონებრივი მდგომარეობა და ხელმოჭერილობა ერთმანეთზედ გადაბმულია და მკვიდრ საფუძველს ქმნის ამ ნაირ დანესებულებათა შენახვა-გაძლიერებისათვის“, ჩვენში იგი არა-ბუნებრივი იყო, ვინაიდან აქ არა თუ გლეხობა იყო წერა-კითხვის მცოდნე, არამედ რამდენიმე ინტელიგენტიც კი ძნე-

⁸⁶ ურნ. „ივერია“ (თბილისი-პარიზი), 1992, გვ. 126..

⁸⁷ ურნ. „კლდე“, 1913 წლის 25 ივლისი, გვ. 13.

ლად მოიძებნებოდა რაციონალური კრედიტის მონყობა როგორ შეძლებოდა", ასეთ პირობებში, შესაძლო იყო კრედიტს სარგებლურ ნაცვლად ზიანი მოეტანა გლუხეკაცისათვის. სესხის აღებას მისი დროული დაბრუნება თუ ვერ მოჰყვებოდა, მაშინ შეიძლებოდა გლუხი-კლიენტი ახალ ვალებში ჩავარდნილიყო. ამიტომ, დ. ვაჩნაძის მართებული მითითებით, ბოლო უნდა მოლებოდა სასოფლო-საკრედიტო ბანკების უთავბოლო ზრდას, რადგან გარეგნული მომხმარებლობის იქით "ქართული საკრედიტო კოოპერაციისათვის მუქარა იმალებოდა", მისი რჩევა იყო, არა ყოველ სოფელში, არამედ 7-10 სოფელს დაეარსებინა საკრედიტო ბანკი, სულ მცირე — 1500-2000 კომლისათვის, რათა თავისი საბანკო ოპერაციების მონყობა-გაძლიერება შეძლებოდა. ამაში იგი მეორე სასარგებლო მხარესაც ხედავდა: "იდეურ მხრითაც ამნაირ მონყობილობას საკრედიტო კოოპერაციისა დიდი მნიშვნელობა ეძლევა დღეს, როდესაც ქართულ სოფლის კარ-ჩაკეტილობა ცნობილია, როცა მეზობელ სოფლებს ერთმანეთში არაფერი საერთო არა აქვთ რა და ბევრჯელ მტრულადაც ეკიდებიან ერთმანეთს, ამნაირი შეერთება ერთ მძლავრ დაწესებულების ფარგლებში, დიდ სამსახურს გაუწევს სოფლის ხალხს ერთმანეთის გაცნობაში, ძმურ მიდგომაში და მხარის დაჭერაში საერთო ინტერესების დაცვის დროს"⁸⁸.

ყურნალი ამხელდა ისეთ კოოპერატივებს (მაგ. საზოგადოება "კახეთს"), რომლებიც არ ასრულებდნენ თავიანთსავე საზოგადოებების, თუ კოოპერატივების სანესდებო მოთხოვნებს... მხოლოდ მათი განხორციელებით იყო შესაძლებელი "კოოპერატიული საქმის სიკეთე. არ იყო რაციონალური და პრაქტიკულად გამართლებული ისიც, რომ თვით საზ-ბა "კახეთის" გამგეობა თბილისში იყო და არა კახეთში. ეს აუცილებელი იყო იმიტომაც, რომ კახეთის რკინიგზის მშენებლობის დამთავრების შემდეგ საჭირო აღარ იქნებოდა მაგ. ლვინის გადმოზიდვა ჯერ თბილისში, სანყობებში შენახვა და შემდეგ რუსეთში გაგზავნა, რაც ხარჯების გასამკვეცებას იწვევდა"⁸⁹.

დ. ვაჩნაძის აზრით ყველა ქართველისათვის ცხადი უნდა ყოფილიყო ის, რომ იმჟამად საზოგადო და საეკონომიო სარბიელზედ პირველად გამოსულ გლუხთა საკრედიტო კოოპერატივების "მონყობასა და სწორ გზაზედ დაყენებას დიდი ეროვნულ-პოლიტიკური მნიშვნელობა" ეძლეოდა. ამიტომ იმთავითვე უნდა ეზრუნათ იმაზე, რომ "ქართულ კოოპერატიულ მოძრაობას, დაწყებული პანია საკრედიტო ამხანაგობიდან დიდ საერთო კოოპერატიულ კავშირამდე მთლიანი და ეროვნული ხასიათი უნდა მისცემოდა, მით უმეტეს, რომ "საქართველოს მომავალი ნაციონალურ

⁸⁸ ჟურნ. "კლდე", 1913 წლის 12 მაისი, გვ. 1-2.

⁸⁹ იქვე, გვ. 3.

ცხოვრების წინსვლაში კოოპერატიული ორგანიზაციები დიდ როლს ითამაშებდნენ⁹⁰.

დ. ვაჩნაძე სამშობლოს ბედზე დაფიქრებული მამულიშვილის პოზიციიდან მკაცრად აკრიტიკებდა თბილისისა და ქუთაისის სათავადაზნაურო-საადგილმამულო ბანკებს, უპირატესად თბილისის ბანკის საქმიანობას, რომელიც დახმარების მაგივრად, ადგილმამულებს უყიდდა ქართველ მემამულეებს ვალების გადაუხდელობის გამო, თანაც უმეტესად სომხებზე... „იყიდება ქართული მიწა-წყალი, იყიდება სოფლები, იყიდება ქალაქები, ქართული მონასტრები, საყდრები...“, მისთვის ცოტა იმედის მომცემი იყო ის, რომ დას. საქართველოში, მოსახლეობის ძირითადად ერთგვაროვნების გამო, ქართველი მემამულისაგან გაყიდულ მიწას ისევ ქართველი ყიდულობდა“, მაშინ, როცა აღმ. საქართველოში ქართული მიწების ხელში ჩაგდებას სომხებთან ერთად ცდილობდნენ და აღწევდნენ კიდევ: რუსები, თათრები, ბერძნები⁹¹.

დ. ვაჩნაძეს, უპირველეს ყოვლისა, ის აღელვებდა, რომ ქართველ მეურნეთა მოყვანილი პროდუქციის ყიდვა-გაყიდვის ბედი სხვის ხელში იყო. მისი თქმით „პური, ღვინო, ხილი, აბრეშუმში, მატყლი, თამბაქო და ბევრი სხვა ჩვენი მეურნეობის ნაყოფი ჩალის ფასად მიაქვთ ათასგვარ გაშმაგებულ ჩარჩ-მოვახშეებს. ერთიერთმანეთს გადაბმულნი, შეკავშირებულნი საერთო ინტერესებით, მწყობრ რაზმ-რაზმად დათარეშობენ ისინი საქართველოში და ჰყვლეფენ ქართულ მეურნეობას“⁹².

მას არაერთი კონკრეტული ფაქტი მოჰყავდა თავისი განაცხადის დასადასტურებლად... და შემდეგ ყველას გასაგონად აცხადებდა: „სოფლის მეურნეობის ნაწარმთა გასაღება აუტანელ მდგომარეობაშია... ჩარჩების რკინის ბრჭყალებში მოექცა დღეს იგი და ვაი იმ მეურნეს ვინც გაბედავს თავის ნაწარმი თბილისის ბაზარზედ გამოიტანოს... მის ნაწარმს ბაზარი არა აქვს, რომ ეს ბაზარი ძლიერ ჩარჩთა რაზმის ხელშია — და რომ ეს ბაზარი ქართულ მეურნეობას მარტო აქვეითებს და ანადგურებს... დღევანდელი უმრავლესობა ჩარჩებისა საქართველოში სომხის ბურჟუაზიას ეკუთვნის, რომელიც მტრულად ეკიდება საქართველოს წინსვლას, გაძლიერებას, ცარცვა-გლეჯა ჩვენი მეურნეობისა ორკეცდება, ძლიერდება და პოლიტიკურ ელფერსაც იღებს. მით უმეტეს, რომ სათავეში ჩაუდგა ქ. თბილისი, სადაც დღეს ბატონობენ ხატისოვეები, არამიანცები, მანთაშევეები და რომლის ეკონომიკური პოლიტიკა

⁹⁰ ჟურნ. „კლდე“ 1913 წლის 26 მაისი, გვ. 1-2.

⁹¹ იქვე 4 გვ. 12.

⁹² იქვე, 15, გვ. 5.

სწარმოებს „ჰორიზონელების“ (თბილისში გამომავალი გაზეთი სომხურ ენაზე — გ. ს.) ხელმძღვანელობით⁹³.

დ. ვაჩნაძის აზრით, თბილისის სომეხთა ბურჟუაზია გაშმაგებულიად იბრძოდა არა მარტო თბილისის, არამედ საპრევიციო ქალაქებშიც დასამკვიდრებლად, რის შემდეგაც თუ მათი ოცნება აღსრულდებოდა „სრულიად დაიპყრობდნენ ქართულ ეკონომიურ ცხოვრებას“, მაგრამ ავტორს სწამდა, რომ „ქართველობა დღითიდღე გონზედ მოდიოდა და მტერ-მოყვარეს კარგად სცნობდა“, და მას სჯეროდა, რომ ეს იქნებოდა თავდები მომავალში უფრო ეფექტური ბრძოლის გასაჩაღებლად „თავის ეროვნულ ინტერესების დასაცავად“⁹⁴.

დ. ვაჩნაძეს აუცილებლად მიაჩნდა ისეთი ჟურნალ-გაზეთების დაარსება, რომელიც სისტემატურად გააშუქებდა საქართველოს სოფლის მეურნეობის საკითხებს... ამასთან ერთად გაზეთებს უნდა აღენიშნათ, თუ რამდენად შეეფერებოდა ამა თუ იმ სოფელს და მისი ცხოვრების პირობებს ესა თუ ის კულტურულ-ეკონომიკური ხასიათის საქმიანობა; რომ სასოფლო გაზეთებს „ყველგან და ყველაფერში უნდა ეხელმძღვანელათ ეროვნულის თვალსაზრისით... ამისათვის კი უპირველესად საჭირო იყო ხალხში ეროვნული თვითშეგნების ცეცხლის ანთება...“ „კლდეისტივის“ აზრით, ეროვნული ინტერესებიდან გამომდინარე იმჟამად გამომავალ ქართულ სასოფლო გაზეთებს „ქართლსა“ და „ხმა კახეთისას“ ყველა გვერდში უნდა ამოდგომოდა, რათა მათ „შეძლებოდათ თავიანთი საქმიანობის გაუმჯობესება, როგორც შინაარსობრივად, ისე ნივთიერად“, ბოროტებათა წინააღმდეგ საბრძოლველად და სოფლის მოსახლეობის თვითცნობიერების გზაზედ გამოსაყვანად⁹⁵.

ჟურნალი მიესალმებოდა ქართული სასოფლო გაზეთების გამოსვლას და დღეგრძელობას უსურვებდა მათ, რომლებსაც იმ უკუღმართ დროში „თითქმის სკოლის მაგივრობა უნდა გაენიათ და უფრო მახლობელი გამხდარიყვნენ ხალხისათვის, სოფლისათვის და ხელმძღვანელად ქცეულიყვნენ ყველა პრაქტიკულ საქმეში და ერთი მიზნისაკენ ნაემართათ მათი საქმიანობა“⁹⁶.

ერთ-ერთ სარედაქციო წერილში ჟურნალი დიდ იმედებს ამყარებდა სოფლის ინტელიგენციაზე (მასწავლებლები, ექიმები, მღვდლები, მემამულეები...), რომლებსაც ხელი უნდა შეეწყოთ გლეხობისათვის, რათა მათ პროგრესული გზით წარემართათ თავიანთი სამეურნეო საქმიანობა... „ხალხის ცხოვრების გამდიდრებას,

⁹³ ჟურნ. „კლდე“, 1915 წლის 5 აპრილი, გვ. 7.

⁹⁴ იქვე, გვ. 6-7.

⁹⁵ იქვე, 1912 წლის 2 დეკემბერი, გვ. 13.

⁹⁶ იქვე.

მის კულტურულ-ეკონომიურ ზრდას... სოფლის ყველა ინტელი-
გენტმა, ვისაც სამშობლოს ბედ-ილბალი თავის ბედ-ილბლად მიაჩ-
ნია, ვისაც გული შესტიკივა ხალხისათვის, უნდა ნააშველოს მად-
ლიანი ხელი... თავისი ცოდნით, მხნეობით, მაგალითით უნდა გამოი-
ყვანოს გლეხკაცი კულტურულ გზაზედ...⁹⁷

„კლდე“ ერთ-ერთ თავის ნომერში ადგილს უთმობდა საკმაოდ
ვრცელ ნერილს „კოოპერაციის მნიშვნელობის“ შესახებ, რომელიც
ჟურნალის კორესპონდენტს იოსებ ირემაშვილს (შემდგომში ცნო-
ბილ სოც.-დემოკრატს, მენშევიკს, ემიგრანტს, სტალინის თანაკ-
ლასელს...) ეკუთვნოდა. ნერილის ავტორის აზრით, კოოპერაციას
„განსაკუთრებული მნიშვნელობა ჰქონდა ქართველებისათვის...
კოოპერაცია ერთი საუკეთესო გზა და საშუალებათაგანი იყო ჩვენი
ქვეყნის ეკონომიურ-კულტურული დონის ასანევადა“; სადაც ქართ-
ველ ხალხს შეეძლო თავი შეეფარებია „ვით საუცხოვო ნავთსაყუ-
დელში და მით ეხსნა თავი გამძვინვარებული ეკონომიური ცხოვრე-
ბის სტიქიისაგან“⁹⁸.

რ. გაბაშვილის ერთ-ერთ ანალიტიკური ხასიათის ნერილში,
საუბარია მებაღეობისა და მევენახეობის ორ ამხანაგობაზე, რომ-
ლებსაც იმ დროისათვის უკვე თვალსაჩინო წარმატებები ჰქონდათ
მოპოვებული. აღსანიშნავია, რომ სწორედ მათ პრაქტიკული
საქმიანობის შედეგებში პოულობდა ხორცშესხმას ის ჩანაფიქრი,
რომლის შესახებაც „კლდეისტებს“ თავიანთი ჟურნალის პირველ-
სავე ნომერში ჰქონდათ გაცხადებული: კოოპერატიულ საქმეს
დიდი მომავალი ექნებოდა ჩვენში და იგი „თითქმის ერთადერთი
საშუალება იქნებოდა ბრძოლისა ჩარჩულ წრეებთან, რომელნიც
შეუბრალებლად ყვლეფდნენ სოფელს და მის ნაწარმოებ პროდუ-
ქტებს გრომის ფასად იგდებდნენ ხელში, რათა შემდეგ მამისისხლად
გაესაღებიათ...“⁹⁹.

მთელ საქართველოს მოდებული ეს ჩარჩ-ვაჭრები, მართლაც,
რომ სისხლს წოვდნენ საქართველოს სოფლის მოსახლეობას, მათ
შორის „გაჭირვებულს მემამულეს, ნამეტნავად პატარას, და მეორეს
მხრით ზარმაცს — რომელსაც ერჩია დამშვიდებით მიეღო გროშები
და ერთბაშად თავიდან მოეშორებია თავისი მოსავალი“.

რ. გაბაშვილის აზრით, იმხანად საომარი მოქმედებების თუ სხვა
მიზეზთა გამო, ცხოვრების გართულებამ ჩვენი თავად-აზნაურობა
და, მითუმეტეს, გლეხობა, იძულებული გახადა „შრომის შეყვარე-
ბის, შრომის გაატიონების“ (ხაზგასმა რ. გაბაშვილისა — გ. ს.) და
ამის საბუთი მარტო თეორეტიული მოსაზრებანი კი არ იყო, არამედ

⁹⁷ 97 ჟურნ. „კლდე“, 1912 წლის 2 დეკემბერი, გვ. 1.

⁹⁸ იქვე 1914 წლის 23 მარტი, 12, გვ.

⁹⁹ იქვე, 1915 წლის 5 აპრილი.

ის აურაცხელი სანიმუშო ბალები, ვენახები, საკრედიტო თუ სამომხმარებლო საზოგადოებანი, რომლებიც ასე რიგად მომრავლებულიყვნენ ქართლ-კახეთის ტერიტორიაზე¹⁰⁰. ამის დასტურად მოჰყავდა ამხანაგობა „ქართლის“ მაგალითი, რომელიც იმის მაჩვენებელი იყო „თუ როგორ გაიზარდა ერთის მხრით საქმიანობა ჩვენში და მეორეს მხრით შეგნება“, რომ მთელი ქართლი მოფენილი იყო ხილის ბალებით და იქაური ხილი, აკმაყოფილებდა არა მარტო საქრთველოს, არამედ ბაქოს, როსტოვის, ოდესის და სხვ. ბაზრებს.

ავტორის აზრით, დღის წესრიგში იდგა საკითხი მწყობრი ორგანიზაციის შექმნისა, რომელიც მისი გასაღების ორგანიზაციისათვის იზრუნებდა. ამის გაკეთება კი ძალთა კონსოლიდაციით მოხერხდებოდა ამხანაგობის გამგეობის წევრთა მიერ პირადი მაგალითის მიცემით, როცა საერთო საქმის მოწყობა — მისი საკუთარი საქმეც იყო, მის საკუთრებას შეადგენდა და არა ისე დაუწყებდა ყურებას, როგორც უცხო დანესებულებას... ასეთი გულმოდგინებით საქმის კეთება შესაძლებელს გახდიდა, იმას, რომ „ხილი „ქართლის“, როგორც პირველი საჭიროების საგანი, ისევე როგორც ღვინო „კახეთისა“, თავისთავად გაიკვლევდა გზასა, რომელსაც წინ წაუძღვებოდა თავისივე ღირსება“. ამასთან ერთად ასეთი კოოპერატივების ქსელი ფართოდ უნდა მოფენოდა „მთელს ჩვენს სამშობლოს, რათა ბრძოლა არსებობისათვის გაგვიადვილებდა და ჩვენის ორგანიზაციით დაგვერღვია მტრის იერიშები, რომლებიც ჩვენს ზღუდეებს ეხეთქებოდნენ“¹⁰¹ —ო დაასკვნოდა რ. გაბაშვილი.

„კლდის“ ფურცლებზე არაერთი საინტერესო მასალაა დასტამბული, რომლებშიც გააზრებულად არის წარმოჩენილი, თავადაზნაურობის, როგორც „საორგანიზაციო ერთეულის“ და არა, როგორც კერძო პირის — პეტრეს ან ჰაველეს დამსახურება ერის წინაშე. ჟურნალის თქმით, „დაუდევრობისა და უცოდინარობის შედეგი იყო ის“, როცა მთელ თავად-აზნაურობას ბრალს სდებდნენ ამა თუ იმ კერძო პიროვნების მიერ არაკეთილშობილური, თუ უფრო მეტი ნაკლულოვანი საქმის ჩადენისა გამო... კორესპონდენტ „შეუპოვარის“ აზრით „ვისაც თავად-აზნაურობაზე, როგორც ორგანიზაციაზე უნდა მსჯელობა, უნდა გაეცნოს მის სხვა ორგანოთა მოქმედებას, განიხილოს მისი საზოგადო კრებების კომისიების ნაწარმოებანი და მხოლოდ ამ გზით მოპოვებული მასალით ისარგებლოს და მხოლოდ ამის შემდეგ გამოიყვანოს ესა თუ ის დასკვნები“¹⁰²—ო.

მომდევნო ნომერში ჟურნალი კონკრეტული ფაქტების მოტანით ასურათხატებდა ქართლ-კახეთის თავად-აზნაურობის

¹⁰⁰ ჟურნ. „კლდე“, 1915 წლის 5 აპრილი.

¹⁰¹ იქვე, გვ. 6

¹⁰² იქვე, 1913 წლის 6 იანვარი, გვ. 15.

საქმიანობას, მის კულტურულ როლს მთელს საქართველოს ცხოვრებაში. ავტორი განსაკუთრებულ ყურადღებას ამახვილებდა თავად-აზნაურობაზე, როგორც ერის კულტურულ-ეკონომიკურ ძალაზე, როგორც ისეთ დანესებულებაზე, რომელიც ზურგს უმაგრებდა და ასაზრდოებდა თითქმის ყველა კულტურულ დანესებულებას, რომელიც იმჟამად გააჩნდათ ქართველებს... მოჰყავდა კონკრეტული მონაცემები იმის წარმოსაჩენად, თუ რას ხმარდებოდა თავად-აზნაურთა ბანკის შემოსავლის საკმაოდ დიდი ნაწილი, როგორ ან რამდენად აკმაყოფილებდა იგი საეროვნო მოთხოვნებს... მაგალითისათვის 1912 წლის თავად-აზნაურობის სახარჯთაღრიცხვო შემოსავალი მიუთითებდა, რომლის რაოდენობა მთლიანად 311.013 მანეთსა და 19 კაპიკს შეადგენდა... აქედან 124.953 მან და 8 კაპ დახარჯული იყო ელექტრო-სადგურისა და ქარვასლის გამართული მუშაობისათვის, დარჩენილი 186.060 მანეთი და 11 კაპიკიდან 175.476 მან. და 40 კაპიკი დახარჯულია: სათავად-აზნაურო გინაზიის (80.000 მან.), სტიპენდიების (8.000 მან.), ქართული თეატრის (12.540 მან.), სხვადასხვა საზოგადოების (11.800 მან.), ქართული მუზეუმის (5.000 მან.), კახეთის რკინიგზის ხარჯის (2.000 მან.), აგრარული კომისიის (45.135 მან და 40 კაპ.) დასაფინანსებლად.

ყურნალის დასკვნით „თითქმის მთელი წლიური შემოსავალი ხმარდებოდა ქართულ ეკონომიურ და კულტურულ“ დანესებულებათა შენახვას. აქვე ხაზგასმით იყო ნათქვამი იმაზე, თუ რა მდგომარეობაში აღმოჩნდებოდა „ჩვენი ეროვნული ცხოვრება, ხსენებული დახმარება რომ არ ჰქონოდა თავად-აზნაურობის მხრიდან: მაშინ, ვერც სხვა მრავალი ისეთი დანესებულება ვერ იბოგინებდა... ამიტომ ყურნალს მიაჩნდა, რომ მეტი ყურადღება დათმობოდა ქართველ თავად-აზნაურობას, რათა იგი გაძლიერებულიყო და გამდიდრებულიყო, რითაც ხელი შეეწყობოდა ჩვენს ეროვნულ აღორძინებასაც“¹⁰³.

¹⁰³ ყურნ. „კლდე“, 1913 წლის 20 იანვარი, გვ. 13-15.

ყურნალი „კლდე“ და ივერიის ეკლესიის საკითხი

საქართველოს მართლმადიდებლური ეკლესიის ავტოკეფალიის საკითხიც ერთ-ერთი უპირველესი საზრუნავი იყო ყურნალისათვის. ამ პრობლემისადმი მიძღვნილ მასალებში არა მარტო ავტოკეფალიის აღდგენის აუცილებლობაზე იყო საუბარი, არამედ იმაზეც, რომ საქართველოს ეკლესიას დაბრუნებოდა რუსეთის მიერ მიტაცებული მისი კუთვნილი ქონება, რომელიც „რამდენიმე ათეული და ასეული მილიონობით ალირიცხებოდა“. „კლდის“ აზრით, საქართველოს ეკლესიას ამის მოთხოვნის უფლება ჰქონდა, როგორც ნებაყოფლობით შესულს რუსეთის წმინდა სინოდის შემადგენლობაში, რაც 1783 წელს დადებული „ტრაქტატის“ მერვე არტიკულს შეესაბამებოდა. ამასთან ერთად, რჩებოდა — რა დამოუკიდებელი, ქართული ეკლესიის წინამძღოლს დამატებით უნდა „მიბოძებოდა ტიტლოსი უწმინდესის სინოდის ჩლენობისა“¹⁰⁴.

თუ როგორ შეასრულა ეს პირობა რუსეთის მხარემ კარგადაც ნობილი... მან ერთის ხელის მოსმით საერთოდ გააუქმა უძველესი ივერიის ეკლესიის დამოუკიდებლობა და იგი რიგით საეგზარქოსოდ აქცია. ასე რომ არავითარ „ტიტლოსსა“ და სინოდის „ჩლენობაზე“ საფიქრალი აღარ დაუტოვეს ჩვენი ეკლესიის საჭეთმპყრობლებს... ამას სჩადიოდა რუსული ეკლესია, რომელმაც თვითონ მხოლოდ „XVII საუკუნეში სიხარულით გადაიგდო საბერძნეთის ეკლესიის უღელი“, რომლისგანაც მისი ავტოკეფალურობა საუკუნეების განმავლობაში დათრგუნვილი იყო. „რუსეთსა და მის ეკლესიას სურდა დაეკანონებია ის უსამართლობა, რომელიც ასი წლის წინათ ჩაიდინეს“ საქართველოს მიმართ...¹⁰⁵.

საქართველოს ეკლესიის შესახებ „კლდეში“ გამოქვეყნებულ მრავალრიცხოვან მასალათა შორის განსაკუთრებულ ყურადღებას იპყრობს შალვა ამირეჯიბის წერილები, რომლებშიც ნათლადაა წარმოჩენილი ქართული ეკლესიის როლი ეროვნული სულისკვეთების განმტკიცებისა და შენარჩუნების საქმეში; მისი უდიდესი დამსახურება ქართული მწერლობის, კულტურის, ხელოვნების განვითარებაში და ა. შ. „ეკლესია ერთი უდიდესი ფაქტორთაგანი იყო ძველის საქართველოსი, — წერდა შ. ამირეჯიბი. იგი იყო არა მარტო სავანე სარწმუნოებრივ ცხოვრებისა, არამედ ეკლესიაში თავს

¹⁰⁴ „გეორგიევსკის ტრაქტატი“, გვ. 69.

¹⁰⁵ ყურნ. „კლდე“, 1913 წლის 14 აპრილი, გვ. 5.

იყრიდა ყოველი დარგი კულტურისა“, რომ მუდამ ქართულ ეკლესიასთან იყო დაკავშირებული ქართველი ადამიანის ზნეობრივი და სულიერი ფორმირება... სწორედ იქ შეიქმნა უდიდესი ღირებულებების საუნჯე ქართველი ერისა და ა. შ.

XX საუკუნის 10-ან წლებში რუსეთის წმ. სინოდი საქართველოს საეგზარქოსოს საერთოდ გაუქმების თაობაზე აყენებდა საკითხს, რაც ქართველი ერის სულიერების საბოლოოდ ჩაკვლას ისახავდა მიზნად. ასეთი იყო სურვილი ქართველთა მოძულე რეაქციონერ ოსტორგოვისა და მისი მსგავსი სხვა რუსი „მამებისა“, რომლებიც იმხანად წმ. სინოდის საეკლესიო კრებაზე გასატანად ამზადებდნენ ამ საკითხს.

„კლდეში“ გამოქვეყნებულ წერილში „ორგვარი მდგომარეობა“, რომლის ავტორია ვინმე „ბერი“ /კირიონ II/, საუბარი იყო იმის თაობაზე, თუ რას ნიშნავდა ქართველისათვის ეკლესიის ავტოკეფალიის აღდგენა, ანდა პირიქით — მისთვის ამ უფლების შესახებ ფიქრის საბოლოო ჩამორთმევა. ავტორის აზრით, თუ რუსი საეკლესიო ბიუროკრატიის ეს უკანასკნელი მცდელობა პრაქტიკულად განხორციელდებოდა, მაშინ ქართული ეკლესია საბოლოოდ მიერთებული შეიქმნებოდა რუსეთის ეკლესიასთან და მისი უწმინდესი სინოდის ხელქვეითი გახდებოდა; მას წაერთმეოდა ისიც კი რაც აქამომდე ჰქონდა, ანუ გაუქმდებოდა ეგზარქატი და მისი ქონება ფაქტიურადაც და იურიდიულადაც რუსეთის წმ. სინოდის საკუთრებად იქცეოდა; რომ ქართული მართლმადიდებლური მრავალსაუკუნოვანი ეკლესია ძალაუვნებურად დაჰკარგავდა თავის სახეს, ინდივიდუალობას და ტრადიციებს; ქართულ ეკლესიაში შემოღებული იქნებოდა სლავიანური წირვა-ლოცვა და გალობა; ხოლო ქართველ მღვდლებსა და ეპისკოპოსებს, როგორც უბრალო სასულიერო მოხელეებს რუსეთის გუბერნიებში გადაიყვანდნენ და მათ ადგილას რუსეთიდან მოწვეულ სამღვდლოებს დანიშნავდნენ...“¹⁰⁶.

ასეთი იყო ჩანაფიქრი, რომლის განხორციელება ქართველ საზოგადოებას არაფრით არ უნდა დაეშვა...

იმავე ხანებში ქვეყნდება შ. ამირეჯიბის სტატია „საქართველოს ეკლესიის საკითხი“, რომელიც ისტორიულ ჭრილში წარმოაჩენს საკითხის არსს და ერთხელ კიდევ მოაგონებს მკითხველ საზოგადოებას, თუ რა სიკეთე მოუტანა ქართველ ხალხს რუსეთთან დამოყვრებამ საერთოდ და, კერძოდ, ივერიის უძველეს ეკლესიას... „1818 წელს მოისპო საქართველოს ეკლესიის დამოუკიდებლობა, — წერდა იგი, — და საკათალიკოსოს მაგივრად საქართველოში ეგზარქატი გამოცხადდა. ამ აქტით მოისპო უძველესი ეკლესიის დამოუკიდე-

¹⁰⁶ ურნ. „კლდე“, 1913 წლის 28 აპრილი, გვ.2.

ბლობა, მაგრამ რადგან უბრალო ბიუროკრატიული აქტი ავტოკეფალიის მოსპობისა არ იყო აქტი კანონიკური, ვინაიდან იგი მსოფლიო საეკლესიო კრების დადგენილებიდან არ გამომდინარეობდა... ამიტომ იგი (ე. ი. საქართველოს ეკლესია — გ. ს.) დღესაც ავტოკეფალურად უნდა ჩაითვალოს¹⁰⁷.

ამიტომ საჭირო იყო ქართველი სამღვდელოებისა და მისი მართლმადიდებელ სამწყსოს ზრუნვა ქართული ეკლესიის უფლებების დასაბრუნებლად, რომელიც წმინდა კანონების უგულვებელყოფით მას რუსეთის ხელისუფლებამ წაართვა... ეს ბრძოლა იმ წლებში კი მთელი სიმწვავეით მიმდინარეობდა, რამაც ბოლოსდაბოლოს ხელმწიფე-იმპერატორამდეც მიაღწია. მან კი იწება და რუსეთის საეკლესიო კრებას დაავალა ამ საკითხის განხილვა... და თუ ეს კრება საქართველოს ეკლესიის დამოუკიდებლობის გაუქმებას ისევ დააკანონებდა, — შ. ამირეჯიბის აზრით, — ეს იქნებოდა მძიმე ლოდის დადება ჩვენი სულიერი და სარწმუნოებრივი ცხოვრებისათვის. „საუკუნეთა განმავლობაში ქართველმა ხალხმა ტანჯვით ზიდა ქრისტეს ჯვარი, არ გადაუცია იგი ურწმუნოებისათვის და ახლა მისი დაკარგვა, ჩვენ სულიერ დაკარგვას ნიშნავს“¹⁰⁸, — დაასკენიდა იგი.

„კლდისტებს“ ისიც კარგად მოეხსენებოდათ, რომ რუსეთის საუკუნოვანი ბატონობის შედეგად, ქართული ეკლესიის შიგნითაც აღარ იყო ერთიანი სულისკვეთება, აღარ იყო ერთიანი ეროვნული ორგანიზმი... ყველა თავის სამრეკლოდან რეკდა/ და სხვადასხვა რანგის სასულიერო მოღვაწეთა უმრავლესობა თავის კეთილდღეობაზე, სამსახურის შოვნასა და ცხოვრების მოწყობაზე ზრუნავდა. სწორედ ამაზე ამახვილებდა ყურადღებას სოც.-ფედერალისტური პარტიის ერთ-ერთი ლიდერი სამსონ დადიანი „კლდის“ ფურცლებზე დასტამბულ თავის სტატიაში. მისი აზრით, აღარ იყო ქართველი სამღვდელოება, როგორც ერთიანი და მჭიდრო კავშირი, ერთი ინტერესებით გამსჭვალული ერთეული. საერთო ინტერესების გაქრობის გამო იყო მხოლოდ ესა თუ ის მღვდელი, ესა თუ ის არქიელი, ესა თუ ის ბერ-მონაზონი... რომ მხოლოდ კერძო პირთა კეთილდღეობას ეწირებოდა ერის რწმენაც და მისი თავისუფალი ეკლესიაც...

„არავითარი მაღალი იდეალი, — წერდა სამსონ დადიანი, — არავითარი საქვეყნო სამსახური არ აინტერესებს სამღვდელოებას, როგორც ერთეულს და მისი დამახასიათებელი თვისება ხალხის ზურგზე მეტხორცად და პარაზიტულად არსებობაა. თუ ოდესმე ჩვენი სამღვდელოება ერთი აუცილებელი ბურჯი იყო ეროვნული

¹⁰⁷ შალვა ამირეჯიბი. წიგნი პირველი. თბ., 1997, გვ. 103.

¹⁰⁸ იქვე.

აღორძინებისა, ეროვნული კულტურისა, თუ იგი ინახავდა და ამშვენიერებდა ჩვენს ენას, ჩვენს მწერლობას, თუ მას საერთო ეროვნული ინტერესებიცა ჰქონდა, დღეს ეს გაქრა და გაქრა პოლიტიკური კონიუნქტურის შეცვლით, პოლიტიკური ცვლილებების წყალობით¹⁰⁹.

ამიტომ, ავტორის თქმით, ერთ-ერთი უპირველესი საზრუნავი ქართული მართლმადიდებელი ეკლესიისათვის ავტოკეფალიის დაბრუნება უნდა ყოფილიყო, რაც რამდენადმე ხელს შეუწყობდა „ჩვენს ეროვნულ შეგნებას და ჩვენი ეროვნული ფიზიონომიის გამოხატვას“¹¹⁰.

„კლდეისტიები“ აქაც, ისე როგორც სხვა საკითხებზე საუბრისას, დაუნდობლად ამხელდნენ ყველას — პიროვნება იქნებოდა იგი თუ პოლიტიკური პარტია, ვინც კი ქართული მართლმადიდებლური ეკლესიის საქმეს სასხვათაშორისოდ მიიჩნევდა. განსაკუთრებით მიზანში ყავდათ ამოღებული „ულმერთო“ სოციალისტური პარტიები, მათ შორის უპირველესად სოც.-დემოკრატები, რომლებიც თავიანთი იდეური მრწამსიდან გამომდინარე ეკლესიასთან (რელიგიასთან) დაკავშირებულ საკითხთა განხილვა-გარჩევაში მონაწილეობას პრინციპულად არ ლებულობდნენ... მაგრამ იმ ხანებში შექმნილი სიტუაციიდან გამომდინარე, მათაც კი რამდენადმე შეიცვალეს პოზიცია და რუსეთის III სახელმწიფო სათათბიროს ტრიბუნა გამოიყენეს, რათა ქვეყნისათვის ემცნოთ რუსეთის ეკლესიის წმ. სინოდის სიძულვილიანი დამოკიდებულება ივერიის უძველესი მართლმადიდებლური ეკლესიისადმი. ეს მისია თავისი პარტიის სახელით დეპუტატმა ევგ. გეგეჭკორმა იკისრა. 1912 წლის 6 მარტს მან ვრცელი და დასაბუთებული სიტყვა წარმოსთქვა... „მე არ შემძლია გაჩუმება, როცა ქართველი ერის ეროვნული ღირსების შეგინებასა და ფეხით გათელვას ვხედავ...“, როცა რუსეთის მართლმადიდებლური ეკლესიისაგან „100 წლის მანძილზე ქართულ ეკლესიას შეურაცხყოფისა და ძალადობის მეტი არა უნახავს რა...“ და ა. შ. მის მიერ მოხმობილმა კონკრეტულმა ფაქტებმა შოვინისტი დეპუტატებიც კი გააოგნა...“¹¹¹

უფრო ამაღლი „კლდე“ ამასთან დაკავშირებით წერდა: „ქართული ეკლესიის საკითხი ამჟამად იმდენად საყურადღებოა, რომ სრული სიჩუმით ვერც სოც.-დემოკრატები უვლიან მას გვერდს. თუმცა ნაჯექ-უუჯექობით დახასიათებული სიტყვა იყო, მაგრამ მაინც III

¹⁰⁹ უფრო „კლდე“, 1914 წლის 26 იანვარი, გვ. 13.

¹¹⁰ იქვე, გვ. 14.

¹¹¹ უფრო ვრცლად იხ. გელა საითიძე — „ევგენი გეგეჭკორი — რუსეთის III სახელმწიფო სათათბიროს დეპუტატი“. საისტორიო აღმანახი „კლიო“, 1999, 5. თბ., გვ. 164-166.

სათათბიროში ე. გეგეჭკორი იძულებული გახდა კათედრიდან პასუხი გაეცა ამ საკითხზე¹¹²—ო.

ამას გარდა, საკითხი დგებოდა იმის შესახებაც, თუ რა ბედი ეწეოდა საუკუნეების მანძილზე შექმნილ ქართული კულტურის მაჩვენებელ საუნჯეებს, რომლებიც ქართულ ეკლესიის კუთვნილებას და მთელი ერის საგანძურს წარმოადგენდა. აქაც უიმედო სურათი იხატებოდა. „კლდეისტა“ აზრით, ყველაფერი ის ხელიდან წავიდოდა, დაცარიელდებოდნენ ქართული ეკლესია-მონასტრები, ქართული ხელოვნების საუკეთესო ნიმუშები რუსეთის სატახტო ქალაქების მუზეუმებში ამოჰყოფდნენ თავს. ამის სამწუხარო მაგალითები კი არა ერთი იყო ქართველი ხალხის ცხოვრებაში, როცა რუსმა ბიუროკრატებმა (კოვალენსკიმ, ლევაშოვმა და სხვ.) გაძარცვეს ქართული ეკლესიები, დაანგრიეს ანდა გადააკეთეს ისინი რუსული არქიტექტურის ყაიდაზე, ჩამოფხიკეს ან საერთოდ მოსპეს უნიკალური ფრესკები და მოზაიკები და ა. შ. ამიტომ ქართველ საზოგადოებას უნდა გაეცნობიერებია ის შედეგები, რაც რუს შოვინისტ-რეაქციონერთა სურვილის განხორციელებას მოჰყვებოდა და ქართველი ერი დაჰკარგავდა თავის ორიგინალურ სახეს, რომელიც მას წარსულიდან ჰქონდა ნაანდერძევი... ერთხელ კიდევ უნდა გაესიგრძეგანებინათ ის, რასაც მთელი საუკუნის მანძილზე განსაკუთრებული დაჟინებით ექცეოდნენ ივერიის ეკლესია-მონასტრებს, ანიავებდნენ ან ითვისებდნენ მის ქონებას და ყოველ ღონეს მიმართავდნენ ქართველი მართლმორწმუნე ერის გადაგვარებისათვის... მაგრამ ჩვენდა საბედნიეროდ, თვით რუსთა შორისაც იყო არაერთი მოღვაწე და ივერიის ეკლესიის გულწრფელი მოყვარული, რომელიც ხმას იმაღლებდა უკანონობის წინააღმდეგ: „რამდენადაც ცხოვრება მძიმე შეიქმნება ქართველისათვის, იმდენად მეტად გაძლიერდება მათი სიყვარული სამშობლოსადმი. ქართველი ერი განმტკიცდება, გაძლიერდება და არასოდეს არ მოკვდება იგი“¹¹³—ო, — წერდა ნიკოლოზ დურნოვო.

პირველი მსოფლიო ომის დანყებამ რამდენადმე შეარბილა რუსეთის წმ. სინოდის დამოკიდებულება ქართული ეკლესიისადმი... მისი დაგენილებით განხორციელდა უმაღლეს სასულიერო პოსტზე მყოფი პიროვნების, ქართველებისადმი არაკეთილად განწყობილ ეგზარხოსის პიმენის განთავისუფლება და მის ნაცვლად — ეპისკოპოსი პიტირიმი იქნა დანიშნული... იგი ზემოთხსენებული ნ. დურნოვოს მონაფედ ითვლებოდა და ქართული ეკლესიისა და

¹¹² ურნ. „კლდე“, 1914 წლის 4 მაისი, გვ. 4.

¹¹³ იქვე, 1913 წლის 23 ივნისი, გვ. 10.

ქართველი ხალხისადმი კეთილად იყო განწყობილი...¹¹⁴ 1915 წლის 14 იანვარს, ნმ. ნინოს ხსენების დღეს, იგი საქართველოში ჩამოვიდა და სიონის ტაძარში ძალზე გულთბილი სიტყვა წარმოსთქვა მრავალრიცხოვანი მორწმუნეების წინაშე, რამაც ქართველი საზოგადოების დიდ ნაწილს ქართული ეკლესიის მდგომარეობის გაუმჯობესების იმედი ჩაუნერგა, მითუმეტეს ეს საკითხი იმხანად ესეოდენ აქტუალურად იდგა... ეს იმედი იმაში აირეკლებოდა, რომ სასულიერო და საერო ხელისუფლებისაგან დევნილი ცნობილი ქართველი საეკლესიო მოღვაწე ეპისკოპოსი კირიონი (საძაგლიშვილი) ქართული ეკლესიის საჭეთმპყრობელი გახდებოდა... ეს კი, როგორც ვთქვით, არ მოხდა... ამასთან დაკავშირებით ჟურნალი „კლდე“ აღნიშნავდა: „საქართველოს საეგზარქოსოს სათავეში დიდად სათნოსიანი, პატივცემული და ქართველთა სიყვარულის მომპოვებელი არქიეპისკოპოსი პიტირიმი ბრძანდება“, მაინც ვერ ხერხდება მსცოვანი კირიონისა და დავითის რუსეთიდან გადმოყვანა, რაც „მეტად თავზარდამცემი და შემადრწუნებელი ამბავია ქართველებისათვის“; ვინაიდან რაც უნდა „პატიოსანი, საყვარელი არ იყვეს არაქართველი მღვდელმთავარი, მაინც ვერ შთაბერავს მაცოცხლებელ ძალას ჩვენს ეკლესიას. იგი ბუნებრივად, ისტორიული აღზრდით, შეხედულებით, მიმართულებით ვერ იქნებოდა გამომხატველი საქართველოს ეკლესიის ტრადიციებისა და იდეალებისა“¹¹⁵.

ამ თემაზე სიტყვას აღარ გავაგრძელებთ, მხოლოდ ხაზგასმით აღვნიშნავთ, რომ ჟურნალ „კლდეს“ და შემდეგ გაზეთ „საქართველოს“ უდიდესი წვლილი მიუძღვოდათ იმაში, რომ ცარიზმის დამხობიდან დაახლოებით ორი კვირის თავზე (1917 წლის 12 მარტს) ქართულმა ეკლესიამ 105 წლის წინათ რუსეთის მიერ ძალით გაუქმებული დამოუკიდებლობა (ავტოკეფალია) აღიდგინა. არ უნდა გამოვრიცხოთ ისიც, რომ ამ საქმეში გარკვეული როლი ითამაშა იმჟამად უკვე სრულიად რუსეთის პატრიარქმა პიტირიმმა...

¹¹⁴ უფრო ვრცლად იხ. გელა საითიძე – „ქართველთა მოყვარე რუსი...“, ჟურნ. „ომეგა“ 2002 წლის დეკემბერი, გვ. 70-75.

¹¹⁵ ჟურნ. „კლდე“, 1915 წლის 28 თებერვალი, გვ. 2.

ჟურნალი „კლდე“ და კახეთის რკინიგზის მშენებლობის საკითხი

ჟურნალი გამოსვლის პირველი დღეებიდანვე განსაკუთრებული ყურადღებით ეპყრობოდა იმუამად მშენებარე კახეთის რკინიგზის საკითხს. „კლდისტებს“ მიაჩნდათ, რომ ამ ობიექტის მშენებლობას არა მარტო ეკონომიკური და სოციალური, არამედ უდიდესი პოლიტიკური და ეროვნული მნიშვნელობა ჰქონდა ქართველი ერის თვითმყოფადობის შენარჩუნების საქმეში.

აღსანიშნავია, რომ კახეთის რკინიგზის მშენებლობის იდეა XIX საუკუნის 70-80-იანი წლებიდან წარმოიშვა. იგი რუსეთის იმპერიის ადგილობრივი ხელისუფლების ინტერესების სფეროში შედიოდა. მონინავე ქართველი საზოგადოებაც დიდ დაინტერესებას იჩენდა კახეთის — თბილისთან და დანარჩენ საქართველოსთან სატრანსპორტო კავშირისადმი. ეს თემა აღმოსავლეთ საქართველოს თავადაზნაურთა დეპუტატების საკრებულოს მუდმივი ფიქრისა და განსჯის საგანი იყო. მიმდინარეობდა ადგილმდებარეობის ყოველმხრივ გამოკვლევა და საბოლოო პროექტირებისათვის ოპტიმალური ვარიანტის შერჩევა. 1904 წლისათვის სარკინიგზო კომისიას თითქმის დამთავრებული ჰქონდა სახელმწიფოს ხაზინის ხარჯზე გზის ტექნიკური გამოკვლევა, მაგრამ მშენებლობის პრაქტიკული დაწყების საქმეს რუსეთ-იაპონიის ომმა შეუშალა ხელი... 1908 წელს თბილისის გუბერნიის თავადაზნაურთა მიერ ისევ აღძრულ იქნა კახეთის რკინიგზის გაყვანის საკითხი და მიღებულ იქნა კონცეფსია. დამტკიცებულ იქნა მიმართულება: ნავთლუღი-მარტყოფი-ჩალაუბანი-თელავი, რომლის სიგრძე 165 ვერსტს შეადგენდა. მშენებლობის საერთო ღირებულება 1.800.000 მანეთით განისაზღვრა. ამ თანხიდან 400.000 მანეთის აქცია თავიდანვე თბილისის გუბერნიის თავადაზნაურობას ეძლეოდა, ხოლო 550.000 აქციის შექენის უფლება. ასე რომ ქართველთა ხელში 950.000 მანეთის ღირებულება მთელი გზისა, ანუ საერთო ხარჯის ნახევარზე მეტი, რაც მას გზის საკუთრების გადამწყვეტ უფლებას აძლევდა...¹¹⁶ ე. ი. ამ უმნიშვნელოვანესი სატრანსპორტო მაგისტრალის ძირითადი დამფინანსებელი ქართლ-კახეთის თავადაზნაურობა და მისი საადგილმამულო ბანკი იყო. სწორედ ეს არ აწყობდათ ქართველი ხალხის მოშულარ სხვატომელებს... წამოყენებულ იქნა იდეა კახეთის ხაზის სიღნაღ-ბაქოს მიმართულებით

¹¹⁶ ჟურნ „კლდე“, 1912 წლის 4 ნოემბერი, გვ. 2.

გაგრძელების შესახებ. ერთი შეხედვით აქ საშიში თითქოს არაფერი უნდა ყოფილიყო, მაგრამ სინამდვილეში ასეთი პერსპექტივა „კახეთის რკინიგზის საზოგადოების“ დამოუკიდებელ არსებობას სპობდა და ქართლ-კახეთის თავად-აზნაურობას უძვირფასეს საკუთრებას აკარგვინებდა... საქმე იმაში იყო, რომ 1.800.000 მანეთის საერთო ღირებულების აქციებიდან, თბილისის გუბერნიის თავად-აზნაურობას მხოლოდ 400.000 მანეთისა ჰქონდა შეძენილი, დანარჩენის დაუფლებას კი ცნობილი მილიონერი პუტილოვი ცდილობდა, თუ ქართველობა დროულად ვერ მოახერხებდა 550.000 მანეთის ღირებულების აქციების შეძენას და 2/3-ზე მეტის მეპატრონე არ გახდებოდა. თუ ამას პუტილოვი და მისი კომპანია მიაღწევდა, მაშინ იგი წმინდა კომერციული თვალსაზრისიდან გამომდინარე კახეთის რკინიგზის საზოგადოების არსებობას აუქმებდა და მას უფრო მეტი სააქციო კაპიტალის მქონე „სიღნაღი-ბაქოს რკინიგზის საზოგადოებას“ უქვემდებარებდა... და ამით „ქართველი თავად-აზნაურობის ქონების განმკარგულებელი ხდებოდა“...

პუტილოვის ადგილობრივ კომპანიონთა შორის დიდ აქტიურობას იჩენდნენ სომეხი კაპიტალისტები. სხვათაშორის „სიღნაღ-ბაქოს რკინიგზის“ პროექტის შემუშავების იდეაც მათგან მოდიოდა...

რ. გაბაშვილის აზრით, ჩანაფიქრი მუხანათური და ქართველთათვის დიდად საზიანო იყო, ვინაიდან სიღნაღ-ბაქოს რკინიგზის სიგრძე 426 ვერსტს უდრიდა და მისი ღირებულება 40-50 მილიონი მანეთი დაჯდებოდა და არა 1.800.000, რაც 165 ვერსტის გაყვანილთათვის იყო გათვალისწინებული. გამომდინარე აქედან სააქციონერო თანხა 5.000.000 მანეთით იყო განსაზღვრული და არა 950.000-ით, რაშიც თითქმის უკვალოდ შთაინთქმებოდა ქართული საზოგადოების აქციები; კახეთის რკინიგზა ჰკარგავდა თავის დამოუკიდებლობას¹¹⁷. სამწუხაროდ მშენებლობასთან დაკავშირებული საზოგადოებრივი აზრი თავიდანვე ორად გაყოფილა — ერთნი სიღნაღი-ბაქოს მაგისტრალისადმი მიერთებას აძლევდნენ უპირატესობას, ანუ მხარს უჭერდნენ მომავალში გზის ექსპლუატაციის უფლება სხვატომელთა ხელში გადასულიყო, მეორენი კი მომხრენი იყვნენ ქართულ საზოგადოებას, პირველ რიგში თბილისის თავად-აზნაურობას, ყველაფერი ელონა და ხელიდან არ გაეშვა ამ უზარმაზარი ეროვნული საქმის სადავეები...

სომხური ბურჟუაზიის მხარეზე არაერთი ქართველიც დამდგარა... „პირველ ყოვლისა ესენი იყვნენ: „რუსეთის სოც. დემოკრატი მუშათა პარტიის“ ქართველი მეთაურები, კერძო ინ-

¹¹⁷ ურნ. „კლდე“, 1912 წლის 25 ნოემბერი, გვ. 4-5.

ტერესების მქონე თავად-აზნაურები და ინტელიგენტები, რომელთათვისაც ჯერ „მე“ იყო მთავარი და მერე „საქართველო“...¹¹⁸

საგანგებოდ უნდა აღინიშნოს, რომ შინაურ თუ გარეშე არაკეთილმოსურნეთა ნების მიუხედავად, თბილისის გუბერნიის თავად-აზნაურობამ მისი ახლად არჩეული წინამძღოლის, დიდი ილიას დისნულის, კოტე აფხაზის ხელმძღვანელობით შეძლო ამ ეროვნული მნიშვნელობის ობიექტის შენარჩუნება.

კახეთის რკინიგზის მშენებლობა ოფიციალურად 1912 წლის 17 ივნისს დაიწყო და გეგმის მიხედვით სამ წელიწადში უნდა დამთავრებულიყო.

1913 წლის 30 თიბათვეს „რ. გ.“ /რ. გაბაშვილი/ ყურნალ „კლდის“ ფურცლებიდან ქართველ საზოგადოებას აღფრთოვანებით აუწყებდა : „თავად-აზნაურობამ საბოლოოდ გადაწყვიტა კახეთის რკინიგზის ხელში ჩაგდება... უთავბოლო და უნიადაგო, ყოველ აზრს მოკლებული ბრძოლის შემდეგ, საქმე კეთილად დასრულდა: 24 თიბათვეს 44 ხმის უმეტესობით 15-ის წინააღმდეგ (ხაზგასმა რ. გაბაშვილისაა — გ. ს.) დეპუტატთა საკრებულოს გადაეცა უფლება და დავალება შეიძინოს იმდენი აქცია, რამდენიც საჭიროა გზის პატრონობისათვის“¹¹⁹.

ეს შესაძლებელი მას შემდეგ გახდა, რაც თბილისის გუბერნიის თავად-აზნაურობის წარმომადგენელმა თ-დმა დ. გურამიშვილმა ხელშეკრულება დადო „რუსეთ-აზოვის ბანკთან“ კახეთის რკინიგზისათვის 5.000 აქციის შესაძენად.

ისტორიისათვის საინტერესოდ მიგვაჩნია ქართველმა ხალხმა იცოდეს თუ ვინ რა პოზიცია დაიჭირა ამ ეროვნული მნიშვნელობის საქმის გადაწყვეტისას... იმ 44 მომხრეს შორის იყვნენ: თ-დი ვას. დავ. გაბაშვილი, თ-ადი მიხ, დავ. ჭავჭავაძე, თ-ადი ივ. მაღალაშვილი, თ-ადი ილ. მიხ თარხან-მოურავი, იაკობ პეტრეს ძე ისარლოვი, თ-ადი ალ. ივ. ყანჩაველი, თ-ადი დიმ. ალ. ფავლენიშვილი, თ-ადი დავ. ალ. გურამიშვილი, თ-ადი იოს. გ. ანდრონიკაშვილი, ლევან ნიკ. დიასამიძე, თ-ადი ალ. ლუარ. მაღალაშვილი, თ-ადი ლევან გიორგ. ჯანდიერი, თ-ადი დიმ. იოს. ჭავჭავაძე, გაბრ. ივ თულაშვილი, თ-ადი რევ. მიხ. ყარალაშვილი, თ-ადი ბეჟ. ივ. ხერხეულიძე, თ-ადი ნიკ. ვას. ვაჩნაძე, კონსტ. იოს. სვიმონიშვილი, თ-ადი ნიკ. ალ. ჯანდიერი, თ-ადი ლევ. ალ. ვაჩნაძე, მიხ. ვახტ. მაჩაბელი, იოს. ქრისტ. მამაცაშვილი, ტარასი გიორ. რცხილაძე, თ-ადი გ. ალ. ბაგრატიონ-მუხრანსკი, თ-ადი იასე კონსტ. ვაჩნაძე, თ-ადი კონსტ. ზაქ. მაყაშვილი, ნიკ. ყარამ. ზაალიშვილი, მიხ. ნიკ. გედევანიშვილი, თ-ადი ივ. გიორგ. ბარათაშვილი, ვას. ილ.რცხილაძე, თ-ადი მაქს. ზაქ. ჭა-

¹¹⁸ ყურნ. „კლდე“, 1912 წლის 25 ნოემბერი, გვ. 4-5.

¹¹⁹ იქვე, 1913 წლის, 30 ივნისი, გვ. 2-3.

ვჭავაძე, პარმენ დიმ. გედევანიშვილი, თ-ადი ესტ. ალ. მაჩაბელი, გრგორგ. დიმ. გაბაშვილი, ნიკ. ივ. საგინაშვილი, თ-ადი ვლ. დავ. ვაჩნაძე, ნიკ. ბეჟან. ტატიშვილი, გრ. სიმ. რცხილაძე, ლევან გაბრ. ნინამძღვრიშვილი, თ-ადი კონსტ. ნიკ. აფხაზი, თ-ადი დიმ. ერასტ. ჩოლოყაშვილი, თ-ადი გრ. ალ. ყარანგოზიშვილი; ხოლო ნინალმდეგი გამოვიდნენ: გიორგ. ივ. მუსხელიშვილი, თ-ადი ივანე დიმ. აფხაზი, მალხაზ არჩ. ანდრონიკაშვილი, კონსტ. ივ. თულაშვილი, თ-ადი დავით სუმბათაშვილი, ნიკ. ივან. არჯევანიძე, თ-ადი ქაიხოსრო ჯავახიშვილი, თ-ადი გიორგ. როსებ. ამირეჯიბი, დ. ფ. ნაცვლიშვილი, თ-ადი ივ. მიხ. სუმბათაშვილი, თ-ადი ლევ. დიმ. ანდრონიკაშვილი, თ-ადი რევაზ იასონის. ერისთავი, გიორგი ზაალ. ტერიშვილი¹²⁰. (პიროვნებათა სია მოგვაქვს იმ ფორმით, როგორც იგი ჟურნალ „კლდეში“ დასტამებული. ავტორი).

რ. გაბაშვილი მთელი კატეგორიულობით აყენებდა საკითხს იმის შესახებ, რომ კახეთის რკინიგზა, რომელიც სამართლიანად დარჩა თბილისის გუბერნიის თავად-აზნაურთა საკრებულოს განკარგულებაში, დიდმნიშვნელოვანი მოვლენა იყო, მაგრამ საკრებულოს მოვალეობა *მარტო საქველმოქმედო საქმიანობა* როდი იყო, (სხვადასხვა სასწავლო თუ კულტურულ დაწესებულებათა დაფინანსება), არამედ საჭირო იყო *საკუთარი ეკონომიური ორგანიზაციების შექმნაც* (ხაზგასმა რ. გაბაშვილისაა გ.ს.), თანაც ისეთი ამხანაგობა—ორგანიზაციებისა, რომლებიც თავისუფლად შეძლებდნენ საკუთარ ფეხზედ დგომას და გლახასავით არავისათვის ხელში შემყურენი არ იქნებოდნენ... „დროით გადავადგოთ ქველმოქმედური ორგანიზაცია ჩვენი ღარიბი ცხოვრებისა და შევუდგეთ მატერიალური კულტურის შექმნას, თანაც ისეთ კულტურისას, რომელიც ნივთიერ სიმდიდრეს მოიტანს, სულიერი სიმდიდრის გადასაფუჩქენელად“—ო¹²¹, დაასკენიდა რ. გაბაშვილი.

აქვე შეიძლება ხაზგასმით აღინიშნოს, რომ მთელი 5 წლის მანძილზე, რაც კოტე აფხაზი თბილისის გუბერნიის თავად-აზნაურობას თავკაცობდა, არ გამართულა ამ საზოგადოების საკრებულოს თითქმის არც ერთი სხდომა თუ საგანგებო კრება, რომლის დღის წესრიგში რაიმე კუთხით კახეთის რკინიგზასთან დაკავშირებული საკითხი არ განხილულიყოს... ამის დასტურია როგორც საქართველოს არქივსაცავებში, ისე იმდროინდელ პრესაში დაუნჯებული მასალები. მათი გაცნობისას შესაძლებელი ხდება ერის ბედზე დაფიქრებელი არა-ერთი მამულიშვილის სახელის წარმოჩენა, პიროვნებებისა, რომელთაც ნათლად ჰქონდათ გასიგრძეგანებული ის პერსპექტივები, რაც ამ სარკინიგზო ხაზის გაყვანას მოჰყვებოდა

¹²⁰ ჟურნ. „კლდე“, 1913 წლის 30 ივნისი, გვ. 12-13.

¹²¹ იქვე, გვ. 12-13.

მომავალში სრულიად საქართველოს ეკონომიკური სოციალური და კულტურული წინსვლა-განვითარების საქმეში...¹²²

ამ შემთხვევაში ჩვენთვის საინტერესოა ის ძალისხმევა, რასაც „კლდეისტები“ იჩენდნენ ამ მშენებლობასთან დაკავშირებით. უფრო ნალის ფურცლებზე გამოქვეყნებული მასალები ნათლად გვისურათხატებენ მათ გარჯილობაზე, იმ პრინციპულ დამოკიდებულებაზე, რასაც ისინი ეწეოდნენ სხვადასხვა ჯურის მონინაალმდეგეებთან დაპირისპირების დროს...

ამასთან დაკავშირებით რ. გაბაშვილი შემდგომში იგონებდა: „უფრონალმა „კლდე“ და „კლდეისტებმა“ პირველი დღეებიდანვე ავკრიფეთ ყველა მხრიდან გადმოყრილი ხელთათმანები და სასტიკი ბრძოლა გავმართეთ კრებებზე, კაბინეტებში, პრესაში და თვით საკრებულოშიც“¹²³, მაგრამ აქ ყველაზე უფრო ძნელი „პოლიტიკურ რეგვენთა“ წინააღმდეგ ბრძოლა გამხდარა. მაინც ვინ იყვნენ ეს „პოლიტიკური რეგვენები?“

„კლდეისტა“ განმარტებით „პოლიტიკური რეგვენები“ ყველა ხალხს ჰყავს და რაც უფრო მეტი გვეყოლება ისინი, მით უფრო ხალხი ყყოფილვართ ჩვენც, ალბათ ასეთია საქართველოს ბედი; მაგრამ როცა ეს რეგვენები, წინააღმდეგ ლოლიკისა და სამართლისა, საზოგადოებრივ აზრს ჰქმნიან და აშკარა დამნაშავეს თავზე მონამეობრივ გვირგვინს ადგამენ, იმ თავზე, რომელშიც დიდი ეროვნული დანაშაულის შემუშავება ხდება ხოლმე, მაშინ ჩვენ ვალდებული ვართ, ვალვიძოთ ხალხის სინდისი, გამოვიხმოთ ჭეშმარიტი სამართალი და ვათქმევინოთ ამ სამართალს პირუთვნელი სიტყვა“¹²⁴. „კლდის“ ფურცლებზე დასტამბული სხვადასხვა მასალების გაცნობა თვალნათლივ გვარწმუნებს იმაში, რომ „კლდეისტები“ მართლაც კეთილსინდისიერად ასრულებდნენ თავიანთ მოვალეობას ხალხის სინდისის გამოლვიძების თაობაზე, როცა საქმე კახეთის რკინიგზის ქართველთა საკუთრებაში დარჩენას შეეხებოდა... მათ იმთავითვე მიაჩნდათ, რომ ეს სარკინიგზო მაგისტრალი სრულიად საქართველოსათვის გახდებოდა უმნიშვნელოვანესი შემაკავშირებელი ძარღვი; რომ იგი გადააბამდა კახეთს — ქართლსა და იმერეთთან, აგრეთვე კავკასიის სხვა კუთხეებთან და რუსეთთან. ეს ძარღვი თავის სიგრძეზე აამოქმედებდა ჩვენს ვაჭრობამრენველობას. განავითარებდა მეურნეობას და ხელს შეუწყობდა იმასაც, რომ თვით კახეთშიც კიდევ უფრო მეტად განვითარებუ-

¹²² უფრო ვრცლად იხ. გელა საითიძე. „სწამდა სამშობლოს აღორძინება...“, თბ., 1997, გვ. 20-28.

¹²³ იხ. ნიგნში: „დაბრუნება“, ტ. III, გვ. 141.

¹²⁴ უფრო. „კლდე“, 1912 წლის 16 დეკემბერი, 14. გვ. 6.

ლიყო — მეღვინეობა, მეთამბაქოეობა, მეცხოველეობა და სხვა დარგები...

სხვებთან ერთად, „კლდეისტებმაც“ მნიშვნელოვანი წვლილი შეიტანეს კახეთის რკინიგზის მშენებლობის ქართველთათვის მისი კეთილად გასრულების საქმეში... და როცა ეს საქმე კეთილად დამთავრდა და 1914 წლის 22 სექტემბერს კახეთის რკინიგზის სასინჯი გახსნა მოხდა, როცა ნაოცნებარი რეალობად იქცა და ეს სატრანსპორტო მაგისტრალი ქართველთა საკუთრებად დარჩა, ამან დიდი სიხარულით აღავსო „კლდეისტებიც“.

იმ დღეებში ჟურნალის რედაქტორი რ. გაბაშვილი წედა: „კახეთის რკინიგზაზე ჩვენ ბევრი წერილი დაგვიწერია, ბევრი მელანი და შრომა დაგვიხარჯავს იმ ხანებში, როცა მისი ბედი სწყდებოდა. მრავალი მტერიც შევიძინეთ იმათ შორის, ვინც შეგნებულად თუ შეუგნებლად ლალატობდა დიდ საქმეს და ხელს უშლიდა მის გადასვლას ჩვენს ხელში... დღეს გვინდა მხოლოდ გაგიზიაროთ ის სიხარული, ის გრძნობა კმაყოფილებისა და სიამაყისაც, რომელსაც ამ რკინიგზის ამუშავება, მისი „პირველი ნაბიჯები“ იწვევს...“

პირველ მგზავრთა შორის ყოფილა თბილისის მაზრის თავად-აზნაურთა წინამძღოლი, თავადი დიმიტრი ჩოლოყაშვილი, რომელსაც უნებებია და რედაქტორის თხოვნით რამდენიმე სურათი გადაუცია ჟურნალში დასაბეჭდათ კახეთის რკინიგზის სადგურებისა და სხვადასხვა ადგილებისა... რ. გაბაშვილი გულითად მადლობას უძღვნიდა ყველას, ვისაც რაიმე წვლილი მიუძღოდა ამ საშვილიშვილო საქმის ხორცშესხმაში. „დიდება და პატივი იმ ქართველ მოღვაწეებს, ვინც ამ საქმეს „სიძნელე გზისა გაუადვილა“ და ხორცი შეასხა თეორიულადაც დიდი ხნის წინათ მოაზრებულ მშენებლობას. მათი სახელები ოქროს ასოებით უნდა იყოს აღბეჭდილი არა მარტო ქართველის გულში, არამედ ყველა იმ სადგურზედაც, საცა მომავალი რკინიგზის მატარებელი გაჩერდება“¹²⁵.

...აღსანიშნავია, რომ სამიოდე წლის შემდეგ 18 მილიონ მანეთად ღირებული კახეთის რკინიგზა, თბილისის გუბერნიის თავად-აზნაურთა ორგანიზაციის სხვა უძრავ-მოძრავ ქონებასთან ერთად, კოტე აფხაზმა საქართველოს პირველ ეროვნულ ყრილობაზე ქართველ ხალხს ნობათად მიართვა, რაც 1918 წლის 26 მაისს საფუძვლად დაედო საქართველოს დამოუკიდებლობის გამოცხადებას.

¹²⁵ ჟურნ. „კლდე“, 1914 წლის 26 ოქტომბერი, გვ. 12-13.

ჟურნალი „კლდე“ და რუსეთის IV სახელმწიფო სათათბიროს არჩევნების საკითხი

ჟურნალის გამოსვლა; რუსეთის მეოთხე სახელმწიფო სათათბიროს საარჩევნო კამპანიას დაემთხვა. რა თქმა უნდა, „კლდეისტები“ ამ მნიშვნელოვანი პოლიტიკური მოვლენის მიმართ უბრალო მაყურებლის როლში არ დარჩენილან. ხოლო თუ რა პოზიცია დაიკავეს მათ, ამის თაობაზე „კლდის“ მეორე ნომრის სარედაქციო წერილშია საუბარი: „ახლოვდება დრო, როცა ქართველმა ხალხმა თავისი სურვილი არჩევნებით უნდა გამოსთქვას... რუსეთის სახელმწიფო სათათბირო, სადაც მან თავისი წარმომადგენელი უნდა გაგზავნოს, რასაკვირველია, პანაცეა არ არის, იგი მას ყველა პოლიტიკური და ეკონომიკური ტკივილისაგან ვერ განკურნავს, მაგრამ რაკი დრო ამას ითხოვს და პარლამენტში დეპუტატის ყოლა მისთვის ერთგვარი სახელმწიფოებრივი აუცილებლობაა, ამიტომ საჭიროა დიდი ტაქტისა და პოლიტიკური გამჭრიახობის გამოჩენა, რათა ყველას უჩვენოს თავისი სახე, რომელზედაც მძიმე ნაოჭებით იქნება აღბეჭდილი ყველა მისი სურვილები“¹²⁶.

ჟურნალის აზრით, არჩევნებში დიდი დაძაბულობანი და გართულებები იყო მოსალოდნელი, რასაც უპირველეს ყოვლისა, ჩვენი ქვეყნის სიმცირე განაპირობებდა. საქართველო, რომ დიდი ქვეყანა ყოფილიყო, მაშინ მას მეტი წარმომადგენლის გაგზავნა შეეძლებოდა სათათბიროში და პარტიათა შორის ბრძოლაც უფრო განვლებული იქნებოდა. სამწუხარო ის იყო, რომ საარჩევნო კანონის შესაბამისად საქართველოს სულ სამი დეპუტატის არჩევა შეეძლო, ვინაიდან, „მთელ ქართლ-კახეთს ერთი დეპუტატი ჰყავდა, იმერეთ-გურია-სამეგრელოს აგრეთვე ერთი და ჩვენს ზღვისპირა მხარესაც ერთი“¹²⁷.

„კლდეისტთა“ აზრით, სადეპუტატო ადგილის მოპოვებისათვის ძირითადი ბრძოლა სოციალ-დემოკრატებსა და ეროვნულ ჯგუფების კანდიდატებს შორის გაიმართებოდა. ამიტომ, თუ რა პოზიცია უნდა დაეკავეთ მათ, წინასწარ ნათლად ჰქონდათ წარმოდგენილი. „სოციალ-დემოკრატია ერთის მხრივ და ეროვნულ ჯგუფების კოორდინაცია მეორეს მხრივ, სავსებით ახასიათებს საარჩევნო

¹²⁶ ჟურნ. „კლდე“, 1912 წლის 23 ენკენისთვე, გვ. 2.

¹²⁷ იქვე.

ბრძოლას¹²⁸. ცნობილი იყვნენ დეპუტატობის კანდიდატებიც... აღმოსავლეთ საქართველოში „ერთის მხრით იქნებოდა ლუარსაბ ანდრონიკაშვილი და მთელი შეგნებული ქართველი ერი, მეორე მხრივ კარლო ჩხეიძე და მისი პარტია, სოციალ-დემოკრატია..., რომლებიც სავსებით გამოხატავდნენ ამ პარტია-ჯგუფების ფიზიონომიას“. ასე რომ „საარჩევნო ბრძოლა სავსებით გამოხატული და ჩამოქნილი იყო ორი პირის მეტოქეობაში“¹²⁹.

დასავლეთ საქართველოში, ანუ ქუთაისის გუბერნიაში ერთმანეთის პირისპირ იდგნენ სოც.-ფედერალისტების პარტიის ერთ-ერთი ლიდერი კიტა აბაშიძე და მესამე სათათბიროს ყოფილი დეპუტატი, სოციალ-დემოკრატი ევგენი გეგეჭკორი. „კლდეისტა“ პოზიცია აქაც გარკვეული იყო... „მთელი შეგნებული ქართველობის სურვილია, და მასთან ჩვენიც, სწორედ ბ-ნმა აბაშიძემ და მისმა მომხრეებმა გაიმარჯვონ“¹³⁰.

ყურნალის აზრით, ქუთაისში არ უნდა განმეორებულყო წინა არჩევნების მსგავსი რამ, როცა სოც.-დემოკრატებმა გაიმარჯვეს... თანაც სად?! „ისეთ ტიპიურ წვრილ ბურჟუაზიულ ქალაქში, როგორც ქუთაისია, სადაც მძლავრად აქვს ფეხი გადგმული ეროვნულ მიდრეკილებას“... ამის დაშვება კი „პოლიტიკური თვალთმაქცობა იქნებოდა...“¹³¹

ეს ამომრჩეველთა დიდი უმრავლესობის ინტერესთა უარყოფას მოასწავებდა... განა პოლიტიკური შეგნება იმაში მდგომარეობს, რომ ხელი აიღო საკუთარ ინტერესებზე და დასაკლავ ზვარაკად გაჰყვე პარტიას, რომელიც თავის დღეში არ იზრუნებს ქართულ ინტერესებზედ?“¹³²

„კლდეისტებს“ მიაჩნდათ რომ სახელმწიფო სათათბიროში ასარჩევი კანდიდატები — ევგენი გეგეჭკორი (სოც.-დემოკრატი ქუთაისის გუბერნიიდან), და კარლო ჩხეიძე (სოც.დემოკრატი თბილისის გუბერნიიდან) უნდა შეფასებულყვნენ, ჯერ როგორც ამათუ იმ პარტიის წევრნი, მერე კი როგორც პიროვნებები, „თავისი მიმართულებით ისინი არიან წევრნი რუსეთის სოციალ-დემოკრატიული პარტიისა. ჯერ მართო სახელწოდება ამ პარტიისა გვეუბნება, რომ ეს პარტია ქართული პარტია არ არის. ყოველი პარტია ეროვნული უნდა იყვეს, თუ სურს სავსებით შეისწავლოს ის პირობები, რა პირობებშიც სცხოვრობს ხალხი, რომელსაც იგი ემსახურება... და თუ პარტიას არა აქვს შესწავლილი ქვეყანა, რომლის

¹²⁸ ყურნ. „კლდე“, 1912 წლის 7 ოქტომბერი, გვ. 1.

¹²⁹ იქვე.

¹³⁰ იქვე, 1912 წლის 14 ოქტომბერი, გვ. 1

¹³¹ იქვე.

¹³² იქვე.

მესვეურობასაც ის კისრულობს, რომელ ლოლიკის და ზნეობის ძალით აფარებს მას თავის კალთას?"¹³³.

მაშ, ვის უნდა მინდობოდა სათათბიროში საქართველოს ინტერესების დაცვა? ჩვენის ღრმა რწმენით მხოლოდ ლუარსაბ ნოკოლიზის ძე ანდრონიკაშვილს, — ნერდა აღ. ყიფშიძე. იგი ფრიადნიჭიერი ყმანვილი კაცია, შემკული ძლიერის ლოლიკით, რომელიც განუვითარებია ფილოსოფიის საფუძვლიანად შესწავლით, მჭერმეტყველი და ენაწელიანი ორატორი, თამამი და გამბედავი, სპეტაკი სულის პატრონი და გულწრფელი უანგარო მოღვაწე. ასეთ კაცს, რომ თავის პატარა სამშობლო, მერე ისიც დაჩაგრული, განბილებული, პატივყარილი არ უყვარდეს დიდის სიძლიერით, დიდის სულისკვეთებით, შეუძლებელი წარმოსადგენია და ჩვენ ვამონებთ, რომ ლუარსაბს უყვარს საქართველო... მაშ, ავირჩიოთ ლუარსაბი!"¹³⁴.

იმავე დღეებში, პირველი სახელმწიფო სათათბიროს ყოფილ დეპუტატს, სოც.-ფედერალისტთა პარტიის ერთ-ერთ ლიდერს, იოსებ (ოსიკო) ბარათაშვილს „კლდის“ თანამშრომელთან საუბრისას, ლუარსაბ ანდრონიკაშვილი დაუხასიათებია როგორც „მშვენიერი ორატორი, განათლებული, დიდი ცოდნის პატრონი და მასთან ერთად სამშობლოს მოსიყვარულე, რწმენით დემოკრატი“ პიროვნება... „ბევრს დაეკარგავთ, თუ მას დეპუტატად ვერ გაიყვანთ“—ო, აღუნიშნავს რესპოდენტს.

აღსანიშნავია, რომ სოც.-ფედერალისტებსაც რეალური შანსი მიეცათ ქუთაისის გუბერნიაში თავიანთი წარმომადგენელი აერჩიათ სახელმწიფო სათათბიროში მას შემდეგ, რაც ქუთაისის ქალაქის არჩევნები უკანონოდ სცნო კომისიამ და გააუქმა მისი შედეგები და III სახელმწიფო სათათბიროს ყოფილ დეპუტატს ევგ. გაგაჭკორს ცენზი წაერთვა.

ამასთან დაკავშირებით „კლდე“ ნერდა: „ახლა ჩვენი მხარდაჭერა სოც.-ფედერალისტების პარტიის ერთ-ერთი ლიდერის კიტა აბაშიძის მხარეზეა; რომ ქუთაისი მოვალეა პირველ რიგში ქართული ინტერესები დააყენოსო“ და სხვ.

მართალია, პიროვნულად კიტა აბაშიძე დეპუტატობის მანდატის გარეშე დარჩა, მაგრამ მისმა პარტიამ შეძლო თავისი წარმომადგენელი ვარლამ გელოვანი გაეყვანა IV სათათბიროს წევრად...

დაძაბულობა მატულობდა და გამორიცხული არ იყო თბილისის გუბერნიის ამომრჩეველბსაც ლ. ანდრონიკაშვილის კანდიდატურისათვის დაეჭირათ მხარი, მაგრამ სოც.-დემოკრატებმა თავიანთი ორგანიზებული და მაღალ დონეზე დაყენებული დემაგოგიური

¹³³ ჟურნ. „კლდე“, 1912 წლის 14 ოქტომბერი.

¹³⁴ იქვე, 1912 წლის 7 ოქტომბერი.

სააგიტაციო-პროპაგანდისტული მუშაობით და ინტერნაციონალიზმის დროშის ფრიალით, შეძლეს თბილისის სომხური საზოგადოების მიმხრობა და თავიანთი კანდიდატის — კ. ჩხეიძის გამარჯვება და ლ. ანდრონიკაშვილის დამარცხება.

„კლდეისტებმა“ ძალზე მტიკივნეულად განიცადეს ის, რომ ქართველმა სოც.-დემოკრატებმა გამარჯვებას დაშნაკცუთუნელთა მხარდაჭერით მიაღწიეს. „სომხის ბურჟუაზია მუდამ ის ჩხირია, რომელიც ქართულ ცხოვრების ბორბალის ტრიალს უშლის. ამიტომ იგი არჩევნებში მუდამ სოციალ-დემოკრატებთან მიდის...“¹³⁵ ფაქტი სახეზე იყო. ქართველ სოც.-დემოკრატთა და დაშნაკცუთუნელთა კავშირმა გაიმარჯვა...

„ციფრების წინააღმდეგ ბრძოლა შეუძლებელია, — წერდა „კლდე“. ციფრები კი შემდეგს გვეუბნებიან: ანდრონიკაშვილს ხმა მისცა 21 ამომრჩეველმა. ამ 21 ამომრჩეველზედ გამოილაშქრა 23 ამომრჩეველმა, რომლის შემადგენლობა ასეთი იყო: ექვსი ქართველი და 15 სომეხი და სხვ.“¹³⁶

სოც.-დემოკრატები უპასუხოდ არ ტოვებდნენ მონინააღმდეგეთა არც ერთ გამოსვლას და თავიანთი ჟურნალის — „ჩვენი არჩევნის“ ფურცლებზე ათავსებდნენ საპასუხო წერილებს, რომელშიც დამამცირებელ და შეურაცხმყოფელ სიტყვებსაც არ იშურებდნენ კონკრეტული კანდიდატის, ლ. ანდრონიკაშვილის მიმართ. მაგალითად, ისინი ანდრონიკაშვილს დიდ ცოდვად უთვლიდნენ იმას, რომ იგი პეტერბურგში ცხოვრობდა მუდმივად და თავისი ქვეყნის ავკარგი ნაკლებად იცისო. ამ „მომაკვდინებელ ბრალდებაზე“ ჟურნალი „კლდე“ ირონიულად შენიშნავდა: ქართული აზროვნების საუკეთესო წარმომადგენლები — აკადემიკოსი მარრი, პროფესორები ცაგარელი, ივ. ჯავახიშვილი, ზ. ავალიშვილი პეტერბურგში ცხოვრობენ. განა ამ პირთ ხელს უშლის ეს, საქართველოს მდგომარეობა რომ ზედმინვენით იცოდნენ?! წინა, III სათათბიროს გამოცდილებაზე დაყრდნობით, ჟურნალი იმაზეც მიუთითებდა, რომ ქართველმა დეპუტატებმა გეგეჭკორმა და ჩხეიძემ, რომლებიც „ტავრიდის სასახლეში დაბრძანდნენ, ხალხთან კავშირი მთლიანად განყვიტეს“ და ამით პარლამენტარიზმის პრინციპებს უღალატეს...

როგორც აღვნიშნეთ, მიუხედავად გულმოდგინე გარჯისა და დიდი სურვილისა, ქართულმა ეროვნულმა ძალებმა ვერც IV სახელმწიფო სათათბიროს არჩევნებისას დაძლიეს სოც.-დემოკრატების მიერ აღმართული ზღუდე: აღმოსავლეთ საქართველოს დეპუტატის რწმუნების მანდატი ისევ კარლო ჩხეიძეს დარჩა... აღსანიშ-

¹³⁵ ჟურნ. „კლდე“ 1912 წლის 14 ოქტომბერი, გვ. 1-2.

¹³⁶ იქვე, 1912 წლის 28 ოქტომბერი, გვ. 1.

ნავია, რომ გამართლდა „კლდის“ წინასწარი პროგნოზი: კ. ჩხეიძე გამარჯვებას მიაღწევს სომეხ ამომრჩეველთა მხარდაჭერით.

„კლდეს“ მიაჩნდა, რომ ალ. ხატისოვის მეთაურობით 15 სომეხმა-დაშნაკცაკანმა გადანყვიტა ქართლ-კახეთის დეპუტატის ბედი... „ეს იყო მნიშვნელოვანი ნუთი, როცა სომხის ბურჟუაზიამ ნათლად და საბოლოოდ გამოხატა თავისი სიძულვილი ქართველი ერისადმი“¹³⁷.

ყურნალი პრინციპულ მნიშვნელობას ანიჭებდა სათათბიროში წარსაგზავნი პიროვნების შერჩევას და მისი პასუხისმგებლობის საკითხს... მიაჩნდა, რომ „დეპუტატობა ადვილი საქმე არ არის. საჭიროა დიდი ცოდნა, დიდი გამოცდილება, დიდი დაკვირვების ნიჭი, თავისუფალი აზროვნება, დამოუკიდებელი მოქმედება და გამჭრიახობა. თუ ყველა ეს თვისება დეპუტატს არა აქვს და პარლამენტში მიდის, მაშინ იგი ცულლუტია, მატყუარა და თბილი ალაგისათვის მიდის იქ.“

„კლდეისტები“ ყურადღების გარეშე არ ტოვებდნენ სათათბიროში ქართველ დეპუტატთა საქმიანობას და ყოველ მათ გამოსვლას ეროვნულ ჭრილში განიხილავდნენ.

ყურნალი მოწონებით ხვდებოდა დეპუტატ ვარლამ გელოვანის გამოსვლებს, რომლებშიც რამდენადმე ეროვნული პოზიცია იყო გაცხადებული, მათ შორის გასაკუთრებით გამოჰყოფდა საქართველოს ავტონომიის საკითხისადმი მიძღვნილ მის გამოსვლას... „სულ ერთი თვის წინათ, — წერდა „კლდე“, — საქართველოს დეპუტატმა ვ. გელოვანმა მინისტრ-პრემიერის დეკლარაციის საპასუხოდ წარმოსთქვა სიტყვა, რომელშიც აღნიშნა საქართველოს ავტონომიის საჭიროება...“, მაგრამ სამწუხარო ის იყო, რომ მის ამ გამოსვლას ყრუდ შეხვდნენ — სათათბიროც, პრესაც და საზოგადოებაც... ყურნალის აზრით, ასეთი დამოკიდებულება მეტად საჭირობოროტო ფაქტისადმი, პირველ ყოვლისა „რუსეთის პარლამენტარიზმის უსუსურობას ნიშნავდა...“ და ეს მოხდა იმიტომაც, რომ ოფიციალურ რუსეთს არა მარტო სახელი „ავტონომია“ ეჩოთირა, რომელიც არ არსებობს, არამედ თვით სახელი „საქართველო“, რომელიც არსებობს მხოლოდ როგორც კულტურულ-ისტორიული ერთეული... მაგრამ ყურნალი განსაკუთრებული გულისტკივილით ამახვილებდა ყურადღებას კიდევ ერთ ფაქტზე, რომელსაც ყველაზე უფრო გაუნეიტრალე-გაუუფასურებია გელოვანის მიერ დაყენებული ქართული საკითხი. ეს გახლდათ ის, რომ გელოვანის გამოსვლისთანავე ტრიბუნაზე ასულ მეორე ქართველ დეპუტატს კ. ჩხეიძეს გელოვანის მიერ წამოყენებული იდეის საზიანოდ განუცხადებია რომ ქუთაისის გუბერნიის დემოკრატიამ თავისი სათქმელის

¹³⁷ ჟურნ. „კლდე“, 1912 წლის 28 ოქტომბერი, გვ. 2-3.

გაცხადება მე და ა. ჩხენკელს დაგვევალა" და ასეთი რამ (ე. ი. ავტონომიის მოთხოვნა — გ. ს.) მის სურვილებს ეწინააღმდეგებაო... „კლდის“ აზრით, ასეთი განცხადება „აბსურდული იყო, როგორც იურიდიულად, ისე პარლამენტისათვის“..., ვინაიდან „ვერავითარი „დაბარება“ ვარლ. გელოვანს ვერ დაუშლიდა „გამოსულიყო და ჩხენკელზე უკეთესად დაეცვა ქუთაისის გუბერნიის დემოკრატიის ინტერესები“—ო¹³⁸.

ქართველ სოც.-დემოკრატ დეპუტატებს — აკ. ჩხენკელსა და კ. ჩხეიძეს საქართველოსათვის ავტონომიის არსაჭიროება რძით „დაუსაბუთებიათ“, რომ იგი, „რეაქციული და ნაციონალისტური მოთხოვნაა და ქართული შოვინიზმის კერად გადაიქცევაო“¹³⁹.

ეროვნული ინტერესებისადმი მათი ასეთი დამოკიდებულებით აღშფოთებული „კლდეისტები“ სიბრაზესა და აღშფოთებას არ ფარავდნენ და პირდაპირ მიუთითებდნენ: „ორი ასეთი დეპუტატის ყოლა სათათბიროში, რომლებიც მუდამ წინააღმდეგნი იქმნებიან და მუდამ ასე სკანდალურად განმარტავენ დეპუტატ გელოვანის ყოველ გამოსვლას, საკუთარ გულზედ ორ შხამიან გველის ყოლას ნიშნავს. ისინი კბენას არასოდეს არ მოიშლიან, მაგრამ საკმაო არ არის გველის შხამი, საჭიროა გველის სიბრძნე... ეს უკანასკნელი კი მათ არა აქვთ“—ო¹⁴⁰.

იმავე ნომერში „კლდე“ აკ. ჩხენკელის „საეროვნო“ გამოსვლასაც არ ტოვებდა რეაგირების გარეშე, როცა მას დანვრილებით მიმოუხილავს (1912 წლის 10 დეკემბერი) „საქართველოს უფლებრივი და ეკონომიური მდგომარეობა“, სადაც დეპუტატის თქმით, აუნერელი ყოფილა „ადმინისტრაციის თვითნებობა... საქართველოს გლეხობა მინის სივინროვეს განიცდის... განსაკუთრებული წესები კავკასიაში, ნორმალურ წესებად გადაიქცნენო“ და სხვ.

აღსანიშნავია, რომ „კლდეისტები“ ობიექტურობის გრძნობას არ ღალატობდნენ და სოც.-დემოკრატების საქმიანობის დადებითი მხარეების წარმოჩენასაც არ ერიდებოდნენ.

აფასებდა რა ერის წინაშე „დასელების“ ისტორიულ დამსახურებას შ. ამირეჯიბი („ა—ი“) მცირე წერილში „ორი ხანა“ წერდა: ამ ოციოდე წლის წინათ, როცა დასელები გამოვიდნენ (გულისხმობს „მესამე დასელთა“ გამოსვლას — გ. ს.), მაშინ საქმე გვექონდა მარქსიზმთან, ეკონომიურ თეორიასთან, ეხლა საქმე გვაქვს ეკონომიურ პრაქტიკასთან, მაშინ ირაზმებოდა ჩვენი დემოკრატია, ახლა ირაზმება ჩვენი ბურჟუაზია. ეჭვი არ არის დასელებმა დიდი მონაწილეობა მიიღეს არა მარტო დემოკრატიის

¹³⁸ ურნ. „კლდე“, 1913 წლის 27 იანვარი, გვ.5.

¹³⁹ იქვე.

¹⁴⁰ იქვე.

იდეოლოგიის შექმნაში, არამედ ბურჟუაზიის გათვითცნობიერებაშიც. დასელებმა, რომლებმაც საშინელი სიმტკიცე და უნარი გამოიჩინეს შემდეგში თეორიაში, იმ თავითვე პრაქტიკული უნარიც გვიჩვენეს. ცხადია, ისინი ჭეშმარიტი სოციალისტები იყვნენ, აღმსარებელნი მარტოოდენ პროლეტარიატის სოციალიზმისა, მაგრამ მათ კარგად იცოდნენ, რომ სოციალიზმი თუ პროლეტარიატის რელიგია არის, იმავე დროს ყველა ღარიბთა ფილოსოფიაც იყო. ცოტა იყო მაშინ პროლეტარიატი ჩვენში, მაგრამ სამაგიეროდ მათ წინ იყო ღარიბი საქართველო, საქრთველო ყოველს უფლებას მოკლებული, ეკონომიურად სრული არარაობა და აი, ასეთ უმწეო ქვეყანაში მათ დაიწყეს ისეთი თეორიის ქადაგება, რომელიც ამბობდა: ეკონომიური განვითარების კანონები ყველგან ერთია, მაშასადამე საქრთველოც უნდა გახდეს ოდესმე კაპიტალისტური ქვეყანაო. მომავალი ისტორია ჩვენის ქვეყნისა ოდესმე იტყვის, რომ ასეთ ქადაგებაში პროგრესისა და აღორძინების იდეის გარდა, დიდი პატრიოტიზმიც იდო, რადგან რა არის თუ არ პატრიოტიზმი ღარიბსა და უმწეო ერს ჩაჰბერო სული უკეთესის იმედისა“¹⁴¹.

და რაკი ქართული ბურჟუაზია უკვე ასპარეზზე ჩანდა, ამდენად „კლდეისტები“ არც ფარავდნენ, რომ მათი იდეოლოგიის მქადაგებლები იყვნენ, ვინაიდან თვლიდნენ, რომ ეს კლასი დიდი „სოციალური ენერჯის პატრონი“¹⁴² იყო.

„კლდეისტები“ განსაკუთრებულ დამოკიდებულებას იჩენდნენ „ქართული საეროვნო პარტიის“ — სოც.-ფედერალისტების წარმომადგენლის, დეპუტატ ვ. გელოვანის საქმისადმი; მიაჩნდათ, რომ ისიც ვერ იდგა სათანადო სიმალლეზე და რამდენადმე სოლიდარული იყო სოც.-დემოკრატების პოზიციისადმი.

„გადაათვალისწინებთ მთელი მისი სიტყვა და მოქმედება დღიდგან მისი გადუქტატებისა და რას ნახავთ ცოტათი მაინც რომ მოეცხოს მალამოდ ჩვენს დაწყლულულ საეროვნო იდეალებს?!“¹⁴³. ბევრს ვერაფერს. მისი პირველი სიტყვის შემდეგ, საქრთველოს ავტონომიის საკითხს რომ მიუძღვნა, ყველაფერში მთლიან ან ნაწილობრივ სოლიდარობას უცხადებს სხვა ქრთველ დეპუტატებს (ჩხეიძე, ჩხენკელი). ასე იყო ხიზანთა საკითხის განხილვისას, ხოლო 1914 წლის ბიუჯეტის განხილვისას მან მხარი დაუჭირა როგორც სიტყვით, ისე საქმით ჩხეიძის მკვეთრ გამოსვლას, რისთვისაც საქრთველოს წარმომადგენლები 15 სხდომიდან იქნენ დათხოვნილნი. „ქრთველმა დეპუტატმა ჩხეიძემ, — წერდა „კლდე“, — თავისი სოციალისტურ-რესპუბლიკანური სიტყვით აურზაური გა-

¹⁴¹ ურნ. „კლდე“, 1914 წლის 16 მარტი, გვ. 2-3.

¹⁴² იქვე.

¹⁴³ იქვე, 1914 წლის 25 მაისი, გვ. 5.

მოიწვია. ის მისცეს პასუხისგებაში... მის გულისთვის სათათბიროში მოახდინეს ობსტრუქცია. ამ ობსტრუქციის დროს თავი ისახელა მეორე ქართველმა — ჩხენკელმა. ისტორიული საქმე იმანაც ჩაიდინა. მისი იშვიათი სიჯიუტის გამო სათათბიროში პირველად შევიდა „უხეში ძალა“, რომელსაც ის დაემორჩილა. ესეც აღინიშნება სათათბიროს ისტორიაში. რასაკვირველია, „ტრუდოვიკი“ გელოვანიც არ ჩამოუვარდა მათ და ჩვენი დეპუტატების ასი პროცენტი „თავგანწირული ბრძოლისათვის“ 15 სხდომისაგან იქნა დათხოვნილი“¹⁴⁴.

სიტყვას აღარ გავაგრძელებთ და ვიტყვით, რომ IV სახელმწიფო სათათბიროსადმი „კლდის“ და „კლდეისტების“ დამოკიდებულება კარგადაა გაცხადებული ჟურნალში დასტამბულ შემდეგ სიტყვებში: „დიდი ხანია ცხადი გახდა, რომ სახელმწიფო სათათბიროს კანონმდებლობითი შემოქმედება, მისი ეხლანდელი უმრავლესობის წყალობით არაფერს წარმოადგენს“.

პროფ. ტრუბეცკოიმ მისი უმწეო მდგომარეობა ასე დაახასიათა: „ჩემს ბავშვობაში სეირნობის დროს ჩვენი მეეტლე კოფოზე დამსვამდა ხოლმე თავისთან და სადავეზე ხელებს მომაკიდინებდა და მეც მიხაროდა, ვითომ მე მივერეკებოდი ცხენებსაო“.

მართალია, უსუსურია სათათბიროს როლი რუსეთის ეხლანდელ პოლიტიკურ ცხოვრების მსვლელობაში, მაგრამ მიუხედავად ამისთანა უილაჯო მდგომარეობისა, სახელმწიფოს მთელი მოწინავე საზოგადოების ყურადღება მაინც მისკენ არის მიჰყრობილი, რადგან გონება ჩვენი ვერ შეჭრივებია საკანონმდებლო დანესებულების ფაქტიურ არ ქონას...“¹⁴⁵

„უსუსური სათათბიროს“ საქმიანობის სატირულ ფერებში წარმოდგენა იშვიათი როდი იყო „კლდეისტების“ მიერ, რასაც ხელისუფლების მხრიდან განსაკუთრებული „დაფასებაც“ მოჰყვებოდა ხოლმე... 1914 წლის 29 ივნისს ჟურნალი ბეჭდავს „ნაცარას“ წერილს სათაურით — „სახელმწიფო სათათბიროს კომედია“. იგი პოლიტიკური სატირის მშვენიერი ნიმუშია, რომელსაც აქვე მოვიტან, რათა მკითხველმა თავად გააცნობიეროს მისი ღირსებანი...

„ — როცა სახლს ცეცხლი უკიდია, ფანჯრებს ვინა ზოგავს, — სთქვა ერთმა მინისტრმა. — რუსეთში, ღვთის მადლით, არა გვაქვს კონსტიტუცია, — სთქვა მეორე მინისტრმა. — რუსეთში ასე იყო, ასე არის და ასე იქნება, სთქვა მესამემ.

ფანჯრებთან სახლსაც მოუნგრის კედლები და სახურავი. კონსტიტუცია მართლაც არავის უნახავს რუსეთში. ასე იყო, არის და იქნება. მაგრამ მაინც არის გულუბრყვილო ხალხი, რომელსაც ჰგონია, რომ მარტო შუშები დაიმტვრა.

¹⁴⁴ ჟურნ. „კლდე“, 1914 წლის 25 მაისი, გვ. 5.

¹⁴⁵ იქვე.

ასტყდა აყალ-მაყალი... რაზედ? ჩხეიძე პასუხის გებაში მისცეს! კადეტებმა ბიუჯეტის დამტკიცება... იუარეს მორცხვად! განა რა მოხდა არაჩვეულებრივი? პირველმა მინისტრმა მთელი სათათბირო დაითხოვა და თავისი კანონი გაიყვანა დასავლეთ გუბერნიებში.

მეორე ყურსაც არ იბერტყავდა „სალაყბო“ ნალაპარაკეზედ (Parlament — სალაყბო. ავტ. შენიშვნა). მესამემ დაცივნით უთხრა ლენის ანიოკების შემდეგ: ასე იყო, არის და იქნება.

დღეს კი უკვირთ, რომ ჩხეიძე სამართალში მისცეს, 20 დეპუტატი დაითხოვეს. რა არის აქ გასაკვირველი? მე მიკვირს, რატომ სულ არ დაითხოვეს ის „სალაყბო“, რომელიც მხოლოდ ლაყბობაში იმოდენა სახაზინო ფულსა ხარჯავს, როდესაც ეს ფული შეიძლება მოხმარებოდა საზღვრების დაცვას, მოხმარდებოდა უფრო მძიმე ტყვია-ნამალს, ვიდრე მსუბუქი სიტყვაა, უფრო მჭრელ ხიშტებს, ვიდრე ჩხეიძის, როდიჩევის ან მილიუკოვის „რჩეზია“, ან გელოვანის მჭერმეტყველური დუმილი... ავტონომიაზედ... ისეთი დუმილი, როგორც... თამამი ბავშვები რომ დაიბადებიან, ლაპარაკს იწყებენ, მაგრამ პირველსავე ავადმყოფობაზე, ენა ჩაუვარდათ და დიდხას, დიდხანს... როდეს აქეთია, ღმერთო? ჰო, პირველ იანვარს აქეთია, ხმას ვეღარ ამოიღებენ... ჰო, რას ვამბობდი? რამ ააღელვა ხალხი, რამ შეანუხა? პირიქით, უნდა უხაროდეს, რომ ბიუროკრატია მართლაც სიმაართლის თქმა მოინდომა და თვალთმაქცობას თავი დაანება: აქამდის ამბობდა: ღვთის მადლით არა გვაქვს კონსტიტუციაო და თან საზღვარგარეთელ სტუმრებს „დუმაზედ“ უჩვენებდა S'il vous plait, voila notre constitution და ლაქუცით ელიმებოდა: ფულს ხომ არ გვიბოძებთ ზარბაზნებისთვისო.

დღეს კი ნილაბი აიხადა და იმ დუმას, რომელსაც ჩამოათალა, რაც კი ჩამოეთლებოდა და ხოხოლიკები შეინვა, — გამოუცხადა: Не судят свое суждение имей! და ჩხეიძე სამართალში მისცა. რა არის აქ გასაკვირველი? თითქო ახალი ამბავი იყოს. თითქო ახალი ხილია, რომ ჩხეიძეებს სამართალში აძლევენ, თითქო ამისთანები გვენახოს ამ ხნის განმავლობაში. — ასე იყო, არის და იქნება. — რუსეთში, ღვთის მადლით, არა გვაქვს კონსტიტუცია¹⁴⁶.

ალსანიშნავია რომ სახელმწიფო სათათბიროს საქმიანობის პერიპეტიათა ასე ფართო წარმოჩენისათვის ყურნალ „კლდის“ რედაქტორის დამსახურება სათანადოდ „დაუფასებია“ ხელისუფლებას. ყურნალის 29 ივნისის სარედაქციო ქრონიკაში ნათქვამია: „ყურნალ „კლდის“ 18-ში მოთავსებული წერილისა „სახელმწიფო სათათბიროს კომედია“ და 19-ში დაბეჭდილ წერილისათვის „საშინელი უბედურება“ (ტირიფონის შესახებ), /უნდა იყოს არა „საშინელი“, არამედ „ახალი უბედურება“ — გ.ს./, რედაქტორი

¹⁴⁶ ყურნ. „კლდე“, 1914 წლის 4 მაისი, გვ. 6.

პასუხისგებაშია მიცემული 1034 და 152 მუხლების ძალით. პირი საბრალმდებლო ოქმისა უკვე ჩაბარდა მას 27-ს თიბათვეს“. სასამართლო პროცესზე წარმოთქმული თვიდაცვითი სიტყვის ეფექტურობის მეოხებით რედაქტორი რ. გაბაშვილი ციხეში დიდი ხნით ჯდომას გადაურჩა და მხოლოდ დაჯარიმება აკმარეს...

ასეთი იყო „კლდის“ დამოკიდებულება საქართველოში რუსეთის IV სახელმწიფო სათათბიროს არჩევნებისადმი და იქ წარგზავნილ ქართველ დეპუტატთა საქმიანობისადმი. ყოველივე ამან მნიშვნელოვან წილად განაპირობა ქართული პოლიტიკური აზრის ჩამოყალიბება დემოკრატიის გამოვლენის ისეთი უმნიშვნელოვანესი ინსტიტუტისადმი, როგორც პარლამენტარიზმია. მითუმეტეს ისეთ რეაქციულ ქვეყანაში, როგორც რუსეთის თვითმპყრობელური იმპერია იყო. რაც შეეხებათ „კლდეისტებს“, მათ თავიანთი ჟურნალის ფურცლებზე მეტის თქმა ვერ მოასწრეს, ვინაიდან 1915 წლის მაისში მისი გამოცემა შეწყდა და „კლდის“ ნაცვლად ქართველმა მკითხველმა იმავე მიმართულების ყოველდღიური გაზეთი „საქართველო“ მიიღო, რომელმაც სათათბიროს საქმიანობისადმი დამოკიდებულებას სისტემატური ხასიათი მისცა. აქვე შევნიშნავთ, რომ ამ ხანებიდან მოყოლებული, ვიდრე 1917 წლის თებერვლის რევოლუციამდე, ანუ თვითმპყრობელობის დამხობამდე, სათათბიროში მოღვაწე ქართველი სოციალ-დემოკრატი დეპუტატების აკაკი ჩხენკელისა და კარლო ჩხეიძის გამოსვლებში უფრო მეტი ყურადღების დათმობა გამოსჭვივის ეროვნული საკითხისადმი...

გამოჩენილ მამულიშვილთა წარმომაჩინებელი

ჟურნალ „კლდის“ ფურცლებზე სათანადო ადგილი უკავია ერის უკუდავი შვილების ნაღვან-ნაამაგართა წარმოჩენას, მათი ამაგის დაფასებისათვის ზრუნვას. რედაქციას კარგად ჰქონდა გათვალისწინებული, თუ რა როლის შესრულება შეეძლო ასეთ მასალებს ქართველი ხალხის ეროვნული სულისკვეთებით აღზრდის საქმეში. მითუმეტეს ისეთ ერს, რომელსაც მსოფლიო ცივილიზაციის ხმის გამწვდომი გენიოსები ჰყავდა... ერთ-ერთი მათგანი ხომ დიდი რუსთაველი და მისი ხელთუქმნელი ძეგლი — „ვეფხისტყაოსანი“?! რომელიც საუკუნეების მანძილზე მუდამ ქართველი ხალხის ჭირისა და ლხინის გამზიარებელი იყო. აკი ამაზე ამახვილებდა ყურადღებას სიმონ ქვარიანი „კლდის“ ფურცლებზე დაბეჭდილ წერილში — „შოთა რუსთაველი“.

ავტორის აზრით, მსოფლიო ისტორიაში მხოლოდ სამი მწერლის ნაწარმოებს დაუდვია ბინა ერის გულში: პომეროსის „ილიადას“, ფირდოუსის „შაჰნამეს“ და რუსთაველის „ვეფხისტყაოსანს“. რომ ქართველ ერს „თავისი ტრალიზმით სავსე ისტორიაში“, „მზიან დღეებზე“ მეტი საშინელი წყვიადით მოცული წლები და საუკუნეები ახსოვდა: „ქართველი ერის თვალწინ დაიმსხვრენ და გაჰქრნენ უზარმაზარი იმპერიები და სამეფონი...“, ის კი — ქართველთა სამშობლო — საქართველო, ცოცხალია და ყოველთვის ბრწყინვალე მომავლის მოლოდინშია... „ტანჯვისა და სიბნელის გრძელი საუკუნეების მანძილზე მის სხეულს ამსხვრევდა და აჩანაგებდა უღმობელ მტარვალთა უხეში ძალა, ანგრევდა მის სულიერ ერთობას და ტერიტორიულ მთლიანობას“, მაგრამ ვერავინ შეძლო მისი განადგურება... რატომ? იმიტომ, რომ ამ შავბნელ საუკუნეებში „მისი გამამხნეველები რამ იყო: წმ. ნინოს ჯვარი და შოთას „ვეფხისტყაოსანი“. პირველი სიმბოლო სარწმუნოებისა, მეორე კი სიმბოლო ეროვნობისა...“¹⁴⁷.

სწორედ ისინი აერთებდა ქართველურ ტომებს: ქართლელსა და კახელს, იმერსა და მეგრელს, სვანსა და აფხაზს, თუშსა და ინგილოს, მესხსა და გურულს“, რომ ენა, სარწმუნოება და „ვეფხისტყაოსანი“ იყო მათი შემკერველ-შემდუღაბებელი.

სწორედ ამ დიდი ღვანლის დასაფასებლად და დიდი რუსთაველის სახელის უკვდავსაყოფად ფართოდ უნდა აღნიშნულიყო პოეტის დაბადების 700 წლისთავი. გამართულიყო ლექციები და მოხსენებები, შექმნილიყო რუსთაველის ფონდი, დადგმულიყო შო-

¹⁴⁷ ჟურნ. „კლდე“, 1913 წლის 14 ივლისი, გვ. 6.

თას ძეგლები თბილისში, ქუთაისში, მესხეთში — სოფელ რუსთავში. ამ ეროვნული საქმის ორგანიზებაში მონაწილეობა უნდა მიეღო ყველა კულტურულ დაწესებულებას, ანუ სრულიად საქართველოს... წერილის დასასრულს სიმონ ქვარიანი ქართველ ერს მოუწოდებდა: „დრო არის, ბატონებო, შესაფერისად დავაფასოთ ის ღვთაებრივი ქართველი, რომელმაც მოგვცა უკვდავი „ვეფხისტყაოსანი!“ დრო არის შესაფერისი ძეგლი ავუგოთ იმ დიდებულ სულმნათს, რომლის გენიის წინაშე ქედს იხრის განათლებული კაცობრიობა!“¹⁴⁸

რედაქციას, რომელსაც დიდი ილიას მიერ დასახული გზის გამგრძელებლად მიაჩნდა თავი, მისი იდეებით ხალხის დამოძღვრა ესახებოდა უპირველეს მიზნად. „კლდეისტები“ არასდროს წასულან კომპრომისზე და მუდამ მტკიცედ იდგნენ ილიას სახელისა და საქმეების დაცვის სადარაჯოზე. არავის პატიობდნენ ერის „უგვირგვინო მეფის“ სახელის აუგად ხსენებას. ამ ბრძოლაში მენიწავეობას არავის უთმობდა „კლდის“ რედაქტორი რ. გაბაშვილი.

მისი აზრით, ილია ჭავჭავაძე „მამათ მთავარი იყო იმ ეროვნული თვითშეგნებისა, რომლითაც შეგვაყვარა სამშობლო უზენაესის სიყვარულით, მან დაგვისურათა და მოგვაგონა დიდებული წარსული, მან აგვინერა ჩვენი ბუნების სიდიადე... მან და მისმა თანამოძმეთ განანათლეს ჩვენი ქვეყანა ჰუმანურის, მეცნიერულის მისწრაფებით, მათ შეგვაერთეს ურთიერთი ერთის გრძნობით და ღვანლი მათი წარუშლელია“.

„კლდეისტები“ განსაკუთრებული დაუნდობლობით გამოირჩეოდნენ სოციალ-დემოკრატების მიმართ, რომლებიც ბედავდნენ და დროდა დრო ლაფსა და ტალახს ესროდნენ ილიას სახელს. ამ მხრივ ყველაზე მეტად გამოირჩეოდა მენშევიკური პრესის ერთ-ერთი კალამ-ნაყოფიერი თანამშრომელი პეტრე გელეიშვილი (ყარიბი).

ვინ იყო პეტრე გელეიშვილი და მისი მსგავსი „სულით ლატაკი ადამიანები, რომელთაც ილია მოჰკლეს და მაინც არ ისვენებდნენ და ჩვენი ეროვნულ სიამაყის, მასტადონტის საფლავსაც დაჰყეფდნენ და ათასგვარ ჭორსა და ცილისწამებას ავრცელებდნენ მის მიმართ“¹⁴⁹.

იმ დღეებში ასეთი ღვარძლიანი და ცილისწამებლური ლექციით გამოსულა პ. გელეიშვილი ქუთაისის საზოგადოების წინაშე და აუდიტორიისაგან სტვენა, ბოლოკისა და კვერცხების სროლა დაუმსახურებია... „კლდე“ თავის მხრივ ყურადღების გარეშე არ ტოვებდა ამ ფაქტს და აღმფოთებით წერდა: „როცა ჯალათი კაცს დაჰკლავს, ან ჩამოაღრჩობს, მერე მინას მიაყრის და... მოისვენებს, ან სინანულით იქნება პირჯვარიც გადაინეროს... თქვენ, თქვენ კი

¹⁴⁸ ურნ. „კლდე“ 1915 წლის 20 ოქტომბერი, გვ. 5.

¹⁴⁹ იქვე, 1914 წლის 4 მაისი, გვ. 3.

გელეიშვილებო და მახარაძენო რა გინდათ კიდევ, რა? გინდათ ხალხს ჩაუნერგოთ სიძულვილი და უკუნითი-უკუნისამდე ანათემა ათქმევინოთ? სადამდე მივა თქვენი სიმდაბლე და ღვარძლიანობა?.. მოასვენეთ დიდებული ქართველი თქვენი ბილნი ენისაგან, თქვენი ლექციებისაგან¹⁵⁰.

„ილია ჭავჭავაძე და ფ. მახარაძე“, ასეა დასათაურებული „რ. გ.“-ს (რ. გაბაშვილის) წერილი, რომელსაც ეპიგრაფად ჰომეროსის „ილიადიდან“ მოტანილი სიტყვები აქვს წამძღვარებული: „სახ-ელოვანი არ გეყავს პატროკლე, საზიზლარი კი ტერსიტი, მინაზედ დაიარება“. საკმარისია ეს სიტყვები გავაცნობიეროთ და მივხვდებით თუ რა დამოკიდებულება ჰქონდა ავტორს ამ ორი პიროვნე-ბისადმი.

წერილი იმდენად საინტერესოდ მიგვაჩნია, რომ მთლიანად მოგვყავს იგი, რათა დღევანდელ მკითხველს შესაძლებლობა მიეცეს თავისი თვალით წაიკითხოს და ამასთან წარმოადგინოს ის პოზიცია, რომელიც ეროვნულ-დემოკრატიებს ეჭირათ სოც.-დემოკრატების, როგორც ილიას მკვლელობის ორგანიზატორთა მიმართ...

„ფილიპე მახარაძეს და მის ზნედაცემულ კომპანიას კიდევ ერთხელ მოუსურვებიათ გამომზეურება თავისი ბილნი გულისა და ახლა მიუმართავთ ორიგინალურ საშუალებისათვის — შეცდომაში შეჰყავთ გულუბრყვილო, შეუგნებელი ხალხი, რომელიც ბრმად აჰყვება ხოლმე თავის გალაღებულ ბელადებს და აწერიან პროტესტებს. რასაკვირველია, ს.-დემოკრატიული ბელადები დაჩვეულნი არიან დემაგოგიურ სიყალბეს, რადგან ხელობათა აქვთ გადაქცეული ხალხის გაბრიყვება იქ, სადაც სიმართლით ვერას ხდებიან; მაგრამ ძნელი წარმოსადგენია, რომ მოკლული მგოსანი, რომელიც მსხვერპლად შეენირა ფ. მახარაძისთანა ხალხის უფიცობას — დღესაც არ პოულობდეს მოსვენებას საფლავში.

ჯერ იმ შავ დროს, როდესაც მთელი ერი აღშფოთებული იყო, უმაგალითო, უმზავს მკვლელობით, როდესაც მთელ საქართველოს ბინდი გადაეკრა და გული დათუთქული ჰქონდა — გონება ვერ ურიგდებოდა იმ შემზარავ გარემოებას, რომ მოიპოვებოდნენ ისეთი პირები, ჯგუფები, რომლებიც ამართლებდნენ, ან უსიტყვოდ ურიგდებოდნენ ამ მკვლელობას. ჯერ მაშინვე გაისმოდა ხმები, რომ ეს პარტიული მკვლელობა იყო, მაგრამ არც ერთ შეგნებულ ადამიანს არ სჯეროდა ასეთი უხამსი ბრალდება მთელი პარტიისა და მაშინვე ცხადი იყო მხოლოდ, რომ შეუგნებელი ნაწილი ამ პარტიისა, ერთი ჯგუფი მისი, იზიარებდა ამ მკვლელობის ბრალსა. ეს ისეთი მეხის დატეხა იყო მაშინ, რომ შესაძლებელია, რომ ბევრმა გადააჭრბა კიდევ თავის სიფიცხეში; მაგრამ როდესაც დღეს, შვიდი

¹⁵⁰ ჟურნ. „კლდე“ 1914 წლის 4 მაისი, გვ. 3.

ნლის შემდეგ, ფ. მახარაძე და მისი ამქარი იმეორებს იმავე ცილისნამებას ილია ჭავჭავაძის წინააღმდეგ, როდესაც თითქოს დღესაც ამართლებენ ამ საზიზღარ მკვლელობას — ჩვენ იძულებულნი ვართ ვიფიქროთ, რომ შემქმნელნი და დამბადებელნი — ილიას მკვლელობის იდეისა სწორედ ს.-დ. იყვნენ.

რალა თქმა უნდა, ილია ჭავჭავაძე, როგორც კერძო საკუთრების პრინციპის მომხრე და მემამულე, დაიცავდა თავის მამულს, გაუმკლავდებოდა იმ აზრის გამარჯვებას, რომელიც წინააღმდეგი იყო მისი შემეცნებისა, მაგრამ ჯერ არავის არსად დაუმტკიცებია, რომ მას ამ თავდაცვაში რაიმე სისასტიკე ჩაედინოს ან გლეხების დარბევა მოენადინებინოს. ცილისნამება სწორედ იმაში არის და ფ. მახარაძის დაბეჭდილი კორესპონდენცია (გულისხმობს უფრნ. „მოგზაურში“ დაბეჭდილს... — გ. ს.), საცა მას ავაზაკად გამოჰყავდა იდეური დამცველი კერძო საკუთრებისა, — სწორედ ის სტიმული იყო, რომელმაც მოაკვლევინა დიდი ილია.

არც ერთი ადამიანი არ არის უნაკლო. დიდბუნებოვან ადამიანთ ხშირად დიდი ნაკლიცა აქვთ, მაგრამ მათი დასჯა სიკვდილით არამც თუ ისეთივე უაზრო, მხეცური საქციელია, როგორც ყოველი უბრალო ადამიანისა, არამედ ერთი-ათად მეტი.

ადამიანს უფლება არა აქვს შეგნებული, პრინციპიალური მონინააღმდეგე დასაჯოს სიკვდილით რწმენისათვის და ამისათვის იბრძვის მთელი კაცობრიობა, მთელი ქვეყნის დემოკრატია, როცა მოითხოვს სიკვდილით დასჯის მოსპობას, — და რა იყო თუ არა სიკვდილით დასჯა, ილიას მკვლელობა? არა, ეს უბრალო მკვლელობა არ იყო, არ იყო გამონეული აღშფოთებით, ან პირადი ჯავრით, — არა, ეს დასჯა იყო, სიკვდილით დასჯა და აი, რაში აქვს ბრალი ფ. მახარაძეს. იმ დროს, როცა ადამიანის სიცოცხლე გროშად ფასობდა, როცა კერძო საკუთრების ყველა მომხრე, იდეური თუ ანგარებითი, დამნაშავედ ითვლებოდა, სოციალისტურ წრეებში, გამოდგა მახარაძე და ამტკიცებდა, რომ ილია ჭავჭავაძე არა მარტო პრინციპიალური მომხრეა კერძო საკუთრებისა, არამედ სასტიკი, ბოროტი მისი დამცველი, ჯამუში და ავაზაკი. რალა თქმა უნდა, რომ შეუგნებელ ადამიანისთვის ეს საკმარისი ნასაქეზებელი მიზეზია მკვლელობისათვის და ნამეტნავად იმ დროს, როცა მემამულის მოკვლა სიყოჩაღედ ითვლებოდა. და იმის დასამტკიცებლად, რომ ეს მკვლელობა უბრალო კი არ იყო, არამედ შეგნებულად მომზადებული და „პოლიტიკური“ ხასიათისა, რომ იგი დასჯა იყო იდეური მონინააღმდეგისა — ისიც კმარა, რომ მკვლელები „შენუხებული“ გლეხები კი არ იყვნენ, არამედ ვილაც სხვა, გარეშე წრეებიდან გამოსულნი და მათი იდეური სულის ჩამდგმელი ფ. მახარაძე იყო.

ჩვენ იმასაც კი ვერ ვიტყვით, რომ ფ. მახარაძე შეუგნებელი დამნაშავეა, რადგან იმდენი ჭკუა თუ ჰქონდა მაშინ, რომ შეუგნე-

ბელ ბრბოს ხელმძღვანელობდა, ისიც კარგა უნდა ჰქონოდა გათვალისწინებული, თუ ისეთს მზაკერულ ბრალდებას რა შედეგი შეიძლებოდა მოჰყოლოდა. გარდა ამისა, განა ეხლანდელი მისი და მის ამხანაგთა განგაში, ეხლანდელი განმეორება ცილისწამებისა, არ ამტკიცებს იმას, რომ ისინი დღესაც იმ აზრისანი არიან, რომ ილია სამართლიანად მოჰკლეს, მის მიერ ჩანადენ (?) დანაშაულისათვის? განა ის ჭკუასა და აზრს მოკლებული პროტესტები, რომელსაც აწერინებენ ვილაც გაქსუებულ მუშებს, არ ამტკიცებენ, რომ დღესაც მოიკვლებოდა ილია, რომ ამ მკვლელობის განმეორება შეიძლებოდეს? განა ისინი, ვინც მკვდარს არ ასვენებენ საფლავში, შესდგებოდნენ იმის მაღლით მოსილ ნიჭის წინაშე და იტყოდნენ: შენ, მართალია, ადამიანური ნაკლი გაქვს, მაგრამ მაინც პატივსა გცემთ, როგორც ღირსეულს?

არა, ისინი დღესაც გაუგებრად დნენ მას გულსა, რადგან ფანტიკური შემეცნება, რომელიც მით უმეტესად იპყრობს ადამიანს, რაც უფრო დაბალ საფეხურზედა სდგას იგი განვითარებისა და შეგნებისა, — დღესაც უკარნახებს: არავითარ საშუალებას არ მოერიდო შენი მიზნის მისაღწევად. და როდესაც ნამდვილი, ევროპული დემოკრატია მუხლს მოიდრეკდა დიდი მგოსნის წინაშე და ეტყოდა: მირონცხებულო, ნაკლნი შენნი ჰქრებიან შენის შარავანდედის ბრწყინვალეებაში, ჩვენებური შეუგნებელი, გაბოროტებული და მარტო შურით აღჭურვილი „მუშათა პარტია“ (აფსუს სახელო) ეუბნება მუშას: წვრიმალნი მიზნისთვისაც კი არ დაინდო დიდებული ადამიანი. ეგრეც უნდა იყვეს: იდეა სამუშაო იარაღსა ჰგავს — ჭკვიანის ხელში ჰხმარდება სასარგებლო საქმეს და ბრიყვნი ხელფეხს წარიკვეთენ, ან სხვას დაასახიჩრებენ.

სხვასთან ერთად ჩვენც ვაცხადებთ ჩვენს გმობას და ზიზლსა იმ პირებისადმი, რომელნიც ილია ჭავჭავაძის წმინდა სახელსაც არ ინდობენ და თავიანთ პოლიტიკური მლიქვნელობის იარაღად ჰქმნიან¹⁵¹.

„კლდე“ სწორად აცნობიერებდა: „როდესაც ჩვენ ვამბობთ, რომ თქვენ მოჰკალით ილია, ეს იმას კი არ ნიშნავს, რომ მახარაძემ, გელეიშვილმა ან ვინმემ სხვამ თავისი ხელით მოჰკლა, არამედ იმათ შეჰქმნეს ისეთი ატმოსფერო და იმისთანა დროს, როცა ეს მკვლელობა აუცილებელი თუ არა, შესაძლებელი გახდა“ (ხაზგასმა ჟურნალისა — გ. ს.).

„კლდე“ დიდი პატივისცემით და ყურადღებით ეკიდებოდა აკაკის, როგორც შემოქმედების, ისე მისი სახელისა და ღირსების წარმოჩენას. აქ ყველაფერზე დანვრილებით არ შეეჩერდებით, ყურადღებას გავამახვილებთ მხოლოდ რამდენიმე ეპიზოდზე,

¹⁵¹ ჟურნ „კლდე“, 1913 წლის 28 ივლისი, გვ. 3-4.

რომლებიც უფრო ნათელს მოჰყენენ „კლდეების“ დამოკიდებულებას „საქართველოს ბულბულისადმი“.

...საინტერესო ფაქტია, რომ აკაკი მონანილეობას ლებულობდა რუსეთის IV სახელმწიფო სათათბიროს არჩევნებში, როგორც დეპუტატობის კანდიდატი... თუმცა ეს იმდენად პირადი სურვილი არ იყო, რამდენადაც ანგარიშის განევა მის პატივისმცემელთა დიდი ჯგუფის თხოვნისათვის... მაგრამ მისმა მონინაალმდეგეებმა (სოციალ-ფედერალისტებმა) მოახერხეს და აკაკი დაამარცხეს... რა თქმა უნდა, ეს სასიამოვნოდ არ დარჩებოდა 70 წელს გადაცილებულ მგოსანს, მითუმეტეს მაშინ, როცა თავის სიხარულს ვერ მალავდნენ სოციალისტური პარტიების წარმომადგენლები და მათი ბეჭდური ორგანოები.

ფარსმან-ფარუხი (შალვა ამირეჯიბი) „კლდეში“ დასტამბულ ერთ-ერთ ნერილში, ქართველ ამომრჩეველთა უმნიფარობაზე მიუთითებს, რომლებმაც ვერ გაითვალისწინეს, თუ რა მნიშვნელობა ექნებოდა აკაკის არჩევას და მის გამოსვლებს სათათბიროში ერის ინტერესების დასაცავად... „წარსულ არჩევნებში აკაკი წერეთელი გააშავეს. მე რომ მკითხოთ, ყველაზე დიდი სიურპრიზი არჩევნებისა ის იყო, რომ სოლოლაკის ბურჟუაზიამ სოციალ-დემოკრატი ჩხეიძე აირჩია დეპუტატად, მაგრამ, რაკი არიან ისეთები, რომლებიც ამ სიურპრიზზედ უდიდეს სიურპრიზად აკაკის გაშავებას სთვლიან, — ჩვენც ამაზედ ვილაპარაკებთ. თავის თავად ეს ფაქტი კუროზია. ამ დამარცხებით და გაშავებით არც ჭეშმარიტება შელახულა, არამც თვით აკაკი წერეთელი. ეს თუ გნებავთ, ერთგვარი ეფექტია! ეფექტი, როცა კოზირი ხალხს მოუვიდა და კოზირმა სხვა მასტის ხელმწიფე მოკლა!“¹⁵² პუბლიცისტს მიაჩნდა, რომ აკაკისადმი მხარდაჭერის სინანულის გამოთქმა მხოლოდ ქვენა მისწრაფებათა გამომხატველი დემაგოგია იყო.

1915 წლის იანვარში ქართველ ხალხს დიდი უბედურება დაატყდა თავს: თავის მშობლიურ სოფელ სხვიტორში, გარდაიცვალა აკაკი წერეთელი. მისი გადმოსვენება და მთანმინდაზე დაკრძალვა უდიდეს დემონსტრაციად იქცა არა მარტო ქართველი ხალხისათვის, არამედ აქ მაცხოვრებელი სხვადასხვა ერებისთვისაც. იმ დღეებში არ დარჩენილა არც ერთი პერიოდული ორგანო, როგორც კავკასიაში, ისე იმპერიის მასშტაბით, რომ ჩვენი ხალხის მწუხარება არ გაეზიარებია და სამძიმართან ერთად აკაკის შემოქმედების საკაცობრიო ღირებულებაზე არ გაემახვილებია ყურადღება... სამგლოვიარო დღეებში, განსაკუთრებით კი მისი დასაფლავების დღეს — 8 თებერვალს, მრავალმა ადამიანმა მგოსნის კუბოსთან გამოსვლისას დააფიქსირა, როგორც თავისი, ისე ამა თუ იმ

¹⁵² უფრ. „კლდე“, 1912 წლის 4 ნოემბერი, გვ. 7-8.

პარტიის თუ დანესებულების დამოკიდებულება აკაკის პიროვნებისადმი... მრავალთა შორის, ერთერთი მშვენიერი იყო აზებაიჯანელი ხალხის თვალსაჩინო წარმომადგენლის — ალი-მარდან-ბეგ-თოფჩიბაშის გამოსვლა... ჟურნალმა „კლდე“ და „კლდეისტებმა“ იმ მრავალ გამოსვლათა შორის, სწორედ თოფჩიბაშის სიტყვა შეარჩიეს და მთლიანად დასტამბეს იგი. ამ გულწრფელ სიტყვაში იმდენი სიტბო და სიყვარული, არაერთმორწმუნე მეზობლის გულისთქმეა გადმოცემული, რომ მიზანშეწონილად მიმაჩნია ამ გამოსვლიდან ვრცელი ამონაწერი მივანოდო დღევანდელ მკითხველს, მითუმეტეს მასზე ჯერჯერობით ყურადღება არავის შეუჩერებია. ოთხიათეული წლის წინათ წარმოთქმულ ამ სიტყვებს დღესაც არ დაუკარგავთ თავისი აქტუალური ჟღერადობა...

„მეზობელო ქართველებო! ამიერკავკასიის აღმოსავლეთ ნაწილში მცხოვრები მაჰმადიანები, თავიანთი კულტურულ-საგანმანათლებლო და საქველმოქმედო დანესებულებათა სახით, ბაქოდან, განჯიდან, თბილისიდან, ერევნიდან თუ სხვა ქალაქებიდან, უღრმესი თანაგრძნობით იზიარებენ ჭალარა მეზობელ საქართველოს ეროვნულ მწუხარებას, რომელიც დიდი მეფანდურის აკაკის დაკარგვამ გამოიწვია მასში!

როგორც მთელი ქართველი ერი სწუხს და ჰგოდებს თავის საუკეთესო იდეალების მატარებლის დაკარგვის გამო, ისე მაჰმადიანებმა, გაიგეს თუ არა მგოსნის გარდაცვალების ამბავი, იგრძნეს, რომ 26 იანვარს დასავლეთ ამიერკავკასიაში მოხდა რალაც საშინელი რამ...

ასეთ შემთხვევაში მეგობრული ხელის განოდება, თუნდა მცირეოდენი სანუგეშო სიტყვაც კი, მწუხარებაში თანაგრძნობა და მონაწილეობა უწმინდესი მოვალეობაა ჩვენი, რასაც გვიკარნახებს ჩვენი ურთიერთისადმი კეთილი მეზობლობა და სიყვარული.

ჩვენ ვამაყობთ და დიდად ვაფასებთ კიდეც ამ დამოკიდებულებას, ვინაიდან ჩვენ, მაჰმადიანებმა, კარგად გავიგეთ და ვუნწყით კიდეც, რომ მეზობელ ქართველებში ჩვენ საქმე გვაქვს რაინდ და კეთილშობილ ხალხთან, რომლის სამარადისო დევიზი იყო: „იცოცხლე და მიეც სხვასაც სიცოცხლის უფლება!“

ეს უდიდესი და ბრძნული საწყისი მთელი საკაცობრიო ცხოვრებისა, რომელსაც გულწრფელად ეწევიან ქართველები, ჩვენში, მაჰმადიანთა შორის იწვევს გულწრფელ თანაგრძნობას და კეთილგანწყობილებას მომავალ თაობათა საბედნიეროდ და საკეთილდღეოდ.

ყველასათვის ძვირფას დიდებულ ქართველის კუბოსთან მიწდა დავაპოვნო, რომ ძალზედ გულწრფელია და სპეტაკი ეს ჩვენი გრძნობა, მნამს, რომ ამით განიხარებს თვით მგოსნის სიტყვაც... განა ეს შენ არ ხარ ბრძენო წინასწარმეტყველო, რომელიც ტკბილ

საგალობელთა დამღერებით ადასტურებდი შენი სამშობლოს აღორძინებას და მოუნოდებდი ყველა ხალხს თანხმობისა, სიყვარულისა და ერთობისაკენ! „ხან ცის, ხან მიწის ანარეკლი“ შენ, მგრძნობიერი, ჯადოსნურ სულით განჭვრეტდი შენი საყვარელი სამშობლოს ბედნიერებას, მშვიდობის დღესასწაულს და ერთა გაერთიანების სხივოსნობას! დაე, ამიერიდან ამ უკანასკნელთა შორის იფრინოს შენმა შარავანდედით მოსილმა სახემ, რათა მარად-ჟამს მოაგონოს მათ ის დიდებული იდეები, რასაც შენ მთელი ნახევარი საუკუნის განმავლობაში ჰქადაგებდი, ერთა შორის სიყვარულისა და თანხმობის განსამტკიცებლად! შენ იყავ წეშმარიტი მოციქული ამ საუკუნის იდეებისა, რომლებიც ძვირფასი კავკასიის გაფურჩქვნის თავდებად ჩაითვლება! შენ, დაუვიწყარო მგოსანო, უკვდავ ჰყავ შენი ქართველი ერი, რომელმაც საკმარისია ახსენოს შენი სახელი, რომ მთელ ქვეყანას დაუმტკიცოს, რომ ისიც ღირსია კულტუროსან და განათლებულ ქვეყნის სახელწოდებისა!

მძიმეა საქართველოს დანაკლისი, მაგრამ დაე, ინუგეშონ ჩვენმა კეთილშობილმა მეზობლებმა, რომ დიდებულ ქართველის მიერ სამშობლოს ნიადაგზე მხატვრულ-შემოქმედებით დაბნეული თესლი, მთელ კავკასიაში აღმოაცენს აცისკროვნებულ ნაყოფს, რომლის ნათელი მოჰფენს სიყვარულს და თავისუფლებას ესოდენ მწყურვალ ერებს...

და აი, ამ განშორების ჟამს, როდესაც დიდებულ ნეშტს სამუდამოდ უნდა გამოვემშვიდობოთ, ფიცი დავდოთ, რომ მტკიცედ დავიცავთ და შევასრულებთ მის აღთქმებს, რათა უდანაშაულო ხალხთა სისხლი უბრალოდ აღარ დაიღვაროს, არ განადგურდეს ნაჭირნახულევი ველ-მინდორი და სარჩო-საბადებელი, აღარ გადაიბუგოს სახლები და სოფელ-ქალაქები...

დაე, მგოსნის სანუკვარი ფიქრები და ზრახვები სასურველად გაიფურჩქნოს, რათა უკუნითი უკუნისამდე განმტკიცებულ იქნეს მის მიერ შექმნილი ხელთუქმნელი ძეგლი, რომლის გარშემო არასოდეს არ ნაიშლება კვალი მადლიერ კავკასიის ერებისა¹⁵³.

ნიკო ნიკოლაძე ჟურნალ „კლდის“ და „კლდეისტების“ ერთ-ერთი მოძღვართ-მოძღვარი გახლდათ. ჟურნალის მიმართულებას სრულად შეეფერებოდა დიდი მამულიშვილის მოსაზრებები საქართველოს შემდგომი პოლიტიკური, ეკონომიკური თუ ნაციონალური განვითარების სფეროებში... ნიკო ნიკოლაძე ხომ ის პიროვნება იყო, რომელიც „თერგდალეულთა“ ბანაკიდან გამოსულ გიორგი წერეთელთან ერთად სათავეში ჩაუდგა ე.წ. „მეორე დასს“ და კაპიტალისტური გზით საქართველოს განვითარების პრიორიტეტი აღიარა... იგი არა მარტო თავისი უბრწყინვალესი პუბლი-

¹⁵³ ჟურნ. „კლდე“, 1915 წლის 15 თებერვალი, გვ. 6.

ცისტკით, არამედ პრაქტიკულ-ორგანიზატორული საქმიანობით თვალნათლივ უმტკიცებდა ყველას, რომ ერის, ნაციის ეკონომიური სიძლიერით შეიძლებოდა განპირობებული ყოფილიყო მისი სიცოცხლისუნარიანობა. ეკონომიკაში მტკიცედ იცავდა კერძომე-საკუთარულ პრინციპს, აღიარებდა ვაჭრობა-მრეწველობის განვითარების პრიმატს, ხოლო პოლიტიკაში რუსეთთან, მის პროგრესულ ძალებთან კავშირს, რუსეთის მფარველობის ქვეშ, საკუთარი ეროვნული ავტონომიის განმტკიცებას თვლიდა გამართლებულად... / აქედანაც შეიძლება ნათლად წარმოვიდგინოთ, თუ რა საყრდენ ბურჟს წარმოადგენდა იგი სამშობლოს ბედ-იღბალზე დაფიქრებული ჩვენი საუკუნის 10-იანი წლების ახალგაზრდა მამულიშვილებისათვის, რომლებიც სწორედ დიდი წინამორბედების მოსაზრებათა სინთეზში სახავედნენ სამოქმედო პროგრამას...

ყველაზე რელიეფურად ნიკო ნიკოლაძისადმი „კლდეისტა“ დამოკიდებულება 1913 წლის ნოემბერში თავიანთ ჟურნალში მისი წერილის „მამაშვილური რჩევის“ გამოქვეყნებით აისახება. უფრო ზუსტად კი რედაქციის მიწაწერში, რომელშიც ნათქვამია: „ეს წერილი მოგვივიდა ბ-ნ ნ. ნიკოლაძისაგან. როგორც თვითონ პატივცემული ავტორიც კერძო წერილში გვეუბნება — „ამ ეხლანდელ დროისთვის, ამ ხანის მდგომარეობისათვის, მას არავითარი მნიშვნელობა არ ექნება, რადგან ეხლა ჩვენს ერს სულ სხვა საქმე, საჭიროება და მოქმედება უდევს წინ: ყოველ ახალ მდგომარეობას ახალი ტაქტიკა შეეფერება“-ო, მაგრამ რედაქცია მაინც ბეჭდავდა მას, როგორც ძვირფას ისტორიულ მასალას, რომელიც აჩვენებდა „მომავალ გამომძეველს ჩვენის წარსულისას, თუ გადამწყვეტ მომენტებში პოლიტიკური ცხოვრების ბრუნვისა, რომელი მოაზრე რას ფიქრობდა და ქადაგებდა ჩვენში, რა გზას უჩვენებდა ჩვენს ერს და მწერლობას“¹⁵⁴.

ჩვენთვის კი, როგორც ნ. ნიკოლაძე მიუთითებს, „მომავალ გამომძეველთათვის“, მისი ეს წერილი, მართლაც რომ უმნიშვნელოვანეს ისტორიულ ღირებულებას იძენს, სადაც გაბმით გადმოცემულია თითქმის 40-წლიანი საქმიანობა იმ მიმართულებისა, რომელსაც იგი მოთავეობდა...

ნ. ნიკოლაძეს ეს წერილი დაუნერია და გაუგზავნია სოც.-ფედერალისტების გაზეთის „ცნობის ფურცლის“ რედაქტორის ალ. ჯაბადარისათვის, მისდამირწმუნებულ ორგანოს ფურცლებზე ბ-ნ სიტყვას (ს. ფირცხალავას) მიერ გამოქვეყნებული განმარტებულ წერილის პასუხად...

¹⁵⁴ ჟურნ. „კლდე“, 1913 წლის 15 ნოემბერი.

ბ. სიტყვა კი ძველ მოღვაწეებს აბრალებდა „არამც თუ არაფერს ამბობენ და გაჩუმებულან მკვდრებივით, მალავენ და მარხავენ იმას, რაც უთქვამთ და გაუკეთებიათ წინადო“.

ალსანიშნავია, რომ „ცნობის ფურცლის“ თანამშრომელი „ძველ მოღვაწეებში“ გულისხმობდა, — ილიას, აკაკის, ნიკო ნიკოლაძეს, იაკობ გიგებაშვილს და სხვ.

ნ. ნიკოლაძე, როგორც ბრძენსა და გამოცდილ პოლემისტს შეეფერება, თანმიმდევრულად აქარწყლებს თავისი შედარებით ახალგაზრდა ოპონენტის მოსაზრებებს და სწორედ რომ მამაშვილური თავდაჭერილობით (ღირსებით, ტონით) მას და მის რედაქტორს შეახსენებს იმას, თუ რა და როგორ უკეთებიათ მის წინამორბედებს ერისა და ქვეყნის სასიკეთოდ...

„სიტყვას“ (ს. ფირცხალავას) გამონათქვამი: „ძველები არაფერს ამბობენ, მკვდრებივით გაჩუმებულანო“ — ნიკო ნიკოლაძეს მიაჩნია ახალგაზრდულ თავშეუთქავებლობად, ვინაიდან „მის ბედნიერ ასაკში კაცს, მოქმედებად, დედამინის ღერძად, ზეცის ბოძად მარტო ის საქმე მიაჩნია, რომელსაც თვითონ ემსახურება“. სხვათა ნაკეთებსა და ნაღვანს, ან აღმაცერად უყურებენ, ანდა საერთოდ ივიწყებენ... ნ. ნიკოლაძის ირონიული შენიშვნით „მოღვაწე, მათი აზრით, მარტო ისაა, ვინც „სტატიებს“ სწერს სხვის დედანზე, ან ძველ ლექსს გრეხს ახალ კილოზე. სხვა ყველა, მკვდარიცა და გადამდგარიც, ღმერთს მადლობა შესწირე, თუ მოლალატეც არ დაგარქვეს, ან სხვა რამ უარესი, რაც ატაცებულ ყმანვილს ენაზე მოადგება. ბედნიერ ასაკს ასე სჩვევია. *მაგრამ ვაი იმ ერს, ვის მწერლობაშიც ამ განვითარების პირობი კანონსა სდებენ*“-ო¹⁵⁵.

ნ. ნიკოლაძე გულწრფელად ერთგულია იმ პრინციპისა, რომელიც ქართველ ხალხს შესანიშნავად აქვს გაცხადებული ბრძნულ აფორიზმში: „ის ურჩევნია მამულსა, შვილი რომ ჰჯობდეს მამასა“ და რომ „ძველ მოღვაწეებს ეს გულმხურვალედ და გულწრფელად სურთ“...

„სიტყვასა“ და მის თანამოაზრეთა უმადურობას ნ. ნიკოლაძე იმაში ხედავდა, რომ ისინი შეგნებულად თუ შეუგნებლად აგდებულ დამოკიდებულებას იჩენდნენ ნამდვილი მოღვაწეების მიმართ და ახალგაზრდული ამჩატიების გამო ავიწყდებოდათ, რომ „ნამდვილი მოღვაწე როდი კვდება ხოლმე“.

ახალთაობის მოღვაწეთათვის საქილიკო და დასაწუნნი „ძველების“ საქციელში ის ყოფილა, რომ თავიანთი აზრი გამოუთქვამთ რევოლუციასთან დაკავშირებით და იმის შესახებაც, თუ რაოდენ სასარგებლო ან, საზიანო იქნებოდა იგი ჩვენისთანა პატარა ერისათვის.

¹⁵⁵ ურნ. „კლდე“, 1913 წლის 17 გიორგობისთვე, გვ. 4.

„დღეს ისეთი დროა, — წერდა ნ. ნიკოლაძე მათ გასაგონად, — რომელიც საუკუნეში ერთხელ დგება ხოლმე. მინა იძრა, ძველი გზა და შენობა დაიქცა და ახალი ჯერ არავისთვისა სჩანს. ამ უცნაურ მდგომარეობაში საზოგადო მოღვაწეებს მიძიმე მოვალეობა და პასუხისგება აწევს ერისა და შთამომავლობის წინ: ხალხს უნდა გამოუძებნოს მტკიცე, უტყუარი გზა შევლისა და წარმატებისა. დროშა უნდა აღმართონ დაფანტული ხალხის შესაკრებად, ხიფათის ასაცილებლად და უმჯობესი მომავლისაკენ წასამართავად“¹⁵⁶.

ამის მაგიერ, „ჩვენი მოღვაწეები თუ დასები ერთმანეთს იმაში ეკინკლავებიან: ჩვენ შევძარით დედამინა თუ თქვენო“, — მხარედ შენიშნავს ნ. ნიკოლაძე და პირდაპირ მიმართავს ასე მოფიქრალ ოპონენტებს: „მინის ძვრას, ბატონო, ვერც ჩვენისთანა, ვერც — გავბედავ თქმას — თქვენისთანა ვაჭბატონი მოახერხებს. ჩვენ ღმერთმა იმ სიდიდე ღონე გვაღირსოს, რომ გამოკვლევა შევიძლოთ თუ რა მსოფლიო ძალებს უმოქმედნიათ ამ შემთხვევაში და რითი ავიცილოთ თავიდან მათი მავნე გავლენა? თუ თავის მოტყუება და ხალხის შეცდენა არა გვსურს, უნდა ბეჯითად გვახსოვდეს, რომ ჩვენს მხარეს (გულისხმობს საქართველოს — გ. ს.) არც გაძლიერება, არც შეჩერება შეუძლია ამ მოვლენისა. მეტსაც მოგახსენებთ, თუ არ გამირისხდებით: არც საჭიროა ჩვენის მხრით მინას ვებლაუჭოთ, მის შესაძრავად. უამისოდაც, უმსხვერპლოდაც, შეგვიძლია, თუ არ დავიბენით, ვნებას ავცდეთ და უმჯობესი მომავალი დავიმკვიდროთ“¹⁵⁷.

ამ ვრცელი წერილის მომდევნო ნაწილში ნ. ნიკოლაძე ყურადღებას მიაქცევდა იმას, თუ რა მიმართულებები იქნა შემოღებული ქართველ მოღვაწეთა მიერ გასული ათწლეულების მანძილზე „ნაციონალურიდამ დანყებული სოციალურამდი“ და, რომელი დროშა გამოდგა „შველის დროშად და რომელი — დაღუპვისა?“.

მისი ღრმა რწმენით, იმჟამად „ყველა მოღვაწეს, ძველსა და ახალს, ყველა წოდებას, ყველა ეროვნებას ჩვენს ქვეყანაში ის დროშა უფრო იზიდავს, რომლის აფრიალება პირველად მე მელირსა „დროებაში“ 1870- ში და, რომელზედაც მარტო ორი სიტყვა ეწერა: „ერთობა, თვითმართველობა“. ეს დროშა მით იმარჯვებს, რომ გარეგან მიბაძვით კი არ არის შემოღებული, შინაური ნაკეთებია, ჩვენი ქვეყნის საჭიროებაზეა გამოჭრილი“¹⁵⁸.

ყურნალის შემდეგი ნომრის გაგრძელებაში ნ. ნიკოლაძე თავის ოპონენტებს მოაგონებდა, რომ მის მიერ შემუშავებული პოლიტიკის შესაბამისად უნდა გაერთიანებულიყვნენ „ყველა წოდების, სარწმუნ-

¹⁵⁶ ჟურნ „კლდე“, 1913 წლის 17 გიორგობისთვე, გვ. 5.

¹⁵⁷ იქვე.

¹⁵⁸ იქვე.

ნეობის, ქონების, ეროვნების განურჩევლად" და შეერთებული შრომით და ღონით უნდა ებრძოლათ „*რუსეთის მოწინავე ნაწილთან ერთად*“, იმ წესების შემოსაღებად, ურომლისოდაც ადამიანის ცხოვრება ადამიანური არ იქნებოდა¹⁵⁹. ჩვენი მოღვაწის ამ იდეისათვის იმჟამად, ე. ი. 1870-ში მთელი კავკასიის ინტელიგენციას დაუჭერია მხარი... 1877 წელს ნ. ნიკოლაძის მიერ აღმართული ამ დროშის წინააღმდეგ ქართველებს გაულაშქრებიან, რომელთაც მალე სომხობაც მიჰყოლიან, მაგრამ ამ ორი ერის წარმომადგენლები მთელი 10 წლის განმავლობაში მაინც არ დაობდნენ... 1890 წელს კი მათ შორის ატყდა მწვავე ბრძოლა, ხოლო „სამი თუ ოთხი წლის შემდეგ გაიმართა თვით ქართველობაში შინაური ომი ეგრედ ნოდებული „მესამე დასის“ თაოსნობით“, როცა „მუშა წინა-ლუდგა პატრონს, გლეხი — აზნაურს, მრევლი — მღვდელს“ და სხვ.¹⁶⁰

პუბლიცისტის თქმით, ერთიანობის დროშისადმი უარის თქმამ კავკასიის ვერც ცალკეული ერების და ვერც კლასების განდგომამ, სასიკეთო ვერაფერი მოუტანა ვერავის, „ცალცალკე ვერც ერთმა ჩვენგანმა ქვეყანა ვერ ააშენა. ჩვენი ძალა კი ურთიერთ-შუა ბრძოლაში დაიღუპა... ცალცალკე ვერა გავარიგეთ-რა... ცალკე გზით შევლის ძებნამ ჩვენში სიკეთე არავის მოუტანა; რომ ერთობის იქით გზა არავის აქვს და, რომ საერთო გასაჭირს საერთო მტერს — მარტო ერთობა სძლევს და განხეთქილება კი აძლიერებს“¹⁶¹.

ნ. ნიკოლაძე ღრმად დარწმუნებული თავის მიერ შემუშავებულ პოლიტიკის სისწორეში, კავკასიის ხალხებს, ცალკეული კლასებისა თუ სოციალური ფენების წარმომადგენლებს მოუწოდებდა შეერთებისაკენ, გაერთიანებისაკენ: „რუსი, თათარი, ფრანგი, სომეხი, ქართველი, ურია, ლეკი, გლეხი, თავადი, აზნაური, ერი და მღვდელი, მდიდარი და ღარიბი, ნასწავლი და უმეცარი შეერთდით თვით-მმართველობის დროშის ქვეშ...“¹⁶²

ნ. ნიკოლაძეს სწამდა: თუ კი ერთობას ვიქონიებდით და დავიცავდით მას, ვერავითარი ძალა წინ ვერ აღუდგებოდა ჩვენს წარმატებას და სრული თვითმმართველობის მოპოვებას; რომ სწორედ სრული თვითმმართველობის მფარველობის ქვეშ შესაძლებელი იქნებოდა შრომა და ბრძოლა კერძო სიკეთის საძიებლად; რომ იქ, საცაა სიმართლე და მტკიცე წესი არ არსებობს, ვერც ფაბრიკანტი დაამყარებს მკვიდრათ თავის კეთილდღეობას, ვერც მუშა მოეს-

¹⁵⁹ ურნ „კლდე“, 1913 წლის 25 ნოემბერი, გვ. 3.

¹⁶⁰ იქვე, 1913 წლის 24 გიორგობისთვე, გვ. 4.

¹⁶¹ იქვე.

¹⁶² იქვე.

წრება თავის ღირსების დაცვას, ვერც ერი თავის ენის და ვითარების შერჩენას...“¹⁶³ და სხვა.

ასეთი იყო ძირითადად ნ. ნიკოლაძის პოლიტიკური მრწამსი, რომელსაც იგი მთელი თავისი შეგნებული ცხოვრების მანძილზე ემსახურებოდა. მთავარი „მამაშვილურ რჩევაში“ ის იყო, რომ თუ კავკასიის ხალხებს სურდათ თავისუფლებისა და თვითმმართველობის (ავტონომიის) მოპოვება, მათ ერთიანი ძალისხმევა უნდა მიემართათ რუსეთის თვითმპყრობელური ხელისუფლების წინააღმდეგ და იმავე რუსეთის პროგრესულ ძალებთან ერთად, და არა მათგან განცალკევებით, აეგოთ ერთიანი დემოკრატიული სახელმწიფო... მოგვიანებით, კერძოდ, საქართველოს დამოუკიდებლობის წლებში, განსაკუთრებით კი საქართველოს პირველი ეროვნული ყრილობის მოწვევისა და ეროვნული საბჭოს არჩევის შემდეგ ნ. ნიკოლაძე მნიშვნელოვან დიპლომატიურ ღონისძიებებში ღებულობდა მონაწილეობას, სადაც ყოველთვის რუსეთის პროგრესულ ძალებთან კავშირში ყოფნის აუცილებლობას ანიჭებდა უპირატესობას, რადგან ეს მისი აზრით, ვინმეს სურვილი კი არა, არამედ ისტორიული და გეოპოლიტიკური აუცილებლობით იყო განპირობებული...

აქვე აღვნიშნავთ იმასაც, რომ ნ. ნიკოლაძე ყურნალ „კლდის“ მუდმივი და სასურველი სტუმარი იყო, როგორც ავტორი და როგორც მოქმედი პირი მის ფურცლებზე დასტამბულ არაერთ საყურადღებო მასალისა. სამაგალითოდ ყურადღებას შევაჩერებთ ვინმე „რიონელის“ წერილზე — „ფოთი და ნიკო ნიკოლაძე“... წერილი განსაკუთრებულ ღირებულებას იძენს იმის გამოც, რომ იგი იმ დროს გამოქვეყნდა, როცა ნ. ნიკოლაძის წინააღმდეგ აღვირახსნილ კრიტიკას ეწეოდა სხვადასხვა ერის, კლასის თუ ფენის წარმომადგენელი, როცა ბოლო აღარ უჩანდა მის წინააღმდეგ გამართულ ცილისმწამებელთა და ინსინუაციების დიდოსტა გამოხდომებს, როცა შეთითხნილი ბრალდებებით იმდენი ჰქნეს რომ სასამართლოს კარამდე მიიყვანეს 70 წელს გადაცილებული ერისთვის დამაშვრალი მოღვაწე...

„რიონელის“ წერილში ნიკო ნიკოლაძის მრავალმხრივი მოღვაწეობის ერთ-ერთ, შეიძლება ითქვას, ყველაზე მნიშვნელოვან მხარეზეა ყურადღება გამახვილებული. ესაა — საქართველოს ზღვისპირა ქალაქის ფოთის, ნავსადგურის განაშენიანება-გამშენიერებაში შეტანილი წვლილი, როცა ნ. ნიკოლაძემ 20-წლიანი დაუღალავი შრომით შეძლო გასაცოდავებული, დაჭაობებული უძველესი საზღვაო დასახლება, ევროპული ტიპის ნავსადგურთა დონემდე აეყვანა... ასეთი იყო ფოთი, „შავი ზღვის საცოდავი

¹⁶³ ჟურნ, „კლდე“, 1913 წლის 24 გიორგობისთვე, გვ. 4.

ბოლაზი, უმწეო ლატაკი და ჭაობიანი; ფოთი მკვდარი, უპატრონო და ბათუმით დაჩაგრული¹⁶⁴.

მაგრამ იქ ნ. ნიკოლაძის მიზანმიმართული შრომისა და გარჯის მეობებით სასწაულებრივი გარდაქმნები მომხდარა თავისი თვალ-მისაცემი შედეგებით. „იგი ოც წელიწადში სუფთა, მშვენიერ ქალაქად გარდაქმნილა. დამშრალა ჭაობები, დადუმებულა ბაყაყების გაუთავებელი ყიყინი; სწორი და ვრცელი მოკირნლული ქუჩები, ხისა და ქვის ორ სართულიანი ლამაზი და ფეროვანი სახლები, საქონლით სავსე მინით გადახურული რკინის ბაზარი და კოხტა დუქნები, პატარა წყალსადენი, ცხენის „კონკა“ და ელექტრონით განათება“, რომ საქართველოს ეს ქალაქი პირველხარისხოვან ბოლაზედ ქცეულა, რომლის ნავსაყუდარი იმდროისათვის დიდი საოკეანო გემებით იყო სავსე და, რომლის ტვირთბრუნვა წელიწადში 100 მილიონ ფუტს შეადგენდა...

ყველაფერი ეს — კორესპონდენტის მართებული შენიშვნით, — ფოთის ქალაქის თავის — ნიკო ნიკოლაძის დამსახურება იყო, რომელსაც მტრობდნენ და ებრძოდნენ ჯგუფი ქართველი ინტელიგენტებისა და რალაცეებს ბეჭდავდნენ გაზეთებში, ცდილობდნენ ასეთ მოღვაწეთა დამსახურების გაბიაბრუებას, მათი საქმიანობის მიფუჩქვებას და „თავისი თავი ქართველი ერის წინამძღვრად და პატრონად მიაჩნდათ“... ავტორი დარწმუნებული იყო, რომ ამ „სპილობუმბერაზის მიმართ პატარა ფინიების ყეფა“ მას ვერაფერს დააკლებდა და დადგებოდა დრო, თუ მისი თანამედროვენი არა, „მომავალი მაინც დააფასებდა ამ იშვიათი კაცის ღვაწლს, ამ ერთადერთი ქართველის (ხაზგასმა ავტორისაა — გ. ს.) შემოქმედებას, მაღალ ნიჭს, იშვიათ ცოდნას, გამოცდილებას, უდრეკ ენერგიას და თავისებურობას. ეს კაცი განათლებულ ევროპის უპირველეს სახელმწიფოებში დაიკავებდა ერთ უპირველეს ადგილს... ჩვენში კი ჩვენმა „ქებულმა მამულიშვილებმა“ გააძვევეს და გაიმარტოვეს, მისცეს იგი უსამართლო პასუხისგებაში და 70 წლის მოხუცს წაართვეს სახელი, მიაყენეს სულიერი სიმწარე და ნივთიერი შევიწროება“¹⁶⁵.

„კლდის“ კორესპონდენტი შემდეგ ააშკარავებდა იმ ნაძირალებს, რომლებმაც „ამ 6 წლის წინად პარტიის სახელით საგურამოს გზაზე მოჰკლეს დიდებული ილია; 70 წლის მოხუცის წმინდა სისხლით მორწყეს წინამურის მიდამო... ახლა კიდევე სხვა მათ გვარნი აუჩემდნენ მეორე დიდებულ პირს, 70 წლის მოხუცებულს, დიდ ნიკოს და გაზეთის სამუშალებით ათახსირებენ მის პოლიტიკას და მიმართულებას, ჰგმობდნენ და მასხარად იგდებდნენ მის სა-

¹⁶⁴ ურნ. „კლდე“, 1913 წლის 20 ოქტომბერი, გვ. 9.

¹⁶⁵ იქვე, გვ. 10.

ზოგადო მოღვაწეობას", და ამით აძულებენ ხალხს ამ იშვიათ ადამიანს... ამ სულით მახინჯებს — „კლდეისტები“ ჭკუისმოხმობისაკენ მოუწოდებდნენ და მკაცრად მიუთითებდნენ: „გონს მოდით, ბატონებო! შესდექით! კმარა! ნუ ესვრით ნიხლებს მოხუცებულ ლომს! ნუ ჰგმობთ სიმართლეს და ჭეშმარიტებას! გაახილეთ თვალი, ჩადით ფოთში, ნახეთ ამ კაცის ნამოქმედარი, გაეცანით კარგად ნიკო ნიკოლაძის სულისკვეთებას მისწრაფებას, შემდეგ საჯეთ მის პოლიტიკაზე და მის მოქმედებაზე, მანამდი კი სირცხვილია და ბოროტმოქმედება ამ კაცის წინააღმდეგ ხმის ამოღება“.

და ვიდრე ეს ღვთის პირისგან გადავარდნილი „ურნმუნო თომები“ ასეთი ნაბიჯის გადადგმას მოისურვებდნენ, „კლდის“ კორესპონდენტი რეპორტაჟული სტილით საუბრობს იმ კონკრეტულ ობიექტებზე, რომლებიც ნიკო ნიკოლაძის გამჭრიახი გონების წყალობით, ფოთის მშვენებად ქცეულიყვნენ... მათ შორის, ნავსადგურზე, რომელსაც იგი ნიკოლაძის „უსაყვარლეს პირმშო შვილს“ უწოდებს, წყალსადენზე, ელექტროსადგურზე, ელევატორზე, გზებსა და ხიდებზე, მოკირწყლულ ქუჩებზე და ბალებ-სკვერებზე, ქალაქის პერსპექტივებზე, ახლო მომავალში რომ ფიქრობდა ნიკოლაძე რეალობად ექცია ისინი... და რომლებიც, მოშურნეთა წყალობით, შეიძლებოდა მოშლილიყო და განადგურებულიყო... კორესპონდენტი ცდილობდა გაერკვია, თუ საიდან, ან რის გამო მოდიოდა ეს უმადურობა და გულბოროტება ნ. ნიკოლაძისადმი იმ დროინდელი ინტელიგენციის ერთი ნაწილის მხრიდან, რომლებიც სხვადასხვა რედაქციებსა და დაწესებულებებში მოკალათებულნი ღვარძლს ანთხევდნენ ღვანღმოსილი პიროვნების მიმართ და ფრიად საინტერესო და ანგარიშგასაწევ დასკვნამდე მიდიოდა...

„ბევრჯერ დავფიქრებულვარ და დღემდი არ მქონდა კარგად შეგნებული, თუ რად აითვალწუნა ჩვენმა ინტელიგენციამ საუკეთესო შვილი ნიკო ნიკოლაძე. ახლა კი მესმის. ნიკოლაძე და რუსეთში ნასწავლი ინტელიგენცია, სულ სხვადასხვა ტიპები, ორი ანტიპოდი. *ნიკოლაძე სულით და გულით ევროპელია* (ხაზგასმა ჩემია — გ. ს.), ევროპაში ნასწავლი, ევროპის იდეებით გამსჭვალული, ევროპის ტეხნიკა-ინდუსტრიის მცოდნე, ინიციატივის კაცი, პრაქტიკი და საქმიანი. ჩვენი ინტელიგენცია კი უმთავრესად აღზრდილი რუსეთის სკოლაში, ამ სკოლის მონური სულით, ჩინოვნიკური რუტინით და სხოლასტიკით გაყლენთილი... ნიკოლაძე კი უწინარეს ყოვლისა მუშაკია დაკაპინებული ხელებით, ცხოვრების ტეხნიკი და ლაბორანტი. იგი რეალისტია, რეალურ პოლიტიკის მანარმოებელი, ცხოვრების მცოდნე, მის ქარტეხილში ჩავარდნილი. ძალაუნებურად იქცევა ისე, როგორც უკარნახებს მას ცხოვრების სასტიკი სინამდვილე. ეს არ ესმის ჩვენს ინტელიგენციას და არც სურს შეიგნოს. ნიკოლაძის ასეთ მოქმედება-პოლიტიკას ჩვენ ცხოვრებაში

უსუსური ინტელიგენტები ნათლავენ ოპორტუნიზმად, ქვეყნის ლა-
ლატად და თვით ნიკოლაძეს ეძახიან რენეგატს, რუტინიორს და
რეაქციონერს... აქედან აშკარაა, რომ ნიკოლაძე და ჩვენი ინტელი-
გენცია, სულ სხვადასხვა პოლიუსზე დგანან, ცხოვრებას სხვა და
სხვა პრიზმით უმზერენ და ერთმანეთის პოლიტიკას გმობენ. ამან
გამოიწვია ანტაგონიზმი ნიკოლაძისადმი, მისი დევნა და ქირღვა¹⁶⁶.

ასეთი იყო „კლდეისტების“ დამოკიდებულება ნიკო ნიკოლაძის-
ადმი, როგორც მოღვაწის, პიროვნებისა და მამულიშვილისადმი. ვინ
იცის მოხუცი მოღვაწის გულს რა საღებუნად დაედებოდა ასეთი
მხარდაჭერა, როცა მის წინააღმდეგ იმ ხანებში მხოლოდ დაუმ-
სახურებელი ლანძღვა-გინება ისმოდა... ეროვნულ-დემოკრატები
იყვნენ, რომლებმაც შემდგომ ნ. ნიკოლაძე თავისი პარტიის საპატიო
თავმჯდომარედ აირჩიეს...

განსაკუთრებით აღსანიშნავია „კლდეისტა“ დამოკიდებულე-
ბა არჩილ ჯორჯაძის პიროვნებისა და მისი ნაღვან-ნაამაგარი-
სადმი... არჩილის პიროვნული ღირსებები შესანიშნავად აქვს გააზ-
რებული ცნობილ ქართველ მწერალს ეკატერინე გაბაშვილს, რო-
მელიც „კლდის“ ფურცლებზე წერდა: „არჩილი იდეალია, ესენციაა
იმ ნაპერწკლების, რომელიც გაფანტულია ერის გულსა და სიღრ-
მეში... ერის შვილი უებრო, მირონცხებული, რომელმაც მისცა ერს
თვითშეგნება, აზრი დაუდო, გზა გაუკაფა და ყველა ამისთვის
იარაღად იხმარა მხოლოდ სიმართლე, დიდსულოვნება, აზრი სპე-
ტაკი და სიყვარული დაუშრეტელი“¹⁶⁷.

სიმონ ქვარიანის აზრით, არჩილი იყო „სულით ფაქიზი, განათ-
ლებული ევროპელი, გულით საუკეთესო ქართველი. მან მთელი
თავისი მგზნებარე არსებით შეიყვარა ამირანივით ტანჯული სა-
ქართველო. ის ჩაუდგა სათავეში ქართველი ახალგაზრდობის ახალ
მოძრაობას ჯერ პარიზში, შემდეგ კი თბილისში. ეს მოძრაობა... იმ
დროს ძლიერ საჭირო იყო, როგორც მონინააღმდეგე ძალა იმ უკულ-
მართ მოძრაობისა, რომელიც დამკვიდრდა ჩვენში დასელთა სახ-
ელით და რომელიც უარპყოფდა ყოველივე ქართულს“¹⁶⁸.

ჟურნალის აზრით, კი არჩ. ჯორჯაძე იყო — „გულწრფელი პა-
ტრიოტი. საქართველო, ქართველი ერი! — აი მისი მუდმივი
საფიქრალი.

ქართველი ერის ზრდა-განვითარება, საქართველოს ცხოვრების
მონყობა-გამაგრება! — აი მისი წმინდათა-წმინდა, რისთვისაც იგი
დაულალავად იბრძოდა, წერდა, შრომობდა, იტანჯებოდა.

¹⁶⁶ ჟურნ. „კლდე“ 1913 წლის 20 ოქტომბერი, გვ. 10.

¹⁶⁷ იქვე, 1913 წლის 13 მარტი, გვ. 3.

¹⁶⁸ იქვე, 1913 წლის 7 აპრილი, გვ. 5.

მას ყველაფერი მიაქვს ეროვნული იდეის განმტკიცების სა-
კურთხეველზედ.

იბრძვის ქართული ტერიტორიის მთლიანობისათვის. ✓

იბრძვის ქართული ვაჭრობა-მრეწველობის აღორძინებისათვის.

იბრძვის ქართველი მშრომელი ხალხის ცხოვრების პირობების
გაუმჯობესებისათვის.

ამისთვის ბევრჯერ სცდილობს:

შეარიგოს შეურიგებელი,

მოარჯულოს ურჯულო,

გაამხნევოს მშრომელი,

გაათამამოს ლაჩარი.

სცდილობს სოციალიზმიც კი ეროვნულ იდეის განმტკიცებას
დაახმაროს!

ა. ჯორჯაძე თავით-ფეხამდე პატრიოტია, პატრიოტი დემოკ-
რატი... მუდმივად, დაჟინებით მოუწოდებდა მოპირდაპირეებს:

შეთანხმდით!

და ამ შეთანხმების იმედით სიკვდილამდე ოცნებობდა¹⁶⁹ —
წერდა „ეკალი“ (დავით ვაჩნაძე) მისი გარდაცვალების წლის თავზე
„კლდეში“ დასტამბულ წერილში „ძვირფასი სამარე“.

ჟურნალის ფურცლებზე ფართო პლანით არის წარმოჩენილი
არჩ. ჯორჯაძის პოლიტიკური ნააზრევი, რომელიც „მესამოციანი“
წლების განმათავისუფლებელთა შემდეგ პირველი იყო, რომელმაც
ეროვნული საკითხი პრაქტიკულ ნიადაგზე დააყენა“, რომ „ნაციონ-
ალურად მოაზროვნე საქართველოსათვის იგი მუდამ იყო უმაღლესი
ავტორიტეტი ყველა ეროვნულ საკითხში“ და ა. შ..

უფრო თვალნათლივ რომ წარმოეჩინა არჩილ ჯორჯაძის
დამსახურება თავისი მკითხველებისათვის, ჟურნალი „კლდე“ 1914
წლის მარტში ბეჭდავს მის უმნიშვნელოვანეს თეორიულ ნაშრომს,
საპროგრამო ხასიათის თხზულებას „საერთო მოქმედების ნიადაგი“.
სარედაქციო მინაწერში „კლდე“ განმარტავდა ნაშრომის ხელახალი
პუბლიკაციის მიზეზებს და წერდა: „ეს წერილი ეკუთვნის განსვე-
ნებულ არჩ. ჯორჯაძის კალამს, დაწერილია 1901 წელს. ვბეჭდავთ
ამას, რადგან იგი მეტად დაახლოვებულია დღევანდელ მომენტთან,
როდესაც ირკვევა და ისახება ახალი შეჯგუფება, რომლის გარშემო
ასეთი შეხლა-შემოხლაა გამართული. იქნება ეს წერილი ცოტათი
გამოაფხიზლებს იმათ, ვისაც აქამდის დარჩენილი ჰქონდათ სა-
ზოგადოებრივი აზრის შესაქმნელი ბურთი და მოედანი და „სო-
ციალისტური“ ჟრიაბულით გააქვთ და გამოაქვთ ქვეყანა“¹⁷⁰.

¹⁶⁹ ჟურნ „კლდე“, 1914 წლის 30 მარტი, გვ. 13-14.

¹⁷⁰ იქვე, გვ. 2.

ყურნალი აქცენტებს აკეთებდა არჩ. ჯორჯაძის მოსაზრებებზე იმასთან დაკავშირებით, რომ საქართველოს დაღუპვისაგან იხსნიდა „გამრთელება და გაფართოება“, რისი მიღწევის საფუძვლად ყველასათვის გამოდგებოდა — ზრუნვა ქართული ენის დაცვისათვის, ვაჭრობა-მრეწველობისათვის და ქართული მეურნეობის ქართულთა ხელში შენარჩუნებისათვის.

ყურნალი აქცენტს აკეთებდა არჩ. ჯორჯაძის დამოკიდებულებაზე მშობლიური ენისადმი, რომ „სამშობლო ენა გონების წარმატების აუცილებელი პირობაა...“ რომ „სამშობლო ენის დაკარგვასთან ერთად ხალხს სიცოცხლე აკლდება და ცხოვრება ფერსა და სისრულეს ჰკარგავს...“, რომ „ქართული ენის გადარჩენით, მთელი ჩვენი ეროვნული ხასიათი გადარჩებოდა...“ და ა. შ.

არჩ. ჯორჯაძის აზრით, ქართული ვაჭრობა-მრეწველობის განვითარებით საქართველოში კაპიტალიზმს ნაციონალური მიმართულება მიეცემოდა, ანუ „საქართველოს კაპიტალისტი, ე. ი. ვაჭარი და მრეწველი, ქართველ მუშას კი არ უნდა დაპირისპირებოდა, არამედ იმ უცხო ტომის ელემენტებს, რომელთაც ხელში ეჭირათ აღებ-მიცემობის მონოპოლია“... დაბოლოს ქართული ტერიტორიები, ქართული მიწები ქართველთა კუთვნილებაში უნდა დარჩენილიყო ქართული მეურნეობის გასავითარებლად, ხოლო თუ ქართველი მემამულისაგან მიწის გაყიდვა გარდაუვალი გახდებოდა, იგი ქართული ბანკების დახმარებით ქართველ გლეხკაცობას, ან ქართველ ვაჭარ-მრეწველთ უნდა შეესყიდათ.. ამრიგად „ნაციონალური ცხოვრების გამაგრება ხელს შეუწყობდა ეკონომიური წარმატების განმტკიცებას“ — დაასკვნოდა არჩ. ჯორჯაძე და ეს მოსაზრება მისაღებად მიაჩნდათ „კლდეისტებს“.

„კლდის“ ფურლებზე დასტამბულ — სტატიაში „არჩილ ჯორჯაძე და ხიზნობა“, ავტორი დავით ვაჩნაძე განიხილავდა არჩ. ჯორჯაძის მიერ 1908 წელს გამოცემულ წიგნში „სამშობლო და მამულიშვილობა“ გამოთქმულ მოსაზრებებს საერთოდ ეროვნულ, და კერძოდ, ხიზანთა საკითხის გამოც... „ეროვნული პრობლემის სიძნელე თეორიული სიძნელე არ არის... თეორიაში ყოველივე მწყობრად სწყდება და ჰლაგდება. სიძნელე იწყება იმ დროიდან, როდესაც ეროვნული პრობლემა გინდათ გადასწყვიტოთ კონკრეტულ პირობების მიხედვით...“ დ. ვაჩნაძის თქმით, არ. ჯორჯაძეს მიაჩნდა, რომ ოსთა ჩამოხიზვნას მიზანიმართულად წარმართავდა თვითმპყრობელური ხელისუფლება... ვინაიდან „ოსების იმიგრაციას წინ არავინ ელოებოდა, მაშინ როცა ქართველობის გადასახლ-გადმოსახლების გზები ყოველგან შეკრული ჰქონდა...“ დიდ მამულიშვილს, შოვინისტური მოსაზრებები როდი ალაპარაკებდა. არა!

„ჩვენ არც მისვლა-მოსვლის წინააღმდეგნი ვართ, არც უცხოელების გარეკვის აზრი გვალფრთოვანებს, ჩვენ ვამბობთ

მხოლოდ, რომ ემიგრაცია-იმიგრაციის საკითხი მონესრიგებული უნდა იქმნას სამართლიანობის თანახმად... (ხაზგასმა არჩ. ჯორჯაძისაა — გ. ს.)... ჩვენ გვინდა, რომ იგი გაბატონებული ბიუროკრატიის ხელში პოლიტიკის იარაღი არ იყოს¹⁷¹.

არჩილ ჯორჯაძის გარდაცვალების ერთი წლისთავთან დაკავშირებით „კლდეში“ დაბეჭდილ წერილში „ა—ი“ (შალვა ამირეჯიბი) სწორად გაიაზრებდა ამ დიდი მოღვაწის საზოგადოებრივ-პოლიტიკური ცხოვრების გზას, მოღვაწისას „რომლის სახელი სამუდამოდ გადაბმულია ქართულ პოლიტიკურ ფიქრებთან“. იქვე დასმულ კითხვაზე, თუ ვინ იყო არჩილ ჯორჯაძე, ავტორი საინტერესოდ პასუხობდა: „თუ ავიღებთ ყველა იმას, რაც მას უწერია, რაც მას უფიქრია და განუცდია, თუ ავიღებთ ყველა ამას, იგი მუდამ სფინქსად დარჩება ჩვენთვის. ერთის მხრივ ის თითქმის პირველი იყო, რომელმაც საძირკველი ჩაუყარა ქართველი ხალხის პოლიტიკურ პროგრამას და სურდა ყოფილ სამეფოსათვის დაებრუნებინა ელემენტი სახელმწიფოებრიობისა, ე.ი. თვითმმართველობა და, მეორეს მხრივ კი, სოციალურ სამართლიანობის ნიადაგზედ, იგი მივიდა სახელმწიფოს სრულ უარყოფამდე“, ხოლო თუ როგორ თავსდებოდა ეს ორი ურთიერთსაწინააღმდეგო თეორია მის აზროვნებაში, — შ. ამირეჯიბის აზრით, ყველა დაინტერესებულ პირს მისი თხზულებების გულდასმით გააზრების შემდეგ შეეძლო... მთავარი ის იყო, რომ არჩილ ჯორჯაძე „პირველად ეჩვენა ქართველ საზოგადოებას, როგორც მებრძოლი ეროვნულ უფლებისათვის“; რომ „ქართული პოლიტიკური აზროვნება დავალებული იყო მისგან“, რადგან „საზოგადო ასპარეზზედ მის გამოსვლამდე ქართველი საზოგადოება თავის პოლიტიკაში, მხოლოდ კეთილის სურვილებით იქცევდა თავსა“, ვინაიდან მას „არ ჰქონდა გარკვეული პროგრამა აღმოცენებული ეროვნულ ნიადაგზედ...“ ჩვენ მივისწრაფოდით, როგორც თავგანწირული მხედარი და არ კი ვიცოდით საით?.. ეს იყო ბრძოლა, გნებავთ სროლა გაშმაგებულ მონადირეთა, მაგრამ სროლა უმიზნოდ... ასეთ დროს გამოჩნდა არჩილ ჯორჯაძე...“ ავტორის აზრით, მის გამოჩენას შედეგად ის მოჰყვა, რომ მან განვრთნა ჩვენი მერანი, საზღვარი დაუდო მის ლტოლვილებას, ანუ დაუახლოვდა მიზანს და მოგვცა ნიშანი, ურომლისოდაც მანამდე არ ვიცოდით ვარტყამდით თუ არა მიზანს... ახლა ჩვენ ვიცით საით მიჰქრის ჩვენი მერანი“.

შ. ამირეჯიბის აზრით, თუ ყველაფერ ამას პოლიტიკურ ენაზე გადავთარგმნიდით, არჩილ ჯორჯაძის სახით მივიღებდით „დიდ

¹⁷¹ ჟურნ. „კლდე“, 1913 წლის 21 აპრილი, გვ. 7.

პოლიტიკურ მოღვაწეს, რომელმაც დიდი ღვაწლი დასდო თავის სამშობლოს პოლიტიკური პროგრამის შექმნით¹⁷².

მოგვიანებით იგივე შ. ამირეჯიბი ყურადღებას ამახვილებდა იმაზე, რომ საქართველოს სოციალისტ-ფედერალისტთა პარტია, რომლის დამაარსებელი და ლიდერი არჩილ ჯორჯაძე იყო, დიდ „კრიზისში იმყოფებოდა“, ვინაიდან მის „პროგრამას სული არა აქვს, რომელიც ზრდის, აწვითარებს და აყალიბებს პარტიულ პროვინციას“, ამის მიზეზი კი, — ავტორის აზრით, ის ყოფილა, რომ სოც.-ფედერალისტებს საკუთარი ფილოსოფიაც კი არ ჰქონდათ, გნებავთ იმის მსგავსი, როგორც სოციალ-დემოკრატებს ჰქონდათ მეცნიერული სოციალიზმის სახით... რატომ მოხდა ასე? ამაში თავისი „წვლილი“ ჰქონდა შეტანილი არჩილ ჯორჯაძეს, რომელიც „უფრო მოაზროვნე იყო, ვიდრე პოლიტიკური მოღვაწე...“ უპირველესად იგი ეროვნული თავისუფლების შეუდრეკელი მომხრე იყო. მისთვის სწორედ „ეროვნული თავისუფლება იყო ვარსკვლავი, ხოლო სოციალიზმი — მზე, მაგრამ მისი შეცდომა ის იყო, რომ მზის შუქზედ სურდა ვარსკვლავის დანახვა და მას ისე დაემართა, რომ მზის დროს ვარსკვლავს ველარ ხედავდა, ხოლო ვარსკვლავის დროს მზესა“. რატომ მოხდა ასე? შ. ამირეჯიბის შენიშვნით: „მის მსოფლმხედველობას ნაციონალიზმი და სოციალიზმი შეადგენდა, რომლებიც ერთმანეთს ეწინააღმდეგებოდნენ და რომ ერთმანეთში მოეთავსებინა, შექმნა რალაც მესამე — ფედერალიზმი“¹⁷³. ავტორის აზრით, ფედერალიზმის შემუშავებით, არჩილ ჯორჯაძემ მხოლოდ თავისი ძიება დააგვირგვინა, მან ავანსი გაიღო მომავლისათვის და ამით დროებით გადაარჩინა თავისი თეორია დალუპვას, მაგრამ მას არ უფიქრია იმაზედ რომ ასეთი რამ თავისთავად მხოლოდ nonsens-ია¹⁷⁴.

შ. ამირეჯიბს და, საერთოდ, „კლდეისტებს“ კარგად მოეხსენებოდათ თუ რა იყო ფედერალიზმი, მაგრამ მათ მხოლოდ ის მიაჩნდათ საეჭვოდ, რომ „პარტია, რომელიც ეროვნული უფლებისათვის ბრძოლას აპირებდა, სარჩულად პოლიტიკური ფედერალიზმის დადება არ გამოადგებოდა“. არ გამოადგებოდა იმიტომ, რომ „ფედერაცია კავშირია თანაბარ უფლებიან ერთა, ორგანიზაციათა, ერთეულთა. მას სხვა შინაარსი არა აქვს... მას არც ფორმა აქვს — მართვა-გამგეობისა, სახელმწიფოსი, კონსტიტუციისა, იგი მხოლოდ კომბინაციაა. და განა შესაძლებელია პარტიულ პროგრამას ან ეროვნულ პროგრამას სარჩულად კომბინაცია დაედოს?“

¹⁷² ჟურნ „კლდე“, 1913 წლის 31 მარტი, გვ. 2-3.

¹⁷³ იქვე, 1914 წლის 16 თებერვალი, გვ. 2-3.

¹⁷⁴ იქვე.

სტატიის დასკვნით ნაწილში შ. ამირეჯიბი ყურადღებას ამახვილებდა იმაზე, რომ „რამდენადაც სავსეა ფედერალისტების პროგრამა ამგვარ კომბინაციებით მომავლის შესახებ, იმდენად ნაკლებ ნარმოადგენას იძლევა იგი თვით ავტონომიის შესახებ... ამრიგად იგი ქართველი ერის სრულ პოლიტიკურ იდეალს არ გამოხატავს და უფარვისობა პროგრამისა... სწორედ აქ არის“¹⁷⁵.

ერთი სიტყვით არჩილ ჯორჯაძის მრავალმხრივი ნამოღვანარის დაფასება და ნარმოჩენა ფართოდ არის დაფიქსირებული ჟურნალ „კლდე“ ფურცლებზე, და ხაზგასმით არის მითითებული, რომ არჩილ ჯორჯაძე „იყო უპირველეს ყოვლისა დიდი პატრიოტი, დიდი ეროვნული მოღვაწე, რომლის გარშემო თავს იყრიდა მთელი (ხაზგასმა ჟურნალისაა — გ. ს.) ქართველი ერი და მისი პარტიული მისაკუთრება არავის შეუძლიან“¹⁷⁶.

„კლდე“ დროდადრო ნარმოაჩენდა ისეთ „მოღვაწეთა“ პორტრეტებსაც, რომლებიც თავმდაბლად და უპრეტენზიოდ კი არ აკეთებდნენ საერთო საქმეს, არამედ ყველაფერს კადრულობდნენ, რომ საზოგადოებაში დაუმსახურებელი პოპულარობა და თბილი ადგილი მოეპოვებინათ... „საქმის ჭეშმარიტი ვითარება, იდეური მოქმედება, უანგარო შრომა და ჯაფა, ჭეშმარიტების გულმართლად და სინდისიერად კვლევა-ძიება, ბოროტებასთან შეუდარებელი და ვაჟაყაცური ბრძოლა მას არ აინტერესებს, არ იზიდავს და არც შეუძლია“. ასეთ „მოღვაწეთა“ დამახასიათებელია „მოურიდებლობა, სითამამე, ხელოვნურად შექმნილი ენა-წყლიანობა, მსჯელობის პარადოქსულობა, აზროვნების რიგორისტობა, გრძნობათა გაზვიადებული გამოაშკარავება — ყოველივე ამასთან, — თავისმომჭრელი, აფერადებული დროშა მამულიშვილობისა — აი ფარხმალი და უალრესი საშუალება ასეთის ვაჟბატონების საპატიო სავარძელზე წამოსკუპებისა და „საზოგადო მოღვაწედ“ გახდომისა“¹⁷⁷.

ნერილის ავტორის, იმ. ვართაგავას თქმით, „ასეთი „მოღვაწე“ მოიპოვებს რა „საპატიო სავარძელს“ ერთხანს კიდევ ფართი-ფურთოტს, ენაწყლიანობს და გარშემო თავის ძმა-ბიჭებს შინა-ყმებს იკრებს... შემდეგ კი იმის მცდელობას იწყებს თავისი ტახტი ხელშეუხებელი გახადოს, პოზიცია გაიმაგროს და იგი ცდილობს მუდამ კარგ განწყობილებაში იყოს საზოგადოების იმ ნაწილთან, რომელნიც ქმნიან და ასაზრდოებენ ენით თუ კალმით, მის საზოგადოებრივ შეხედულებას... თავის სამფლობელოში თავს უყრის თანამოაზრეებს და შინაყმებს, — მომეტებულად იმისთანებს, რომლებიც მას ვერავითარ მეტოქეობას ვერ გაუწევენ“.

¹⁷⁵ ჟურნ „კლდე“, 1914 წლის 16 თებერვალი.

¹⁷⁶ იქვე, 1914 წლის 30 მარტი, გვ. 13-14.

¹⁷⁷ იქვე, 1913 წლის 1 დეკემბერი, გვ. 5.

ასეთი „მოღვაწე“ საერთო ეროვნული საქმისათვის საშიშია იმდენად, რამდენადაც ვერ იტანს „ნიჭიერს, დამოუკიდებელს, ენერგიულ ადამიანს ე.ი. ისეთ პიროვნებას, რომელსაც შეუძლია თავისი მოქმედებით საერთო სიყვარული, ნდობა-სიმპატია დაიმსახუროს, უნებლიე მეტოქეობა გაუნიოს ჩვენს „მოღვაწეს“, სიახლოვეს არ იკარებს, სიტყვით და საქმით, ჩუმად თუ აშკარად, ნდობას უკარგავს, სასაცილოდ იგდებს, ნერვებს უშლის. არჩევნების დროს, საზოგადო კრებაზე, პრესაში, მომეტებულად კი მალულად, შინაურობაში. ამნაირად ჩვენი „მოღვაწე“ იმის ნაცვლად, რომ საზოგადო ეროვნულ საქმეს პირნათლად გაუძღვეს და მას მოახმაროს თავისი ენერგია და ძალ-ლონე, პირად ბრძოლას, კინკლაობას, მოპირდაპირის დამცირებას და ახალგაზრდების დაჩაგვრას ანდომებს... ამავე დროს მას თავი მიაჩნია უცოდველ პირად, უებრო მამულიშვილად, უანგარო მოღვაწედ, შორსმჭვრეტელ პოლიტიკოსად, სიმართლისა და ჭეშმარიტების მოციქულად. ერთი სიტყვით, საქართველოს შუქურ ვარსკვლავად, მის მხსნელად“, -ო¹⁷⁸ — დაასკვნის ავტორი.

¹⁷⁸ ჟურნ „კლდე“, 1913 წლის 1 დეკემბერი, გვ. 6.

ჟურნალი „კლდე“ და ლიტერატურისა და ხელოვნების საკითხები

როგორც დასაწყისშივე აღვნიშნეთ, ჟურნალი „კლდე“ საზოგადო ეკონომიკური და სალიტერატურო ორგანო იყო, რომელიც ქართველ ეროვნულ-დემოკრატიულ იდეების გავრცელებას მიიზღვედა თავის უპირველეს მიზნად. მისი საზოგადოებრივ-ეკონომიკური საქმიანობის შესახებ ზემოთ უკვე გვქონდა საუბარი, ახლა შევეცდებით მოკლედ გავამახვილოთ ყურადღება ჟურნალის ლიტერატურისა და ხელოვნების საკითხებისადმი დამოკიდებულებაზე. გამოსვლის პირველი დღეებიდანვე „კლდის“ რედაქცია ცდილობდა თავის გარშემო კალმის ისეთი ოსტატები შემოეკრიბა, რომელთა უპირველესი საზრუნავი სამშობლოს მომავალზე და მის კეთილდღეობაზე ზრუნვა იქნებოდა. ჟურნალის ფურცლებზე დასტამბულ მხატვრულ-პუბლიცისტურ თუ ლიტერატურულ-კრიტიკული ნაწარმოებების გაცნობიდან ნათლად სჩანს ის იდეური სიახლოვე, რაც ქართველ ხალხში პატრიოტული სულისკვეთებით აღზრდისაკენ იყო მიმართული.

„კლდის“ ფურცლებზე დაბეჭდილი ყოველი ლიტერატურული ნაწარმოები თავისი მხატვრული დონით თანაბარი არ არის, მაგრამ ეროვნული სულისკვეთების გადმოცემით სავსებით შეესაბამებიან იმ მოთხოვნებს, რის მსახურებაც რედაქციას თავიდანვე აშკარად ჰქონდა გაცხადებული... როგორც აღვნიშნეთ ჟურნალის ავტორთა შორის იყვნენ: ვაჟა-ფშაველა, ეკატერინე გაბაშვილი, კოტე მაცაშვილი, ნიკო ნიკოლაძე, იოსებ მჭედლიშვილი, დუტუ მეგრელი (ქოჩაკიძე), ია ეკალაძე (იაკობ ცინცაძე), იოსებ გრიშაშვილი, სანდრო შანშიაშვილი, მელანია (ნიკოლოზ ნათიძე), გრიგოლ მეგრელიშვილი, ალექსანდრე სარაჯიშვილი (რიშ-ბაბა), სიმონ ქვარიანი, პავლე ინგოროყვა, ალექსანდრე ფრონელი (ყიფშიძე), დავით კასრაძე, შალვა ამირეჯიბი, დავით ვაჩნაძე, რევაზ გაბაშვილი, იროდიონ სონღულაშვილი, სარგის კაკაბაძე, თედო ღლონტი, სპირიდონ კედია, გიორგი ნამორაძე, გიორგი მამრაძე, შალვა ქარუმიძე, სამსონ დადიანი, მიხეილ მაჩაბელი, ვასილ ყიფიანი, გიორგი დაფქვიანაშვილი, დიმიტრი ჯავახიშვილი და აგრეთვე, დღესდღეობით ათეულობით გაუხსნელი ფსევდონიმს ამოფარებული ქართული პუბლიცისტის თუ მეცნიერების სხვა დარგის წარმომადგენელი (მაგალითად, მეგობარი, მოხეტიალე, ნაცარა, ლელი, ძვერელი, მროველი, იმერელი, გორელი, თ. თიანელი, გ. ახ-ელი, მგზავრი, გარეშე, რიონელი, ვინმე სოფლელი, შეუპოვარი და ა.შ.).

ავტორთა მრავალრიცხოვნებით განპირობებული იყო ჟურნალის თემატურ-ჟანრობრივი მრავალფეროვნებაც. საზოგადოე-

ბრივ-პოლიტიკური და სამეცნიერო-ეკონომიკური ხასიათის ნაწარ-
მოებების გვერდით დასტამბულია — ლექსები და მოთხრობები,
ნოველები და ესკიზები, ეტიუდები და ჩანახატები, ლეგენდები და
პიესები, იგავ-არაკები და თარგმანები, პაროდები და პამფლეტები,
პარჟები და კარიკატურები, რეცენზიები და ბიბლიოგრაფიები,
ლექტურათურულ-კრიტიკული წერილები და მიმოხილვები...

ჟურნალ „კლდის“ ფურცლებზე პირველად დაიბეჭდა ვაჟა-
ფშაველას ლექსები: „რამ შემქმნა ადამიანად“ (1913 წელი №6) და
„მე შენის ტრფობით ვერ გავეძღ“ (1915 წლის, №2).

რეალური ყოფით გულდასევდიანებულ პოეტს სანატრელად
გახდომია „წვიმად მოსვლა“, რომელსაც თავისუფლად შეეძლებოდა
ყველგან და ყველაფრისათვის მიახლება და, რომელსაც „მალლა ცა,
დაბლა ხმელეთი“ ექნებოდა თავის მფლობელობაში და ვინმეს
დაუკითხავად გადაუშლიდა გულმკერდსა „დღისით მზეს, ღამით
მთვარესა“, სიცოცხლეს აგრძნობინებდა „მომაკვდავ არემარესა“ და
მას იმედად რჩებოდა გულში, სიკვდილის შემდეგაც კი, ანუ თოვ-
ლადეცევეითაც კი არ დაიკარგებოდა, ისევ „სიცოცხლედ გადა-
იქცეოდა და განახლებულ ბუნებას ყელ-ყურზედ მოეხვეოდა“. სწორედ ამ ფილოსოფიური გააზრებით ლექსის დასაწყისშივე სვამს
კითხვას პოეტი: „რამ შემქმნა ადამიანად? რატომ არ მოველ წვი-
მადა“¹⁷⁹.

„რამ შემქმნა ადამიანად?
რატომ არ მოველ წვიმადა,
რომ ვყოფილიყავ მუდამა
ღრუბელთ გულმკერდის მძივადა,
მინაზე გადომოსაგდებად
ცვარად ან თოვლად ცივადა?
არ გამწირავდა პატრონი
ასე ოხრად და ტივლადა!
ცაშივე ამიტაცებდა,
თან მატარებდა შვილადა
ასე არ დამჭირდებოდა
სულ მუდამ ყოფნა ფრთხილადა.
მზის მოტრფიალე ვივლიდი
სიკვდილის გამანბილადა;
მალლა ცა, დაბლა ხმელეთი
მე მექნებოდა წილადა.
გავიხარებდი, მთა-ბარსა
ოდეს ვნახავდი მწვანედა,

¹⁷⁹ ჟურნ „კლდე“, 1913 წლის 2 თებერვალი, გვ10.

მორწყულსა ჩემის ოფლითა,
 ყვავილებს შიგნით, გარეთა.
 გადავუშლიდი გულმკერდსა
 დღისით მზეს, ღამით მთვარესა.
 სიცოცხლეს ვაგრძნობინებდი
 მომაკვდავ არემარესა.
 თოვლად ქცეულსა გულშია
 ცოცხლად იმედი მრჩებოდა,
 რომ ისეც ჩემი სიკვდილი
 სიცოცხლედ გადაქცეოდა
 და განახლებულ ბუნებას
 ყელ-ყურზე მოეხვეოდა.“

„კლდეში“ დაბეჭდილი ვაჟა-ფშაველას მეორე ლექსი „მე შენის ტრფობით ვერ გავძელ“ ალეგორიული ხასიათისაა... ჯანგატიხილი და ქართველი საზოგადოებისაგან უყურადღებოდ მიტოვებული პოეტი მაინც სამშობლოს ერთგული რჩება („ვერ გიღალატებ მაინცა, თუნდ ხორცს ვიგლეჯდე კბილითა, გულდაკოდილი შენგანა, მითც ღმერთს გახვეწებ სიტყვითა“), რადგან იცის, რომ სიცოცხლე წარმავალია და ამ ქვეყნად სამუდამოდ ვერავინ დარჩება („სამყაროს იქით რომ მიდის, მომაკვდავთ განა იცითა?!“), ამიტომ მისთვის მთავარია ღმერთთან საუბრის უფლება ჰქონდეს („არ დამიშალონ მიმოსვლა ღმერთთან ამ გრძნობის ხიდითა“) და მის ერთგულებაში სამშობლოსადმი ეჭვი არავინ შეიტანოს და მიუხედავად ყოველივესი, მიუხედავად არაერთგზის გულის დაკოდვისა, მაინც ბოლომდე სამშობლოს ერთგული დარჩება („შენი ვარ დიდი ერთგული, ვერვინ შემხედავს იჭვითა. შენი ვარ, შენთვის მოვკვდები, თუნდ შხამს მასმევედე ჯიხვითა!“)¹⁸⁰.

„მე შენი ტრფობით ვერ გავძელ
 შენ — ჩემის სიძულვილითა.
 ვერ გიღალატებ მაინცა
 თუნდ ხორცს ვიგლეჯდე კბილითა,
 გულდაკოდილი შენგანა
 მითც ღმერთს გახვეწებ სიტყვითა;
 გახვეწებ, ვემუდარები
 ცეცხლის მქმინავის პირითა,
 გარშემო შემოხაზულა
 ცხელის ცრემლების მილითა.
 თანაც დაგბრუნავ თავზედა

¹⁸⁰ ჟურნ. „კლდე“, 1915 წლის 18 იანვარი, გვ.12.

ჩემის ჯვარცმულის ფიქრითა.
შენ ამას არაფრად აგდებ,
მოხვალ ზედ მდგები ნიხლითა.
უცვლელი ვრჩები მაინცა
ჩემის წადილით დიდითა,
სამყაროს იქით რომ მიდის,
მომაკვდავთ განა იცითა?!
წერილმანს, ჩანჩალა აზრებსა
ვილაღავ აქეთ-იქითა
არ დამიშალონ მიმოსვლა
ღმერთთან ამ გრძნობის ხილითა.
შენი ვარ დიდი ერთგული,
ვერვინ შემხედავს იჭვითა.
შენი ვარ, შენთვის მოვკვდები,
თუნდ შხამს მასმევედ ჯიხვითა!“

აქ თამაზ ჩხენკელის სიტყვებს დავიმონმებ: ვაჟა-ფშაველა ვითარცა მოქალაქე და პოეტი მხნე პატრიოტი იყო. იგი როგორც თვითონ ამბობს, ის იყო, რაც უნდა ყოფილიყო თავისი დროის სამშობლოს შემანევარი კაცი. მაგრამ ამავე დროს მას ფხიზელი და უცთომელი თვალი ჰქონდა, რომელიც უშიშარი სიმართლით ჭკრეტდა გარე სინამდვილეს, იმ სიდუხჭირეს, მას რომ გარს ერტყა და ზოგჯერ ეს თვალი შედრკებოდა ან შეღონდებოდა ულიმლამო სინამდვილის ცქერით. პოეტის გულში მიძინებული იჭვი გაიღვიძებდა და სამშობლოცა და თანამემამულენიც თავიანთი ერთადერთი შემზარავი განზომილებით წარმოუდგებოდა. და მაშინ სრული თავგამეტების პათოსი იპყრობდა პოეტის გულს:

მე შენი ტრფობით ვერ გავძელ,
შენ — ჩემი სიძულვილითა,
ვერ გილაღატებ მაინცა,
თუნდ ხორცს ვიგლეჯდე კბილითა...
ასეთია უკანასკნელი აღსარება ვაჟასი...“¹⁸¹

ჩვენთვის ამ შემთხვევაში საინტერესო ის არის, რომ ეს „უკანასკნელი აღსარება“ პოეტმა ჟურნალ „კლდის“ მეშვეობით გაანდო თავის მკითხველს.

¹⁸¹ თამაზ ჩხენკელი „ვაჟა-ფშაველას პოეზია“. ქართული პოეზია. ტომი 9. თბ., 1977, გვ. 15-16.

„კლდეში“ არაერთი საყურადღებო ნაწარმოები აქვს გამოქვეყნებული /მოთხრობა, ნოველა, მოგონება, წერილი.../ ცნობილ ქართველ მწერალს ეკატერინე გაბაშვილს.

ნოველაში „ჯვრობა“, ეკ. გაბაშვილი დიდი ეროვნული სულისკვეთებით მოგვითხრობს სოფ. ერთანმინდის წმ. ესტატეს ეკლესიის ეზოში 20 სექტემბერს გამართულ დღესასწაულის ამბავს... მწერლის თქმით: „ერთანმინდა არა მარტო ქართველი ერის სამლოცველი იყო, არამედ იქ აუარებელი ხალხი იკრიბებოდა განურჩევლად ეროვნებისა და სარწმუნოებისა“, სადაც ადამიანები ცოტა ხნით ივიწყებდნენ ყოველდღიურ საჭირობოროტო საკითხებს... „რა შვილია ის ხალხი, რომელიც არ მხიარულობს და ათასში ერთხელ მაინც გიჟურის გატაცებით არ ივიწყებს თავის ჩვეულებრივ უფერულ და უბადრუკ მდგომარეობას, თავის ბედშავს, ყოველ შვებას მოკლებულ სიცოცხლეს?!“¹⁸².

ასევე საინტერესოა მისი ნოველა „ლიტანიაზედ“ („კლდე“ 14, 1914, 21/XII), თარგმანი ჰენრი ვან დაიკის მოთხრობისა „ციხე დარბაზის გასაღები“ („კლდე“ 3, 1913, 13/1), ნოველა „უკანასკნელი შუქი“ („კლდე“ 1, 1913, 7/1), წერილები: ლადო მესხიშვილზე, არჩილ ჯორჯაძეზე, ნიკო ლომოურზე, აკაკი წერეთელზე და ა. შ.

ნიკო ლომოურზე, ამ საუკეთესო მოღვაწესა და მშვენიერ ბელეტრისტზე, ეკ. გაბაშვილი წერდა: „... ის იყო ნამდვილი ადამიანი... კეთილი, სათნო, მართალი, მოსიყვარულე, ალერსიანი და კაცთმოყვარე. ნიკოსთანა წმინდა, ანკარასავით სუფთა, ფაქიზი და ზნეობა-მაღალი შვილები შუქს ჰფენენ თავის დაჩაგრულს, მაგრამ ამაყს და გულგაუტეხელ სამშობლოს“¹⁸³.

განსაკუთრებით გამოირჩევა ეკ. გაბაშვილის მოგონება „ვლადიმერ მესხიშვილის გამოსვლა „სამშობლოში“, რომელიც „კლდეშია“ დასტამბული და ლადო მესხიშვილის სასცენო მოღვაწეობის 30 წლისთავისადმია მიძღვნილი.

მწერალი იგონებს 1882 წლის 22 იანვარს, როცა პირველად იქნა წარმოდგენილი „სამშობლო“ და რომელშიც ლევან ხიმშიაშვილის როლი ლადო მესხიშვილს განუსახიერებია... „წინათაც მენახა მესხიშვილი სცენაზედ, — წერს ეკ. გაბაშვილი, — გამეგონა მისი მომაჯადოებელი, გარმონივით სავსე ხმა, ხმა იშვიათი, თითქმის დაუჯერებელი და წარმოუდგენელი ჩემის სმენისათვის (მაშინ ყრუ არ ვიყავი), მაგრამ დღეს ლადო სულ სხვა იყო! ის აღარ იყო აქტიორი, რომელიც სცდილობდა ხოლმე დასწავლილი როლი, ქართულ-რუსულის კილოთი გადაეცა ამხანაგისათვის, არა — ის იყო მშვენიერი ვაჟკაცი, ქართულ ძველებურ ტანისამოსით გამონყობილი,

¹⁸² ურნ. „კლდე“, 1912 წლის 30 სექტემბერი.

¹⁸³ იქვე 1915 წლის 3 მაისი.

ქართულ ძვირფას იარაღით შესხმული მეომარი, რომელსაც სამშობლო უნდა დაეცვა მტრისაგან და, რომელიც ამ დაცვის ასრულების ფიცს, მშვენიერის, უზაკველის, ყოველგვარ აქცენტს აცილებულ ქართული ენით წარმოსთქვამდა... დღესაც თვალწინ მიდგას ის სცენა, როდესაც ხიმშიაშვილი ზეციურის ხმით, რაინდულის გრაციით, შეუდარებელის გმირობით ეუბნება შაჰს სამსახურზედ უარს, როდესაც ის თავის ქალის თხოვნით უბრუნებს წართმეულ ხმალსა: „არა, ვერ მივიღებ... მე კარგად ვიცნობ ჩემს ხმალს, ის ამჯობინებს ჩემს გულში გადატრიალდეს, ვიდრე თავის მტერს ემსახუროს... მე და ჩემი ხმალი ქართველები ვართ, დიდებული შაჰო!“ რა თავხედობა იყო, რა გამბედაობა ამ საქციელში“ და რა გვარად იმოქმედა დროთა ბრუნვით დამუნჯებულ და ყოველგვარ საკუთარ აზრის უქონელ მაშინდელ ქართველობაზედ!“¹⁸⁴.

ამ სიტყვების დასტამბვა ჟურნალის მიერ გმირობის ტოლფასი იყო, ვინაიდან ქართველთა პოლიტიკური მდგომარეობა დიდად არ იყო განსხვავებული მაშინაც და რუსეთის თვითმპყრობელობა ჯერ ისე მაჯლაჯუნასავით აწვა მხრებზე საქართველოს და ქართველი ხალხის ჭრილობაშეუქრავ სხეულს.

აღსანიშნავია, რომ ჟურნალმა „კლდე“ ფართოდ გააშუქა ვლადიმერ ალექსი-მესხიშვილის იუბილე და თავის ფურცლებზე ვრცელი ანგარიში გამოაქვეყნა. „რაც“ (რევაზ გაბაშვილი) თვლიდა, რომ „მისი დღესასწაული იყო დღესასწაული ეროვნულ გრძნობათა გამოღვიძებისა და ნათლად შეგრძნებისა“¹⁸⁵.

„კლდის“ თანამშრომელთა შორის ერთ-ერთი კალამნაყოფიერი ავტორი გახლდათ იმდროისათვის ახალგაზრდა მწერალი დავით კასრაძე, რომელიც ხშირად „ქართლელის“ ფსევდონიმითაც აქვეყნებდა თავის ნაწარმოებებს. მისი მოთხრობები, ნოველები, ეტიუდები, წერილები თუ პამფლეტები, შნოსა და ლაზათს აძლევდნენ ჟურნალის შინაარს და მკითხველებში დიდ ინტერესს იწვევდნენ... მრავალთაგან, აქ მის ორიოდ წერილზე შევაჩერებთ ყურადღებას... ქართველმა ხალხმა და ქართულმა მეცნიერებამ უდიდესი დანაკლისი განიცადა გამოჩენილი მკვლევარისა და მაღალი რანგის პროფესორის ალექსანდრე ხახანაშვილის გარდაცვალების გამო, რომელიც უდიდესი ავტორიტეტით სარგებლობდა რუსეთის სამეცნიერო წრეებში... თბილისში გამართულ მისი ხსოვნის საღამოზე დამსწრე საზოგადოება მოხიბლული დარჩა დავით კასრაძის მშვენიერი მოხსენებით, რომელიც ალ. ხახანაშვილის სამეცნიერო მოღვაწეობის წარმოჩენას მიეძღვნა. ეს იყო უდიდესი პატრიოტული სულისკვეთებით გაჟღენთილი სამეცნიერო

¹⁸⁴ ჟურნ. „კლდე“, 1913 წლის 10 თებერვალი, გვ. 2.

¹⁸⁵ იქვე, 1913 წლის 17 თებერვალი, გვ. 2.

გამოკვლევა დიდ მეცნიერსა და მამულიშვილზე, რომელშიც საოცარის სითამამით იყო გადმოცემული რუსეთის თვითმპყრობელობის „დამსახურებანი“ ქართველი ერის წინაშე... მოხსენებაში დასმული ყველა ეროვნული კითხვა ალ. ხახანაშვილის ნაწერებიდან მოტანილი ციტატებით იყო გამაგრებული¹⁸⁶.

სხვა ადგილას დავით კასრაძე პროფ. ივანე ჯავახიშვილის ლექციის მოსმენით აღფრთოვანებული წერს: „ფრიად საგულისხმო ლექცია ნაიკითხა ჩვენმა თანამემამულემ პროფ. ივ. ჯავახიშვილმა საქართველოს უფლებობის ისტორიიდან XIII და XIV საუკუნეების შესახებ. ჩვენთვის იგი მით უფრო საგულისხმიერო იყო, რომ დაერწმუნდით: საქართველოს არა მარტო ხმალ-კაპარჭის მომარჯვებაში ჰქონია უნარი, არამედ სოციალურადაც და პოლიტიკურადაც იგი სადიადო წერტილზე მდგარა...“ დასასრულს დ. კასრაძე ხაზგასმით მიუთითებდა, რომ პროფ. ივ. ჯავახიშვილის ლექცია იმდროინდელი საქართველოს ცხოვრებაში „ერთი უშესანიშნავესი გამომაფიზიზლებელი საყვირის ძახილი“ იყოო...¹⁸⁷

როგორც აღვნიშნეთ, ჟურნალ „კლდეში“ პოეტი კოტე მაყაშვილიც თანამშრომლობდა. განსაკუთრებით საყურადღებოდ მიგვაჩნია ლექსი — „ახალგაზრდობას“, რომლის მთავარი დედაზრი სახელოვანი წარსულის არ დავიწყება და მტრისადმი დაუმორჩილებლობის, ერთმანეთის მხარში დგომის სურვილის გამძაფრებაა... ვინაიდან პოეტი კარგად ხედავდა, რომ იმჟამად „ერთმანეთის მტრობა-შურის მწვავე ჯაჭვი არა სწყდება, ვაგლახ ჩვენა, რომ წარსულის გაკვეთილი გვაინწყდება“¹⁸⁸.

პოეტის უპირველესი რჩევა ქართველი ახალგაზრდობისადმი იყო თავი დაენებებინათ ნუნუნისა და ცრემლთა ფრქვევისათვის, რაც ლაჩართათვის დამახასიათებელი თვისება იყო და ერთობის დროშა აღემართათ და უშიშრად ნასულიყვნენ უკეთესი მომავლისაკენ... აი, ეს ლექსიც:

სევდის სახე არ გვმორდება
ვით აჩრდილი მაბეზარი!
ირგვლივ ისმის სულ გოდება,
მოთქმა გლოვის მწარე ზარი!
ძველთა მტვერში ფიქრი სჭკნება
გული ძლივს ჰფეთქს სისხლნაკლული
საცოდავ ჩვრად იქცა ნება
გზა გადამცდარ-დაკარგული!..

¹⁸⁶ ჟურნ. „კლდე“, 1913 წლის 10 და 17 თებერვალი.

¹⁸⁷ იქვე, 1915 წლის 25 იანვარი, გვ. 13-15.

¹⁸⁸ იქვე, 1913 წლის 1 იანვარი, გვ. 6-7.

ერთმანეთის მტრობა-შურის
 მწვავე ჯაჭვი არა სწყდება!
 ვაგლახ ჩვენა, რომ წარსულის
 გაკვეთილი გვაგინწყდება!
 დაანებეთ წუნუნს თავი:
 ცრემლი ლაჩართ ხვედრი არი!
 კარგად გესმით ხომ მტრის ავი
 დამცინავი ხმა საზარი!..
 რამდენიმე ათასის წლის
 სისხლი გიჩქეფთ ამაყ მკერდში,
 ყოვლი წვეთი ამა სისხლის
 ნადულია ბრძოლის ბრძმედში
 ოხვრა-კვენსა და ჩივილი
 არ შეგშვენით თავმომწონეთ!..
 გმირ არწივთა კვლავ ყივილი
 გამაგონეთ, გამაგონეთ!..
 მეგობრებო დროს ნუ ჰქარგავთ
 განიკურნეთ გულის წყლული
 ლამაზ სიტყვებს ნულარ ჰქარგავთ
 და ჩაუდგით საქმეს სული!
 ერთობისა, შეთანხმების
 დროშა წმინდა ზე ასწიეთ!..
 და შუქოსან მომავლისკენ
 უშიშრად და მხნედ გასწიეთ!..
 დაგვარწმუნეთ რომ ვარსკვლავი
 ჩვენის ბედის კიდევ ბრწყინავს,
 რომ არ გვიდევს წინ საფლავი,
 არ მოვმკვდარვართ აღარც გვიძინავს!..¹⁸⁹

შალვა ამირეჯიბი ჟურნალ „კლდის“ ერთ-ერთი დამაარსებელი
 გახლდათ და მის ფურცლებზე ათეულობით ნაწარმოები აქვს გამო-
 ქვეყნებული, როგორც საკუთარი გვარ-სახელით ხელმოწერილი,
 ისე ცნობილი ფსევდონიმით — „ფარსმან-ფარუხი“. აქვე უნდა აღვ-
 ნიშნოთ, რომ შ. ამირეჯიბის ფსევდონიმები იყო აგრეთვე „ა—ი“
 (ამირეჯიბი) და „ფარი“. მკითხველის მოწონებით სარგებლობდა
 მაღალ იდეურ-პოლიტიკურ დონეზე დაწერილი პუბლიცისტური
 წერილები, ენამახვილობით გამორჩეული პამფლეტები, ესკიზები,
 ლექსები, პაროდები... აქ მაგალითად ერთ-ერთ მის საღალაობო
 ხასიათის ლექსს მოვიტანთ, რომლის დაწერა პოეტიკისათვის რუსულ-
 ენოვან გაზეთ „ტიფლისკი ლისტოკის“ ფურცლებზე დასტამბულ

¹⁸⁹ ჟურნ. „კლდე“, 1913 წლის 8 დეკემბერი, გვ.7.

ლეონ მელიქსედ-ბეგოვის მიერ გამოქვეყნებულ გამოკვლევას შთაუგონებია. ლექსს, რომლის სათაურია „მეფე ლეონის ბარონები“ ეპიგრაფად წამძრვარებული აქვს: „ტიფლისკი ლისტოკში“ დაბეჭდილია მელიქ-სეტ ბეგოვის გამოკვლევა, რომ სომხური „პარონები“ წარმოსდგებოდნენ ბარონებისაგანო.“

მეფე ლეონი იჯდა ტახტზედა,
ასე ფიქრობდა სომხის ხალხზედა:
რად მინდა ჩემი ოქროს თახჩები,
რად მინდა ჩემი პარონ-ახჩები!
მე მინდა მქონდეს სულ სხვა წესები,
მყვანდნენ ბარონნი, ბარონესები,
მეფე ლეონი რუბენიანი
იყო ბარონის გუნებიანი!

* * *

მეფე ლეონი იჯდა ტახტზედა
ასე ფიქრობდა სომხის ხალხზედა:
მე ჩემს პარონებს, ვიფიცავ დედას!
გავაბარონებ სულ ზედი ზედა!
დავკიდებ არშინს, დავკიდებ „გირსა“
და მით დავიპყრობ ქვეყნისა პირსა!
მეფე ლეონი იყო სვიანი,
იყო სვიანი და თან ჭკვიანი!

* * *

მეფე ლეონი იჯდა ტახტზედა,
ალარ ფიქრობდა სომხის ხალხზედა:
ახლა სტიროდა ოქროს თახჩებსა
და იგონებდა პარონ-ახჩებსა.
თავს გრძნობდა ცუდათ, არ მეტყველებდა
და სიბრაზისაგან სულ ახველებდა...
რომ ის პარონებს უზახდა ბარონს
ხალხი კი მეფეს კვლავ ლევონ-პარონს!¹⁹⁰

ყურნალის ფურცლებზე სისტემატურად იბეჭდებოდა იმ დროს ახალგაზრდა პოეტების იოსებ მჭედლიშვილის, სანდრო შანშიაშ-

¹⁹⁰ ყურნ. „კლდე“, 1915 წლის 8 მარტი, გვ. 5-6.

ვილის, იოსებ გრიშაშვილის, გრიგოლ მეგრელიშვილის და სხვათა პოეტური ნაწარმოებები, თარგმანები უცხო ენიდან, რომლებიც კარგად გამოხატავენ ქართველი ხალხის ეროვნულ მისწრაფებებს...

იმხანად, როცა პირველი მსოფლიო ომის ხანძარი გიზგიზებდა და მისი ერთერთი ისტორიული კუთხე — აჭარა, საშინელ დღეში იყო ჩავარდნილი, ქართველი მამულიშვილები თავის უპირველეს მოვალეობად თვლიდნენ მხარში დადგომოდნენ უბედურებაში ჩავარდნილ თანამოძმეებს, მიუხედავად სარწმუნოებრივი განსხვავებისა... აჭარის თემას მაშინ ფართო ადგილი ეკავა ქართულ პრესაში, მითუმეტეს ეროვნული მიმართულების ჟურნალ-გაზეთებში... „კლდის“ ფურცლებზე ამ თემისადმი მიძღვნილ უამრავ მასალათა შორის ყურადღებას იქცევს პოეტ გრ. მეგრელიშვილის ერთი ლექსი „მშობლიური ჰანგები“, რომლითაც იგი ქართველ საზოგადოებას მოუწოდებდა ანიოკებული და დარბეული კუთხის მცხოვრებთა მხარდაჭერისაკენ... პოეტს სწამდა, რომ „განახლებისა საათმა დაჰკრა“ და შესაძლო იყო ამ ომს უბედურებასთან ერთად „გულს დამარხული ფარული ვნების“ განხორციელება, სამშობლოს განთავისუფლება მოჰყოლოდა... მანამდე კი არაფერი დაეშურებიათ მცნება-რჯულშეცვლილ ძმების გადასარჩენად, რომელიც ვერანად ექცია და ცეცხლს შთაენთქა მათი სახლ-კარი, ბავშვების კვნესას, ქალების მოთქმას, თვის ხმას უერთებდა ზუზუნით ქარი...

„მხნე აჭარელი, გულადი ლაზი
უმანკო სისხლით ფართო ველს ჰვლებავს
და სიკედილში მყოფს ის ანუგეშებს,
იმედის სხივით ის რწმენა ჰკვებავს,
რომ არ უარჰყოფს ქართველი ქართველს,
რომ ძმა მიჰხედავს თვის ნამდვილ ძმებსა,
და გულგრილობით არ შეაშფოთებს
საფლავთ მდებარე წინაპართ ძვლებსა!“

ამიტომ, პოეტის აზრით, საჭირო იყო ყველა მიმართულების ქართველის გაერთიანება და მიშვილება უპატრონოდ მყოფი აჭარელი ძმებისათვის და მფარველი ხელის განოდება, ხოლო ვინც მარტო სიტყვას იკმარებდა და რეალურად არაფერს გააკეთებდა, შთამომავლობის მიერ სამარადისოდ შეჩვენებული უნდა ყოფილიყო მათი სახელი...

„განახლებისა საათმა დაჰკრა
გაიასკეცე სამშობლოვ ნება,

სასტიკ გრიგალად გადააქციე
გულს დამარხული ფარული ვნება¹⁹¹.

თუ რა უბედურებაში იმყოფებოდა აჭარა და აჭარლები, ნათლად არის ასახული დავით კახელის (დავით ვაჩნაძის) რეპორტაჟებში, რომლებიც საერთო სათაურით — „აჭარის კლდეებიდან — „კლდეს“ იბეჭდებოდა ყურნალის ფურცლებზე... მოვიტანთ მოკლე ამონაწერს ხსენებული მასალიდან...

„ჩემს გარშემო ბუნება ლაპარაკობდა, მღეროდა და გალობდა მარტო სიმშვენიერეზე...“

ეს იყო აჭარა...

...აჭარაში ბუნება, ხალხი და ყოველი საგანი მისი მოსთქვამს მარტო საქართველოსა.

თვით ის ტრადიციაც, რომელსაც განიცდის დღევანდელი აჭარა, ადასტურებს კვლავ იმას, რომ ქართველი ერის ცხოვრების ისტორია, რამდენადაც ლამაზი და კეთილშობილური იყო, იმდენად ტრადიკული და მწარე...

* * *

შევხვდი ერთ აჭარელ მოხუცებულს.

— შენი გვარი?

— ჰუსეინ ოლლი.

— აჭარელი ხარ?

— დიახ!

— საიდან?

— სოფელ ლურჩიდან.

— შენი ძველი გვარი?

— ხარაძე, ბატონო.

— რატომ მაღავე ქართულ გვარს?

— ასე ვინერებით...

გულის შემძვრელია თვალცრემლიანი მოხუცი აჭარელის თხოვნა: „ბევრი ხალხი დაგველუპა, ცოლ-შვილი ხეტიალში გაგვინცდა. ნისქვილის ქვებში ვისრისებით, ბატონო. ღმერთი არის მარტო მნახველი და მსმენელი ჩვენი ტანჯვისა და გლოვისა. გვიშველეთ, ბატონო, გვიშველეთ ძმებო, გვიხსენით ამ საშინელებისგან...“, — მოსთქვამდა მოხუცი და თან ცხარედ სტიროდა...

— ბატონო, ხუთი დღეა არაფერი მიჭამია. ერთი ლუკმა პური მიბოძე — მთხოვა დიდი მორიდებით საბრალომ...“¹⁹².

¹⁹¹ ჟურნ. „კლდე“, 1915 წლის 3 მაისი, გვ. 3-4.

ჟურნალი „კლდე“ თავის მეხუთე ნომრიდან ამკვიდრებს საინტერესო რუბრიკას: „ჩვენი ფოსტა“, რომელიც მიზნად ისახავდა უნიჭო და მდარე ხასიათის ნაწარმოებთა ავტორებისაგან თავის დაცვას, განსაკუთრებით იმათგან, რომელთაც თავხედობა ჰყოფნიდათ და თავიანთი „შემოქმედებითი“ ნიმუშების დაუყოვნებლივ დაბეჭდვას მოითხოვდნენ...

რედაქციის მიმართებაში ნათქვამი იყო: „ბ.ბ. ახალგაზრდა მწერლებო! მწერლებო, რომლებიც უკვე გამოსულხართ სამწერლო ასპარეზზე და მწერლებო, რომლებიც გამოხვალთ ახლო მომავალში. ერთი თვე არ არის რაც ჟურნალი „კლდე“ გამოდის და ერთ თვეზე მეტია, რაც ჩვენს რედაქციას აუარებელი ბელეტრისტული თუ პოეტური ნაწარმოებები მოსდის. ჩვენ იმაშიც დარწმუნებულნი ვართ, რომ მრავალი მათგანი ჯერ კიდევ გზაში იმყოფება. ყველა ჩვენ დიდის ყურადრებით გადავიკითხეთ და შემდეგი უცნაური მოვლენა აღმოვაჩინეთ: ისინი შეეხებიან მზესა და მთვარეს, ვარსკვლავსა და ელვას, იასა და ყაყაჩოს, ზღვასა და წყალსა და სხვა მრავალ უსულო საგანს. არსად ადამიანის ხსენება არ არის! ამის გარდა ეს უსულო საგნები მუდამ ლაპარაკში არიან, არშიყში, სიყვარულის გამოცხადებაში და ფილოსოფიურ საუბარში. მაგალითად მზე ახველებს, მთვარე ნანას მლერის, ვარსკვლავი „ლოგინში წვება“, ზღვა კლდეს ზღაპარს ეუბნება და მდინარე „იზმორება“, როგორც გვენერს ერთი ახალგაზრდა, მაგრამ უნიჭო პოეტი. რაც შეეხება სიტყვა კლდეს, რომელიც ჩვენდა სამწუხაროდ, იმავ დროს ჩვენი ჟურნალის სახელიც არის, იგი მოსვენებას არ გვაძლევს. ამ სათაურით ჩვენ მოგვივიდა ორმოცდასამი ლექსი, ასთხუთმეტი მინიატურა, ასთვრამეტი სილუეტი, სონეტი, ჩახრუხაული და მუხამბაზი. ერთი სიტყვით, ჩვენი მწერლების (ე.ი. თქვენ) საყვარელ სიტყვად გადაქცეულა. ამის დანაშაულს ჟურნალი „კლდე“ თავის თავზე იღებს და მწუხარებას აცხადებს. ამასთანავე ჟურნალის სარედაქციო კოლეგიამ ერთხმად დაადგინა მთავრობას თხოვნით მიმართოს, — დაკეტოს ეს ჟურნალი, რადგან სახელის გამოცვლისაც გვეშინია: ქართველი პოეტისათვის ვერ გამოიგონებ ისეთ სახელს ან სიტყვას, რომელმაც არ ააფრთოვანოს, მუზა არ გაუღიზიანოს და ლექსი არ დაანერინოს.

თქვენი ნიჭის „პატივისცემით“ რედაქცია“¹⁹³.

¹⁹² ჟურნ „კლდე“, 1912 წლის 14 დეკემბრისთვე, გვ. 16.

¹⁹³ იქვე, 1914 წლის 30 მარტი, გვ. 15.

მიუხედავად ამ „პატივისცემით“ გაცხადებული შეგონებისა ჟურნალის რედაქცია მაინც ვერ აუდიოდა უნიჭოთა შემოტყეებს, რის გამოც „კლდეისტები“ იძულებულნი იყვნენ დროდადრო საქვეყნოდ წარმოეჩინათ ასეთ ავტორთა სახელები და მათსავე „წაწარმოებებიდან“ ამოკრეფილი სტრიქონებით ეპასუხათ.

უნდა ვივარაუდოთ, რომ ამ ღონისძიებამ სასურველი შედეგი მოიტანა, ვინაიდან რუბრიკიდან-რუბრიკამდე პერიოდი თანდათან ხანგრძლივი ხდება, ხოლო ჟურნალის არსებობის ბოლო წელიწადს იგი თითქმის იშვიათობად იქცა.

ქვემოთ მოტანილი ამონაწერები, ვფიქრობთ, ნათელს ჰყოფს ჟურნალის პოზიციას, ამასთან დავრწმუნდებით იმაშიც, თუ რაოდენ კარგად იყენებდნენ „კლდეისტები“ სატირისა და იუმორის შესაძლებლობებს...

მაგალითად, 1912 წელს მესამე ნომერში ჟურნალი ასე პასუხობს პ. ზეგნელს: „იქნება ვსცდებით, მაგრამ გეგონია, რომ მოთხრობას სიგრძის გარდა აზრიც უნდა ჰქონდეს“; ანდა: ირ. ტ-ძეს: „თქვენ თავს პირუტყვს ადარებთ თქვენს ლექსში. რად სჩადით ამას? პირუტყვები კი ცოდონი არ არიან?“

მომდევნო ნომერში ჟურნალი ა. ჯაფარიძეს, რომლის ლექსშიც ასეთი სიტყვები ყოფილა: „დედი დედილო!.. მე უკვე გავიზარდე“ პასუხობს: „ჩემო კარგო, შენი მოთხრობა ამას რომ არ ამტკიცებს?!“ ანდა: პანჩანიძეს: „ქუთაისში წყალი არ არი“, — ინერებით. მაშ, ლალიძის წყლები დალიეთ“. (1912წ 4) ვინმე „ტუმბას“ კი ატყობინებდნენ: „თქვენი ფსევდონიმი ძალიან შეეფერება თქვენს ლექსებს, მაგრამ თქვენი ლექსები არ შეეფერება ჩვენ „კლდეს“; ანდა: პლატონ კოჩორიძეს, რომლის „თხზულებაში“ ასეთი სტრიქონები ყოფილა: „უშვა ხელი სურას, რამაც იატარკზე (?) საშინელი ჩახანი მოიღო, და მივიდა ტახტზე ჩამოჯდა და გადაჰკიდა თავი ფანჯარაში...“. ამის მთქმელს რედაქცია ასე ესიტყვებოდა: ლიტრამ რომ იატარკზედ (?) ჩახანი მოიღოს დასაჯერებელია, მაგრამ ტახტზე ჯდომისა და ფანჯარაში თავის გადაკიდებისა კი რა მოგახსენოთ“; იქვე ჟურნალი ვინმე გიგლაშვილს ამუნათებდა: „გასტყორცნილი სიყვარული, ჩემი ფიქრთა სტვენა მარადი“. უნდა ბრძანო: „გამეცალე საყვარელო, თავში მისტვენს მარადის“ (5, 1912წ.);

ვინმე „უჩინარს“ ჟურნალი ატყობინებდა: „მოთხრობა კარგა გრძელიც არის, კარგი ხელითაცაა ნაწერი, ქალაღდსაც არა უჭირს რა, მაგრამ შინაარსის მაგიერ ყველა ესენი როდი გამოდგება“; (6, 1912წ.); „კოკობოს“ კი უხსნიდა, თუ რატომ არ ბეჭდავდნენ მის ლექსს: „გიკვირთ, რატომ არ ვბეჭდავთ თქვენს ლექსს? იმიტომ, რომ თქვენი ლექსი აქლემსა ჰგავს, რომელსაც ჰკითხეს: კისერი

რადა გაქვს მრუდო? და მან უპასუხა:სხვა რა მაქვს სწორეო?!" (, 19125.)

გაზეთ „ხმა კახეთისა“-ს მეათე ნომერში გამოქვეყნებული ყოფილა ვინმე გ. ლელაშვილის შემდეგი სტრიქონები:

„სულს ვერავინ შეეხება,
უმნიკვლოა და სპეტაკი,
თუმცა ფიქრობს ზოგიერთი
სულელი და ავაზაკი...“

„კლდის“ შესიტყვება ასეთია: „მაშ, შენცა ლელაშვილო?“ (11, 19125.) ანდა: „ურჩისადმი“ გამოთქმული რჩევა: „თუ შენი თავი და ქალაღდი არ გებრალება, ჩვენ მაინც შეგვიბრალე“. (იქვე).

„ონავარს“ კი ურჩევს: „მართალია, შენი წერილები ისეთი მძიმეა, რომ მეტი მარკის ფულს გვახდევინებენ ხილმე, მაგრამ თან ისე მჩატეა, თითქო ქარით მონაბერია“ (311, 1912);ანდა ასეთი: „გადამთიელს: „გეგეჭკორი, რომ არ აირჩიეს იმის ბრალია, რომ ვარსკვლავი, ჩაესვენაო“. ასეთი ცნობა ფლამრიონს გაუგზავნეთ ხოლმე“. (11, 19125).

ვინმე „ზემოუბნელს“ ჟურნალისათვის გაგზავნილ ლექსში ასეთი სტრიქონები ჰქონია: „...კლდეზედა დავენექ, ჩავარდნილს უფსკრულში გამთენებია...“ ასეთი ლექსი ეწინააღმდეგება ბუნების კანონს: უფსკრულში ჩავარდნილს, როგორღა გაგითენდებოდა კიდევ. თუ სიზმარია, ნეტა ავიხდეს!“ (10, 19135.).

ანდა: „მე-ეს“: „როდია კარგი, ავტორი იმ ცხოველს ჰბაძავს, რომელზედაც სწერს: „თქვენ კი ასე ათავებთ ლექსს: „ბატკანი ტირის (?) მე...ე...მე“ და ხელს აწერთ: მე-ე-ე“. (10, 19135.).

ფსევდონიმის უგემოვნოდ შერჩევისათვის ასე ჰკენწლავს ავტორს ვინმე „ჯონჯოლაძეს“: „ეს სადიდმარხვო ფსევდონიმია, თუ ნამდვილი გვარი? მოთხრობა კი მეტად უმაროლოა“. (11, 19135.)

იქვე, „მწყერის“ ფსევდონიმს ამოფარებულ ავტორს ასეთ ანგარიშს უდგენს: „ერთ პატარა ზღაპარში 15 ანდაზა მოგყავთ. კარგი არის მე-16-ეც: არა შეჯდა მწყერი ხესაო“. (11, 19135.).

„მ-ის: „მაიმუნი იჯდა და მღეროდა“ (?). ეს უფრო ავტოგრაფი-ასა ჰგავს, თითქო?“ (11, 19135.).

„განდევნილს“: „მდევნის ბედი, მდევნის ხალხი მდევნის და-ძმა და დედაცა. მდევნის... მუზა“. „კლდე“ ასეთ პასუხს უგზავნის: „ამას უთქმელადაც გავიგებდით, მაგრამ რატომ გგონიათ, რომ ჩვენ გამონაკლისს შევადგენდით ამ საერთო ხოროში?“ (23, 19135.)

ვინმე „გარდუვალს“ ჟურნალისათვის მიუმართავს: „ტყუილად ფიქრობთ, რომ სატირა უეჭველად სატირალი უნდა იყვეს“-ო. აი,

მაგალითად, თვითონ თქვენმა სატირამ, ბევრი გვაცინა“, პასუხობს „კლდე“ (იქვე)

ნაღდი იუმორი იგრძნობა შემდეგ სიტყვებში: „ანიჩკაძეს: „მირბის, მიმაფრენს უგზო-უკვლოდ ჩემი... ირემი“. უგზო-უკვლოდ სირბილი არავის ეკრძალება, მაგრამ თან როცა ნაპარავი მიგაქვს, ყოველთვის მდევარს უნდა მოელოდე“. (26, 1913წ.)

ყურნალი აღნიშნავს: „ჩვენი შინზრდილი პოეტები ყოველთვის ბევრსა სწერენ, მაგრამ ეტყობა, შემოდგომაზედ მათი ფანტაზიის ხეხილიც უფრო უხვად იღებს ნაყოფსა და მოგვივიდა კვანჭატური-ასაგან:

„...მოდო ვნახოთ ვენახი,
ამოსულა ბალახი
მოდო ვნახოთ თხაო
სულ მთლად გადახმაო“.

გეტყობათ ყური მოგიკრავთ ხალხური ლექსისათვის, მაგრამ შიგა ფულუროს რეზონანსი გაგფუჭებით“. (31, 1913წ.)

„თელაველ ნიკოსაც“ ალბათ კარგახანს აღარ გაუჩნდებოდა პოეტობის სურვილი, როცა მის ამ ნაცოდვილარს დაბეჭდილს იხილავდა „კლდის“ ფურცლებზე (რა თქმა უნდა, თუ ამდენი მიხვედრის უნარი აღმოაჩნდებოდა):

„ვარდს ზამბახი გადავანან,
შიგ ჩავგრიხე ია მე
გვირილები შემოვუწყე
მიანც, ეთერ მშია მე...“ (31, 1913წ.)

ვინმე „ცუცუკა“ რედაქციას სთხოვდა: „...თუ ამას დამიბეჭდავთ, კიდევ ბევრს მოგანვდით“-ო. სწორედ ამისათვის ვერ დაგიბეჭდავთ, — პასუხობდა „კლდე“ (31, 1913წ.)

ან კიდევ:

„ლას-პარს“: მთვარის ტრფიალით ველად გავიჭერ,
ქარის გრიალით, მიწას ჩავიჭერ...“

მაგრამა, ლას-პარ, კალმის ტრიალით,
ვერას გახდები, ვერას დაიჭერ...“ (31, 1913წ.)

ამ მეთოდმა რამდენადმე გასჭრა და რუბრიკაც („ჩვენი ფოსტა“) შედარებით მჭლე გახდა, თუმცა ასე დიდხანს არ გაგრძელებულა...

1914 წლის 29 ივნისის ნომერში „კლდე“ წერდა: „უკანასკნელ დროს მწერლობის უინმა ისევ წამოუქროლა ქართველ ახალგაზრდობას და მუდამ-დღე მოგვდის „პოეზია“ და „პროზა“, რადგან

კერძოდ პასუხის გაცემა ძნელია, უყურადღებობა კი შეურაცხ-
მყოფელი, ჩვენ ისევ უურნალით ვუპასუხებთ", და პასუხობდა
კიდეც:

„ტალღას: „წყალი“ და „ქარი“ თქვენს ლექსში ძალიან შეხ-
მატებილებულან, ვეჭვობთ, რომ მწერლობაში „წყალი“ და მოსაზ-
რებაში „ქარი“ შეგიხმატებილებიათ... თუმცა ლექსი ცელქი და
მაღხაზია...”

„საირხელ მაროს: „მაგრამ კვლავ მაინც შენ მეყვარები, შენთ-
ვის მოვიკლავ საბრალო თავსა“, — წერს მარო და პასუხობს „კლდე“
— „ჩვენ არ ვიცით რა საშუალებით აპირობთ თავის მოკვლას, ჩვენი
რჩევა კია: „კლდიდან“ გადავარდეთ“¹⁹⁴.

ანდა **„ქინციკიძეს:** „... არ ძალმიძს მუზა მოვიხმო ავაჟღარუნო
(?) გიტარა...“, — წერს ავტორი და რჩევას აძლევს უურნალი: „მერე
ამ სიცხეში ვინ გატანს ძალას; რაზე ეწვალეები ან შენ, ან ჩვენ რას
გვერჩი?“

ანდა: **„მ. ც-ს:** „ერთი ხანია გიმნაზია გავათავე და მინდა რამე
საქმეს მოვეკიდო“ — გვწერს. გიმნაზია გაათავეთ და მერე არ
იცით, რომ კლდე ცუდი ხელმოსაკიდია?“

ანდა: **„ცაცაიას:** „აბა მარჯვენა ხელით სცადეთ წერა იქნება
უფრო ჭკვიანური რამ გამოგივიდეს“¹⁹⁵.

ანდა: „...ლექსთა წერა მეხერხება,
პროზა? — რა მოგახსენოთო
ქართველი გლეხის ხარები
სულ უნდა გავაცხენოთ“(?)

ატყობინებს თავისი ლექსით „კლდეს“ ვინმე „არიფო“, რაზედაც
უურნალისაგან ასეთ პასუხს ლებულობს: „გაგვიგია ხანდახან კაცი
გაბრიყვდება და ლექსებს სწერს, მაგრამ ხარი რომ გაცხენდებოდეს,
ეს როგორღაც უხერხულად მიგვაჩნია...“¹⁹⁶.

ანდა: ვინმე „ენციკლოპედი“ უურნალს სთხოვს გაარკვიოს, თუ
როგორ მოიქცეს: „...ვიცი, ბევრი რამ ვიცი... როგორ გადმოგცეთ,
ვაი თუ არ გამოგადგეთ...?“

პასუხი ასეთია: „ნუ გრცხვენიათ, მართალია, ზამთარი გავიდა,
მაგრამ ხანდახან ღუმელს ეხლაც ვანთებთ ხოლმე წვიმიან
დღეში“¹⁹⁷. და სხვ.

¹⁹⁴ უურნ. „კლდე“, 1914 წლის, 29 ივნისი, გვ. 14.

¹⁹⁵ იქვე, 1914 წლის 29 ივნისი, გვ. 14.

¹⁹⁶ იქვე, 1913 წლის 7 მარტი, გვ. 16.

¹⁹⁷ იქვე.

ჟურნალს მიაჩნა, რომ ხელოვნებას საერთოდ და, კერძოდ, კი ქართულ ხელოვნებას, უდიდესი როლის შესრულება შეეძლო ადამიანების სულიერი აღზრდის საქმეში. ამიტომ იყო, რომ გამოსვლის პირველი დღეებიდანვე მის ფურცლებზე იბეჭდებოდა სხვადასხვა ჟანრის მასალები (ნერილები, რეცენზიები, ორიგინალური თუ თარგმნილი დრამატული ნაწარმოებები, ფერწერული თუ გრაფიკული ტილოების რეპროდუქციები და ა.შ.). „კლდის“ სტუმრები იყვნენ გამოჩენილი ქართველი მსახიობები, რეჟისორები, მხატვრები, სკულპტორები...

ჟურნალი ასეთ მასალებს ძირითადად მუდმივი რუბრიკის „თეატრი და ხელოვნების“ ქვეშ ათავსებდა... ასეთი მასალების ავტორები უმეტეს შემთხვევაში რევაზ გაბაშვილი და შალვა ამირეჯიბი იყვნენ.

მოვიტანთ ორიოდე მაგალითს, 1913 წლის 6 იანვარს შ. ამირეჯიბი წერილში „ვლადიმერ მესხიშვილი“, მალალ შეფასებას აძლევდა გამოჩენილ მსახიობსა და მამულიშვილს, მის დამსახურებას ერისა და ქვეყნის წინაშე... „ერის ცხოვრებაში ბევრია ნიჭიერი და ხალისიანი მუშაკი, ბევრი აღწევს ვარჯიშობით და გონიერის დაკვირვებით იმ საფეხურს, რომელიც საზღვრავს ღვთიურ შემოქმედებას, მაგრამ იშვიათია, როგორც აღმასი მოელვარე, მინის გულიდან ამოღებული, როგორც მარგალიტი, ზღვის ძირიდან მზის შუქზე ამოტანილი, ისეთი ზეციური ნაპერწკალი, რომელსაც ზეშთაგონება ჰქვია... ზეშთაგონება, — ბუნებით ნაბოძები ნიჭია: ვერც სწავლა, ვერც გონიერება, ვერც ცდები მას ვერ შექმნის... ასეთია ლადო, რომლის სიტყვა, მუდამ იყო „ეროვნული გრძნობის ჩამწერგველი ძალა“¹⁹⁷

„ოტელო“ ქართულ სცენაზე“ ასეა დასათაურებული რ. გაბაშვილის რეცენზია, რომელიც თბილისში ქართველ არტისტთა ახალი ამხანაგობის მიერ შექსპირის ხსენებული პიესის დადგმას ეხება. ოტელო — ვალერიან გუნიას, იაგო — კოტე მესხს, ხოლო დეზდემონა — ქიქოძის ასულს შეუსრულებიათ.

რეცენზენტი სწორედ ამ სამი მსახიობის მიერ განსახიერებული როლების შესახებ ამახვილებს ყურადღებას და არც ერთის თამაშს წარმატებულად არ მიიჩნეზს. რ. გაბაშვილის აზრით, ვალ. გუნია „ყოველ ღონეს ჰხმარობდა, რომ მთელი თავისი ძალ-ღონე გამოეყენებია, მაგრამ მაინც ვერ აღწევდა სანადელს“, ვერც კოტე მესხის პერსონაჟი ამაღლებულა „შექსპირის მიერ დახატულ იაგომდე“,

¹⁹⁷ ჟურნ. „კლდე“, 1913 წლის 6 იანვარი.

ხოლო „ქ-ნი ქიქოძის ასული ჯერ კიდევ გამოუცდელია ასეთ პასუხ-საგებ როლში გამოსასვლელად“—ო. რაც შეეხება „დანარჩენთ მათ აღარ შევეხებით: თვითონვე მიხვდებით“,— აწნიშნავდა რეცენზენტი და იქვე შენიშნავდა: „საზოგადოთ უნდა შევნიშნოთ, რომ ჩვენი სცენა სათანადოდ ვერაა ამაღლებული, რომ კლასიკოსებს ასე ხშირად დავუთმოთ ადგილი. ტეხნიკის განუვითარებლობას თან სდევს მსახიობთა უძლური მხარე. ნუ წარუხუხოცავთ სასოებას, მაგრამ ნურც ასე გამოვიდებით თავს, რომ ასე ხშირად შეგვეძლოს ჩვენი სუსტი ძალებით „ანტიგონესი“, „მეფე ლირის“, „ოტელოსი“, ხვალ კიდევ „ოიდიპოსის“ დადგმა“¹⁹⁸.

მომდევნო რეცენზიაში, რომელსაც ქართულ თეატრში „მეფე ედიპეს“ დადგმას უძღვნიდა იგივე რ. გაბაშვილი დადებით შეფასებას აძლევდა სპექტაკლს მთლიანობაში, ხოლო ცალკეული მსახიობების თამაშის შეფასებისას გამოჰყოფდა ქ-ონ ქიქოძის ასულის მიერ განსახიერებულ იოკასტას და შენიშნავდა: „დიდ იმედებს იძლევა და თამამად ითქმის, რომ მეტად ნიჭიერი და შეგნებული არტისტი დადგება“, რაც შეეხება გუნიას (ოიდიპოსს) მან „ჩვეულებრივად როლი არ იცოდა“, „კრეონის როლის შემსრულებელი „მგალობლიშვილი მეტად კარგი იქნებოდა, რომ მეტად ყმანვილი არა ყოფილიყო“¹⁹⁹—ო.

ყურნალში დასტამბულ ერთერთ სტატიაში „ქართული თეატრის გარშემო“ პირუთვნელი საუბარია სანდრო შანშიაშვილის არტისტულ შესაძლებლობებზე, რომელსაც იმხანად გლეხის როლი შეუსრულებია სპექტაკლ „მსხვერპლში“.

რეცენზენტის თქმით, ეს გამოწვეული ყოფილა „ერთის მხრით მოუხეშავი მიხვრა-მოხვრის გამო, რაც მისი კომპლექსისაგან და-მოკიდებული იყო, მეორე მხრით კი — ღრეჯია მიმიკით და გლეხის შეუფერებელი პათოსით ლაპარაკის გამო, რითაც ერთხელ კიდევ გვიმტკიცებდა, რომ ჩვენს არტისტებს ფიქრადაც არ მოსდით რაიმე არამც თუ სკოლის, უბრალო დისციპლინის მიმდევრობა თავიანთ შემოქმედებაში“. მითუმეტეს ერთ კერძო საუბარში სანდრო შანშიაშვილს განუცხადებია: „ბულბულს რად უნდა სწავლაო“, ანუ საჭირო არ არის თავის ზედღმეტი შენუხება სამსახიობო ხელოვნების დაუფლებისათვისო.²⁰⁰

„კლდე“ ამის გამო შეაგონებდა ნიჭიერ პოეტს და უნიჭო მსახიობს, რომ „ხელოვნების მოტრფიალე ყოველს ადამიანს უნდა ჰქონდეს არა თუ სწავლა-განათლება საზოგადოთ და ხელოვნების დარგშიაც, არამედ საკუთარი ნიჭის გათვითცნობიერებაც. არტ-

¹⁹⁸ ჟურნ. „კლდე“, 1913 წლის 7 მარტი, გვ. 15-16.

¹⁹⁹ იქვე, 1913 წლის 17 მარტი, გვ. 16.

²⁰⁰ იქვე, 1913 წლის 13 იანვარი, გვ. 14.

ისტს ღრმად უნდა ჰქონდეს შესმენილი; ი ის მცნება, რომ მარტო მაშინ შესძლებს სხვაზედ მოქმედებას, როცა თვითონ ღრმად შეითვისებს საგანს, რომელსაც მაყურებლის თვალწინ უყენებს... ახალმოვლენილ შანშიაშვილზედ, მგონი ისიც არ ითქმის, რომ ნიჭიერი იყოს... არ ეტყობა მაინც." ჟურნალს ყველასათვის საუკეთესო მაგალითად მიაჩნდა ვალერიან შალიკაშვილი, რომელიც „ყოველთვის ჩინებულად თამაშობდა“²⁰¹

ჟურნალის რედაქციას, რომელიც ესოდენ დაინტერესებას იჩენდა ეროვნული თეატრის, თუ ხელოვნების სხვა დარგების ავკარგიანობაზე, კარგად ჰქონდა გაცნობიერებული ის როლი, რომელიც ხალხის ეროვნული სულისკვეთების აღზრდის საქმეში სცენიდან ნათქვამ სიტყვას უნდა შეესრულებინა. „კლდეისტებს“ სწამდათ დიდი ილიას შეგონება, რომ მეცნიერებასთან ერთად ხელოვნებას ხელი უნდა შეეწყოს საზოგადოებრივი „აზრის მოძრაობისათვის“, რომ „ისინი თავს უნდა დასტრიალებდნენ ცხოვრებასა და ყოველი ყვავილი მისი მოჰკრიფონ, შეიტყონ რისთვის არიან იგინი და რანი არიან...“²⁰²

ჟურნალის ფურცლებზე არაერთი საყურადღებო მასალაა დასტამბული ისეთი ეროვნული დანესებულების შესახებ, როგორც ქართული საისტორიო და საეთნოგრაფიო მუზეუმი იყო. იმდროისათვის ერთადერთი ეროვნული დანესებულება, სადაც „ჩვენი წარსულის ნივთიერი და სულიერი კულტურის ნაშთები“ იყო შეკრებილი... „ეს მუზეუმი, — რ. გაბაშვილის აზრით, — ტაძარია, შექმნილი სულ რამდენიმე მოსიყვარულე ქურუმისაგან, რომელნიც თავგამეტებით სწირავენ მას თავის დროს, ენერგიას და სიყვარულს“... ამ ქურუმთაგან სტატიის ავტორი განსაკუთრებით გამოჰყოფდა ექვთიმე თაყაიშვილის განუზომელ დამსახურებას, რომელიც დაუცხრომლად იღვწოდა მისთვის საჭირო ექსპონატების მოპოვებისათვის, მაგრამ გულსატკენი ის იყო, რომ მუზეუმს შესაფერი შენობა არ გააჩნდა, საცა უფრო მეტი ნაყოფიერებით შეიძლებოდა მუშაობის გაშლა... არა-და, ავტორის აზრით, — „მუზეუმი ისეთი განძია, რომელზედაც დახარჯული ფული უბრუნდება ქართველ საზოგადოებას. იმ ისტორიულ და ძვირფასად ღირებულ ნაშთების სახით, რომელთაც გარდაუვალი და მეტად დიდი მნიშვნელობა აქვთ ჩვენთვის, როგორც ჩვენი ეროვნული კულტურის გაცნობისათვის წარსულში, ისევე მის აღორძინებისათვის მომავალში“²⁰³. გამომდინარე აქედან, იგი ქართველ საზოგადოებას მიმართავდა მეტი თანაგრძნობა და მხარდაჭერა აღმოეჩინათ ამ

²⁰¹ ჟურნ „კლდე“, 1913 წლის 13 იანვარი, გვ. 14.

²⁰² იქვე, გვ. 14.

²⁰³ იქვე, 1914 წლის 22 ივნისი, გვ. 2-5.

ნორჩი დანესებულებისათვის, როგორც სრულიად საქართველოს საისტორიო, საეთნოგრაფიო და საარქეოლოგიო მუზეუმი იყო. /

„კლდეისტებს“ იმთავითვე კარგად ჰქონდათ გაცნობიერებული პრესის როლი ქვეყნის საზოგადოებრივ-პოლიტიკურ ცხოვრებაში. ამიტომ იყო, რომ ისინი მუდამ ფხიზლად აფასებდნენ ყოველი ბეჭდვური ორგანოს საქმიანობას. უპირველესი კრიტერიუმი ამ შეფასებისა იყო ის, თუ რას აკეთებდა ესა თუ ის გამოცემა ქართველი ხალხის ეროვნული სულის აღორძინებისათვის, ქვეყნის ტერიტორიული მთლიანობის, ეკონომიკური განვითარებისა და კულტურული წინსვლისათვის... მათ ისიც შესანიშნავად იცოდნენ, რომ პრესას არა მარტო იდეების გავრცელება, არამედ დიდი ორგანიზატორული როლის შესრულებაც შეეძლო, მითუმეტეს იმ დროს, როცა ამ მხრივ საქმიანობის წარმართვისათვის ერთიანი პოლიტიკური ცენტრი არ არსებობდა... ჟურნალის რედაქტორი რევაზ გაბაშვილი ამასთან დაკავშირებით გულისტკივილით აღნიშნავდა: „ჩვენ არა გვაქვს რომელიმე ერთი დანესებულება, რომელიც ჩვენს საერთო ეროვნულ ინტერესებზედ, ენაზედ, ტერიტორიაზედ, ეკონომიურ კეთილდღეობაზედ ზრუნავდეს“²⁰⁴. ამის მიზეზი, მისი აზრით, ის იყო, რომ გაბატონებული ბიუროკრატია, ანუ თვითმპყრობელური ხელისუფლება, დაინტერესებული იყო ჩვენს რუსიფიკაციაში. „ჩვენ არა გვყავს საკუთარი არჩეული თვითმმართველობა არამც თუ საერთო ეროვნული საქმეებისათვის, არამედ ცალკე დაბა-ქალაქთა და სოფელთა ინტერესების დაცვისთვისაც. ჩვენ დაქსაქსულნი ვართ. ამიტომ უაღრესად საჭიროა შეკავშირება, კოორდინაცია ჩვენის ძალისა, რათა საერთო საქმე გამაგრდეს ეროვნული შეგნება განმტკიცდეს...“²⁰⁵

მერე რა გზით, რა საშუალებით, რისი მეშვეობით შეიძლებოდა ამ საქმისათვის შველა, მისი მოვლა-პატრონობა?

რ. გაბაშვილის აზრით, ასეთი მაკორდინირებელი როლის შესრულება პრესას შეეძლო: „უაღრეს როლს ამ შემთხვევაში პრესა თამაშობს, საცა გამოითქმება ხოლმე სხვადასხვა მიმართულების და ჯგუფების შეხედულება. მარტო პრესის საშუალებით შეუძლიან ქართველ ერს ხმა მიანვდინოს ერთმანეთს და თავისი გულისნადები უთხრას, რადგან არ არსებობს სხვა, თითქმის არც ერთი დანესებულება, ან ადგილი, სადაც შეიძლებოდეს ლეგალურად ეროვნული პროგრამის შემუშავება ცხოვრებაში გასატარებლად“²⁰⁶.

ქონდა კი ქართველ ხალხს იმ ხანებში ისეთი ბეჭდვური ორგანოები, რომლებიც ამ მძიმე ტვირთის ზიდვას შეძლებდნენ?

²⁰⁴ ჟურნ „კლდე“, 1914 წლის, 4 მაისი, გვ. 10.

²⁰⁵ იქვე.

²⁰⁶ იქვე, 1914 წლის 30 მარტი, გვ. 6-7.

რაოდენობრივად კი, მაგრამ რეალურად მათი მარგი ქმედების კოეფიციენტი ძალზე უმნიშვნელო იყო. იმავე რ. გაბაშვილის თქმით: იმხანად საქართველოში თვრამეტი ყუნალ-გაზეთი გამოდიოდა, მაგრამ ეს მისი კულტურული დონის მაჩვენებელი სულაც არ იყო; პირიქით „გაზეთების სიმრავლე მარტო ჩვენს უკულტურობასა ნიშნავს, ჩვენს ზერელობას მრავალფეროვან მატერიალურ, პოლიტიკურ და ეროვნულ საკითხებში“ და სურვილს გამოთვამდა: „ორისამი, მაგრამ ხეირიანი ორგანო გვექონოდა, მართლაც „ფესვებიანი“ და არა ათასი და ისეთი უნიათო და წყალწყალა, როგორც დღესა ხედავთ“²⁰⁷ -ო.

„კლდე“ 1913 წლის 3 თებერვალს მონინავეში პრესის შესახებ და მის სასარგებლო საქმიანობაზე წერდა: „თვალი რომ გადავაგლოთ ჩვენს „მრავალრიცხოვან“ პრესას, რომ ჩაუუკვირდეთ ჩვენი ყურნალ-გაზეთების მიმართულებას, ადამიანი გაცოდება, თუ მიზანი და მისწრაფებანი როგორ ყველას ერთი აქვს თითქო და იმავე დროს ერთ-ერთმანეთს სჭამენ სულ უბრალო და უმნიშვნელო საბაბების გამო, სჭამენ როგორც ფარაონის მჭლე ძროხები და ისევ მჭლენი რჩებიან“.

ამ ფაქტით შემფოთებული „კლდე“ განაგრძობდა: „სად არის ამის მიზეზი? რად ვფანტავთ ასე ჩვენს ლიტერატურულ ძალას, რად ვალევთ ენერჯის დიდ ნაწილს უმნიშვნელო და არასასურველ შეხლა-შემოხლას, როცა საქმე-სამკალი ბევრია და მომკალნი ასე ცოტანი?“

„...ჩვენი ყურნალ-გაზეთობა უმეტეს ნაწილად, მიზანზედ, ანუ პრიინციპზედ კი არ ეკამათება ერთი-ერთმანეთს, რადგან უმეტესობას ერთი უმაღლესი მიზანი აქვს — ეროვნული აღორძინება და განვითარება, არამედ დაუცხრომელი ბრძოლა წერილმანების გარშემო ტრიალებს... ეს კი უსიამოვნებას და გულისტიკვილს ინვევენ მკითხველში.

ის პრესა, რომელიც ხელმძღვანელი უნდა იყვეს საზოგადო აზრისა, რომელიც უნდა მიმართულებას აძლევდეს საერთო საქმეებს თავისი შეგნებული გათვალისწინებით ყოველი მოვლენისა; რომელიც უნდა აწარმოებდეს გარკვეულს, მიზანშეწონილ პოლიტიკას — იფანტება, ჰკარგავს უმთავრესს — წერილმანებში, რყენის დიადს უმნიშვნელოთი.

...ეხლა ჩვენს პრესას არამთუ არ შეაქვს შეგნება ეროვნული მთლიანობისა ჩვენს საზოგადოებაში და ხალხში, არამედ იმ კავშირსაცა შლის და ჰგლეჯს, რომელის ბუნებრივად არის დამყარებული და ათას მტრულ ბანაკადა ჰყოფს გააფთრება, ისედაც დაკნინებულ ერსა“.

²⁰⁷ ურნ „კლდე“, 1914 წლის 30 მარტი, გვ. 6-7.

დასასრულს რედაქცია ასე ამთავრებდა თავის მოწინავეს: „მივმართავთ ჩვენი ეროვნული პრესის ყველა წარმომადგენელს, ვინც პრინციპიალურ წინააღმდეგობას ვერ დაინახავს ასეთ შეთანხმებაში, გამოსთქვან თავისი აზრი.

იქნება საერთო ძალით უკეთ შეიძლებოდეს მოგვარება არა მარტო ჩვენი სიტყვიერი მსჯელობისა, არამედ ყველა იმ კულტურულ-ეკონომიკურ დაწესებულებისა და იმ საქმისა, რომელთაც ნება-ნება საფუძველი ეყრებათ და რომელზედაც უნდა აღმოცენდეს ჩვენი ერის მომავალი ძალ-ღონე“²⁰⁸.

„კლდეისტები“ გაფაციცებით ადევნებდნენ თვალყურს საქართველოში სხვადასხვა ენებზედ გამომავალ ჟურნალ-გაზეთებს და შეუნიშნავს და რეაგირების გარეშე არ ტოვებდნენ, თუ რომელიმე მათგანის ფურცლებზე საეროვნო მნიშვნელობის რაიმე მასალას წააწყდებოდნენ... მოსანონს ინონებდნენ, ხოლო გასაკრიტიკებელს აკრიტიკებდნენ. ამ შემთხვევაში მათთვის პარტიულ განსხვავებულობას რაიმე მნიშვნელობა არ ჰქონდა.

„თუ ავგუსტ ბებელს შეეძლო იმის თქმა, რომ პროლეტარიატის ინტერესებისათვის ეშმაკსაც კი დავუმეგობრდებო, ქართველი ხალხის ინტერესებისათვის ჩვენ თვით დასელებთან (გულისხმობენ ქართველ სოც.-დემოკრატებს — გ. ს.) ნავალთ ერთად და არ შევუშინდებით იმასაც, თუ ჩვენი „სოციალისტები“ იმის მტკიცებას დაგვინყებენ, რომ ეშმაკი სჯობია ქართველ დასელს“²⁰⁹.

ამის კონკრეტულ მაგალითად მოჰყავდათ სოც.-დემოკრატიული მიმართულების გაზეთი „აზრი“, რომელსაც მოუთხოვია — ქართველთა შორის წერა კითხვის გამავრცელებელი საზოგადოების საქმიანობა დემოკრატიზაციის პრინციპით შეფასებულიყო.. „ჩვენ არავითარი უფლება არა გვაქვს ვიფიქროთ, როცა წერა-კითხვის საზოგადოების დემოკრატიზაციას ქადაგობენ. გვნამს, რომ ქართულის დემოკრატიის მესვეურნი, ქართული კულტურის ინტერესებს ისინიც მალლა აყენებენ და დაიცავენ კიდევ. თუ ეს ასეა, მაშინ არავითარი უფლება არა გვაქვს ვენინააღმდეგოთ ისეთ მოთხოვნილებებს, რომელიც დროს შეეფერება და საზოგადოების დემოკრატიზაციაში გამოიხატება...“²¹⁰

„კლდეისტთა“ ღრმა რწმენით „ყველა ნეიტრალური ეროვნულ-კულტურული დაწესებულება (მათ შორის ქართველთა შორის წერა-კითხვის გამავრცელებელი საზოგადოებაც — გ. ს.) მოვალე იყო კარი გაეღო ხალხის უმრავლესობისათვის, რათა ყველა მიმარ-

²⁰⁸ უურნ „კლდე“, 1913 წლის 3 თებერვალი, გვ. 1-2.

²⁰⁹ იქვე, 1914 წლის 22 ივნისი, გვ. 2.

²¹⁰ უურნ. „კლდე“, 1914 წლის 22 ივნისი, გვ. 2.

თულების წარმომადგენლებს თავისი ხმა უნდა ჰქონოდა საერთო ნეიტრალურ ნიადაგზე²¹¹.

რ. გაბაშვილის ამ სტატიას თავის მომდევნო ნომერში ეხმაურება გაზეთი „იმერეთი“ და აღნიშნავს: სოც.-დემოკრატიების ქ.მ.ნ.კ. გამავრცელებელი საზოგადოების საქმიანობაში ჩართვამ იგი „პოლიტიკური ბრძოლის მოედნად არ გადააქციოს“.

რ. გაბაშვილი კი ამასთან დაკავშირებით პასუხობდა: „პოლიტიკური მოსაზრებით არასოდეს არ შეიძლება ვიხელმძღვანელოთ კულტურულ დაწესებულებაში... საერთო ეროვნულ საქმეში — პარტიულ და პოლიტიკურ მოსაზრებათა შეტანა — დიდ შეცდომად მიგვაჩნია ყველას... რაც შეეხება იმ შიშს, რომ დასელები რასაც ხელში ჩაიგდებენ, იქ აღარავის დააყენებენო — ეს ჩვენ არ გვაშინებს: ჯერ ერთი ისინიც დაინტერესებულნი არიან საზოგადოების (ე.ი. ქ.მ.ნ.კ.გ.ს.-ის — გ. ს.) არსებობაში და, მაშასადამე, თვითონ ძირს არ გამოუთხრიან და, მეორეც, საკითხი სწორედ იმაშია, რომ ერთს მიმართულებას არ უნდა ჰქონდეს ჩაყარდნილი ხელში ეს დაწესებულება“²¹².

უმართებულოდ მიაჩნდა რ. გაბაშვილს „იმერეთის“ განცხადება: ჯერ განაცინონალისტდნენ და მერე გაუღებთ მათ ხსენებულ დაწესებულებათა კარებსო“..., რადგან სწორედ ასეთი კარის ჩაკეტვა შექმნიდა გაუფალ კედელს, რომელიც ეროვნულ-დემოკრატიასა და სოციალ-დემოკრატიას შორის შენდებოდა. ამიტომ საჭირო იყო სოც.-დემოკრატიებისათვის ხელის შეწყობა, რათა ეროვნულ საქმეებში ტრიალით ესწავლათ ეროვნულ შემეცნებათა გაზიარება... რ. გაბაშვილს მიაჩნდა, რომ იმ დროისათვის (ე.ი. 1914 წლის შუა ხანებისათვის — გ.ს.) „დასელები ეროვნულად უკვე უბრუნდებოდნენ თავის პიროვნულ ფორმულებს, რომელსაც ადგნენ სოც.-დემ. II ყრილობამდე — ამის საბუთები მრავალია იმათთვის, ვინც თვალყურს ადევნებს უკანასკნელ დროის აზრთა ევოლუციას“ და თხოვდა თანამოაზრე გაზეთის რედაქციებს გულისყურით აენონათ ეს ტაქტიკური მოსაზრება და პრინციპიალური განხეთქილების საგნად არ გაეხადათ უბრალო საკითხი.

„კლდეს“ სისტემატური პოლემიკა ჰქონდა იმდროინდელ ჟურნალ-გაზეთებთან, მითუმეტეს, როცა მათი პოზიცია ეროვნულის სანინაალმდეგო და საზიანოდ მიაჩნდა...

ამის საუკეთესო მაგალითად გამოდგება რ. გაბაშვილის წერილი — „თემიც“ ერევა მარაქაშია“... რ. გაბაშვილის აზრით, „თემის“ უპირველესი ნაკლი ის იყო, რომ იგი რაიმე საკითხსა და იდეას კი არ იცავდა, არამედ პიროვნებას; ანდა, როცა იგი ვინმეზე წერდა,

²¹¹ ჟურნ. „კლდე“, 1914 წლის 22 ივნისი, გვ. 2.

²¹² იქვე, 1914 წლის 29 ივნისი, გვ. 3-4.

ილაშქრებდა, ნერდა ან ილაშქრებდა პიროვნებაზე და არა იდეის წინააღმდეგ.

„თემი“ კამათს მაინც არ იშლიდა... ამიტომ იყო, რომ რ. გაბაშვილის თქმით „დიდი ხანია აღარავინ ეკამათებოდა და თითქმის ყველა ქართულმა გამოცემამ არა ერთხელ გამოაცხადა თავისი უკანასკნელი სურვილი მასთან ყოველი პოლემიკის მოსპობის შესახებ“.

მაგრამ „თუ მთა არ მივა მაჰმადთან, მაჰმადი თვითონ წავა მთასთანო“ და „თემიც“ თვითონ ეშვებოდა (თავს არ ანებებდა სხვეების გაკენწვლას, ჩირქის მოცხებას, ცილისწამებასაც კი და ა. შ.)

რ. გაბაშვილის თქმით „თემს“ იმჟამად ფარხმალი აულია და „კლდის“ წინააღმდეგ დაუბეჭდავს კახეთის რკინიგზის თაობაზე... ამის გამო „კლდე“ ნერდა: ჩვენ „არსებითად არ შევებებით მის წერილს, რაკი ჩვენთვის და ჩვენი მკითხველისთვისაც არა საკადრის საქმედ მიგვაჩნია“, და შემდეგ „ძმურ“ რჩევას აძლევდა: „...არ არის ამ გაზეთის საქმე ისეთ რთულ კითხვებში ჩარევა, როგორც არის ამჟამად კახეთის რკინიგზა და საზოგადოთ ის რთული სოციალ-პოლიტიკური საკითხები, რომელთა ცოდვილობა ასე უყვარს მას“.

რ. გაბაშვილი არა მარტო რედაქტორს, არამედ რედაქციის მთელ შემადგენლობას არ ტოვებდა შეფასების გარეშე... „თემის“ მთელი რედაქცია ისეთ პირთაგან შედგება, რომელიც, ღმერთი რომ ჰბადავდა უთხრა: აი, პური და აი წყალი, თუ გიყვარდეთ პოლიტიკას თავი დაანებეთ! მაგრამ „თემმა“ მალე დაამტკიცა, რომ ოღონდ პოლიტიკაზედ ალაპარაკე და თუ გინდ პურს ნუ აჭმევ, ასე ყირამალა გადაატრიალა „თემმა“ ღვთის განგება.

აი, ჩვენი აზრი გაზეთ „თემის“ შესახებ“. და შემდეგ:

„ისეთი გაზეთები როგორც „თემია“ პირდაპირ მავნე ფუნქციას ეწევიან ჩვენს საზოგადოებაში. განა შესაძლებელია ისეთი გაზეთის არსებობა, რომელიც თვიდან-თვე მარტოოდენ ისეთი წერილებით იკვებება, როგორც არიან თემის მეთაურები... რაკი გაზეთი თავის საკუთარ აზრს მოკლებულია, იგი იძულებულია აზრთა მაკლერობა გასწიოს... „თემი“ ერთი იმ გაზეთთაგანია, რომელიც რყვნის საზოგადოების შეგნებას, რომელიც ბურუსში ახვევს მართალ და საღ აზრს და განზრახ ან შეუგნებლად (ჩვენ უფრო ეს უკანასკნელი გვგონია) საზოგადოებაში ბოროტებას და მავნებლობას სთესავს“

„დღევანდელმა უბადრუკმა ხანამ, ნერდა „კლდე“ თავის „პრესის“ განყ-ში, — საქართველოს აჩუქა ერთი უბადრუკი შვილიც გაზ. „თემი“ და მისი რედაქტორი...“

მას „ხლესტაკოვშინობას“ სწამებდა, როგორც ტყუილის მთქმელს, ცილისმწამებელსა და მეჭორეს...

უნუნებდა მეთაურ წერილს:

„ბ-ი დიასამიძე ელაქუცება ცნობილ დეგენერატს ფ. მახარაძეს, რომლის ხელებზედ ჯერ ილია ჭავჭავაძის სისხლი არ გამშრალა და ეფიცება: „ჩვენ ძალიან კარგად ვიცით, რომ ილია ჭავჭავაძე კერძო საკუთრების პრინციპის აღმსარებელი და მისი შეურყევლობის მომხრე იყო. ამ მხრით ილიას ჩვენში ბევრი არ ემხრობოდა ჩვენ შორისაც იყო დიდი განსხვავება. (ხაზგასმა ნერილის ავტორის — „ეკალისა“ — გ. ს.).

ამ „განსხვავებით“ გაკადნიერებული „თემის“ რედაქტორი ურჩევს ქართველ საზოგადოებას დაუყოვნებლივ გაუმართოს ილია ჭავჭავაძეს სამედიცინო სასამართლო. („თემი“ წერდა: (იხ. 124 1913) დაუყოვნებლივ მოაწყოს ჩვენმა საზოგადოებრივმა და პოლიტიკოსთა ჯგუფებმა და ქართულმა პრესამ აირჩიოს სანდო პირები და დაადგინოს თუ რა განწყობილება იყო ილიასა და გლეხებს შორის, სანამ მოწმენი ცოცხლები არიან“).

ე.ი. სანამ ცოცხალნი არიან ილიას მორალური მკვლეელი ფ. მახარაძე და ხლესტაკოვი გ. დიასამიძე რომელსაც, რასაკვირველია, ამ სასამართლოს თავმჯდომარედ აირჩივენო“ — ირონიით შენიშნავდა „ეკალი“.

„ეკალი“ ჟურნალ „კლდეში“ პატარა მიმოხილვაში „საზარელი დღეები“ წერდა: „ქართული პრესა საზარელ დღეებს განიცდის. ბრწყინვალე ქართველი მგოსნის ილია ჭავჭავაძის სახელის გარშემო ატეხილი ლანძღვა-გინება, მისი ხსოვნის შეურაცყოფა და ლაფში თრევა ყოველ საზღვარს გადავიდა და საზარლად ახასიათებს დღევანდელ ჩვენს ჟურნალიზმს. ქართულ ჟურნალიზმს გზა აებნა და აბნეული რყვნის ქვეყნის საზოგადოებრივ აზრს; თეთრს უჩვენებს შავად, ნითელს — თეთრად.

რუსულ თონეში გამოცხობილმა „სოციალიზმმა“ შეკაზმა ქართული ცხოვრება და ბნედიანად, უგზო-უკვლოდ, ქვეყანაზე დათარეშობს, გააქვს-გამოაქვს და ფეხქვეშ სთელავს პატარა ისტორიული ქართველი ერის წმინდა იდეალებს. დღევანდელი ქართული ცხოვრების გმირები ზიპო ნკიპურტაძეები და ფილიპე მახარაძეები მზად არიან საქართველოს ყველა წმინდა საფლავები გაქექონ და გვამებიც ჰაერში გაანიავონ.

„კლდე“ ყოველთვის დიდი ინტერესით ხვდებოდა ამათუიმ პერიოდული ორგანოს დაარსებას, მითუმეტეს მასში თუ რაიმე ეროვნულს, სამშობლოს მოჭირნახულის პოზიციას შენიშნავდა. ასე გამოეხმაურა ჟურნალი გაზეთ „მზის“, გაზეთ „შადრევანის“ და სხვათა გამოსვლას...

1912 წლის ნოემბერში ქუთაისში გამოვიდა ყოველკვირეული კოოპერატიულ ჟურნალ „შრომის კავშირის“ პირველი ნომერი იოსებ გაბილაიას რედაქტორობით.

„კლდე“ ოპერატიულად ეხმიანება ამ ფაქტს და ბეჭდავს „დ. ვ.“-ს (დავით ვაჩნაძის) გამოხმაურებას, რომელშიც ნათქვამია: „ენერგია და შრომა თვით ბ-ონ გაბილაიასი კოოპერატიული იდეის გავრცელებაში ჩვენს ეკონომიურად ღარიბს ქვეყანაში, საუცხოვო და მისაბაძია. ამ დაჟინებულ ენერგიაში ისახება მომავალი თვით ჟურნალისაც“.

რეცენზენტის სურვილი იყო ახალ ჟურნალს ბევრი ენერა არა მარტო მომხმარებელთა საზოგადოებაზე, არამედ „სხვა კოოპერატიულ ორგანიზაციებისთვისაც მიექცია ყურადღება. არა ნაკლებ მნიშვნელოვანი იყო საკრედიტო, მწარმოებელი, საქონლის გამსაღებელი და სხვა კოოპერატივები. მეტადრე საკრედიტო კოოპერაცია, რომელიც ასე სწრაფად ვრცელდებოდა ჩვენში და ულმობლად ითხოვდა ყოველ დღე მრავალ პრაქტიკულ საკითხების გამორკვევას... ამისათვის კარგი იქნებოდა ჟურნალს სისტემატურად მიენოდებინა ჩვენი კოოპერატიულ დანესებულებებისათვის მეტი მასალა ქართული კოოპერაციის ცხოვრებიდან...“²¹³ და სხვ.

„გულნრფელად დაგულოცავთ ჟურნალს მის კოოპერატიულ გზას და ვურჩევთ ჩვენს კოოპერატიულ ამხანაგობას გამოინერონ ეს, მათთვის ყოვლად სასარგებლო გამოცემა“.

„კლდე“ თავისი შესაძლებლობის ფარგლებში (უპირველესად მისი პერიოდულობა გვაქვს მხედველობაში) უყურადღებოდ არ ტოვებდა როგორც ცენტრალურ, ისე კავკასიის რეგიონალურ პრესაში დასტამბულ მასალებს, რომლებიც ნეგატიური თუ პოზიტიური თვალთახედვით საქართველოსადმი იყო მიძღვნილი. ჟურნალი დაუყოვნებლივ ახდენდა მათ გადმობეჭდვას თავის მუდმივი რუბრიკის „პრესა“-ს ქვეშ.

მაგ. თავის 1915 წლის 7-ში „კლდე“ ახდენს ქართულ გაზეთ „ახალი აზრიდან“ ერთერთი პუბლიკაციის გადმობეჭდვას, რომელიც მიძღვნილი იყო გამოქვეყნულ სომეხთა და აისორთა შესახებ, მაშინ როცა არავინ ყურადღებას არ აქცევდა დარბეულ და ანიოკებულ აჭარელთა ყოფას, „რომელთა დასახმარებლად არავინ აღმოჩნდა“-ო.

„დღეს ადგილობრივი და სატახტო პრესა სომეხთა და აისორების ბედს დასტირის. მართლაც, მათი მდგომარეობა მძიმეა, მარა არის ერთი კუთხე, რომელსაც გარეშე და შინაურ მტერთაგან გაცილებით უარესი დღე დაადგა. ეს არის აჭარა, მისი მდგომარეობა მართლაც აუნერვლია. გაივლის ხანი, სომეხ-აისორების უმრავლესობა თავის სახლ-კარს დაუბრუნდება, ხოლო აჭარელთა გოდება მთამომავლობას ისევ გადაეცემა, როგორც ებრაელთა გოდება მდ. ეფრატის ნაპირას. ამას ისტორია ვერ დაივიწყებს“.

²¹³ ჟურნ. „კლდე“, 1912 წლის 18 ნოემბერი, გვ. 11.

1914 წლის 22 დეკემბერს ქართველმა მკითხველმა მიიღო გაზეთ „შადრევანის“ პირველი ნომერი — ქართველ სოც.-დემოკრატიკ-ავტონომისტთა ორგანო.

„კლდე“ სიხარულითა და მოწონებით ხვდება თანამოძმის გამოსვლას, ჟურნალის სარედაქციო წერილში ნათქვამი იყო:

„ქართულს პრესას მიემატა კიდევ ერთი თანამოძმე „შადრევანი“, რომლის პირველი ნომერი ფრიად საინტერესოდ შედგენილი გამოვიდა ამ წლის 22 ქრისტეშობისთვის.

სიამოვნებით უნდა აღვნიშნოთ, რომ მისი თამამი და რეალურ ცხოვრებასთან დაკავშირებული სიტყვა ყოველმხრივ პასუხს აძლევს თანამედროვე საკითხებზე და უსურვებთ გამარჯვებას ამ მარჯვედ აღებულ გეზზე“.

შემდეგ მითითებული იყო გაზეთის კონკრეტულ ღირსებებზე და ზოგიერთ „ბუნდოვანებაზეც“, თუმცა „მისი თვალსაჩინო ადგილები მინც მონმობენ გაზეთის მიერ თავის სარედაქციო წერილში გაცხადებულ აზრად: „მთელს ჩვენს იმედებს საზოგადოების წინსვლისას და ეროვნული განახლებისას ვამყარებთ საზოგადოების ფართო დემოკრატიულ წრეებზე და მათს პოლიტიკურ-კულტურულ ამალგების დიად და წმინდა საკურთხეველზე მიგვაქვს შეძლებისდაგვარად მსხვერპლი საერთო თანამოაზრებთან ერთად“.

ეს აზრი „კლდეს“ სრულის გულწრფელობით და სინამდვილესთან მიახლოვებით“ ნათქვამად მიაჩნდა. განსაკუთრებით გამოჰყოფს „ამონანერის უკანასკნელ სიტყვებს, ვინაიდან ეს ახალი იერია ამ ბანაის სიმღერებში, რომელთაც ქართული ზოგი ძალად და ზოგი მართლაც ეროვნული ჯგუფები — ერეკებოდნენ საზოგადო ასპარეზიდან.

(„კლდეს“ მხედველობაში აქვს ის, რომ ავტონომისტები სოც.-დემოკრატიების ნიაღში აღიზარდნენ და ამ დროისათვის უკვე ხმამაღლა განაცხადეს თავიანთი დამოკიდებულება საქართველოს ავტონომიასთან დაკავშირებით — გ. ს.).

ჟურნალს სრული იმედი ჰქონდა, რომ „ეს ახალი იერი ხიდად გაედება მოპირდაპირე ლაშქრებს“ და ხელს შეუწყობდა მათი გაერთიანების, შეერთების საქმეს. ამის გარანტიად „კლდეს“ მიაჩნდა გაზეთის დანაპირები: „გაზეთი ენერგიულად ეცდება მხარი დაუჭიროს გაცნობიერებულ წრეების მართლა შეგნებულ მიდრეკილებას და დაფანტულ ძალთა თავის მოყრას“.

„კლდის“ დასკვნით: „ეს ფრიად მძიმე ტვირთი, ცოტა არ იყოს ძნელი ხდება ახალი თანამოძმისათვის, მაგრამ იმედი, რომ თანამედროვე დიადი მომენტი, რომელსაც ყველა მხარე ერთნაირის სიმწვავით განიცდის — ხელს შეუწყობს პრაქტიკულ საკითხებში გაერთიანებას“.

ყურნალი იმდენად მნიშვნელოვნად მიიჩნევს ახალი გაზეთის მეთაურ ნერილს, რომელშიც დაკონკრეტებული იყო პრესაში მანამდე გამოთქმული ზოგიერთი მოსაზრება, რომ მთლიანად სთავაზობდა მას თავის მკითხველებს... გაზეთის მეთაურ ნერილში კი მითითებული იყო იმ ისტორიულ მომენტზე, როცა ომის გამო საქართველო, როგორც რუსეთის იმპერიის ნაწილი, ფრონტის წინა ხაზთან აღმოჩნდა, რის გამოც საჭირო იყო მეტი სიფხიზლისა და თავდაჭერის გამოჩენა". კერძოდ, ქვეყნის სამხედრო დაცვა ჯარის საქმე იყო... „ჩვენ სხვა შინაურ სამოქალაქო და ეკონომიური საქმეების" მშვიდობიან გაძლოლისათვის უნდა მიგვეხედა და ამავე დროს მზად ვყოფილიყავით ყოველი „მოსალოდნელი გართულების ღირსეულად შეხვედრისათვის".

„კლდე" იწონებდა „შადრევანელთა" დამოკიდებულებას სომხეთის საკითხთან დაკავშირებით, თუმცა გაზეთს იმაზეც მიუთითებდა, რომ საჭირო იყო საკუთარი დამოკიდებულების გამჟღავნება იმ ობიექტურად არსებული სამი საკითხისადმი, როგორიც იყო: სომხეთის ავტონომია ოსმალეთში, ანექსია და რეფორმები. ყურნალის აზრით: ამას დისონანსი შეჰქონდა გაზეთის პირველი ნომრის გადაჭრილ კრედოში... „ჩვენ გვესმის სიფრთხილე, გვესმის ეროვნებათა სოლიდარობის" პრინციპიც, მაგრამ დღევანდელი მომენტი აუცილებლად მოითხოვს პასუხს კონკრეტულ მოვლენებზეც და არა მარტო პრინციპიალურ შეხედულებათა გამოქვეყნებას"-ო.

„კლდე" ერთხელ კიდევ ხაზგასმით აფიქსირებდა ეროვნულ-დემოკრატიების დამოკიდებულებას ომისადმი და მიიჩნევდა მას ერის, ეროვნული იდეით შეკავშირების საშუალებად, რომელიც უპირისპირდებოდა ინტერნაციონალიზმისა და მუშათა კლასის, პროლეტარიატის სოლიდარობას... „ეროვნულმა იდეამ და გრძნობამ შესძლო გაერთიანება ისეთი მონინაალმდევე ჯგუფებისა ერის ფარგლებში, რომელნიც ერთი-ერთმანეთის სისხლსა სვამდნენ, მხოლოდ ეროვნულმა იდეამ და გრძნობამ გათიშა ისეთი კლასები და ჯგუფები, რომელნიც სხვა ერთა იმგვარივე ჯგუფებსა და კლასებზედ ამყარებდნენ თავიანთ იმედებს. დღეს ბუნებრივი კრისტალიზაცია ხდება ერებისა თავიანთ ბუნებრივ ფარგლებში და ისპობა ომის ზეგავლენით კრისტალიზაცია კლასების მიხედვით. კლასთა ბრძოლა არასოდეს არ მოსპობილა და კვლავაც დარჩება, რასაკვირველია, მაგრამ იგი იტრიალებს ეროვნულ ფარგლებში, რადგან საერთო გასაჭირმა ნათელჰყო ის აზრი, რომ უფრო მახლობელია იმავე ერის, მაგრამ სხვა კლასის ნაწილი, ვიდრე იმავე კლასისა და სხვა ერის".

დასასრულ, ჟურნალი „კლდე“ სიცოცხლეს უსურვებდა ახალ თანამოძმეს გაზეთ „შადრევანს“ და სიამოვნებით უწვდიდა ხელს საერთო მოქმედებისათვის, ანუ ეროვნული საქმის საკეთებლად²¹⁴.

„კლდის“ აშკარა გაცხადებულმა ეროვნულმა პოზიციამ არაერთი ქართველი მამულიძეილი დააფიქრა და ბევრმა მათგანმა მიატოვა კიდეც თავიანთი ორგანიზაციები და ხსენებული ჟურნალის გარშემო იწყო თავმოყრა. ამის შესახებ იმდროინდელი ჟურნალ-გაზეთებიც წერდნენ: მაგალითად, გაზეთი „თემი“ აღნიშნავდა: „...დიდი მოძრაობაა... ჩვენს ზომიერ-საზოგადოებრივ ელემენტების წრეებში. ახლა ეს ელემენტები ამოძრავდნენ. გამოდიან იმ პარტიებიდან და იმ ჯგუფებიდან, რომელშიაც აქამდე იმყოფებოდნენ. მათ დაეტყოთ შესამჩნევი ცვლილება და ეს უკანასკნელი გამოისახა უპირველეს ყოვლისა ჩვენს ჟურნალ-გაზეთებში.

ჟურნალ „კლდის“ თანამოაზრეთა გამოყოფა „სახალხო გაზეთის“ წრიდან მეტად თვალსაჩინო და საყურადღებო მოვლენაა... ჩვენის აზრით, ამ ყმანვილკაცობის პირდაპირი, ნილაბ ჩამოუფარებელი გამოსვლა სწორედ მოსაწონია. ყოველი საზოგადოებრივი ჯგუფი მაშინ არის პატივისცემი, როცა ის წრფელად აღიარებს თავის რწმენას და არ თვალთმაქცობს.

ჩვენ ამას გულახდილად ვაღიარებთ, ხშირად მოგვსვლია შეტაკება „კლდელებთან“, უეჭველია, შემდეგშიც მოგვივა, მაგრამ რაც ცხადია და უტყუარი, იმის დამალვა შეუძლებელია“.

გაზეთი „სიმართლის ხმის“ თქმით:

„გაუმარჯოს ზომიერ პარტიას, ძირს სოციალისტები! — აი დროშა, რომელნიც ჟურნალმა „კლდე“ კაი ხანია ააფრიალა. „კლდის“ პუბლიცისტები გულწრფელი და გაბედული ხალხია! მათი ლაშქარი იზრდება და სხვა.

თავის მხრივ ჟურნალი „კლდე“ ასეთ კომენტარს უკეთებდა ამ გამოსხმაურებას „ორივე გაზეთი მარტო „ზომიერებით“ ხსნის ამ ელემენტების გამოთიშვას უწინდელ პოზიციებიდან. მაგრამ ეს დახასიათება სრული არ არის. განა უკიდურესობას გამოექცა ივ. გო-მართელი, თუმცა მას „კლდეში“ არ შეუფარებია თავი?.. ჩვენ ვფიქრობთ, ზომიერების გარდა აქ დიდ როლს თამაშობს ეროვნული პროგრამა, რომელიც არც სოციალ-დემოკრატებს უფარგათ და არც სოციალ-ფედერალისტებს.

აქედან ერთი დასკვნა უნდა გამოვიყვანოთ: მართალია ჩვენ ვართ ზომიერნი სოციალურ პოლიტიკაში, მაგრამ ეროვნულ პოლიტიკაში ჩვენ ვიქნებით უკიდურესი რადიკალები“²¹⁵.

²¹⁴ ჟურნ. „კლდე“, 1914 წლის 31 დეკემბერი, გვ. 7-8.

²¹⁵ იქვე, 1914 წლის 26 იანვარი, გვ. 9.

„ბიბლიოგრაფიის“ განყოფილებაში ყურნალი დრო და დრო აქვეყნებდა პროფესიონალურ დონეზე დაწერილ რეცენზიებს ამა თუ იმ სამეცნიერო თუ მხატვრული ნაწარმოების ღირსება-ნაკლოვანებებზე, ზოგჯერ კი ანოტაციის დონეზე აცნობებდა მკითხველ საზოგადოებას ახლად გამოსული ნიგნების შესახებ.

XIX საუკუნის 60-იანი წლების დასაწყისში ზოგიერთი ქართველი მოღვაწე ქართული ენის კვდომისა და რუსულთან მისი შერწყმა-გათქვეფის აუცილებლობასაც კი ქადაგებდა. მათ შორის იყო გიორგი ბაგრატიონ-მუხრანელიც. მან სპეციალური ბროშურაც კი მიუძღვნა ამ საკითხს... რასაც დიდი გამოხმაურება მოჰყვა ქართველ 60-იანელთა მხრიდან... ერთ-ერთი პირველთაგანი, რომელმაც დასაბუთებული პასუხი მისწერა ბაგრატიონ-მუხრანელს — იმერეთის ეპისკოპოსი გაბრიელი იყო. 1872 წლის 21 ნოემბერს დაწერილი პირადი წერილი პირველად ყურნალმა „მოამბემ“ გამოაქვეყნა 1896 წელს, ხოლო 1914 წლის 8 ივნისს მისი ხელახალი პუბლიკაცია ყურნალმა „კლდე“ მოახდინა... რედაქციის შინაწერში ნათქვამი იყო: „ეს წერილი გადმობეჭდილია პატარა ბროშურიდან „სულმნათი გაბრიელის საუნჯე“ და ვათავსებთ, როგორც დღესაც ისევე საინტერესოს, როგორც ყოველთვის“²¹⁶.

ყურნალი თავის უარყოფით დამოკიდებულებას გამოთქვამდა გ. ბაგრატიონის მოსაზრებების გამო, რომელსაც მიაჩნდა, რომ ყოველი სახელმწიფო არის და უნდა იყოს ერთი ორგანიზმი... რომ სახელმწიფოში უნდა იყოს ერთი ენა, წინააღმდეგ შემთხვევაში სახელმწიფო არ იქნება მაგარი და მკვიდრი“ (რუსეთზე ზრუნავდა ბაგრატიონთა წარმომადგენელი — გ. ს.). ამის საპასუხოდ გაბრიელ ეპისკოპოსი „გადაგვარების მოსურნე“ ქართველს შეახსენებდა: „დედამინის ზურგზე დასაბამითგან ვიდრე აქობამდე და ახლაც ჩვენს დროებაში, არ ყოფილა და არ არის ისეთი დიდი სახელმწიფო, რომელთა შინა ყოველნი მცხოვრებნი ლაპარაკობდნენ ერთი ენით; ყოველ სახელმწიფოში ყოველთვინ და ყველგან გარდა ერთი უმთავრესი სამმართველო ენისა, ყოფილან სხვა წერილ-წერილი ენები...“, რომ „ხალხის ხალხთან შეერთება (слагание) მარტო ენით არ მოხდება და არც დაბრკოლდება... თუ სიყვარული, ნდობა, ინტერესების ერთობა არ შეაკავშირებს კაცს კაცთან, ხალხს ხალხთან, ენა იქვერაფერს იქმს...“²¹⁷ და ა.შ.

²¹⁶ ყურნ. „კლდე“, 1914 წლის 8 ივნისი, გვ. 12-15.

²¹⁷ იქვე.

ერთი სიტყვით, სამშობლოს მოყვარული მამულიშვილი საეხე-
ბით დასაბუთებულად აქარწყლებს რუსოფილ მეორე ქართველის
მოსაზრებებს და უმტკიცებს მას, რომ ქართული ენა არასდროს არ
მოკვდებაო. ჟურნალი „კლდე“ კი ქართველ ხალხს კიდევ ერთხელ
შეახსენებდა, რომ რაც უნდა დიდი ყოფილიყო სურვილი ჩვენი ერის
მოსაპობისა და გადაშენებისა, ამას ვერ მოესწრებოდნენ ვერც
შინაური და ვერც გარეშე მტრები, ვინაიდან ჩვენ დიდი ისტორიული
წარსულის და მდიდარი კულტურის მქონე ხალხი ვართ და საკუ-
თარი წილი გვექონდა შეტანილი მსოფლიო ცივილიზაციის განვი-
თარებაში... ისტორიული სამართლიანობის დადგენის მიზნით
ძალზე საყურადღებო იყო „კლდის“ ფურცლებზე დასტამბული რე-
ვაზ გაბაშვილის რეცენზია ისტორიკოს მოსე ჯანაშვილის წიგნზე —
„გიორგი სააკაძე და მისი დრო“ (თბ., 1914, გვ. 1-52).

რ. გაბაშვილის აზრით, არასამართლიანი იყო ორი „შინზრდილი
ისტორიკოსის“ — ანტონ ფურცელაძის და მოსე ჯანაშვილის მო-
საზრებები გიორგი სააკაძეზე. რეცენზენტი ანტ. ფურცელაძის
მონათხრობს „ფანტანზიის ნაყოფად“ მიიჩნევდა, ხოლო მოსე
ჯანაშვილისას — როგორც „ციტატების გროვას“, თუმცა უპირატე-
სობას ანტ. ფურცელაძის მოსაზრებებს აძლევდა, რომელიც „ლიტ-
ერატურულად შემუშავებული და სასიამოვნო წასაკითხს მაინც
წარმოადგენდა“, მაშინ, როცა მოსე ჯანაშვილის ბროშურა „რალაცა
ტლანქი ძალის პარკაშა“ ჰგავდა, რომელიც „ვერც თვითონ
მოუნელებია და ვერც მკითხველი მოინელებს“²¹⁸.

რ. გაბაშვილი თვლიდა, რომ „ბ-მა ჯანაშვილმა სუბიექტურ მო-
საზრებათა ძალით ცალმხრივად გააშუქა“ გ. სააკაძის ამბავი და
შეეცადა მისი „მარტო უარყოფითი მხარეები დაენახვებინა მაშინ,
როდესაც მას ბევრი დადებითი მხარე უქონდა“²¹⁹.

დასასრულს რ. გაბაშვილი დაასკვნია: „ეს არ არის „ჟამთა
აღმწერლობა, რომელიც ჭეშმარიტების მეტყველება არს“, არამედ
მართლაც „თვალხმა ვისთვისმე“ და მკითხველი საზოგადოება
მეტის სიფრთხილით უნდა მოექცეს ასეთ ისტორიკოსებს, რომელ-
ნიც ვალდებულნი არიან მკითხველებზედ უფრო მეტის
სიფრთხილით ექცეოდნენ საისტორიო მასალას, თორემ გამოჩნდება
კიდევ ახალი შინზრდილი ისტორიკოსი ვინმე და ახლა ჯანაშვილის
წაწერს გაიხდის მონმედ, რომ სააკაძე ჯაშუში და მუხანათი იყო,
თუნდაც ამაში ნამცეცი სიმართლეც არ მოიძებნებოდეს“²²⁰.

ზემოთ ჩვენ მოვიხსენიეთ იშხანიანის რუსულ ენაზე გამოსული
წიგნაკი „ეკონომიური და საზოგადოებრივი საფუძვლები სომეხ-

²¹⁸ ჟურნ. „კლდე“, 1914 წლის 8 ივნისი, გვ. 12-15. ო

²¹⁹ იქვე.

²²⁰ იქვე, 1914 წლის 15 ივნისი, გვ. 15.

ქართველთა ანტაგონიზმისა“, რომელშიც, ჟურნალის თქმით, ავტორი „საოცარის მოურიდელობით ნილაბს ხსნიდა სომხურ ნაციონალისტურ პოლიტიკას და საშუალებას აძლევდა ყოველ შეგნებულ ქართველს, ნათლად წარმოედგინა ჩვენი „მეზობლების და მეგობრების“ გულწრფელობა სიმშვიდისა და ძმობის მოძახილებში“²²¹.

რეცენზენტის, რ. გაბაშვილის (***) აზრით, მას „უტიფარი დასკვნები გამოჰყავდა საქართველოს სიკვდილზე და ჩამორჩენაზედ სომხურ პროგრესულ კაპიტალის მსვლელობის წინაშე... იმხანის თქმით „სომეხ-ქართველთა ანტაგონიზმი მოგონილი კი არ გახლდათ, არამედ იგი იყო, არის და იქნება (ხაზგასმა — იმხანის — გ. ს.), რადგან ღრმა ეკონომიური და საზოგადოებრივ საფუძველზეა დამყარებული...“²²²

²²¹ ჟურნ „კლდე“, 1914 წლის 27 აპრილი, გვ. 17.

²²² იქვე.

დასკვნა

1. ჟურნალი „კლდე“ ეროვნულ-დემოკრატიული მიმართულების გამოცემა იყო. ჟურნალის გამომცემელთა აზრით, იგი „ერის გამომაფხიზებელ მესაყვირედ“ უნდა გამხდარიყო. „კლდე“ თავისი არსებობის მანძილზე (1912 წლის სექტემბერი — 1915 წლის მაისი) თავდაუზოგავად ემსახურებოდა დასახული მიზნის ხორცშესხმის საქმეს.

2. ჟურნალ „კლდის“ მიზანდასახულობა გაცხადებული იყო მის საპროგრამო წერილში: რაც უპირველესად გულისხმობდა უკომპრომისო ბრძოლას საქართველოს ეკონომიკური და სოციალურ-პოლიტიკური, ეროვნული და ტერიტორიული მთლიანობის დაცვას... ჟურნალის სამოქმედო დევიზი იყო: „გამდიდრდით, იმუშავეთ, შეიძინეთ!“, ანუ „ქონებრივი სიმდიდრე და ეკონომიური სიძლიერე უნდა გამხდარიყო დედა-ბოძი ეროვნული მოძრაობისა...“ და სხვ.

3. ჟურნალი გამოსვლისთანავე ხმალშემართული დადგა სამშობლო ქვეყნის ეროვნული ინტერესების დაცვის სადარაჯოზე. „კლდისტებს“ (რევაზ გაბაშვილის მიერ შერჩეული ტერმინია — გ. ს.) მიაჩნდათ, რომ „ეროვნული იდეა იმავე დროს საკითხი იყო ქართულის ენისა, ქართულის ტერიტორიისა, ქართულის ეკლესიისა, ქართულის კულტურისა, ქართულის მესაკუთრეობისა და ვაჭრობა მრეწველობისა“ და, რომ „ყოველი იდეა რეალიზაციის დროს იგივეა, რაც ოქროს ფული გადახურდავებული სპილენძის გროშებზედ. ვინც არ აფასებს სპილენძის გროშებს, მან არ იცის ფასი ოქროს მანეთისა“.

4. ჟურნალი „კლდე“ გადაჭრით იცავდა კერძო საკუთრების პრინციპს... „კლდისტების“ თქმით, ქვეყნის ეროვნული დამოუკიდებლობის უპირველეს საშუალებად საკუთარი ეკონომიკის განვითარება უნდა გამხდარიყო: „განავითარეთ ქვეყნის მწარმოებლური ძალები, მოაწყვეთ ყოველგვარი ეკონომიური ორგანიზაციები, ჩაუნერგეთ მათ ეროვნული სული და ამ გალესილი იარაღით ამაყნი და ძლიერნი გამოდით საბრძოლველად...“.

5. ჟურნალი უპირველეს მნიშვნელობას უთმობდა მინისა და ტერიტორიის საკითხს, რადგან სწამდა, რომ მასზე იქნებოდა დამოკიდებული „ქვეყნის მომავლის ბედი“; რომ „ტერიტორიისა და მინის წართმევა ქართველებისათვის, ისტორიულ-პოლიტიკური ნიადაგის გამოცლა იქნებოდა...“. ამ პრობლემისადმი „კლდისტთა“ დამოკიდებულება ყველაზე საჩინოდ იკვეთება ოს ხიზანთა და სომეხი ბურჟუაზიის წარმომადგენელთა მგლური მადის მხილებაში, რასაც ისინი ქართული მიწების მიტაცებისადმი იჩენდნენ...

6. ჟურნალს სწორი კონცეფცია ჰქონდა შემუშავებული მეზობელ ერებთან საურთიერთოდ, რაც „კლდეისტა“ აზრით, „თვითსაქართველოს ტერიტორიული აგებულებიდან გამომდინარეობდა“, რომ „ქართველი ხალხი არავის ცხოვრებაში არ ერეოდა და მას თამამად შეეძლო ეთქვა: საკუთარ მინა-წყალზე ვცხოვრობ და ვიდრე ეს ტერიტორია არსებობს მე სუპერარბიტრი ვარ ყველა მთავარ საკითხში, რომელნიც კი წარმოიშვებიან ამ ტერიტორიის ცხოვრებაში“... „კლდე“, აგრძელებდა რა დიდი ილიას „ქვათა ღალადის“ კურსს — საამკარაოზე გამოჰქონდა საქართველოს ეროვნული ინტერესების ყოველგვარ ხელმყოფთა წამოქმედარ-წააზრევი.

7. ჟურნალს ვინრო ეროვნულ საქმედ არასდროს გაუხდია საქართველოს ტერიტორიული მოწყობის საკითხი, მას არასდროს წამოუყენებია შოვინისტური ლოზუნგი — „საქართველო მხოლოდ ქართველებისათვის!“ (როგორც იმხანად თბილისში გამომავალი სომხური გამოცემები სწამებდნენ „კლდეისტებს“), არამედ მათი უპირველესი საზრუნავი იყო საქართველოს ტერიტორიული მთლიანობის შენარჩუნება და არა სხვა ეროვნების ხალხთა ჩვენი მინაწყლიდან განდევნა. ეს აზრი თავის განივთებას პოულობდა მათ სამოქმედო დევიზში: „საქართველო ჯერ ქართველებისათვის!“

თემატურად საკითხთა ამავე წრეს განეკუთვნება შუა ქართლში, ტირიფონის ველზე სამხედრო პოლიგონის მოწყობის წინააღმდეგ გამოსვლა, რომელსაც ინტენსიურად დასახლებული ტერიტორია უნდა შენირვოდა და სხვ. რევაზ გაბაშვილი აძლევდა რა ჟურნალის მიერ ამ მიმართულებით განეულ საქმიანობას შეფასებას, აღნიშნავდა: „კლდესა“ და „კლდეისტებს“ ამ საკითხთა გარშემო ატეხილი ბრძოლის მეტი რომ არა გვეწარმოებინა რა, და რაც მივალნიეთ, იმის მეტი არა გაგვეკეთებინა რა, — მაშინაც ვერავინ იტყვის, — „ამაოდ დაშვრნენ“-ო.

8. ცალკე აღნიშვნის ღირსია ის დამსახურება, რაც ჟურნალს საქართველოს ეკლესიის ავტოკეფალიის აღდგენისათვის ბრძოლის საქმეში მიუძღვის...

9. ჟურნალის გამოსვლა რუსეთის IV სახელმწიფო სათათბიროს არჩევნებისათვის გაჩაღებულ კამპანიას დაემთხვა და, ბუნებრივია, ამასთან დაკავშირებულმა პერიპეტეებმაც ჰპოვეს მის ფურცლებზე ფართო ასახვა... „ერთის მხრივ, სოციალ-დემოკრატია და, მეორეს მხრივ — ეროვნული ჯგუფების კოორდინაცია“ ახასიათებდა საარჩევნო ბრძოლას. „კლდეს“ სწორედ რომ „ეროვნული ჯგუფების კოორდინაცია ჰქონდა დასახული“ თავის მიზნად და „მთელი შეგნებული ქართველი ერის“ კანდიდატის არჩევას უჭერდა მხარს... ჟურნალი პრინციპულ მნიშვნელობას ანიჭებდა პარლამენტში წარსაგზავნი პიროვნების მოვალეობასა და პასუხისმგებლობას და ასაბუთებდა, რომ „დეპუტატობა ადვილი საქმე არ იყო“.

10. ქართველთა შორის ეროვნული სულისკვეთების ამალ-
ლებისა და განმტკიცების საქმეში, ჟურნალი განსაკუთრებულ
როლს ანიჭებდა ქართველ მამულიშვილთა მიერ განეული ღვანლის
წარმოჩენის საქმეს (შოთა რუსთაველი, დიმიტრი ყიფიანი, პეტრე
ბაგრატიონი, ილია ჭავჭავაძე, აკაკი წერეთელი და სხვ.).

11. ჟურნალის მიხედვით, პრესა იყო ის მნიშვნელოვანი დაწესე-
ბულება, რომელსაც შეეძლო განსაკუთრებული როლი შეესრულე-
ტინა ერის კონსოლიდაციის საქმეში... პრესის რაოდენობრივი ზრდა
არასასურველად მიაჩნდა, თუ „იგი საერთო საქმის გაუმჯობესე-
ბისაკენ არ იქნებოდა მიმართული“. აქვე, ხაზგასმით უნდა აღინიშ-
ნოს იმაზეც, თუ რა ადგილს უთმობდა „კლდე“ ქართული სიტყ-
ვაკაზმული მწერლობისა და ქართული ხელოვნების განვითარების
საკითხებს... ქართული საზოგადოებრივი აზრის ეროვნული მიმარ-
თულებით ფორმირების საქმეს ხელს უწყობდა ის ლიტერატურულ-
პუბლიცისტური ძალები, რომლებიც ჟურნალის რედაქციის
ირგვლივ იყვნენ შემოკრებილი მისი გამოსვლის პირველი ხანე-
ბიდანვე. პირველ რიგში „კლდის“ დამაარსებლები — დავით ვაჩნაძე,
რევაზ გაბაშვილი, შალვა ამირეჯიბი, ალექსანდრე ყიფშიძე (ფრო-
ნელი) და მიხეილ ადამაშვილი (ჯავახიშვილი) უნდა მოვიხსენიოთ,
შემდეგ კი ისინი, ვინც ილია ჭავჭავაძის გზის გამგრძელებლად
თვლიდნენ თავს /შალვა ქარუმიძე, დავით კასრაძე, მიხეილ მაჩა-
ბელი, გიორგი დაფქვიაშვილი, ალექსანდრე სარაჯიშვილი, ვასილ
ყიფიანი, დიმიტრი ჯავახიშვილი, სამსონ დადიანი, გიორგი
წამორაძე, თედო ღლონტი და სხვ. თავიანთი კალმის ნაყოფით ჟურ-
ნალს დროდადრო ამშვენებდნენ: ნიკო ნიკოლაძე, ეკატერინე გაბაშ-
ვილი, ვაჟა-ფშაველა, იოსებ მჭედლიშვილი, იოსებ გრიშაშვილი,
დუტუ მეგრელი, პავლე ინგოროყვა, ია ეკალაძე, მელანია (ნიკოლოზ
ნათიძე).

ავტორთა მრავალრიცხოვნება ჟურნალის თემატურ მრავალ-
ფეროვნებასაც განაპირობებდა, რაც ფართო მკითხველის მიზიდვის
საუკეთესო გარანტს წარმოადგენდა...

11. ამრიგად, ჟურნალმა „კლდე“ თვალსაჩინო როლი ითამაშა
ქართველი ხალხის გამოფხიზლების, მისი ეროვნული კონსოლი-
დაციის, საქართველოს ტერიტორიული მთლიანობის შენარჩუნების,
ეროვნული ეკონომიკისა და კულტურის შემდგომი განვითარების,
საქართველოს ეკლესიის ავტოკეფალიის აღდგენის, ერის ერთიანი
ფსიქიკური ნყოფის ჩამოყალიბების საქმეში. „კლდისტებს“ თა-
მამად შეეძლოთ გაემეორებინათ ფრენის ბეკონის სიტყვები: „მე
ზარები დავარისხე, რომელიც ჭკვიან ადამიანებს ერთად შეკრე-
ბისკენ მოუწოდებდა!“-ო.

R e s ü m e

Die Zeitschrift von national-demokratischer Richtung "Klde" (1912-1915) war eine monatliche Ausgabe, die den Fragen der territorialen Integrität, der "nationalen Ökonomik, der Wiederherstellung von Autokephalie der georgischen orthodoxen Kirche, der internationalen Beziehungen, der Entwicklung von nationaler Kunst und Literatur besondere Aufmerksamkeit schenkte.

Die Zeitschrift "Klde" hat zur Formierung des georgischen nationalen Bewusstseins sowie zur Verwandlung der national-demokratischen Partei in eine politische Organisation stark beigetragen – Die Zeitschrift, deren Begründer bekannte georgische Patrioten Dawid Watschnadze, Rewaz Gabaschwili und Schalwa Amiredshibi waren, hat in der Geschichte der georgischen Journalistik eine hervorragende Stellung eingenommen.